




清代傳記叢刊·綜錄類⑦  
周 駿 富 輯

# 國朝耆獻類徵初編

(四二)

卷二八九至  
卷二九八

(清)李桓輯



明文書局印行

Wick 1107

國朝耆獻類徵初編卷二百八十九目錄

將帥二十九

汪騰龍

富僧阿

劉輝祖

富當阿

李煦

傅良

努三

李國柱

珠爾格德

官達色

仕

申保

宗室一嗣

宗室舒景安

國朝耆獻類徵初編卷二百八十九目錄





國朝耆獻類徵初編卷二百八十九

通奉大夫前署江西巡撫江西布政使司布政使湘陰李桓輯  
將帥二十九

汪騰龍

汪騰龍順天昌平人乾隆二年武進士授藍翎侍衛選江南江甯  
協標浦口營都司十三年遷甘肅西甯鎮標前營遊擊十八年升  
提標中軍參將二十三年擢直隸大名協副將二十四年大學士  
川陝總督黃廷桂奏請暫留騰龍護理西甯鎮總兵印務 命以  
副將銜護理卽留甘肅以副將另補尋補慶陽協副將二十五年  
五月擢興漢鎮總兵八月調西甯鎮總兵二十六年 命往葉爾

羌換防三十一年三月回任八月遷陝西提督二十六年大兵進  
勦小金川四川總督桂林出師南路咨調陝西兵二千名騰龍自  
請帶兵赴軍前效用 允之三十七年二月抵卡了軍營時大兵  
方攻東山梁及墨壘溝金川逆酋索諾木潛與小金川土司僧格  
桑通謀屢遣兵助守抗拒防禦甚堅三月騰龍偕桂林等進攻扎  
哇窠山梁奪獲溝口大湖五座石卡二十一處賊於對面山梁拒  
守尋擊敗之乘勝克阿仰東山梁墨壘溝之眾皆潰進至達烏獲  
賊寨十四碉房六百餘斃賊無算得 旨嘉獎並賞荷包四月參  
將薛琮敗沒於果洲山桂林匿不奏報經散秩大臣銜前四川總  
督阿爾泰偕總兵宋元俊劾其乖張欺罔並劾騰龍與桂林等終

日酣飲不理軍務桂林復以銀五百兩令汪騰龍交總兵王萬邦贖取金川所掠軍士奏入得旨褫桂林職騰龍解任候訊命額駙尙書公福隆安馳往嚴鞫六月福隆安奏提訊桂林等以所劾各款惟薛琮敗沒未據實入告屬實騰龍等在營酣飲並無其事其用銀贖取官兵一切初據汪騰龍供因金川送出官兵面稟桂林以銀交王萬邦備賞嗣經研詰得實乃知州曹焜同知林儁因我兵有迷失在山谷中者欲令土番尋覓故發銀備賞初非爲向金川贖兵之用宋元俊等旣附會入奏欲實其語以危言怵王萬邦云若不依參款書供恐致刑訊並教誘騰龍騰龍等爲所愚遂亦扶同匿飾請上革騰龍職以兵丁效力贖罪上加恩賞



給參將銜 命自備資斧帶兵赴綽斯甲布駕馭土司等進剿尋  
命領隊大臣舒常督辦十月參贊大臣阿桂以綽斯甲布革布什  
咱兩路均可進擣金川賊境而金川所據綽斯甲布之地曰甲爾  
壘壘距革布什咱尤近得之可以扼據要隘令騰龍偕侍衛音吉  
圖等率兵由拉古鄂進攻中經甲魯破賊礮據之南攻正地溝口  
破其水礮木柵 諭曰汪騰龍等進攻甲爾壘壘已得正地水礮  
木柵似亦可望得力索諾木撤兵自衛僧格宗路賊勢必孤乘閒  
犁巢自可剋期集事十二月將軍溫福阿桂等進克美諾僧格桑  
遁入金川大軍分路進討騰龍等在甲魯望見山下火起分兵攻  
正地溝口番眾奔潰獲礮六木柵二十三石卡六三十八年正月

副將軍阿桂以馬奈馬爾邦爲乾隆十二三年進剿金川之路亦係巴旺布拉克底與金川交界之所後路卽通格藏章谷諸處令騰龍率兵駐守十月副將軍明亮請以騰龍代理甘肅甯夏鎮總兵事務 諭曰汪騰龍人本平常且不能實在得力候補總兵敖成人甚可用卽應補授此缺汪騰龍原賞參將銜今所出有甘肅提標中軍參將卽令補授三十九年正月將軍阿桂復進討金川以南路信格宗一帶四面受敵須熟於情形者料理請於總兵英泰參將汪騰龍二人中酌派一人統兵防守 上以騰龍專務口給不甚足恃 命用英泰嗣以明亮奏英泰亦須帶兵隨營 特命富勒渾在彼駐守經理令騰龍隨同辦事二月桂林奏信格宗

國朝通志卷之三十一  
驛卒李文遞送公文遇賊番被傷回站又據汪騰龍咨稱李文遇賊之日別差驛卒至科多亦至曉不反其爲賊匪潛放夾壩無疑上以僧格宗一帶係騰龍專駐防守旣不能先期防範事後又不上緊查拏下部嚴議嗣明亮奏李文所遇賊匪三十餘人並非親見而外委張盈所報雷虔被賊掠去更無影響明係爲逃兵裝點諭曰僧格宗一帶係責成汪騰龍專管乃於此等虛詞捏報之事並不卽時確查妥辦惟以一咨塞責該員向係專務口給獲有罪愆經朕棄瑕錄用仍不知改勉圖報鋼染綠營惡習殊屬負恩汪騰龍著革職枷號示眾以示懲儆四月 諭曰見在防守僧格宗地方甚屬緊要雖已派海明帶兵駐防但伊未諳軍務且於番地



情形更未通曉必須派一諳練之員前往幫辦汪騰龍雖言不可信但伊在南路軍營日久粗知番地情形著加恩釋放隨海明辦理事務效力行走如伊不知感戴朕恩實心出力必從重治罪時海明在僧格宗軍營病故明亮請令總兵敖成前往駐守上復賞騰龍參將銜仍在僧格宗辦事諭曰敖成帶兵打仗自爲得力應畱於明亮軍營備用其僧格宗防守之事已派汪騰龍專辦並令痛加改悔若再專尚口給不肖實心出力卽難保全首領想彼亦稍知感畏但其地究不可無總統之人桂林見駐章谷著傳諭桂林不時往來僧格宗一帶一切畱心照料有應措辦機宜卽面交汪騰龍實力妥辦如見有虛浮不實之處卽據實奏參六月

桂林奏請將南路設駐兵丁移於納木覺爾宗一帶卽派騰龍移駐料理歸併添設事宜七月卒

右 國史館本傳

富僧阿

富僧阿舒穆祿氏滿洲正黃旗人雍正二年由閒散挑補拜唐阿  
九年拔補藍翎侍衛十三年升三等侍衛乾隆八年升二等侍衛  
九年七月充侍衛章京十二月充管侍衛印務章京十年三月升  
頭等侍衛五月授三姓副都統十八年五月軍政屆期 上以富  
僧阿不勝副都統降二等侍衛十二月補侍衛章京十九年授成  
都副都統二十三年調三姓副都統二十四年調甯古塔副都統  
二十五年疏奏盛京事宜一吉林甯古塔等處放票收簿文移所  
關甚要請各按地方鑄給關防一甯古塔等處官學教習須清文  
習熟之員向由官學生內挑補如一時不得其人卽於馬甲內通

融選補三年期滿教課有方報部以筆帖式補用其馬甲開缺另挑一三姓地方緝捕事宜向於發遣人犯內派充此等皆不安分之徒轉恐騷擾滋事請另設番役十名並派官員專管遇有失察將該員照例議處下軍機大臣議行二十八年正月授荊州將軍十二月調黑龍江將軍二十九年奏發到黑龍江給與旗人爲奴人犯所有隨帶妻子部文只稱將本犯賞給兵丁爲奴並無一併爲奴字樣是以未將伊等妻子爲奴俱聽另居度日見在伊等妻子並無管束養育之人不但易致爲匪卽伊等之夫牽連室家於各該主家亦不能安心服役請將見在發到並嗣後有原主將妻子一併送部發遣者俱給兵丁爲奴嚴加管束不致別生事端



上是之著爲令三十年正月奏索倫進貢貂皮毋庸自行呈送並請停鄂倫泰等賞賚 諭曰向來索倫進貢貂皮不特及等者例有賞賚卽不及等者朕亦加恩減半賞給以示體卹歷有年所今若停其賞賚則伊等無由霑受朕恩殊非嘉惠遠來之意嗣後著仍照舊例行閏二月奏該管兵內有應代祖父賠還銀兩請免息將本銀展季扣還官員亦照此例於季俸內坐扣兩月歸還新放新挑官兵遇婚喪賞借銀者不必待至下季卽將庫貯銀兩動借下軍機大臣議行八月疏稱據往探格爾畢齊河源之副都統瑚爾起稱自黑龍江至格爾畢齊河口計水程一千六百九十七里自河口行陸路二百四十七里至興安山其間並無人煙蹤跡又

往探精奇哩江源之協領納林布稱自黑龍江入精奇哩江北行至  
托克河口計水程一千五百八十七里自河口行陸路二百四十  
里至興安山其地苦寒無水草禽獸又往探西里木第河源之協  
領偉保稱自黑龍江經精奇哩江入西里木第河口復過英肯河  
計水程一千三百五里自英肯河口行陸路一百八十里至興安  
山地亦苦寒無水草禽獸又往探鉗曼河源之協領阿迪木保稱  
自黑龍江入鉗曼河復經西里木第河入烏默勒河口計水程一  
千六百十五里自河口行陸路四百五十六里至興安山各處俱  
無鄂羅斯偷越等語查呼倫貝爾與鄂羅斯接壤之額爾古納河  
西岸係鄂羅斯地界東岸俱我國地界處處設有卡座直至珠爾

特地方見復自珠爾特至莫哩勒克河口添設二卡於索博爾罕  
添立鄂博逐日巡查鄂羅斯爾瑪爾斷難偷越其黑龍江城與鄂  
羅斯接壤處有興安山延亙至海亦斷難乘馬偷越第自康熙二  
十九年與鄂羅斯定界查勘各河源後從未往查嗣後請飭打牲  
總管每年派章京驍騎校兵丁六月由水路與捕貂人同至托克  
英肯兩河口及鄂勒希西里木第兩河間徧查回報總管轉報將  
軍三年派副總管佐領驍騎校於冰解後由水路至河源興安山  
巡查一次回時呈報其黑龍江官兵每年巡查格爾畢齊河口三  
年亦至河源興安山巡查一次年終報部得旨允行十月以齊  
齊哈爾呼蘭二處本年田禾被水奏請借給旗戶穀一萬二千七



百石索倫等銀一千七百餘兩奉 上諭該處既被水災若借以銀穀仍令償還該旗戶索倫等不無拮据著加恩將所借銀穀全行賞給不必令其償還又奏請借給齊齊哈爾呼蘭二處官屯壯丁口糧籽種 命由該處倉儲內借給其應交糧石加恩豁免十二月奏呼蘭運糧水手支放錢糧並紅白事實銀等項例由水師營派領催一員管理殊未妥協請添派呼蘭八旗佐領一員管理由該處四十名水手內揀放領催一員以備差遣 從之三十一

年五月以審訊逃走賊犯扎蘭泰張子英解送刑部由驛馳奏諭曰扎蘭泰係發遣重犯拏獲卽應正法富僧阿止解刑部亦屬拘泥且摺內復牽入額魯特俘虜逃走行文緝捕事尤屬可笑額

魯特俘虜逃走何足輕重不過照例治罪而已何至如此牽扯辦理著嚴行申飭又奏呼倫貝爾地方原設筆帖式四員前因達呼爾官兵撥回打牲地方裁汰二員查此地鄂爾多斯喀爾喀邊境卡座甚多凡記寫檔冊移咨各處甚屬繁冗請添設無品級筆帖式二員於本處應用人員內挑補 從之八月奏言派出巡查額魯特家口驍騎校齊庫爾特依領催圖壘向馬甲四保尼堪等索銀擅令伊等存畱不往齊庫爾特依復因圖壘宰羊細故恣行毆打請將圖壘四保尼堪等革去領催馬甲齊庫爾特依革職一併交刑部治罪 諭曰富僧阿此奏殊屬不成事體齊庫爾特依圖壘等固應治罪然亦不過斥革差使懲治完結而已何至多人

紛紛解部擾累驛站齊庫爾特依著革去驍騎校圖壘四保尼堪俱著褫革領催馬甲重加懲治嗣後此等事件不必交部卽在本地完結三十三年二月奏向來發遣黑龍江爲奴人犯俱係賞給出力兵丁至官員等例不賞給但邊地官員受田耕種全賴奴僕力作請嗣後准於發遣爲奴人犯二十分中以一分賞給出力官員得旨允行九月諭曰昨閱視奉天秋審招冊內德保一案有延錫保扎傷監婦諾們著拉身死之語因令刑部查取原案呈閱緣延錫保之父德保與諾們著拉通姦俱擬絞監禁上年春閒德保曾借諾們著拉皮襖當錢迨九月內令該犯贖回送還延錫保素恨諾們著拉與父通姦致伊母受累挫折身死遂借送還皮

稟之名進監將諾們著拉登時扎死德保與諾們著拉俱係久擬  
情實牢固監禁重犯而男女各監例應分別羈管乃竟聽其私相  
借物是因姦收禁之犯轉因在監得任意往來囹圄重地固當漫  
無檢束如是乎至以繫獄要犯輒容閒人進內逞兇殺斃可見獄  
中全無稽察防範實出情理之外平時監犯自戕尙例有處分此  
案管獄官卒更非尋常疏縱可比將軍富僧阿一任獄規懈弛若  
此漫不經心所司何事富僧阿著交部嚴加議處尋議降調上  
加恩銷去紀錄十二次尋調西安將軍三十四年八月奏西安移  
駐伊犁滿洲兵二千名陸續起程所出之缺請由京城派撥 諭  
曰西安駐防不甚緊要見在雲南用兵明歲凱旋地方官無暇兼



顧所有西安應撥滿兵著暫緩二年撥往三十六年奏稱金川需用滿洲兵見將西安八旗兵內選派烏槍兵二千名備用俟調用時派書麟帶往 上允之三十七年七月奏陝西向於八旗滿洲蒙古閒散人內挑選二十名爲巡撫親丁給與綠營馬兵錢糧伊等俱係見應移駐巴里坤之人業補入新添之馬甲拜唐阿等數內遺缺無人可補此項親丁向無差使應請停挑部議如所請十月條奏西安甯夏滿洲兵移駐事宜一西安甯夏滿營兵俱係各按本營舊制今兩處官兵同駐巴里坤自應畫一分撥請於西安甯夏兩處各派協領二佐領防禦驍騎校各八分爲八旗各兵仍聽本處協領管轄並每歲分派領催前鋒各四十馬兵八百步兵

八十礮手十六匠役二十四至甯夏撥缺之兵將來由京撥補原額該處官員僅敷管轄無庸議裁一移駐馬步兵應每名帶腰刀一弓二梅針箭五十撒袋一每去處各帶大纛八小旗四十每二兵合帶帳房一並各帶威遠礮四子母礮口由西安清軍廳撥給其馬兵應每名給馬二令於明春三月間乘騎前往一巴里坤領隊大臣之筆帖式經伊犁將軍奏定二缺應令西安甯夏各分一缺聽領隊大臣挑補一甯夏移駐兵應照西安例於支給製裝銀三十兩內每馬兵一扣銀十五兩以八兩買羊七兩製貨步兵匠役每名扣存七兩五錢以四兩買羊三兩五錢製貨一西安兵因不敷派撥議裁養育兵一百添馬甲二百二十今加添馬兵已經

國朝通志卷之二十一  
裁退養育兵一百請仍還原額 從之十一月奏西安甯夏滿洲  
兵移駐巴里坤二千由京派撥補額其官員俸祿馬乾折項及兵  
餉口糧並借給 恩賞等銀請俱照西安見行例支給下軍機大  
臣議行十二月奏西安滿營兵戶口蕃滋兵缺較少不足養贍前  
奏准由京派往滿洲兵一千請少派二百其缺在該處拜唐阿閒  
散內挑補如所請行四十年正月奏請豁免由京移駐西安兵內  
革退年老殘疾三十七人借支餉銀經部議駁 諭曰朕以富僧  
阿辦理非是卽交軍機大臣等查覈八旗初派報部冊內皆係遴  
選健壯並無年老殘疾之人富僧阿從前如何辦理實屬朦混著  
傳旨申飭三月卒尋 賜祭葬



右 國史館本傳

國史館本傳

二



劉輝祖

劉輝祖漢軍鑲白旗人乾隆二十六年武進士授藍翎侍衛三十一年授四川永甯協左營都司三十四年解馬赴雲南軍營三十六年隨征金川由西山溝攻喇嘛寺復由東山梁渡河攻卡了三十七年二月敗賊於達馬等處得旨優敘尋遷福建建甯鎮標中營遊擊十一月隨大軍克甲爾木山梁夜渡河攻西山賊碉輝祖復偕守備崔文傑率昭通等兵踰溝破其石卡奉旨議敘十二月調陝西黃甫營遊擊三十八年五月遷陝西陽平關參將六月賊夜窺我當噶爾拉大營知有備退擾陝兵營輝祖督兵百五十施槍石力戰達旦殺賊八十餘額受石傷事聞賞戴孔雀

翎擢湖南長沙協副將十一月署甘肅甯夏鎮總兵十二月大軍  
分隊抵格藏橋輝祖隨公奎林潛由深嘉卜攻斯第博堵以皮船  
渡奪木城二三十年三月駐防絨布寨五月 命統領陝西兵  
六月隨大軍進攻穆谷七月偵賊伏卡卡角山溝亟擊之賊敗入  
庚額特調卡輝祖督兵分隊誘戰賊匿不出輝祖卽駐守穆谷六  
月賊百餘乘雨擾西山梁土把總阿甲所守卡擊走之十二月攻  
賊碉賊潛出箐斷後援至敗遁四十年正月賊復出箐迎擊之殺  
傷甚眾六月攻布咱克分賊勢七月卒 諭曰劉輝祖在川省軍  
營四載帶兵打仗尙屬出力今因病身故亦屬可憫著加恩照總  
兵王萬邦之例交該部議卹具奏尋 賜祭葬 命入祀昭忠祠

恩應其子德升巡捕營千總用

右 國史館本傳

168-030

111

168-030

富當阿

富當阿顏扎氏滿洲正藍旗人雍正九年由前鋒升驍騎校乾隆五年升防禦八年升佐領十六年升協領二十年擢熱河副都統二十四年奏言達什達瓦屬人等已到熱河一切辦理尙需時日先移人口每月各給米二斗銀三錢暫行接濟俟查明戶口若干以定官兵額數給與錢糧另行具奏得旨此奏稍覺稽遲已差三和前往辦理賞給所奏支領米石卽准其散給至賞給銀兩三和見往辦理或已經分賞亦不必追繳其將伊等作爲官兵酌給俸餉之處著詳細具奏伊等未經出痘應投官職人等不必送京候朕駐蹕熱河時再行帶領引見尋奏查兩次移來熱河安插之



達什達瓦屬人及前往軍營人等男婦大小共二千一百三十六口內丁壯七百三名謹酌擬每丁壯七十名編一佐領每佐領下領催四名馬甲六十六名前奉 諭分爲三旗每旗設散秩大臣總管各一員副管旗章京副總管各二員佐領各三員換給關防圖記其俸餉每年按三季支放照所得職銜降一等減半支給其散秩大臣總管鑲黃旗布林管正黃旗鄂齊爾管正白旗托里曾賞三品全俸今既給與甲米請亦減半支給至伊等住房共需一千三百十二間見在添造俟工竣分派其鰥寡孤獨人等各附親屬養贍又喇嘛十七名照例歸入寺內按月各支銀米下軍機大臣議行 上以布林鄂齊爾俱久經歸順之人加恩仍給與全俸

二十六年四月調正藍旗蒙古副都統六月調山海關副都統十一月以旗人進關向無印票稽察無由恐有逃匪混入請照吉林黑龍江拉林阿勒楚喀等處之例旗人進口有該管官印票關防畫一辦理部議嗣後盛京旗人進關附近省城居住用將軍印票在各小城居住者即用該管官關防圖記 從之二十八年奏稱山海關喜峯口永平府玉田縣三河縣等處驍騎校向由各本處於本旗一二名領催內揀選甚難得人請照補放城守尉佐領防禦之例由各處本旗委署驍騎校前鋒領催內揀補 上允之二十九年正月擢天津水師營都統十一月奏稱天津水師營兵二千名止有馬四百匹其無馬兵丁不得乘騎未能演習騎射請於

滿洲八旗二十四佐領設立四圍蒙古六佐領設立二圍每圍派官二員兵十二名將官馬四百匹均分餵養以備每年春秋操演騎射下軍機大臣議行三十一年奏稱天津水師營馬四百匹每匹月給養馬匹銀二兩前經都統常森奏准自四月出牧至九月撤回每月給銀一兩五錢助其生計其十月至來年三月每月添給銀二兩五錢以充餵養之費但天津斥鹵之地野草早凋請嗣後九月初卽撤回每年收放五箇月下軍機大臣議行三十二年三月 上幸天津閱駐防滿洲兵 諭曰本日閱看天津滿兵技藝均屬平庸且未能嫻習國語前經賞給拴養馬四百匹而兩翼隊內並無騎馬者皆由怯懦不能乘騎故令部下演習有是理乎

伊等駐防年久該大臣等果能勤加訓導何遽如此是皆歷任大臣等未能悉心操演所致姑念與兵丁無涉仍著加恩賞給該都統富當阿等交軍機大臣等嚴加議處尋議褫職 上以天津兵疏懈習氣已成移撥各駐防令其隨同學習 命富當阿暫行畱任兵丁未移撥之前照常管理事務十月事竣回京仍褫職四十年卒

右 國史館本傳





李煦

李煦直隸天津人乾隆四年武進士授藍翎侍衛十三年補江南  
滁州衛守備十八年遷山西運城營都司二十四年遷四川達州  
營遊擊三十一年遷提標營中軍參將三十四年擢貴州鎮遠營  
總兵三十六年調古城鎮總兵時大兵進剿金川三十七年三月  
上命煦領貴州兵三千赴川四月奏自畢節起程 諭嘉其啟行  
迅速各賞兵丁一月錢糧五月抵西路軍營煦同副都統富勒渾  
等領南山兵三千踰喇卜楚克山梁至對面高峯奪卡三據其嶺  
又奪大卡二賊於林箐設木柵拒守煦從山頂壓奪木柵六石卡  
三旋繞南山後分路進攻斬賊十餘賊遁入柵得卡二復分三路

進殺賊數百餘，入大柵固守，繞柵設十餘卡以斷賊援。將軍溫福以聞。六月，上嘉煦在軍營出力，特擢貴州提督。時賊設木城據守鄂克什舊寨及木闌壩要路，煦同侍衛阿爾泰等偪木城。造卡賊來侵，擊敗之。旋率兵夾攻賊三百餘，出拒殲之。復同副都統海蘭察等據山岡立卡，賊來奪我兵，復擊之。先後立卡七八月。官兵分路進攻，溫福以璦爾迪克山梁西通策卜丹南，近木布爾令煦駐兵，貢噶爾防後路。九月，賊酋屢在璦爾迪克卡外認罪，聲言願盡返鄂克布地方。煦等議兵不厭詐，隨諭令將南北兩山美美卡木闌壩各卡全行撤退。賊渠白燧卡柵，煦等隨領兵下壓抵鄂克什舊寨。上以逆酋狡詐百出，恐其僞退，引官軍深入潛抄。

後路 諭畱兵數百交煦等於貢噶爾一帶嚴防後路十一月旋  
移兵駐瓏爾迪克總路十二月大兵克明郭宗抵美諾 上命侍  
郎劉秉恬同煦畱駐美諾辦理降番事務三十八年正月溫福等  
奏調煦赴大營分管貴州陝甘官兵進剿旋抵功噶爾拉分三路  
進攻煦與副都統巴郎等統三隊賊據卡固守大兵由著嶺進煦  
同巴郎由大兵所拒之右緣山脊進殺賊十餘人據卡二時溫福  
移營木果木令煦同常保住帶兵三千駐劄功噶爾拉防守閏三  
月有賊夜從東北山梁撲卡煦等以其地距金川甚遠斷非金川  
賊匪或係小金川鄂克什換班竊爲之溫福等以山梁逼近功噶  
爾拉了口自係金川賊眾因劾奏煦等捏飾狀 諭曰李煦常保

住派駐功噶爾拉防守是其專責乃既疏懈於前竟敢捏報於後實出情理之外將李煦常保住革責卽於軍營枷號示眾旋命內閣學士博清額等前往會同劉秉恬嚴訊五月博清額等奏據當日在卡兵丁供閏三月初三四前後並無小金川鄂克什換班人賊多衣白似係金川賊眾質之李煦等無異擬斬立決諭曰博清額等奏查審李煦常保住一案究係揆度之詞朕斷不肯以莫須有之事遽加二人重辟李煦等罪名不在賊番搶劫營卡而在事後捏報若李煦等據實報出其過止於疏忽且據稱閏三月初三四日前後並無小金川換班之人以此嚴加詰責令李煦切實供明使之毫無疑竇然後可定罪名博清額著再會同劉秉恬



審明具奏時賊番進奪美臥溝卡倫李煦常保住方枷禁登春站  
參贊海蘭察以二人向經戰陣奏請暫行開枷令帶兵駐防簇拉  
角克 上允之尋 諭曰李煦前因功噶爾拉等營卡被賊番賁  
夜搶劫傷人一案捏詞妄報係小金川鄂克什換班番人所爲經  
溫福劉秉恬查明奏參將伊革職拏問於簇拉角克枷號並著博  
清額前往會同劉秉恬審明實在情節按律治罪昨據海蘭察劉  
秉恬奏因賊滋擾將李煦釋枷令其帶兵殺賊卽批諭自應如此  
辦理並令毋庸再審李煦在營已久兵丁等尙聽其調度且其獲  
罪亦非董天彌之死有餘辜者可比著加恩將李煦賞給遊擊隨  
同阿桂軍營差遣委用以徵後效三十九年二月補貴州永城營



遊擊三月大兵攻羅博瓦山梁賊百餘從喇穆喇穆衝出煦督兵  
迎戰賊番落巖者無算七月將軍阿桂奏煦於提督任內獲譴自  
錄用以來倍加奮勉才情較優請補定邊協副將得旨如所請  
四十年十一月擢浙江處州鎮總兵四十一年卒

右 國史館本傳

傅良

傅良富察氏滿洲鑲黃旗人父馬齊官大學士自有傳雍正三年襲騎都尉世職乾隆十四年承襲二等伯爵合前所襲之騎都尉晉一等伯兼一雲騎尉十五年正月授散秩大臣七月 詔加伯號曰敦惠十六年授鑾儀使十八年授鑲白旗滿洲副都統二十五年授伯都訥副都統二十六年以伯都訥旗民雜處命盜要犯向分四門堆房看守易致脫逃咨請設立監獄擇驍騎校之勤慎者管理經吉林將軍恆祿奏入 從之二十七年奏稱兵丁借支庫銀內有因老病革退曾經出兵打仗得有功牌及受傷者應免其完繳其雖經出兵並未打仗或將其子孫及姪挑補本缺仍令

交還庫項經部議駁 上以吉林所辦或與京城不同令將軍恆祿查奏尋奏稱吉林官兵年老殘疾告退者如有子孫食糧所借庫銀扣本免利若無子孫食糧本利俱免雖與京城之例稍有不同然未論及出兵與否若照傅良所奏得有功牌者始准寬免是未出兵者尙有寬免之條而出兵未得功牌者轉不得寬免部駁甚是二十八年正月調吉林副都統四月擢歸化城都統尋因缺裁 命以都統銜仍畱吉林副都統任七月授鑲藍旗漢軍副都統十一月奏請揀發漢軍參領等官升補綠營 諭曰揀發滿洲蒙古人員補用綠營原以騎射嫻熟俾爲漢人表率若將漢軍人員騎射生疏者遣往徒貽譏誚豈能訓導人耶乃管旗大臣等不

思造就人才惟欲沽名市惠以漢軍參領等官奏請升補綠營殊屬不合著將主議之傅良罰伯俸三年以爲沽名市惠者戒三十三年四月授綏遠城將軍九月奏稱駐防筆帖式調補武職者例須六年滿後本翼驍騎校缺出四缺得一而候補筆帖式於本翼驍騎校出缺卽與領催前鋒等揀選補授殊屬不均請嗣後隨印筆帖式屆三年時勤慎能事者遇本翼驍騎校缺出一體揀選其尋常供職者仍俟六年照例辦理下軍機大臣議行三十四年調吉林將軍三十五年三月奏稱拏獲偷乞私濫各犯請分別正法發遣其乞濫公費請著落前任賠補經部以應正法者旣未取據供詞應發遣者又未將姓名開列議駁 命將人犯解京交刑部



評究尋 諭曰傅良奏拏獲偷竈私漚一案業經刑部議駁其竈  
漚所需公費應用與否亦不分析聲敘槩以著落前任賠補含混  
具奏殊屬不曉事體傅良著來京候旨四月授鑲藍旗漢軍都統  
三十七年署正紅旗蒙古都統三十八年授甯夏將軍四十年二  
月奏稱甯夏駐防馬兵二千二百名每名馬二匹不諳餵養馬多  
倒斃請照西安涼州例每名馬一匹以備操演其餘變價存庫遇  
有緊急用馬既可立時採買而所餘馬乾銀兩又可分給眾兵藉  
資養贍下軍機大臣議行三月調西安將軍兼領侍衛內大臣七  
月奏八旗馬廠地內酌將餘地四百八十頃交地方官招民墾種  
升科以作兵丁紅白賞卹之需 從之四十一年奏稱西安八旗



兵丁紅白事件向以養馬節省草料銀兩充用今將馬廠地畝一半招墾收租足敷賞卹請停止扣收節省草料銀兩又奏賞給西安兵丁孤寡養贍請於本處養育兵丁一百二十缺內通融二十缺再動支每年地租餘銀一千八百兩兵餉餘平銀七百兩每月每人給銀一兩均下軍機大臣議行四十二年卒遺疏入 賜祭葬予諡恭勤子善明承襲伯爵官散秩大臣

右 國史館本傳



努三

努三吉林滿洲正黃旗人姓瓜勒佳氏雍正六年由前鋒校授藍翎侍衛九年授三等侍衛十三年授二等侍衛乾隆二年命在乾清門行走八年授頭等侍衛十年在御前行走十一年二月赴北路軍營時四川總督慶復勅下瞻對土酋班滾三月命努三赴慶復軍營給治裝銀四百兩尋慶復奏班滾焚斃十二年接任總督張廣泗奏班滾見在如郎命治慶復罪以努三隨同具奏命銷去議敘加級革退御前行走著在乾清門行走十三年九月命回京請訓再赴四川軍營十四年授鑲白旗蒙古副都統尋授正藍旗護軍統領十八年四月偕湖廣總督永常赴安西

籌議防範事宜十九年正月畱駐鄂爾坤軍營二月準噶爾宰桑  
瑪木特追來降之都爾伯特台吉策凌闖入卡倫 上授努三參  
贊大臣偕散秩大臣薩喇勒往會將軍成袞扎布率兵分路查緝  
時準噶爾烏梁海宰桑赤倫居吹地努三偕貝勒青滾雜卜台吉  
班珠爾分兵往擒赤倫及所屬四得木齊雅爾都所屬一得秦家  
口牲畜至額里音淖爾喀喇烏蘇擒扎哈沁噶勒雜特兵百五十  
餘人及爲首之達什敦多卜事 聞下部優敘二十年二月 上  
以努三及護軍統領烏勒登收服扎哈沁未卽擒獲逃犯巴朗諸  
事推諉交定北將軍班第定邊左副將軍阿睦爾撒納審訊並  
命參贊大臣策楞協理北路軍務侍郎兆惠查明努三等收取牲

畜等項有無隱匿一並具奏尋班第等奏至 諭曰班第等訊問  
努三烏勒登供詞一切推諉俱卸過於薩喇勒夫薩喇勒歸順未  
久從前收獲烏梁海人眾時卽有搶擄之事以伊舊染準夷習俗  
初到未知法度是以姑從寬容若努三烏勒登乃滿洲世僕亦效  
準夷之所爲是尙可寬宥乎且烏勒登收服烏梁海時未將逃人  
巴朗報出努三擒獲包沁逃人特赫拜哈都理應正法乃並未奏  
聞請旨俱屬舛謬策楞所查努三之事尙未奏到著傳諭班第阿  
睦爾撒納卽將努三烏勒登併案嚴審定擬具奏四月 諭曰據  
班第等審訊努三烏勒登擬以應斬監候努三烏勒登收服扎哈  
沁後並不往拏巴朗實係貽誤軍機罪不可追但念伊二人去歲



收服烏梁海扎哈沁時亦曾隨同效力著加恩免其治罪仍留軍營以閒散效力贖罪努三烏勒登俱係滿洲世僕乃在軍營逡巡畏憚此次不卽正法俾全首領皆朕格外之恩其由軍營查出馬匹什物及伊二人所有家產俱著入官五月授藍翎侍衛在嚮道章京上行走二十一年正月授三等侍衛二月遷頭等侍衛命偕左都御史何國宗往伊犁測量度數並繪地圖詳見何國宗傳二十二年二月以送兵赴巴里坤至嘉峪關卽奏請回京得旨降藍翎侍衛仍留巴里坤聽差遣六月招撫巴爾達穆特各鄂拓克人眾上嘉其奮勉擢二等待衛七月授頭等侍衛先是將軍兆惠追逆賊阿睦爾撒納至哈薩克哈薩克黨逆拒戰兵敗請降

兆惠遣努三與哈薩克來使往諭卽畱駐其地尋阿逆竄死鄂羅斯  
斯 詔努三仍回軍營二十三年正月撤兵至烏隆古聞哈薩克  
錫喇之得木齊達什扎卜等匿博羅爾托輝努三偕副都統順德  
訥勒之又生擒盜巴里坤馬之庫魯特宰桑摩羅等於拜塔克收  
服根敦扎卜達什扎卜丁壯二百餘 上嘉之二月授鑲藍旗護  
軍統領四月 命經理巴里坤等處屯田七月奏言自穆壘至烏  
魯木齊有昌吉羅克倫可耕地十六處令屯兵輪種 詔選內地  
綠營兵七千往屯八月又奏言兩處應各駐兵一千五百更番開  
種 命如數添派十一月偵勦嗎哈沁於博羅托海收其馬匹疏  
入 詔賜幣時兆惠被遮黑水二十四年正月努三隨定邊左副

將軍富德往援至呼爾滿分兩翼進擊賊敗遁努三與副都統鄂博什截賊去路前至兆惠營告赴援兵至復備駝馬迎兆惠營官兵努三鄂博什爲殿回駐阿克蘇事 聞下部議敘 恩給騎都尉世職三月 命赴烏魯木齊經理哈薩克貿易沿途查勘屯田搜捕嗎哈沁賊眾六月奏言烏魯木齊見屯兵一千再畱凱旋兵五千在特訥格爾昌吉羅克倫一帶分地墾種明年穫糧卽運供伊犁口糧籽種 上是之九月奏擒嗎哈沁訥克衣等下部議敘 命兼管烏魯木齊屯田事是月奏言博克達山在烏魯木齊之東爲西陲重鎮請令駐劄大臣每年春秋致祭 從之二十五年三月凱旋 上御豐澤園幄次宴賚將軍兆惠富德等及隨往

將士 賜努三幣十端銀二百五十兩五月兼署正黃旗滿洲副都統八月授右翼前鋒統領二十七年正月授鑲藍旗蒙古都統兼武備院事五月兼上駟院卿十月 命在阿哥總諸達上行走三十年授領侍衛內大臣三十一年五月管健銳營三十二年十月署正黃旗護軍統領三十三年授御前大臣三十五年五月命紫禁城內騎馬三十八年十月調正藍旗滿洲都統四十三年十一月卒 諭曰努三內廷行走多年甚屬出力今聞溘逝深爲軫念著施恩派散秩大臣一員帶領侍衛十人往奠茶酒仍賞銀三百兩辦理喪事應得卹典察例具奏 賜祭葬如例諡恪靖子依什策楞襲病故襲次已完停襲

國史館本傳

右 國史館本傳

三



李國柱

李國柱直隸天津人由行伍拔補天津鎮標左營把總雍正八年隨征科布多十年遣修烏里雅蘇臺木城十一年運送輜重至科布多升直隸正定鎮王家坪營千總仍畱科布多緝捕逃匪十二年擒賊首高二殲賊數十人遷直隸山永協右營守備十三年凱撤回營乾隆元年以軍功下部議敘三年調江南河標右營守備六年升浙江麗水營都司十一年擢温州城守營遊擊十六年遷撫標中軍參將十八年升杭州協副將二十年擢貴州威甯鎮總兵因母老請畱杭州協任 允之二十二年調衢州鎮總兵二十七年擢浙江提督 賞戴花翎旋丁母憂三十年服闋 命以提

督銜管處州鎮總兵事三十一年二月補湖廣提督八月湖南常德等府水災國柱率將吏兵役日夜防堵復以湖北濱江州縣田廬淹浸設法疏洩 上嘉之三十二年調貴州提督三十三年仍調湖廣提督三十五年署貴州提督先是雲南征勦緬匪於三十三年調撥貴州兵萬餘名至是雲貴總督彭寶以兵丁老弱無能奏參部議秘職 上加恩改爲降三級調用尋以古州黨堆寨苗人聚眾不法率弁兵馳往查辦疏入得 旨嘉獎六月首逆香要就獲下部議敘十二月授山東兗州鎮總兵三十六年復擢湖廣提督三十九年正月大兵征金川國柱照料過境 上嘉其辦理迅速下部議敘十二月入 覲 諭曰李國柱陛見來京於十二

月二十四日召見略詢地方情形因諭汝尙未老邁可仍回任語未畢彼卽奏請於新正初二日請訓仍告假掃墓以其言不近理顧而哂之卽令其出俾其自知省悟乃伊竟於昨早具摺告假而去可謂不知禮之甚者矣外省提鎮來京每有召對時經朕諭令回任或有再三懇請多畱數日者雖未必盡出於中誠然在臣子奉上之義自應如此今李國柱旣請陛見入都乃甫一召見輒思回任且正值新年凡朝覲者均集於此而該提督遽以回籍掃墓爲請太覺不識輕重朕宵旰勵精辦理庶務從未稍羈時刻或遇軍報要件卽除夕元旦何日不召見軍機大臣降旨籌辦並不因令節稍嫌繁碎至臣下乞假私情且係拜掃之事豈新春所宜言

李國柱不過因在京多住一日恐略添用度遂爾急欲告假冀國  
省費竟置大體於不顧實屬猥瑣著交部嚴加議處尋議褫職  
上加恩改爲畱任四十一年以年老休致四十三年卒子燮雲南  
候補府經歷

右 國史館本傳

李國柱天津人乾隆中任湖廣提督駐常德府值大水郡隄多決  
水府廟隄復欲決國柱親荷土壅水官民從之得不潰因條析情  
形奏請發帑振濟並修治各處隄垸民得安堵

右傳李元度撰



珠爾格德

珠爾格德吉林滿洲正白旗人姓鈕祜祿氏乾隆三十三年授前鋒校三十七年授乾清門三等侍衛三十八年命赴金川軍營三十九年三月隨參贊奎林攻斯第奎林中飛石仍力鬪有兩賊握刀突至珠爾格德運矢斃之餘賊逸詔授頭等侍衛給扎克博巴圖魯號八月攻俄坡第二礮賊於礮後穴地聚守倉猝不及施槍石成逸去珠爾格德等追擊之上嘉其奮勉大兵旣取木克什據水卡斷賊汲道設伏以待賊二百餘冒霧分路來犯我守礮士兵發槍拒伏兵踵至別有賊百餘自山下擾珠爾格德衝入賊隊手刃三人九月攻取木克什山下三礮十月與都統和隆武



等襲取日旁山後戰礮十餘座平礮二百餘閒日旁去勒烏圍近東接谷爾提賊礮寨相望爲後路必爭地復與和隆武乘夜攻據之十二月授正紅旗蒙古副都統四十年四月攻取達爾圖以下得楞以南各礮七月師至石真噶珠爾格德等攻拔石城戰礮二木城一夾攻丹扎木各寨焚之乘勝登扎烏古山梁迎勦賊援兵賊目負箭傷走八月賊棄克爾瑪礮寨遁我兵追殺至曲碩木官寨九月奎林率兵攻什扎古珠爾格德與和隆武設伏琅谷奎林兵至奮勇夾擊獲木城一閏十月進攻扎烏古山梁克賊礮四卡八自日斯滿至巴扎木賊恃其地險礮多在山梁拒守珠爾格德與和隆武分兵進一由山梁上攻一由箐內繞截連克賊礮十七

接通甲索一路官兵曲碩木一帶俱望風焚寨落遁有達撒谷山者賊列寨巖守珠爾格德等分兵一攻旁卡一取中寨擲火彈摧其垣賊歷斃無算遂進克乃當獨松卡拉爾舍斯滿番眾悉降四  
十一年四月凱旋 賜銀幣 命圖形紫光閣 御製贊曰奎林  
深入賊兩將及發矢斃之險中救急同心合力共集大勳寫圖旌  
壯惇史流芬四十四年卒

右 國史館本傳

國朝詩林類卷之七

三

官達色

官達色滿洲正黃旗人姓瓜爾佳乾隆十三年補健銳營前鋒二十年征準噶爾派往西路軍營五月補藍翎長二十一年十一月隨將軍兆惠自鄂壘扎拉圖至特訥格爾剿賊二十二年三月上南巡遣官達色及副護軍校兆坦赴行在備詢問諭嘉其沿途勦賊奮勉行走授藍翎侍衛二十三年進勦烏什護送霍集斯之子漢咱把爾入覲二十四年正月遷三等侍衛二十六年兼健銳營行走二十七年五月予雲騎尉世職十一月遷二等侍衛三十年八月授副參領三十一年六月遷甘肅山丹營遊擊三十三年八月命往雲南以參將題補三十四年授雲南順雲

營參將以不識漢文不能辦理綠營事務自請回京當差經略大學士公傅恆以官達色鑄礮奮勉委署翼長從征老官屯三十五年副將軍阿桂以官達色原任參將已開缺奏補健銳營前鋒參領三十六年隨將軍溫福征金川十一月率成都滿洲兵四百抵甲金達時方進攻巴朗拉山梁官達色與侍衛烏什哈達等領瓦寺土兵百餘由山右登奪卡六據其東西礮峻高峰十二月復攻巴朗拉官達色與侍衛明仁等攜大礮轟賊礮三晝夜克之 詔給巴爾丹巴圖魯名號賞白金百兩三十七年正月師踰達木巴宗至斯底葉安賊嚴守我兵三路夾擊官達色以礮轟破其礮樓二月署松潘鎮總兵三月官兵以山坡築卡斷賊乘雪夜築二卡



攻之賊棄卡逃越日資哩賊眾亦逃官達色追擊賊泗水淹斃無  
數餘竄阿哈木雅隨移營至其寨外發礮轟擊垂破賊夜遁官達  
色與侍衛賡音素等由中路躡追斃賊十餘人溫福等攻南山總  
兵牛天昇後至官達色要擊走之遂合天昇兵下壓斃二卡拒敵  
之賊十餘人餘逃入大卡時天昇連攻南山嶺第二礮官達色領  
兵攻第三礮以分賊勢俱有斬馘三十八年三月署襄陽鎮總兵  
進攻達爾圖我兵設伏伺賊潛出掠擊之賊藏身礮根施槍礮我  
兵舉礮轟擊日斃數十人時豐昇額議移兵日旁官達色同領  
隊大臣華善等率兵六千駐守宜喜軍營每日發礮作進攻狀賊  
守稍懈五月分路攻達爾圖官達色等攻第二三礮卡拔其木柵

殲賊甚眾六月賊搶占木坡喇嘛寺糧站 諭五福同官達色防守丹壩寺等處三十九年四月 上以凱立葉路未能深入 命副將軍豐昇額往谷噶會勦官達色與侍衛普濟保等率兵四千赴谷噶五月定邊將軍阿桂派官達色隨參贊大臣海蘭察乘雨雪大作分路進攻奮取喇穆喇穆高峯大碉奪碉下石卡三殺賊十餘餘傷竄入大碉追至碉根擲火彈以雨不然暫還六月破色湖普山梁七月復隨海蘭察率勇健兵六百直取喇穆喇穆山梁迤西高峯兩大碉夜半潛發援石壁蟻附而登伏碉旁黎明突攻破兩碉殲賊無算旋分三隊攻該布達什諾大碉至溝邊賊覺槍石如雨我兵亦分躍踰溝創碉根或援碉直上賊見勢銳逸出截

擊之殲其在礮者各卡柵賊俱逃追斬無算時賊尙聚守該布達什諾木城阿桂令海蘭察等繞據木城後官兵分道進官達色攻其前賊守益堅奮勇攻之克其石卡木城遂下復入遜克爾宗十月攻默格爾山梁官達色與額森特等合攻其礮卡三冒槍石攀援直上斫破礮門殺賊二十餘隨上山攻其西面之密拉木山奪大山一石礮四并克附近寨落十一月從羅卜克鄂博攻溝內礮寨官達色等禦格魯克古上截礮寨來援之賊旋同海蘭察額森特等分隊裹糧踰溝攻格魯古丁口克當噶海寨及陡烏當噶大礮並焚其沙木拉渠寨連日攻作固頂沿途礮寨遂與丹壩官兵合復令兵循格魯克古山梁下壓至桑噶斯礮特箐邊有賊卡



一躍入殺賊賊潰克山腰石城木柵四十年正月實授襄陽鎮總  
兵三月攻達佳布安吉二寨復分兵三路攻勒吉爾博山址賊碉  
官達色與總兵保甯特成額等分攻第一碉寨克之四月攻榮克  
爾博下木城及木思土噶克了口碉官達色截殺來援賊六月攻  
榮克爾博第八峯官達色與普爾普等踰溝拔木柵二十六進偪  
巴占抗守甚固分道從舍圖柱卡進攻官達色等循混色爾山梁  
攻據雅木則碉遂克果克山等各碉寨復同台斐英阿納爾特等  
焚附近各寨旋圍拉枯喇嘛寺官兵騰入賊不能遁殲之遂收喇  
嘛科爾三寨所屬之卦爾沙巴等寨焚昆色爾寺等山陽什爾德  
擦烏曲所屬之裕爾等寨遂與常祿保乘勝克雅木則戰碉隨同

海蘭察等分三路攻章噶大礪賊掘深溝設柵伏槍石以待我兵拔柵卽取其木植爲溝而過援礪角蟻附至礪頂以次下攻賊驚竄出我兵勦賊數十人遂並礪克取其旁木城復從章噶下溝分路攻各礪寨官達色與保甯仁和等攻克寨落七遂合海蘭察兵攻勒烏圍復同普爾普等由托古魯山半破柵下信並分攻隆斯得三寨擁上礪頂斫寨門先克兩寨殺賊三十餘賊來援潛入最後寨復克之寨內貯鉛子積地二尺餘火藥百餘篋收取之復拔柵設礪臺偪勒烏圍轉經樓旋與保甯彰藹等克轉經樓官兵合破勒烏圍賊巢九月同海蘭察等繞道攻達烏連破其當噶克底礪連破噶拉宇及莫魯古進攻西里賊四出衝抵官達色踰溝夾



攻力殲賊眾賊穿林逃十月與福康安烏什哈達等各領兵循達  
思里山麓焚碉寨閏十月攻克達噶木及西里之黃草坪海蘭察  
攻其前官達色與海祿拔溝北對面之柵遂克之十一月隨海蘭  
察等攻奔布魯木山峯木城并策應各路克西里諸要隘拔木柵  
十餘復同烏什哈達等偪瓦喇占以礮轟破其碉寨循瓦喇占而  
下爲薩爾歪有寨路三海蘭察與五福等攻其前官達色與烏什  
哈達左右合擊賊棄寨逃邀殪之旋隨海蘭察等攻科布曲木城  
冒槍石登殺遂全克科布曲及索隆古山礮進攻布哈爾則朗噶  
克海蘭察等由山坳險徑繞出朗阿古兵分三路進攻近斯拉瓦  
及克爾切木官達色與烏什哈達軍居左破之收朗阿古官兵並

克布哈爾及則朗噶克遂據山梁四十一年正月我兵既取舍齊喇嘛寺復進攻雍中喇嘛寺仍分三路官達色與普爾普等由右及暮兵四合賊不能支有喇嘛六十餘出寺降餘驚潰追勦之進攻噶拉依賊巢二月金川平三月調山西大同鎮總兵四月賞二等輕車都尉併所得雲騎尉爲一等輕車都尉世職 命圖形紫光閣列前五十功臣 御製贊曰連建大功國之雄器帥領得人無往不利及至近礪斫門穴孔大呼直入嘉乃獨勇四十三年正月丁父憂回旗四月 命署直隸宣化鎮總兵四十五年七月卒子哈芬布襲一等輕車都尉見官二等待衛

右 國史館本傳



## 瑚什

瑚什滿洲鑲黃旗人姓瓜勒佳乾隆十一年由護軍升授藍翎侍衛十五年授三等侍衛十九年授二等侍衛二十二年挑乾清門侍衛時西域準噶爾用兵商都達卜遜淖爾達里剛愛等牧場選馬牛送巴里坤備屯田及士卒糗糧用得旨令侍衛等分隊管領瑚什與焉九月上以軍前侍衛瑪常等在外服勞年久命瑚什於巴里坤送交馬牛後卽赴將軍兆惠營更換十一月兆惠勦逆酋霍集占被遮於黑水副將軍富德率眾馳援二十四年正月初六日至呼爾璜賊以五千騎接戰瑚什隨富德率中軍兩翼騎卒六百餘列部伍轉戰五日夜賊奔走初十日偵知兆惠軍營



爲賊人卡倫隔十三日夜統兵啟行夜半至葉爾羌河岸分中軍  
兩翼詰朝與賊遇右翼兵以槍礮接戰數敗賊賊尙依蘆葦力拒  
瑚什隨富德率左翼兵急進大敗之賊渡河遁遂與兆惠合事  
聞授頭等侍衛三月領布特海索倫兵九百餘駐劄克爾品追賊  
至戈壁連界之阿勒楚爾大敗賊眾 諭自將軍至領隊諸臣均  
從優議敘瑚什獲頭等功牌二是月復追賊至伊西洱庫爾淖爾  
其地通拔達克山賊先據山麓拒瑚什率兵五百隨參贊大臣阿  
里表等在淖爾以西截隘降回眾萬餘計自抵準噶爾以來轉戰  
八十餘次九月霍集占爲拔達克山汗素勒坦沙所殺博洛爾全  
部歸順官軍在營年久者悉撤回原地瑚什在沿途約束二十五

年二月奏凱 賚銀幣如例二十七年敘功 恩給雲騎尉二十九年由軍營撤回三十四年正月署奉宸苑卿事二月署正黃旗護軍統領八月實授三十五年管理火器營事四十年得 旨瑚什年老有疾不勝護軍統領之任俟有蒙古副都統缺坐補四十五年卒子那爾善襲雲騎尉世職

右 國史館本傳

1971

1971

申保

申保顏扎氏滿洲鑲白旗人世居盛京由盛京刑部筆帖式升主事擢工部員外郎遷戶部郎中乾隆二十九年來京仍補戶部郎中三十年擢通政使司副使三十三年遷通政使三十七年三月授倉場侍郎十月奏奉天額解黑豆向以守凍天津致被潮滬請於本年直隸總督飭屬雇船受兌並咨奉天將軍等於船到時卽行起剝 上是之三十九年正月以運河水淺起剝費用較多本年未到幫應交餘米准其隨便售賣俟下運交倉以紓丁力並遴員隨時稽察得 旨依議速行旋巡漕御史張猷以幫丁在途售賣餘米恐將正米一并朦混多賣奏罷之 諭令仍照往例於抵



通後再行售賣八月緣與內監高雲從交結革職旋賞三品職銜往庫車辦事十二月調喀什噶爾辦事大臣四十年十月以喀什噶爾辦事大臣雅德爲總理命申保幫辦事宜四十三年九月授正紅旗滿洲副都統十月署工部右侍郎十二月授禮部左侍郎四十四年正月命爲烏什辦事大臣二月授都察院左都御史仍駐烏什以刑部尙書德福署其缺八月申保奏烏什阿克蘇二處之阿奇木伯克阿勤呼哩等叩請挑選回人充當親隨十一月奏內地安民之道察吏爲先撫育新疆回眾亦不外此保舉參贊大臣領隊大臣中有守有爲及謹慎勤於公事者數人得旨嘉獎十二月奏庫車阿奇木伯克阿卜都哩蒂卜苛派所屬回

人並縱放回奴赴各鄉村勒取牛馬羊錢 諭曰前申保等奏參庫車阿奇木伯克阿卜都哩筭卜虐使回民該部擬以發往伊犁具奏朕特加恩免其發往今申保等又審出苛索之事著傳諭申保不必遵前旨辦理將案內人犯明確定擬具奏四十五年二月奏庫車回眾輕視常喜請派一能清語之大臣前往更換 上允之三月授鑲紅旗漢軍都統調伊犁參贊大臣尋請於伊犁等處照南路烏什之例行使普爾錢文 諭曰伊犁鼓鑄清錢回部則沿用普爾原以順俗從宜各因其便如果葉爾羌喀什噶爾二城庫貯普爾壅積一時難以疏通何妨暫行停鑄乃轉欲使伊犁等處亦從回俗改用普爾錢無論一以當十多寡懸殊兵民未便且

亦不成事體申保於此事並未通盤籌畫而徒張皇其詞不過希圖見長殊屬非是四十六年卒

右 國史館本傳

## 宗室弘响

宗室弘响鑲藍旗人乾隆二年由散秩大臣授三等侍衛尋升二等侍衛十三年擢鑲藍旗漢軍副都統兼鑲白旗護軍統領二十九年奏稱鄭家莊官兵移駐福州俟兵丁全數起程請將房屋交內務府遞交昌平州收管其兵丁原領器械城守尉佐領關防圖記分交戶工二部查覈下軍機大臣議行三十年調鑲黃旗蒙古副都統三十一年派往庫車辦事三十三年調鑲藍旗蒙古副都統三十四年以庫車見無差務請裁綠營都司守備及印務處辦事章京各一員添派驛站處筆帖式二員奏入從之三十五年正月授福州將軍福州八旗滿兵一千五百六十名每名拴官馬



三匹向將一匹扣價於需馬時售買實拴馬一千五百六十匹以備操演設立官圈餵養所餘二匹草豆銀兩仍給兵丁以資生計並將所裁馬匹變價以爲建造棚廠之用又奏無依閒散丁口請於官房租銀內酌給養贍俟挑補步甲時再行停止十月奏駐防官兵到閩未久一切馳奏不密查稅口等項須資熟手請將裁歸補伍之千把總內挑選四員馬步兵十二名仍交管束差遣均如所請行三十八年六月調盛京將軍十月襲奉恩將軍尋加宗人府左宗人銜三十九年三月奏言白西虎山煤窯開挖年久未能豐裕請於迤南之鶴子峪復州所屬之五虎嘴招募旗人開採照例徵稅又奏盛京工程需用銅鐵俱動正項採買見查存貯槍礮

及礮子有因潮溼鏽污不堪用者請將此項銷化備用以省工費均得 旨允行四十一年六月朝鮮國人於高橋地方被竊奏請著落鋪州府地方官員賠補 諭曰弘晌係專管地方之員當時既未賠補卽屬不知事體今又欲著落屬員更屬非是此項銀兩卽著弘晌等照數賠補旋以鳳凰岫巖二城事務奏令岫巖通判管理與京一城事務歸與京通判專辦 上是之四十三年三月奏大凌河馬廠西北丈得澤田一萬畝有奇請移駐閒散宗室一百餘戶分爲四屯給屋一千八百間地四百四十三頃每屯駐宗室章京一員閒散三十戶建屋木料由遼陽甯遠等處運買每戶給瓦屋三間餘蓋平棚墾田一犁三牛兵爲耕種一切需用由盛

京戶部支領又每屯添設貼寫及傳事馬甲各四名另給蕩田一頃餘地招墾奏入報 聞十二月錦州協領福神保藉差科派經錦州副都統德福劾奏 命兵部尙書福隆安馳赴查辦先將弘晌革任查明有無染指授意情事尋奏弘晌因錦州蓋州牛莊三處協領缺分較好令其量爲幫貼存貯所設差局酌撥公用實未授意斂錢亦並不入己但以宗室大臣見小滋弊請交宗人府會同刑部治罪福神保等發往烏魯木齊效力贖罪 諭曰弘晌如果與所屬通同作弊藉差斂錢入己卽當從重懲治今訊明實無染指亦未授意斂派不至革職治罪但身爲將軍於辦理差務令屬員幫費而於錦州科派之事又漫無覺察實屬糊塗弘晌著加

恩以散秩大臣效力贖罪四十四年四月授綏遠城將軍九月奏請將伊應追攤派銀一萬餘兩又應交賞銀五千兩分限十年交納諭曰弘晌去年辦差攤賠銀兩究屬因公並未入己著加恩免其交納但伊係將軍因辦差攤派自應將緣由具奏乃經朕詢問數次並不據實奏聞賞伊銀兩本應辦公伊既已攤派豈可領朕賞銀所有應交銀五千兩著賞限五年交納四十六年卒諭曰弘晌歷任多年今聞溘逝深堪軫惜應得卹典著各衙門察例具奏尋賜祭葬如例諡勤肅子永鐸襲爵官至盛京將軍別有傳

右 國史館本傳



匡卓書本類在赤

三

宗室舒景安

宗室舒景安正黃旗人乾隆九年襲奉恩將軍十三年授副護軍參領赴科布多辦事二十二年授鑲白旗滿洲副都統二十四年以追瑪哈沁收楞納克爾等遲誤奉旨革退副都統並革世職留闕展效力贖罪尋隨護軍統領努三在濟穆薩打仗擒獲納克爾等二十七年遷乍浦副都統三十五年調鑲紅旗漢軍副都統三十六年調鑲藍旗漢軍副都統賞戴花翎三十七年調成都副都統時大兵進剿小金川署四川提督參贊阿桂統兵南路命舒景安赴軍營領滿洲兵十二月派駐翁古爾壘詔授爲領隊大臣大軍克美諾移剿金川三十八年正月抵僧格宗阿桂進

據當噶爾拉扼金川要隘令舒景安領成都滿洲兵駐納木爾覺  
羅宗格接應六月賊撥科布多進偪僧格宗犯總兵張玉琦營舒  
景安率駐防兵馳援遂同駐守時金川賊目潛出句連小金川降  
番復叛美諾仍失 上命阿桂爲定邊將軍八月撤當噶爾拉及  
宗格兵賊合力侵截連擊卻之十月偕侍衛三寶攻得布甲賊棄  
礮遁 詔賞荷包十一月克復美諾進攻金川三十九年三月攻  
庚額特山舒景安率兵五百由山前穆當噶爾分路進偪六月隨  
副將軍明亮自絨布進兵正地明亮以正地險阻無機可乘與舒  
景安等議由周叟一路移赴凱立葉時阿桂由西路攻遜克爾宗  
等處互相接應七月攻達爾固山梁舒景安率遊兵扼賊旁突擒

大頭目丹巴阿汰得 旨優敘九月大兵三路攻木克奪礪內賊  
三百人突前搏戰又甲索賊百餘壓至格水勻山梁舒景安等更  
番鏖戰敗之十一月攻日旁山復克戰礪十餘座平礪二百餘間  
又攻獲石包上賊卡二座以破金川門戶與西路軍僅隔一河四  
十年兩路隔河夾擊自日南直偪勒烏圍聯營列柵舒景安偕鑲  
白旗滿洲副都統都爾加互爲策應六月攻額爾替山賊由克爾  
瑪斯底葉安旁突舒景安分兵由左首壓梁截殺賊潰竄遂抵平  
坡七月攻石眞噶及噶西喇嘛寺偕領隊大臣帶兵接應克之卽  
移木城駐守又連克丹木扎木各寨遂進克扎烏古山梁殲賊賊  
目多名獲礪位烏槍刀矛無算捷 聞 上嘉之十一月大兵由



阿爾古山進攻碾占舒景安隨明亮在巴扎木策應各路兵進攻  
克爾甲爾右礪卡克之十二月連克乃當及甲雜官寨抵獨松四  
十一年金川平圖形紫光閣 御製贊曰日旁之石包上攻壓  
梁防賊甲索在峯阿爾古山大卡既得略寨殲醜所至奮力四十  
六年卒

右 國史館本傳

國朝耆獻類徵初編卷二百九十目錄

將帥三十

額森特

武靈阿

五福

覺羅永德

馬彪

劉倬

董果

敖成

覺羅圖思義

哈青阿

宗室莽古賚

仁和

李國梁

富甯

宗室永瑋

日本書紀卷之九 孝德天皇 乙未年 乙未年 乙未年

--	--	--	--	--	--	--	--	--	--

國朝耆獻類徵初編卷二百九十

通奉大夫前署江西巡撫江西布政使司布政使湘陰李桓  
將帥三十

額森特

額森特滿洲正白旗人姓台褚勒初以前鋒馬甲從征伊犁乾隆  
三十二年右部哈薩克與塔什罕相攻贊理邊務大臣富德使額  
森特諭令歸順哈薩克感悅遣人入覲額森特護送至京擢藍  
翎侍衛尋遷三等待衛三十三年遷二等侍衛三十四年從經略  
大學士公傅恆征緬甸十月攻老官屯舟師泊江岸陸兵先發賊  
突出犯傅恆令額森特等率索倫兵邀擊賊披靡旋分兩翼犄角



進賊悉出拒額森特以翼兵橫馳之賊潰竄三十六年從副將軍  
溫福征小金川攻巴朗拉額森特奪東面山峯毀其碉 賜號丹  
巴巴圖魯大兵取達木巴宗額森特由別道出山北連破碉卡至  
資哩與大兵合三十七年正月偕侍衛彭鵬等攻資哩北山破五  
十餘卡得碉七三月資哩賊乘夜築卡額森特率兵百邀擊於卡  
外阿喀木雅賊數百踵至三卻三進額森特中槍力擊敗之於是  
南北兩山官兵乘勢合剿賊夜遁克資哩居數日攻北山之普爾  
瑪寨自普爾瑪至美美卡中閒大碉四賊倚爲聲援額森特設計  
盡取之四月丙寅朔偕總兵馬彪伏兵東崖擊賊水碉翌日並奪  
普爾瑪庚辰攻東瑪賊由別斯滿山梁來援額森特設伏截擊暮

收兵賊躡我後還戰斬二十餘級旋奪東北三卡毀峯下諸礮戊子偪東瑪夜半賊二隊來犯額森特伏兵卡旁羣起合擊殲之擢頭等侍衛甲午賊分兩道一由色爾渠將夾犯我大營額森特與總隊德赫布分伏南北隘逆擊之賊大敗旋出賊不意薄其巢穴入額森特被創呼戰益力遂克東瑪 諭曰額森特在軍營奮勇出力攻取東瑪寨又因奮勇得傷著給副都統職銜七月攻美美卡同彰靄策應中路取旁礮夜半繞山徑黎明會攻中礮與彰靄分道深入南北兩山賊皆遁遂取美美卡九月繞路頂山而右渡河撲兜烏山寨十月拔路頂宗礮授鑲黃旗蒙古副都統十一月自穆拉斯廓繞至博爾根奪山巔大寨復由北山下夜渡南至納

拉覺山仰攻克碉十二卡十五進擊格實迪入又襲破公雅樹山  
踰木爾古魯山麓取溝內寨卡並據嘉邑山十二月授領隊大臣  
是月小金川平三十八年正月將軍溫福抵功噶爾拉山令額森  
特與副都統普爾普等率兵三千先發功噶爾拉者兩金川接壤  
要隘也峯銳積雪塞蹊徑賊多設碉扼險拒守額森特督兵騰雪  
磴直上副都統烏什哈達繼之漸克旁碉二月戰於固木爾山斬  
賊四十餘奪卡一隨與都統海蘭察合攻之得碉卡五遂隨溫福  
移營木果木會攻昔嶺昔嶺多賊碉其扼要大碉十額森特分攻  
第九碉第十碉迸擲火彈乘賊懼疾馳入或殪之碉外或撲之碉  
中賊立盡顧見七八兩峯峻鉅復與海蘭察等合攻往來冰雪中



會日暮乃毀已獲之兩礮佯退以誘賊果有賊四百來襲伏兵譟而前師還戰殲賊幾半三月從攻昔嶺閏三月移攻達扎克角山梁四月復攻昔嶺相持數十日六月戊戌木果木大營陷癸卯參贊大臣海蘭察副將軍阿桂在當噶爾拉令額森特率兵千開路賊拒薩木果木橋不能進阿桂已全師撤駐翁古爾壘上命阿桂爲定邊將軍進剿十月甲寅額森特與總兵海祿等由資哩南北山分進賊據北山橋築卡固守額森特衝擊奪其橋卡卽與海祿夾攻阿喀木雅之東溝總兵成德亦至三路會剿賊夜竄追至坡下殲之酣戰一日夜向晨進攻喀木雅山四面騰上奪其礮乘勝直取木蘭壩又掃蕩鄂什克官寨賊奔潰十一月大兵抵路

頂宗額森特越山南據高俯瞰官兵頂趾在目督令攀堞躍入斫  
賊數十餘多墮崖死進攻明郭宗賊竄逸獲窖內藏糧遂復美諾  
獲大礮四劈山礮八 上以攻復美諾諸處額森特督兵勇往投  
正紅旗護軍統領 賜御用黑狐冠一三十九年正月偕海蘭察  
率首領兵至谷噶山下谷噶山外有橫梁曰喇穆喇穆峯勢陡險  
海蘭察與侍衛公保甯從旁進額森特當其前夜乘雪影穿箐越  
險直前奮擊轉戰至黎明已二十餘里始見高峯列大礮九繞石  
牆俄雪霧交作官兵乘晦抵礮趾賊不敢出乃攻取其左右山梁  
及附近之僭巴拉克山峯斬三千餘級又見喇穆喇穆之東有色  
依谷山高出羣峯卽於是夜襲擊復勝之遂與海蘭察兵合時海



蘭察亦據最高之登古山與羅博瓦山相對險特甚二月乙未額  
森特與海蘭察襲其後兵從石罅漏躍登林中賊礮如雨我兵氣  
益振及三峯麓賊數百從高而下海蘭察屢戰額森特等合力迎  
擊賊屢敗頃之復有數百賊分三隊冒死衝突連殪數十人餘賊  
負矢遁賊猶拒守博羅瓦山庚子擲火彈焚之丙午攻克第二峰  
礪 上獎其奮勉授散秩大臣三月進勦得斯東寨額森特斫寨  
門縱火賊出追殺之賊又以雪夜劫副將常祿保營額森特聞槍  
聲急赴援內外夾擊賊敗走四月賊乘雨霧建二礪於羅博瓦山  
額森特與海蘭察亦乘夜密率兵八百薄礪趾毀牆入賊驚竄追  
斬數人其礪毀 上謂海蘭察額森特等於大雨中殲賊毀礪足

壯我軍之氣破賊人之膽五月賊夜劫烏什哈達營額森特追擊之賊負創遁六月攻羅博瓦峯下色湖普大岡賊於岡上設大礮六又設大礮六左右相應援海蘭察克其中三礮額森特與烏什哈達並克其三附近山寨同時收取 上嘉之 製詩紀事有人人自爲戰上下力各努蓋自用兵來斬獲斯爲巨之句七月海蘭察進攻該布達什諾令額森特偵賊不備斫柵直進遂克二木城毀之 諭曰額森特見海蘭察立功居多思奮勉自勵故不避雨澗將二木城立時攻拔均屬可嘉未幾額森特遙見該布達什諾各寨煙起知海蘭察等兵至賊悉往救色湖普後山結營時額森特遂順下山梁奪獲筆郎納克及該筆達烏等寨 上曰額森特

原係勁將自派往軍營奮勇出力調度得宜首先殺賊從前賞給丹巴巴圖魯名號今改墨爾根巴圖魯並賞給銀二百兩見在大兵之圍遼克爾宗益加奮勉迅奏膚功時額森特駐遼克爾宗之右海蘭察在其中閒岡脊尙有扎木咱克等礮爲賊屏蔽官兵攻之焚其寨落風大作火熾燬平房礮卡二百餘八月額森特伐木立寨與海蘭察督攻 諭曰海蘭察額森特等所帶官兵直至賊礮之下或倚木梯攀上或拆缺口衝出並將礮內之梯用力拔出斷賊人上下點賊於地窖深藏未得而官兵如此奮勇實屬可嘉九月壬子攻遼克爾宗水礮斷賊汲丁巳日出進攻官寨旋佯退日幾中忽從水中躍出驟倡寨牆賊槍石爭發持至日昃他寨賊



來援官兵乃撤庚申復攻之額森特鼻受石傷又槍傷足居數日  
見遜克爾宗右有峯四乃與烏什哈達協擊克其一海蘭察亦取  
其二寨額森特遂撲其三寨賊槍折其弓弮傷及指仍取親隨之  
弓連斃數賊 上以額森特被傷尙能換弓射賊嘉獎之 賞貂  
帽槍狍猴馬褂各一十月攻默格爾山額森特由中路直前與侍  
衛官達色繞道之兵上下夾攻斫破礮門殺二十餘賊餘墮澗死  
遂留海祿等據守而自與官達色趨上山梁時海蘭察已從深箐  
中穿徑先至其西有密拉噶拉木柵礮共攻克之乘勝並克凱立  
葉官寨賊自勒烏圍分三隊來援官兵亦分三隊下壓賊大敗追  
數里斃賊百餘距勒烏圍賊巢僅止二十里得 旨嘉獎投參贊



大臣仍交部議敘額森特乘勝取布拉克森及喀斯巴爾二山顧見日爾巴當噶有賊卡保甯等已破其山陽五礮賊竄山頂額森特追撲殺之格斯巴爾山下羅卜克鄂博其溝口尙餘七礮並焚燬於是凱立葉上下及附近寨落席捲殆盡上嘉其奮勉超羣著在乾清門行走十一月與海蘭察各領一隊乘日黑額森特潛渡溝突入格魯克古了口得礮卡十二循山下抵桑噶斯瑪特其山分四支前石城二後木城三賊疊石牆掘地溝守甚力乃與海蘭察分隊進殺二十餘賊拔石城各隊兵亦奪三木城遂由山足樹柵下抵河涯十二月攻沿河寨柵射柵隙或拔柵木以擊之時沿河礮卡六擦庸及羣尼二寨爲大四十年三月燬羣尼寨並奪

擦庸寨及附近木柵石卡又與海蘭察攻克上下巴木通及安吉  
達佳布至噶爾丹寺前所有寨落百餘賊無敢復抗拒者 諭曰  
既得勒烏圍卽須進攻噶拉依第恐逆酋負嵎死守得之未能迅  
速勢必分兵爾邦夾此路兵自應大員帶往若派參贊大臣則莫  
若派額森特阿桂當遵旨妥辦而行六月額森特由巴木通至直  
古腦山頂柵鱗次時領隊大臣福康安烏什哈達已得礮卡五十  
餘侍衛額成特亦克各山峯俱與額森特合兵額森特遂偕福康  
安等焚冷角寺及側近寨落壓至勒烏圍之上八月與海蘭察直  
至勒烏圍賊巢分兵圍其兩面勒烏圍之南爲轉經樓又過甲爾  
日磔橋而南爲科布曲賊負高阻深互爲脅齒官兵扳援負戴攻

擊益力竟克之時額森特得傷不能乘馬 諡曰阿桂見派額森特在轉經樓前科布曲山下駐紮以牽賊勢額森特雖未能上馬遠涉而防守是其所長著令在勒烏圍一帶小心看守勿使隔岸之賊乘隙過河滋擾或致稍有疎虞九月額森特分兵三路一攻甘肅瓦爾一攻德里雅克角一攻鄂羅木共得碉卡二十七寨十六殺賊二百餘生擒三十餘人後數日還攻科布曲克碉一時額森特所駐與南路明亮兵僅隔一河明亮所攻之阿爾古額森特先用礮摧之明亮奏入 上曰額森特與所領官兵雖未親身攻勦而於隔河施礮轟礮使賊膽落如此不分畛域方無愧爲參贊益當努力自勉其襄大功十一月海蘭察分兵三路合攻西里額



森特望見西里官兵得捷率保甯常祿等攻西里山麓盡克其木  
城勒烏圍之前有山曰克爾古什拉斯爲進取噶拉依正道賊密  
布城礮爲負嶠計額森特分兵六隊攻克之賊退守勒隈勒木通  
山脊十二月額森特乘夜進攻賊退死守前三礮乃繞下山半攻  
其四五兩礮至曙賊見官兵甚眾自相驚擾盡破之又剿其後兩  
礮及石卡九後數日額森特由勒隈勒木通直取格隆古先奪其  
前三寨然後圍其大礮賊突圍欲出官兵環殲之時海蘭察等攻  
科布曲海祿攻兜窩兵皆合遂將科布曲旁寨乘勢掃定賊棄索  
隆古而遁時大兵將及賊巢賊尙以布哈爾則朗噶克爲門戶斫  
木塞道額森特率同烏爾納拉木扎彭雷等督兵進賊伏積木中



發槍如雨官兵直進遂克布哈爾礪卡數日由則朗噶克立柵上  
偪令官兵潛行密籌聞近賊見官兵樹柵悉眾來擾伏兵從箝出  
擊賊驚潰官兵擊敗乘勢進取瑪爾古當噶循山東下至克角爾  
登又下至喀爾巴河沿合圍噶拉依賊巢四十一年正月額森特  
攻克喀爾巴山後燬附近寨落直至河沿截噶拉依之左 諭曰  
參贊大臣額森特奮勇出力茂著勤勞賞給一等男世襲罔替二  
月金川平 賜御用鞍轡馬一匹緞二十端銀一千兩紫光閣繪  
像列前五十功臣 御製贊曰虎槍隨圍覺與眾殊命往勦賊攘  
臂以愉閱歷既多遂參謀議獨當一面亦復集事四十六年六月  
甘肅循化廳逆回蘇四十三因爭立新教聚眾破河州焚蘭州關

廂據華林山額森特奉 命馳驛至蘭州五月大學士公阿桂令  
額森特與海蘭察明亮等攻華林山賊於山前立大卡一通孔穴  
濬深溝爲死守計額森特等鍬鑿開路擁進大卡殲守卡賊於是  
賊傾穴出鬪額森特力戰得傷大軍合擊之賊平 上以額森特  
進剿受傷仍能帶傷進戰賞大小荷包以褒其勇六月由一等男  
晉世襲三等子爵四十七年十月卒子哈金泰以三等侍衛承襲  
三等子爵尋病歿無子以姪伊爾琿阿承襲

右 國史館本傳

武靈阿

武靈阿滿洲正紅旗人瓜勒佳氏由前鋒隊長於乾隆十九年授前鋒校尉二十三年八月署前鋒章京從征準噶爾回部有功給雲騎尉世職三十年授直隸居庸路都司三十五年授督標後營遊擊三十九年九月山東逆匪王倫滋事臨清直隸總督周元理恐賊竄入境令武靈阿等赴王家淺察探行至塔灣西南距臨清三里遇賊百餘焚燒劫掠武靈阿直前奮擊賊敗走翌日官兵屯西岸賊三千餘兩路來犯發槍礮擊之賊散而復合武靈阿射中偽總兵楊雷左肩餘賊潰走奏入 諭曰直隸官兵此次堵殺賊匪使其不能西逸將領弁兵俱奮勇出力甚爲可嘉武靈阿著交

部遇有參將缺出卽行升補又 諭曰周元理奏遊擊武靈阿射  
中賊目頗爲奮勇著舒赫德看其人材如果可用卽補德州城守  
尉儻不能勝任亦卽據實具奏是月卽補德州城守尉十月得  
旨遊擊武靈阿已補德州城守尉但城守尉所得官項較遊擊轉  
少是明升其官而暗減其祿非所以示體恤著舒赫德再將武靈  
阿才具心地與署臨清城守副將之德州參將烏大經秉公比較  
若烏大經勝於武靈阿卽以烏大經升補臨清副將其所遺德州  
參將員缺令武靈阿升補俱著舒赫德妥辦具奏旋奏補德州營  
參將舒赫德尋以武靈阿明敏諳練請調補撫標中軍參將 詔  
如所請四十一年二月 上巡幸山東親詣臨清舊城詢及官兵



勦捕情形 諭曰參將武靈阿係在事出力之人雖已加恩擢用仍著賞戴花翎示獎十月遷陝西慶陽協副將四十四年擢甘肅甯夏鎮總兵四十六年六月勦蘭州逆回蘇四十三於華林山四十七年三月署陝西固原提督七月回甯夏鎮任四十八年六月卒

右 國史館本傳



五福

五福滿洲鑲白旗人姓富察氏由世襲佐領兼烏槍營章京乾隆二十年發四川以遊擊用二十一年補建昌營遊擊二十七年遷城守營參將三十二年遷維州協副將三十五年四月小金川土司澤旺與鄂克什土司色達克拉構釁五福詳請發兵援鄂克什總督阿爾泰檄責小金川澤旺服罪三十六年六月澤旺子僧格桑復與構釁漸侵明正土司大兵議進攻十二月五福領官兵士練五百駐防梭磨界之樸頭三十七年九月擢松潘鎮總兵十二月回營彈壓新附番人三十八年正月赴美諾駐守糧運小金川平同松茂道查禮辦理甄別期滿新改屯練並汗牛十四寨新附

番人事宜時僧格桑竄入金川與土司索諾木爲逆 上慮兩酋  
由丹壩逸出逃往鄂羅克命五福防範六月賊襲攻底木達及大  
板昭營大兵由登春進剿五福由後路往會夾攻七月奏赴梭磨  
察閱 諭曰五福奏先令副將西德布等領兵速回丹壩分防五  
福仍前赴梭磨一帶察閱糧站並駕馭土婦卓爾瑪及大小頭人  
百姓安靜住牧並飭將通金川卡隘加意防範所辦甚好前諭賞  
卓爾瑪名號綵緞傳諭獎勵五福到彼正可辦理此事畢後仍回  
丹壩駐守實力嚴防三十九年三月同副將李天佑領土兵夜燬  
穆爾津岡賊寨二生擒德爾目嘉等七人五月由作固頂赴德烏  
當噶進攻播坵賊出礮拒敗之六月潛攻穆爾津岡賊礮克之燬



其礪山梁上賊以死來援五福奮勇接戰斃其眾七月大兵進攻五福率漢士兵三百六十爲應援令官兵作攻撲狀以綴賊勢士兵伏作固頂水卡左右賊番五十餘衝水卡伏發槍斃頭人餘賊負傷竄士兵進攻穆爾津山半賊礪賊於礪頂施槍石五福督士兵斬礪門施火彈斃賊十一月 諭曰朕閱戰圖凱立葉東北卽達克拉爾其下卽作固頂革什戎岡又下卽穆爾津岡與丹壩甚近今凱立葉旣經攻克進取羅卜克鄂博再進取格魯克古格爾提尤與丹壩相距咫尺五福正當乘此勝勢激勵土司選派士兵進剿五福卽親帶官兵由丹壩一路進攻阿桂等並可爲之預約爲合力夾擊之計見當大兵突入復添此一路官兵賊眾難於支

禦成功更可迅速著阿桂速飭五福協力進剿奮勇自勵以期立功受賞大兵尋攻克格魯克古了口接連丹壩五福隔山瞭大兵至卽督兵將普籠籠瑪讓戰礮數座同時攻燬於作固頂以下沿河設營卡防範十二月大兵進攻勒烏圍五福由陡烏當噶夾攻賊傷斃無算四十年六月進攻榮噶爾博攻燬賊礮一七月大兵攻踞巴克圖仰木山頂五福克其薩木卡爾山下各礮卡與大兵合九月大兵分七隊由達烏達圍進攻五福同總兵常祿保等接應閏十月大兵由黃草坪突上截賊礮五福同副都統普爾普在溝底樹柵前進大兵旣克黃草坪賊糾黨從山包後下拒五福與大兵內外夾擊賊敗竄十月官兵三隊由奔布魯木進攻五福同

副都統烏什哈連夜率第三隊兵圍賊碉賊越碉竄復與第一第二隊兵合至西里正砦賊潰遁獲賊槍矛器械分取瓦爾占舍勒固租魯夜移礮轟摧賊碉尋議敘功加一等紀錄二次十二月官兵分中左右路進攻薩爾歪賊砦同都統海蘭察由中路自上壓下賊棄砦竄復繞出賊砦後殲賊甚眾同時克三處賊砦四十年凱旋 命圖形紫光閣儒臣擬贊曰斫門殺賊於滅金嶺焚碉燬巢作固一頂馬番士兵越險踰幽丹壩突入獲其槍矛大軍旣撤以兩金川地勢寥闊檄五福領兵三千駐守美諾要地四十四年擢陝西提督四十八年卒

右 國史館本傳

皇朝通志卷一百一十八

...



覺羅承德

覺羅承德滿洲正藍旗人由筆帖式於乾隆十七年授刑部主事十八年遷員外郎十九年遷郎中二十年授浙江杭嘉湖道三十年閏三月擢浙江布政使 諭仍管理海防事務十一月疏言乍浦綠營戰船向係本營參將領價自修日久恐有偷減請委乍浦同知承辦工竣再委杭嘉湖道會同參將驗收 諭曰告知督撫酌議行三十一年奏請浙江驛站船隻分別裁畱酌改船式以歸實用 諭曰所奏是三十二年三月請以浙江濱海柴石塘工編列字號以備稽覈 詔如所議行三十三年二月擢浙江巡撫十一月以浙省監製烏槍案內有承德家人王六等從中剋扣銀兩

承德 陸見時不據實陳奏奉 旨嚴議經部議革職 詔畱其  
任三十四年七月請將滿洲駐防營馬裁補綠營例馬並以牧廠  
餘地給民間墾得 旨嘉獎八月疏言乍浦額稅較甯溫二口數  
多而甯溫二口均屬道員管理乍浦僅設同知殊非慎重之道請  
改屬杭嘉湖道管理 從之十月調江蘇巡撫三十五年三月調  
河南巡撫先是承德奏將華亭四層石嶺兩次歲修帑項改爲條  
石塘工並請遇歲修工臨時酌改 諭曰所見是但已調汝河南  
將此交薩載令其妥辦三十六年五月調湖南巡撫六月吏部疏  
劾承德在河南巡撫任內失察屬員諱盜請革職 詔畱任九月  
奏稱通省典商公捐銀兩擬建鐵佛寺 上嚴飭之並令嚴議部

議革職 詔畱任尋調廣西巡撫三十七年三月請嚴議上司徇庇控官之處分並酌定咨報之限部議 從之六月疏言向來親老人員在部銓選者例得預爲呈明而在任推升者必待得缺後始請改銓恐藉親老之名陰爲規避之計且員缺久曠於理未協與其請改於旣升之後莫若呈明於未升之前則無由趨避員缺亦不致久曠 上是之三十八年正月 諭曰永德見在來京陛見看其器局甚小而不甚曉事不勝巡撫之任著卽署理副都御史四月兼署兵部侍郎五月四川璧山縣民徐亮采在都察院控武生鄧貴榜等勒派賑粥軍需銀錢希圖侵蝕 上命永德偕兵部侍郎周煜等前往審訊奏言亮采坐誣論罪九月署刑部侍郎

十月四川蓬溪縣生員黃定獻在步軍統領衙門控本縣歷任知縣借軍需名色勒派民間錢文 上復命承德周煌往訊定讞亦坐誣告治罪如律三十九年四月充經筵講官十二月署正藍旗蒙古副都統四十年授福建福州將軍四十九年三月授散秩大臣閏三月卒

右 國史館本傳



馬彪

馬彪甘肅西甯人乾隆五年由行伍拔把總二十二年升千總隨征西路軍營奮勇有功十月遷興漢鎮標中軍守備二十三年遷波羅協中軍都司二十五年遷西安城守營參將尋授慶陽協副將二十六年六月擢川北總兵十二月調肅州總兵三十年高臺縣毛木縣丞邱天寵私伐巴彥濟魯薩樹木圖爾古特貝勒羅卜藏達爾扎入控詞連彪上命理藩院尙書五吉同總督楊應琚會審得實天寵擬罪如律彪以擅給路引褫職諭送部引見尋賞遊擊銜駐雅爾三十四年五月署雲南永北總兵十月授昭通總兵三十六年九月將軍溫福以彪屢經出師勇往幹練請領黔

兵三千馳赴金川軍營十二月隨溫福克巴朗拉碉卡 賜戴花  
翎三十七年正月大軍由達木巴宗分三路趨資哩彪偕侍衛額  
森特等自北山進攻奪其碉卡賊四百餘據山頂彪斬首百餘與  
大軍會資哩時彪領騎兵二千駐資哩北山梁東西距三十餘里  
賊夜犯都司黃壯略守備王廷玉營彪偕侍衛巴三泰馳援賊敗  
遁失劈山礮三 上以彪督勦奮勉免議處二月都司徐大勇等  
守色布色爾賊據十里外高峯參贊大臣五岱檄彪率兵三百協  
勦未赴副將色倫泰陣亡五岱劾彪逗遛請革職自備資斧效力  
贖罪 詔革職仍畱任尋由顧祿噶爾駐色布色爾時提督阿桂  
代參贊五岱軍次喇卜楚克山麓偪木蘭壩令彪伏兵東崖下克

水碓五月進攻色爾渠彪隨參贊豐昇額等礮擊東瑪砦乘勝至  
哲木克郭羅郭羅美羅喇嘛寺等砦皆克之奪碓卡五殺賊四十  
生擒十四捷 聞敘功加三等六月攻美美卡彪率兵二百由山  
梁小路進碓外賊二百餘來援截殺甚多美美卡至日噶爾橋有  
小路曰兜烏賊毀橋築卡以拒彪伐木造橋濟兵賊棄卡遁十一  
月彪與提督哈國興兵合克喀木色爾穆拉斯郭砦遂據兜烏  
詔予開復尋由達克蘇山後攻明郭宗彪以兵一千自格實迪下  
攻賊棄碓鼠三十八年正月擢西安提督二月偕侍衛烏爾圖納  
遜分兵攻達爾圖大碓賊由卡逸出者皆擊斃之閏三月偕領隊  
大臣華善署總兵官達色以兵六千駐宜喜五月賊四百餘伏林箐

圍我前哨兵擊敗之斬賊三十餘三十九年彪以日旁兵三百宜  
喜兵三千二百攻達爾圖未克十二月賊由沙壩山溝分三隊  
襲宜喜營又賊四百餘夜撲達爾圖營賊二百餘復由東南角來  
犯彪擊之斬級甚多餘負傷竄四十年大軍克乃當抵獨松彪追  
擊之中巴布里下巴布里及瑪雅岡角木賊皆棄砦逸閏十月彪  
與副將欽保伏兵克爾瑪槍礮齊發賊潰我軍乘勢四路進遂克  
扎烏古山梁十一月副將軍明亮令彪偕總兵敖成攻甲索克之  
敘功加一等四十一年金川平赴西安提督任 命圖形紫光閣  
御製贊曰西師效勇早著旂常命截逆番盡力以獲精搗渡河奪  
卡據水用濟我軍井井有理四十六年三月撒拉爾逆回蘇四十



三等滋事 上命彪領兵二千赴河南四月賊眾據龍尾山大學士公阿桂領彪等由山左進剿據山梁礮擊賊營復以綠旗兵二千及舊練土兵皆由華林山東撲賊營擒剿有功四十九年正月調湖廣提督閏三月卒於任 諭曰馬彪前在軍營勞績茂著簡任西安提督亦能實力整飭營務昨因湖廣係水陸要道是以將伊調任不意在途染疾甫經到任遽爾溘逝深堪憫惜著加恩晉贈太子太保賞給雲騎尉世職照例襲替並賞銀五百兩以資喪費所有應得卹典該部察例具奏尋 賜祭葬如例諡勤襄子藍翎侍衛鳴玉襲世職見候補都司

右 國史館本傳

馬公彪固原人少無賴嘗衝突固原提督儀仗提督命杖於轅門  
公問人曰提督品最高究竟何如人始爲之人告以由行伍起者  
公奮然曰吾以提督皆大人耳若由行伍進吾猶能力致之乃誓  
曰吾不致身此官終不入此城也遂仗劍從軍時大兵進討回部  
公奮身用命積功至總兵到官由固原有邀其入城會飲者公力  
辭之曰此尙非吾入城時也後以平撒拉爾回民功果授固原提  
督公至城門揮去侍從步入其闔至衙中首命置前提督神主朝  
服祀之然後接印其眾鄉里父老設酒歡宴終日指其牌曰吾非  
爲此公所激何能致身至此此聊以報德也

右錄宗室昭棟撰

劉倬

劉倬四川永甯人乾隆十二年以行伍從征金川十五年拔外委把總十七年隨總督策楞剿雜谷土司蒼旺敘功一等十九年派防西藏二十年補把總三十一年遷千總三十六年九月從四川提督董天弼由西路征小金川十二月擢四川松潘鎮左營守備三十七年隨參贊大臣出南路十一月大兵克甲爾木倬與侍衛綏庫等潛攻直登梅列高峯大礮官兵合擊之賊驚潰竄當噶爾拉遂收礮卡石房是月遷泰甯協右營都司十二月頭等待衛明亮等由邦甲抵納圍納扎木一帶進攻都恭山梁倬與守備崔文傑攻克拉咱砦番眾多降與章京拉布東阿等夜乘皮船渡至僧

格宗俸夜分攻僧格宗後砦截其去路賊預毀砦後石牆繞河逸  
奪大戰礮一平房小礮百五十餘旋與侍衛德赫布等充前隊由  
東岸進發踰喀咱木籠及奢藍山梁進攻池木奮擊奪礮三十餘  
賊遁美諾追至美都喇嘛寺後奪所據山梁遂乘勝攻寺賊迎戰  
屢潰復合我兵奮擊敗之殲賊眾據其寺仍由寺後分路進攻遂  
克美諾 賞戴花翎三十八年攻色木則礮卡先登被創槍砂貫  
左股部議優賞九月擢黎雅營遊擊三十九年六月官兵破色湖  
普及喇穆喇穆山梁七月克該布達什喜德古十月克勳格爾及  
凱立葉下截山梁旋攻格魯克古了口壓促浸河邊俸俱在事有  
功四十年十一月定邊將軍阿桂以俸熟悉番情奏請升補四川



城守營參將部議俸籍隸川省例應迴避 諭曰武職管理營務原與文職不同卽如福建總兵要缺多有閩省人補授以期人地相宜況川省大功告成應辦善後事務尙多自不必拘於成例毋庸迴避四十三年二月遷陝西定邊協副將以畱辦金川善後事宜調補夔州協副將四十四年擢松潘鎮總兵並令駐新疆辦理屯田事務四十七年回任四十九年四川總督李世傑奏俸舊傷舉發動履艱難請解任調理 允之並 諭賞給全俸五月卒 諭曰松潘鎮總兵劉倬前因舊傷舉發解任調理朕念其效力戎行打仗受傷已降旨加恩照旗員之例一體給予全俸茲因傷發身故殊爲可憫著交部議卹酌量給予千總恩廕以示朕軫念前

勞有加無已之至意尋 賜祭葬如例入祀昭忠祠以其子世榮  
廕千總

右 國史館本傳

董果

董果直隸豐潤人乾隆二十六年武進士授三等侍衛二十八年  
棟發陝甘以遊擊用三十年補督標右營遊擊時甘肅回民馬得  
龍爲積年巨窩分遣夥黨肆劫總督吳達善委董果同固原州知  
州姚棻往平涼鹽茶廳密訪躡緝至卽獲馬得龍並夥匪十餘人  
保奏送部引 見擢湖北荊州營參將三十七年七月遷卽陽協  
副將領兩湖兵征金川三十八年二月參贊豐昇額奏綽斯甲布  
一帶通金川道路甚多派果督兵嚴防三月總理軍營糧務山西  
撫臣鄂寶奏撒拉角遞送公文兵丁冉如學等遇夾壩被殺飭果  
查明分防地界定界址以專防守均報 聞旋於水池橋頭盤獲

米商田濟國並無米石祇載銀兩米票赴軍營經豐昇額奏聞  
諭曰該省招商領運原係佐官運之不足既官給票張自應令其  
執爲運米憑據田濟國安得恃無米之票齎銀遠涉且奸商挾具  
赴營料必仍向兵丁買回食米交官充數事關軍餉非尋常商販  
因公射利者可比審明屬實卽行在彼正法示眾以昭儆戒五月  
湖廣兵丁祝萬清患瘋迷失未經呈報部議降調諭從寬畱任  
九月鄂寶赴南路督催糧運疏稱覺木交一帶不可無大員彈壓  
見駐木池之副將董果人甚勇往且在後路久悉情形請調赴防  
守報聞十月豐昇額於宜喜達爾圖附近覓閒道進攻復派果  
防守後路三十九年七月將軍阿桂密訂各路兵丁進攻達爾圖



十二日丑刻潛伏深箐攀山梁擊賊不備賊驚覺抵死拒果直薄賊塲拋火彈率眾力攻木城外有賊番救援我兵擊殺十餘人遁入礮內濠溝深廣不能越果身受槍傷十二月授福建建甯鎮總兵四十年十一月成都將軍明亮派果於阿爾爾古兵率綴四十年正月大兵進攻噶拉依帶兵防守巴布郎谷山梁要隘二月金川平奏凱回京 賞戴花翎九月赴建甯鎮總兵任十二月調漳州鎮總兵四十二年三月調臺灣鎮總兵四十五年二月偕臺灣道府稟稱鳳山縣屬山豬毛社生番直理產等因被土目虐索率眾移居大路關隘山腳願內附督臣富勒渾以生番下山既慮頭目相尋仇殺若分置各處亦難理飭派果購覓熟識土目之通

事入山勸諭仍令直理產歸故穴嗣以通事一時未得其人董果等查有□□離山豬毛社頭人巢穴甚遠將直理產家屬人等妥爲安插疏入報 閩四十六年九月丁母憂四十八年十一月服闋補福建福甯鎮總兵四十九年八月調海壇鎮總兵因足疾奏請解任回籍調理報 允尋卒

右 國史館本傳

敖成

敖成陝西長安人由行伍赴四川軍營從征瞻對金川補千總乾隆二十二年從征庫車擢守備隨將軍兆惠擊賊於喀喇烏蘇河復追剿賊於葉爾羌俱有功引 見得 旨以遊擊用二十七年授廣西提標遊擊三十三年遷提標參將三十六年擢義甯協副將三十八年十月授右江鎮總兵 命往金川軍營 諭曰召見新授總兵敖成人尙結實據奏從前隨兆惠平定回部又曾在瞻對金川出兵於川省情形自所熟悉著賞戴花翎並賞銀百兩令卽馳驛速赴軍營其應在何路帶兵進剿著阿桂酌量派往十一月調補甘肅甯夏鎮總兵將軍阿桂奏調貴州鎮遠鎮總兵三十

九年四月大兵分路進剿金川副將軍明亮統兵南路偕富德奏  
言僧格宗一帶緊要近日賊放夾壩皆由小金川竊據各番竄伏  
深山伺便偷劫見在河北各隘雖設軍把守未足深恃急須幹員  
彈壓敖成堪以派往得旨敖成獨當一面恐非所長著畱於明  
亮軍營備用六月桂林奏南路應在納木覺宗及塔克撒達宜喜  
等處防守敖成已帶兵由薩木果木過河自美諾將至塔克撒一  
帶設營七月明亮赴宜喜軍營攻達爾圖山梁十月令敖成偕副  
都統舒景安督兵至日旁攻石色上賊卡二克之獲礮卡四百餘  
殲賊甚多四十年四月派帶漢土官兵二千五百先攻甲索以分  
賊勢同副將常泰等分三道進直備礮趾之一破其要隘三礮前



後奪取礪卡十四 諭曰總兵敖成統兵攻克甲索尤屬勇往超羣著賞給僧格巴圖魯名號以示獎勵五月由達爾圖山梁進攻噶爾丹率兵直薄巴里布山脊礪下雷大作我兵繞出礪後奮擊得卡隘四礪內賊驚竄殲賊甚眾 上嘉之七月偕副將常泰攻克礪占向南克爾甲爾古山梁賊礪五及東日格德大牛山梁賊礪二十二月偕提督馬彪率兵至甲雜官砦賊遁溝內之巴布里對峯之瑪雅岡角木各砦俱棄去四十一年凱旋敘功列前五十七功臣圖彤紫光閣 御製贊曰甘涼宿將屢立戰功以其驍桀俾伐蠻宗於巴布里得其恃固乘雪拔之有如李愬四十二年擢貴州提督四十六年七月詣避暑山莊 召見 賞黃馬褂四十七

年因甄別干總未能實力稽覈部議降三級 詔畱任四十九年  
卒 諭曰貴州提督敖成前在金川軍營著有勞績擢任提督於  
營務亦能實心整飭今聞溘逝深爲軫惜著加恩晉贈太子太保  
所有應得卹典該部察例具奏任內降革處分槩予開復又念伊  
子並未服官著賞給雲騎尉世職 賜祭葬如例諡勇愨以其子  
世俊襲雲騎尉世職

右 國史館本傳

科羅圖思義

覺羅圖思義滿洲鑲藍旗人由官學生於乾隆二十七年授內閣中書三十七年遷侍讀三十八年遷御史四十一年三月因承催官項不力部議鍰秩得旨寬免四十三年七月遷戶科給事中十一月遷內閣學士四十四年擢本旗副都統尋授吐魯番領隊大臣四十九年八月疏言吐魯番移駐滿兵經前任大臣議設墩塘八處事經數載至今尙屬虛懸臣在吐魯番年久深悉地方情形自烏魯木齊至吐魯番相距四站沿途設軍臺七處且四十七年在邊地之哈喇巴爾噶遜安營駐劄守備等員聲勢聯絡巡查更爲嚴密無庸添塘糜費下軍機大臣議行是年兼署烏魯木齊

都統疏言查口外提督鎮標營均有屯田事務時屆初秋正屯工緊要之際於此時紛紛調閱未免有妨屯務若急遽草率亦非慎重戎行之道請緩至秋收後農事已畢再爲校閱報聞又奏烏魯木齊鐵廠人犯有出力捐贖兩項原定一百五十人挖礦五十人種地俱名爲出力其年老殘廢者出銀三十兩作爲廠費名曰捐贖向經定額今酌議挖礦種地者仍撥二百名捐贖者只需一百名卽於新到人犯內擇悔過安分者准令入廠補額俱限五年期滿准其另行分別查覈情輕當差者再限十年如始終不懈期滿令其回籍情重爲奴者五年期滿只准爲民永遠不許回籍如此立定章程鐵廠不致短少罪名輕重有別下軍機大臣議行又



奏查參革迪化州觀成虧缺官項先經都統海祿奏參觀成虧缺  
庫項銀二萬七千餘兩得旨如有款可抵則已如有侵蝕入己  
情弊卽照揚桑阿之例審明定擬至是圖思義逐案確查均有款  
項可抵尙非侵吞入己但玩視庫項卽應仍照那移律論發伊犁  
充當苦差至其家人書吏從中侵蝕各按輕重分別問擬下軍機  
大臣議從之尋以吐魯番多交糧石圖思義未能查辦部議降  
級諭曰圖思義於該處多交糧石事件未曾查辦既經失察於  
前及海祿查奏時又復面回懇阻非尋常瞻徇屬員可比圖思義  
著照部議降三級調用尋授正紅旗滿洲副都統五十年九月卒

右 國史館本傳



哈青河

哈青阿塔塔喇氏滿洲正白旗人乾隆四年挑親軍七年補侍衛處筆帖式九年授藍翎侍衛十年挑善騎射換戴花翎十二年在乾清門行走十三年帶領黑龍江兵赴金川軍營十四年授三等侍衛十五年兼公中佐領十八年在奏事處行走十九年擢頭等侍衛是年準噶爾用兵 命往內扎薩克會盟處採辦駝隻二十年赴烏里雅蘇臺軍營旋 命帶領公那噶察前赴巴里坤那噶察在中途患病哈青阿不令休息事 聞降三等侍衛十二月赴西藏照料章嘉呼圖克圖哈青阿在藏獲罪繫成都二十四年釋回二十五年 賞上虞備用處拜唐阿旋授藍翎侍衛二十六年

遷三等侍衛三十四年赴雲南軍營三十六年調赴金川時大兵分路進攻卡了哈青阿同參將辭琮由浮橋渡河直抵卡了我兵奮勇上登先踞石卡賊番驚潰遂克之下部議敘三十七年正月大兵進攻革布什咱地方哈青阿同都司李天佑帶兵由郭宗濟野宗越山下壓直取木巴拉搏祖等處復下部議敘十一月委署營總以攻獲翁古爾壘隘口功授二等侍衛三十九年在僧格宗一帶防守 命赴納木覺爾宗堵禦要隘四十年四月於當噶爾拉進兵以分賊勢八月兼理章谷僧格宗防守事四十一年大兵攻獨松及卡拉爾哈青阿等分兵防守後路奏入得 旨嘉獎是年金川平凱旋回京授侍衛什長四十九年三月擢鑲紅旗漢軍副



都統兼公中佐領授西安副都統五十年卒

右 國史館本傳



## 宗室莽古賚

宗室莽古賚正藍旗人不入八分鎮國公揚福之子雍正五年授三等侍衛十三年十一月授宗室侍衛什長十二月授協辦班領事務章京乾隆三年二月授侍衛正班領五月晉頭等侍衛七月授鑲白旗漢軍副都統十月調正藍旗滿洲副都統五年正月命往西甯辦理青海事務五月奏青海二十九旗各扎薩克例於每年六七月齊集察漠陀羅海查審事件設宴會盟從前奉旨準噶爾夷使進藏將青海沿途經過駐紮之蒙古酌量搬移今查察漠陀羅海乃由東科爾進藏必經要路未便使二十九旗與之齊集一處見今夷使尙無進藏確音俟六七月閒如無信息仍循

例傳集會盟儻夷使於是月內已到則須俟彼從東科爾起身計程可渡木魯烏蘇後再行傳調六年四月奏青海蒙古貿易定例由西甯鎮屬之東科爾如赴西甯稟報公事亦由彼行走是東科爾乃青海蒙古往來聚會要區惟準噶爾夷使往藏熬茶亦在此地住歇貿易若仍聽青海蒙古往來則與夷使居住咫尺事恐未便儻因夷使在彼暫停青海蒙古往來伊等多資貿易養生且遇稟報緊要外事亦難禁止更兼西甯一府民間食鹽向無引商通運全資青海鹽接濟貿易未便暫停查西甯邊口東科爾外尚有南川黑林二口原係蒙古往來大道相距東科爾八九十里及百餘里不等見飭各扎薩克轉傳所屬凡遇貿易稟事徑進南川等



口俟夷使起程後仍在東科爾貿易 上嘉之八年二月青海多羅郡王額勒德尼等具呈理藩院稱莽古賚在任三年辦理青海事務眾心悅服懇轉再畱三年得 旨允行尋莽古賚奏稱換班辦理西邊夷務不止青海一處儻屆更換之期盡行呈請畱任殊屬非理設辦理稍有未協以爲畱任可求去任亦可求甚有關於邊防 國制請仍扣期更換以杜將來之弊奏入 諭曰此奏非矣彼之所奏亦出於情願耳又奏番人米拉等三十五人被郭羅克番賊搶奪牛馬牲畜餬口無資請將應納貢馬暫免二三年 從之十年調正白旗滿洲副都統旋授鑲紅旗護軍統領二十二年六月授正藍旗滿洲副都統十月 命赴伊犁北路軍營在參贊

大臣上行走二十三年五月隨定邊將軍成衮扎布領兵赴布延  
圖追剿舍楞賊眾二十四年因追捕瑪哈沁塞布騰等辦理遲延  
致塞布騰投入鄂羅斯 命往西藏辦事三十五年四月奏請將  
呼畢勒罕伊什達木巴拉布賚邱記仍行賞給達爾汗號三十六  
年二月奏西藏所屬阿克蘇地方三十九部落應交貢馬銀三百  
餘兩請照四川例蠲免均如所請行三十七年奏兵丁徐明如僱  
覓唐古特婦人致伊夫杜華服毒身死 諭曰徐明如係駐藏兵  
丁膽敢將唐古特婦人僱覓來家經年共處與宿娼無異該管大  
臣並不嚴行禁止疏懈之極著交部嚴加議處嗣後兵丁僱覓婦  
女永行禁止三十九年回京授正白旗滿洲副都統旋 賞戴花

翎四十年九月調盛京副都統十二月襲奉國將軍四十四年授  
陝西甯夏將軍四十六年三月 陸見 上詢以操演事務莽古  
賚面奏將軍任所每月操演六日均派章京等閱看 諭曰各省  
將軍副都統除管理兵丁外有何承辦事件每月但操六日已屬  
曠職何至六次仍不親臨閱看嗣後操演兵丁均宜親往閱看若  
仍派章京朕必從重治罪著通行曉諭知之是月撒拉爾回匪蘇  
四十三等犯河州 命莽古賚選兵一千名預備調用莽古賚奏  
請酌給兵丁治裝銀兩 上以其於此等細事過於畱心則緊要  
事件必致貽誤飭之時大學士阿桂督師進剿令莽古賚守龍尾  
山梁接應六月蘇四十三伏誅捷 聞交部議敘四十七年八月

涼州副都統圖桑阿奏請涼州添兵一千莊浪添兵五百 上命  
莽古賚議奏旋奏涼州原額兵不過一千莊浪不過五百若加倍  
添補未免過多涼州酌添兵五百名莊浪酌添兵三百名並請涼  
州酌添佐領防禦驍騎校各二員並莊浪酌添佐領防禦驍騎校  
各一員 從之四十九年四月固原新教回人田五等聚眾滋事  
莽古賚帶兵駐隆德請俟總督李侍堯到時再行進剿 諭曰莽  
古賚身爲將軍既帶兵前至隆德該處見有賊匪滋擾伊卽當相  
機剿捕何得復稱與李侍堯商辦其年邁無能於此可見著傳旨  
嚴行申飭看來該將軍在彼甚不得力旺沁班巴爾係甯夏副都  
統見帶同阿拉善蒙古兵赴彼協剿莽古賚俟旺沁班巴爾到時



卽將所帶甯夏滿兵交伊帶領速回鎮守時陝甘總督福康安率  
兵從底店進剿 命莽古賚催趙乾糧火藥鉛彈五月石峯堡逆  
回平得 旨交部議敘旋調杭州將軍五十年卒子來靈襲奉恩  
將軍緣事革退以孫新瑞襲

右 國史館本傳

168-158

168-158

仁和

仁和鈕祜祿氏鑲黃旗滿洲人祖巴圖魯一等宏毅公額亦都自有傳仁和於乾隆二十一年由親軍承襲一等子爵二十二年補本旗印務章京二十四年授公中佐領二十七年擢鑲藍旗蒙古副參領二十八年遷護軍參領三十五年升火器營翼長三十九年授潼關協副將調赴金川軍營十二月官兵分路進攻康薩爾山下木城賊於榮噶爾博山腰對面突出仁和督兵追擊之是月擢湖北宜昌鎮總兵四十年四月將軍阿桂令分兵攻勒吉博爾山附近之來珠砦克之又會官兵克木思工噶克了口礮座得旨交部議敘七月分兵攻勒章噶大礮焚其上下十餘砦復奮勇

直入奪取溝底砦落七座九月隨副將軍豐昇額赴達思處率級賊勢官兵隨將當噶克底各碉占據仁和分兵進抵鄂羅木賊方欲向德里雅克角各處援應分隊擁眾仁和督兵力擊賊潰即攻占鄂羅木各砦奏入 上嘉之並 賞荷包十一月官兵圍科思東木官砦阿桂派侍衛額爾特向上仰攻令仁和帶兵從山梁下壓奪其砦賊竄山下平礮焚之無一脫者十二月偕總兵保甯等攻克科布曲山卡賊四十一年二月帶湖廣官兵凱撤回任三月調直隸宣化鎮總兵十月調天津鎮總兵四十四年擢甘肅提督四十六年甘肅循化廳回民馬明心蘇四十三等於撒拉爾地方劫立新教念經惑眾與舊教韓哈濟互相仇殺舊教赴省控告陝



甘總督並未查明實在情形卽派官兵往剿擒馬明心正法蘇四十三遂糾眾抗拒知府楊士璣副將新拉被戕勒爾謹札令仁和會剿 諭曰仁和係會出兵打仗之人軍務頗熟悉勒爾謹當與之和衷速辦總以慎重明決爲要又 命仁和相機妥辦賊匪折斷浮橋攻圍蘭州甚急四月仁和設法渡河帶兵扼金城關渡口賊飛槍石如雨官兵以礮轟賊退 上以仁和奮勉出力交部優敘並賞大小荷包尋偕勒爾謹奏賊匪數千人已退占離省數十里之山梁臣等於城郭關廂左近添兵防範復督率遊擊祥保等由山梁東後繞道攻剿殺賊三十餘名又奏賊占南山自高而下又見在所謂循化土兵卽係舊教番回臣等妥爲駕馭令其奮勇

出力以公報仇並於老鴉關沙泥站淇濟橋各隘派兵堵截 諭  
曰賊人占據山梁多至十數日何從得有口食且大兵既經各路  
堵截又從何路搶掠俱著查明覆奏尋 諭仁和前此帶兵渡河  
打仗似屬勇往而近日則氣漸不振著傳旨嚴行申飭時賊匪在  
入蜡廟雷壇及水磨溝竄死守仁和帶兵沿河而西直從大樓  
一路進剿將賊壓下山溝賊潰仁和卽駐守蘭州城外五月 上  
以蘇四十三等肆擾不法乃勒爾謹經理不善養癰貽患及事發  
文安居衙署以致眾相觀望坐失事機 命革職掣交刑部治罪  
並以仁和見勒爾謹種種錯謬無一言阻止嚴飭之尋賊竄匿龍  
尾山不出仁和分兵由山右繞進令老弱兵於山前誘賊俟賊至

截擊大敗之遂進據龍尾山梁復會兵進抵華林山賊掘壕堅拒  
仁和策兵奮擊殲數十人時 上命大學士阿桂赴蘭州督師賊  
被圍勢蹙從直礮縱下水磨溝前創泉盜水經阿桂入奏 上以  
仁和係本省提督所派弁兵皆其所轄何至疎忽若此 命阿桂於  
事畢時嚴參六月仁和帶兵由華林山東攀援而上擊散賊眾將  
山上賊卡占住先是提督馬彪與將軍伍爾泰仁和會議令回民  
海潮宗至賊營曉諭被雷潮宗卽自稱阿渾與首逆蘇四十三同  
坐議事至是被擒 諭曰伍爾泰等身任將軍提督俱有奏事之  
責既遣人赴賊營被雷何以從前並未陳奏均著交部嚴加議處  
尋議仁和降三級調用七月官兵併力攻擊華林山寺蘇四十三

槍斃賊死甚眾餘匪竄逸仁和率本卡兵邀圍之擒殺甚眾嗣因水磨溝疎防被賊盜水一案交部議處部議革職九月 賞委署烏槍護軍參領銜四十七年因前在甘肅提督任內放殘廢馬匹作價不實發往新疆效力贖罪四十八年 賞三等侍衛作爲英吉沙爾領隊大臣五十年卒子托明見任陝西道監察御史

右 國史館本傳



李國梁

李國梁直隸豐潤人乾隆二十二年第一名武進士 殿賜一甲  
第一名授頭等待衛三十一年授浙江提標參將三十四年三月  
擢台州協副將三十七年九月調象山協副將三十八年九月擢  
定海鎮總兵三十九年三月調處州鎮總兵五月調福建漳州鎮  
總兵四十年十月護理福建陸路提督四十一年十一月實授四  
十三年九月丁母憂回籍四十四年八月 諭曰湖廣提督員缺  
李國梁將屆服滿卽著前往署理俟服闋再行實授四十五年十  
二月實授四十六年閏五月二十八日國梁奏川省咽喉匪百十成  
羣到處滋事該屬將弁等率領兵役將咽喉匪打傷多人活擒一人

該匪等仍竄入川省地方 諭曰所辦甚妥可見竟係川省並未  
上緊查拏以致肆出滋事文綬實不得辭其咎此等匪徒聚集多  
人搶劫拒捕甚屬可惡斷不可不盡法處治七月十六日 諭曰  
川省咽喉結夥搶劫竄逸各省一案已諭令文綬親往太平督辦  
外朕思此事湖廣貴州各省若不特派大員專司擒捕不足以專  
責成著卽派李國梁挑選本標精壯兵丁三百名令奮勇將備帶  
領親身督率前往先由湖北至貴州湖南一帶會同各該省督撫  
實力搜捕淨盡毋使一名漏網如三省已無賊匪卽往四川交界  
處所會同文綬將川省各匪一體搜捕淨盡以副朕戢暴安良之  
至意將此由六百里傳諭李國梁並諭文綬知之二十一日 諭

曰李國梁前經諭令帶兵先由湖北至湖南貴州一帶搜捕如三省已無賊匪卽往四川交界處所將川省咽喉匪搜捕淨盡今據李本所奏貴州見無賊匪蹤跡並著傳諭李國梁不必前往貴州並令酌量見在情形如兩湖亦無須往捕卽行迅速前赴四川會同文綬將咽喉匪一體搜拏淨盡毋使一名漏網二十六日諭曰李國梁前經降旨派令帶兵三百名徑赴川省會同該督設法搜捕此時想已到川省如該處咽喉匪業經捕獲淨盡無須李國梁在彼帶兵督辦亦卽一面奏聞一面令其將所帶楚兵先行撤回此事在文綬相度機宜酌量辦理將此由六百里諭文綬並諭李國梁知之八月國梁奏拏獲形迹可疑蕭達等各犯見飭解湖南省審



訊 諭曰著卽解交劉墉嚴切究訊務得實情若審明止係啣匪  
倡令同行並未隨同搶劫拒捕分贖之犯亦應照前旨發伊犁給  
厄魯特爲奴母致輕縱十月國梁奏據遠安營報獲啣匪張元保  
李廷昌胡奎三名宜都營報獲啣匪陳世達劉文年二名宜昌鎮  
後營報獲啣匪匡陽太朱玉孫達色子三名又盤獲葉天才張宗  
榮朱國才張朝選劉曾鳳劉世模黃漢清王登榜余應論九名又  
盤獲劉天貴一名遠安營又獲湖南之劉成一名見咨解赴湖北  
省審辦 諭曰啣匪結黨成羣行蹤詭祕不法已極今又據李國  
梁奏拏獲多人可見文綬辦理不善疎縱釀成致各犯等竄逸各  
處至今尙未盡就弋獲著傳諭舒常鄭大進劉墉等卽將見獲各



犯嚴訊實情遵照前旨辦理至此外逃逸外省及潛蹤川省者尤須嚴切督飭文武上緊搜捕務令盡絕根株並著傳諭福康安實力查辦不但不應有啣匪之迹並不可有啣匪之名將此由六百里發往並將李國梁摺鈔寄閱看並諭李國梁知之四十八年十月諭曰湖廣提督李國梁之父李瑞年屆九旬今來迎駕謝恩著賞給大緞二匹貂皮四張以示優眷四十九年五月諭曰李國梁之父李瑞年屆九旬李國梁著加恩調補直隸提督俾得就近侍養十月國梁奏遣犯劉大受進古北口經領催扎拉豐阿兵丁孟承泰等見該犯面有刺字盤獲送協領達蒙阿訊供稟報臣近在同城當將該犯提至署內面訊無異旋副都統恆山保以協

領達蒙阿並未將遣犯劉大受解送奏參 諭曰恆山保因人犯先送解協領訊供該協領達蒙阿直至李國梁具奏後始行稟報是以奏參等語地方遇有脫逃人犯原應不分滿漢協力查拏此案遣犯劉大受進口時經領催與兵丁盤獲送交協領處李國梁係提督大員近在古北口自應就近提訊卽行奏聞若李國梁以人犯旣已解交滿營伊竟置之不問則關口重地又安用此大員在彼駐劄至達蒙阿經李國梁勾取人犯卽將劉大受解往提署訊明解部以致未經解送副都統提督大員提訊賊犯協領達蒙阿若拒而不予成何事體該員旣經稟報副都統尙有何辜其所請嚴加議處之處著加恩寬免此事總因恆山保以副都統所奏

落後恐干處分是以將協領奏參所見小矣朕於諸臣功過一秉大公至正從不稍存偏倚之見嗣後古北口地方此等逃遣人犯當無分畛域協力查拏設使營員盤獲卽報明提督審訊具奏如係旗員盤獲卽報明該管副都統審訊具奏如係旗營會同拏獲卽先行就近具報提督會銜具奏亦無不可總之期於獲犯勿使漏網不可彼此耽延推諉致滋疎縱五十二年十一月失察汛兵糾夥謀竊部議鑄級得旨免其降調五十二年三月奏參燕窩營署都司觀音保於盧龍縣民王化清酗酒滋事未經送縣懲治輒將王化清杖責致斃該署都司觀音保革職論曰燕窩營距縣城寫遠都司衙門駐劄該處本有彈壓地方之責王化清酗酒

滋事該署都司予以杖責本屬罪所應得又係如法決責非違例  
濫刑者可比所有燕窩營署都司觀音保著加恩毋庸革職其該  
管上司一體免其交部議處尋卒 諭曰直隸提督李國梁宣力  
有年奉職勤慎茲聞溘逝深爲軫惜著加恩賞太子太保銜所有  
應得卹典該部察例具奏 賜祭葬如例諡恪慎

右 國史館本傳



富甯

富甯滿洲正黃旗人姓富察氏父甯古禮任二等侍衛於乾隆二十三年隨征葉爾羌陣亡廕騎都尉世職二十七年七月富甯由閒散承襲三十三年擢三等侍衛在乾清門行走三十七年隨征金川 賞奇徹伯巴圖魯名號三十九年三月 命在領隊上行走六月副將軍明亮奏派隨征正地七月同都統奎林克達爾圖西南碯卡十一月明亮攻日旁令富甯等於西南山腰進剿四十年四月隨都統海蘭察攻取薩克薩谷山梁七月同奎林攻取噶西喇嘛寺四十一年二月金川平凱旋回京畫像紫光閣列後五十功臣 命儒臣擬贊四十三年三月擢二等侍衛四十六年三

月逆回蘇四十三滋事大學士公阿桂奉 旨督師征剿四月  
諭富甯等前往甘肅聽候差遣嗣阿桂奏稱見在逆回退踞山梁  
各路官兵雲集足敷剿捕之用乾清門侍衛無須帶兵打仗臣等  
擇其中曉事者酌畱富甯等二人以備差委五月隨領侍衛內大  
臣海蘭察等攻克龍尾山華林寺等處七月同侍衛台斐英阿押  
解賊首進京十月擢頭等侍衛四十九年五月逆回田五滋事尙  
書福康安同領侍衛內大臣海蘭察等奉 命往剿富甯隨赴軍  
營六月攻克底店 賞副都統職銜七月隨海蘭察進攻石峯堡  
克之回匪平奏凱回京五十年六月補正藍旗蒙古副都統授御  
前侍衛九月擢伊犁領隊大臣五十二年九月卒弟福甯襲騎都

尉世職

右 國史館本傳

國史館本傳

三十一





宗室永瑋

宗室永瑋滿洲鑲藍旗人乾隆十五年襲輔國公二十年授散秩大臣二十五年授宗人府右宗人二十六年兼漢軍副都統二十七年總理鑲紅旗覺羅學三十年管理正白旗蒙古副都統事務三十一年授宗人府左宗人尋充 玉牒館總裁三十四年授宗人府右宗正三十六年授左宗正三十八年授內大臣並總管左翼宗學四十年授廣州將軍四十四年調黑龍江將軍奏齊哈爾城至呼倫貝爾所設十臺當差十名俱有呼倫貝爾派員輪查因非專責遇事不免草率請將呼倫貝爾委署筆帖式六員移二員駐十臺兩界專管事務如果勤慎五年期滿升驍騎校仍於識字

領催披甲內揀選委署得 旨允行四十七年調盛京將軍四十八年三月奏言恭查 三陵殿內桌衣有用明黃行龍緞有用明黃雲緞繪畫藍龍及彩鳳來歸未能畫一且繪畫易於脫落請一體改用明黃雲緞以昭整肅 上是之又奏正紅門柵木在風水河北樹木叢中紅椿下馬碑在風水河南樹木之外該處草木茂盛多被遮掩且近臨河沿易致泡浸應將柵木移於河南樹木外堆房移於柵木外紅椿向南展移二丈飭總管等不時查看得 旨嘉獎九月 上恭謁盛京 祖陵禮成 賞永瑋銀三千兩五十二年十二月卒謚恪勤五十三年 諭曰宗人府奏永瑋所遺公爵照例降襲作爲未入八分請將應襲人員帶領引見此係照

例辦理但永瑋在將軍任內多年一切事務隨勉出力著加恩伊子縣佐再襲奉恩輔國公一次以示朕體卹宗室至意孫奕贊奉國將軍奕澤奉恩將軍

右 國史館本傳





國朝耆獻類徵初編卷二百九十一目錄

將帥三十一

常青

永昌

三德

李杰龍

喬冲杓

李奉堯

陳大紱

黃仕簡

子秉溶



國朝耆獻類徵初編卷二百九十一

通奉大夫前署江西巡撫江西布政使司布政使湘陰李桓輯

將帥三十一

常青

常青滿洲鑲白旗人姓蘇木克由前鋒累遷護軍參領乾隆三十  
二年二月分發雲南以副將試用閏七月補維西協副將八月擢  
由尋鎮總兵時征緬甸十月將軍明瑞令統兵由猛北路進十一  
月到蠻結四山環繞賊立十六寨防守明瑞統兵居中常青同領  
隊大臣觀音保踞其西賊突犯西隊常青奮擊斬級二百餘賊退  
大兵追剿自申至戌賊棄寨竄賊二千餘生擒三十四十二月進

至天生橋奪柵入於宋寨黃土岡等處鏖戰七日敗賊於猛隴獲糧萬餘石三十三年正月在蠻化村殺賊生擒百餘人戰於猛拜茶山等處至蠻魯受石傷二月剿黑水河小天生橋等處又於小猛育擊退賊眾四月 陛見 命仍馳驛回滇六月至永昌尋赴騰越防守七月帶兵進南甸十月赴蓋達十二月隨副將軍阿里衮出萬仞關從夏鳩剿賊三十四年四月隨經略大學士傅恆赴野牛壩督造戰船事竣帶兵赴新街殺賊奪寨十一月賊乞降奉旨班師授雲南提督十二月調貴州提督三十五年正月復調雲南提督三十六年六月署雲貴總督德福劾常青性耽安逸違例坐轎 上命雲貴總督彭寶查奏尋奏並無坐轎情事三十八年



大兵征金川派滇兵二千 諭曰金川番人思丹巴前來投順詢  
係由木果木而來自非虛捏是木果木爲金川要地賊若從此潛  
出卽不難至底木達大板昭等處此乃阿桂軍營緊要後路不可  
不實力嚴防著常青等於此等要隘切實防範時刻巡查不可稍  
有疎懈其美諾僧克宗等處有應互相照應者常青旣就近札知  
王進泰成果並飭汪騰龍一體畱心妥辦尋以富勒渾奏籌辦各  
路糧運臺站 諭曰此事甚有關係阿桂見在統兵乘勝深入其  
後路最關緊要底木達大板昭一帶皆不可不切實防範著常青  
等於此等處所畱心設法嚴防勿稍疎懈二月奏臣同阿桂派防  
布朗郭宗後路由木波至喀爾薩爾等十二處木波與噶魯什尼

二處係甘嶺木果木出入要路見派遊擊福敏泰帶兵駐木波遊擊保甯帶兵駐噶魯什尼所有兩處卡隘均修理堅固又美臥溝係大板昭要路派守備張啟貴帶兵駐劄是處距布朗郭宗最近有副都統富興與臣帶兵照應疏入報 聞三月奏撥綠營新兵四百分駐木波以滿兵三百移駐布朗郭宗將換出兵交遊擊福敏泰帶赴大營聽用美諾應換之三百知會王進泰截留新兵如數更換餘兵百五十名於美諾布朗郭宗分駐疏入報 聞又借富興奏喇嘛寺地方有賊番來放夾壩驚擾卡隘糧臺已飭將弁將林木叢深處所舉火沿燒實力搜查仍於布朗郭宗木波等處派兵由登春一帶附近搜剿 諭曰常青查辦夾壩一摺自應如

此籌辦賊匪所放夾壩之處皆係我兵後路均關緊要今常青遇有箐林可以藏賊者卽派兵焚燒搜剿綠營兵他事無能至於放火焚林尙屬力所能爲果能辦理無閒於事自爲有益時富勒渾王進奏大兵乘勝進攻改由揪砥供運附近大板昭一帶須加意防範查薩拉地方距大板昭一站爲揪砥糧臺總匯明郭宗一處爲西南要隘均駐兵較少請將派往雜谷草坡之兵二百移駐諭曰著富勒渾常青於明郭宗至大板昭一帶不時往來稽查隨地隨時妥爲措置毋稍疏虞四月以富勒渾奏酌定瑪爾當至明郭宗各站運糧 諭曰阿桂會同豐伸額見在統兵深入攻勒烏圍賊酋等自應合力拒守未必能復在小金川地方滋事但富勒



國朝通志卷之三十一  
三十一  
渾常青不可因此稍涉大意凡關係軍營後路總須嚴密固防設  
閒有零星夾壩亦必須上緊追剿方爲妥善尋富勒渾奏賊酋見  
派丹巴沃雜爾莫撒斯欲搶明郭宗木波一帶糧臺 命交常青等  
妥協防範五月美諾糧夫運米於石右魯溝遇夾壩富勒渾議令  
就近赴僧格宗支領奏入 諭曰唯在常青等勤飭官兵實力防  
範遇有賊至務須實力痛剿勿稍疏懈六月偕富勒渾議以大板  
昭撤納一帶爲西北軍營後路大板昭尤屬存貯軍糧軍火總匯  
見撥駐滿兵三百川省兵二百並土練兵數十督率將弁搜查又  
大板昭與谷噶了口甚近亦宜分力防守疏入報 聞旋奏三等  
侍衛穆塔爾廣噶土司察斯甲澤旺等帶土兵百名在噶魯什尼



後山及登春一帶搜捕斬獲首級三生擒一詢係金川人名拉爾  
甲諭曰穆塔爾廣噶及土司等前因拏獲賊目穆上阿庫魯曾  
經分別獎賞今復奮勇殲擒賊匪殊屬可嘉穆塔爾廣噶著再加  
恩賞緞二匹土都司察斯甲澤旺等各賞緞一匹其在事出力土弁  
兵著常青查明量加獎賞七月阿桂以小金川尙有餘孽令穆塔  
爾廣噶帶兵收割卽進勦功噶拉爾木果木以分賊勢奏入諭  
曰見在阿桂等由喇穆喇穆攻克色溯普日則了口指日可抵遜  
克爾宗賊人正在屯處周圍聚守其功噶拉爾木果木等處賊人  
必少猝然乘隙奮攻或能得進俱未可定穆塔爾廣噶等帶兵無  
多自難冀其深入常青見在底木達布朗郭宗駐劄相離甚近伊

處尙有兵丁況自彼進兵係迎賊而進又無侵擾我兵後路之虞  
常青接奉此旨卽帶兵趕上穆塔爾廣噶等查看彼處情形相機  
辦理并寄信富興就近帶兵前來會同妥辦尋諭日前因功噶  
爾拉木果木等處似有可進之機令常青帶兵趕上穆塔爾廣噶  
查看情形并寄信富興協同辦理但富興之絨布地方亦甚緊要  
常青確勘情形如果一鼓可進卽寄信富興令伊前來會辦或無  
益可帶領穆塔爾廣噶等約束鄂克什可期人眾收割麥苗嚴加  
防禦儻遇賊匪卽行殲戮毋庸寄信富興協理卽爾等兵數無多  
亦不宜深入富興尤當相機籌畫以期萬全不可稍有輕忽四十  
年四月富勒渾奏沙壩一帶屢有賊滋擾諭常青等督飭各卡

隘一體嚴密防禦五月偕富勒渾奏沙壩見設糧臺小沙壩爲適中之地路險林深三松坪爲沙壩上站距糧臺較近臣抽兵三百四十於小沙壩及沙壩各安百名三松坪安四十派都司一員督率唯三松坪兵數稍單仍撥民壯六十協守 上嘉之九月常青奏由功噶爾拉進攻獲坪卡二 諭曰此一路官兵久未攻打今忽於此覓閒進攻賊眾見之必皆驚惶支抵自足牽綴賊勢所辦亦好但其地險峻賊人便於拒守若官兵冒昧進攻恐難得力并恐賊計狡譎讓官兵深入在後潛行邀截甚有關係常青等此時不宜輕舉妄動或酌量於底木達等要處帶兵駐守以防後路且可使賊常聞官兵聲息不敢轉動以掣其勢四十一年二月金川



平四月  陸見  命仍回雲南任尋圖像紫光閣  命儒臣擬贊  
九月到滇十月調古北口提督四十二年正月奏新任提督海祿  
已經到任臣交代未行見因緬人孟矣蒙  恩釋回緬首悔過有  
遣人納貢之語請暫畱張鳳銜俟有信息與海祿相機籌辦妥協  
再起程赴任  上是之尋  諭曰常青所調新任並無急需應辦  
之事而得魯蘊前曾差人具稟今孟矣等又往阿瓦緬匪此時必  
有一番計議送信常青在滇已久緬匪素知其名其與提督文稟  
自止知常青而不知海祿就見在情形而論常青竟以畱駐張鳳  
銜籌辦此事爲安卽發往文檄仍當用常青提督舊衙海祿之衙  
暫且無庸並列外夷性多疑懼均認熟人若見內地遽易提督彼



必驚猜以爲另有舉動且俟見在之局辦有就緒常青再行奏聞  
前赴古北口新任亦未爲晚至得魯蘊前稟所云願送還內地之  
人輸誠貢象如果出於誠心悉如所言還人納貢從此完結自屬  
甚好但恐該提督等各存將就了事之見或潛遣人招誘致爲賊  
匪所輕則大不可總之賊匪狡獪異常儻窺見內地有欲圖遷就  
了事彼必以爲奇貨可居轉多羈阻若見提督等不以爲事處之  
淡然而彼或蓄有真誠自必急切懇籲欲冀俯納便可相機妥辦  
中國撫馭外夷之道大率如此該督撫等皆不可不知前已將此  
意詳諭該提督等善體此意不致舛誤也五月隨大學士來京七  
月到任四十六年閏五月以參將麥克老病未經揭參部議降三

國朝通志卷之三十一  
級調用得 旨畱任六月調浙江提督八月調江南提督四十七  
年四月丁母憂七月奉 旨常青任古北口提督於直隸營務較  
爲熟諳見在丁母憂回京已滿百日所有直隸提督員缺仍著常  
青署理十月調福建陸路提督四十八年正月拏獲臺灣逃匪謝  
笑得 旨嘉獎交部議敘加一級四十九年七月授烏魯木齊都  
統十月以烏魯木齊各屬房租牲稅舊額經前都統海祿奏准加  
增見在所收不敷軍機大臣議覆各屬稅租儘收儘報不必照常  
定原額仍令常青確查具奏十二月奏迪化昌吉吐魯番等處租  
稅較海祿奏定額數相符唯迤東之阜康濟木薩奇台宜禾等處  
不敷定額因各屬市價係制錢八百合銀一兩而迤東所屬則以

制錢七百合銀一兩易銀解庫須加平補色畱箇頭錢於收稅時一並征解每銀一兩實需錢九百請嗣後以銀完納者聽以錢完納者均照制錢九百合銀一兩呈繳不得仍畱箇頭錢名目下部議行五十年三月奏烏魯木齊各處屯田收成分數請照舊定章程每兵收糧十二石以上功過相抵十五石以上官員議敘兵丁加賞其古城吉布庫收糧十五石以上功過相抵十八石以上議敘加賞軍機大臣議行旋授西安將軍七月到任五十一年四月以佐領德全等買補馬匹私動官錢定擬輕縱又不將署將軍數倫奏參處奉 旨申飭尋自請議處罰俸二年五十二年以前在直隸提督任內失察西洋傳教部議降一級調用得 旨寬免十

二月卒 賜祭葬如典禮諡莊毅

右 國史館本傳



永昌

永昌伊爾根覺羅氏滿洲正藍旗人世襲騎都尉雍正十一年授  
公中佐領乾隆四年授參領九年授前鋒侍衛十年襲世管佐領  
十二年遷護軍參領十六年授嚮導處章京十九年擢四川督標  
中軍副將三十一年遷松潘鎮總兵三十二年調浙江温州鎮總  
兵三十四年調定海鎮總兵三十八年調直隸馬蘭鎮總兵三十  
九年三月署天津鎮總兵八月山東逆匪王倫滋事連破壽張堂  
邑等縣 上命大學士舒赫德統兵剿之並飭永昌豫選綠營兵  
聽候調用永昌簡天津及附近東省各營得八百名派河間協副  
將雅爾哈等統赴德州隨舒赫德進剿旋以賊匪竄入臨清州之

柳林地方偏近直隸故城縣界總督周元理檄往防禦永昌調集武清霸州等營兵四百名督率都司常格等親赴故城遏截賊勢並以天津地方緊要不可無大員彈壓請於周元理調通州協副將富僧額帶兵二百名來津率同天津官兵一體防範奏入 上嘉之舒赫德之駐德州也以南來會剿之兵弱不足恃奏 聞

上以綠旗兵旣怯懦山東巡撫徐績措置復未妥協 命永昌隨左都御史阿思哈帶領弁兵及東三省兵繞出臨清之南與徐績合爲一路以資表率嗣因賊眾突至臨清河西衝擊官兵周元理復調永昌赴油坊一帶相機策應首逆王倫旋敗焚死永昌恐餘匪竄逸帶領弁兵密布運河西岸擒獲曾受僞號逆匪多名賊平

諭曰署天津鎮總兵永昌帶兵在油坊一帶接應並往臨清西岸  
堵擒賊匪其所派天津鎮兵經大學士舒赫德帶往亦爲得力永  
昌辦事尙屬奮勉著交部議敘四十年授天津鎮總兵尋授荊州  
左翼副都統五十年調鑲黃旗漢軍副都統五十一年以老致仕  
五十二年卒

右 國史館本傳

皇朝通志卷之九十九

九



三德

三德滿洲鑲紅旗人姓瓜勒佳氏乾隆三十二年以馬甲從征緬甸擢健銳營前鋒校三十六年隨將軍溫福出師金川三十七年征金川有功 特賞花翎三十八年補授前鋒副參領尋擢護軍參領四十年擢陝西潼關協副將四十一年奉 旨署陝西延綏鎮總兵是年金川平定西安將軍阿桂奏攻克格隆古科布曲素隆古喇烏喇及噶喇依等處三德均奮勇出力應列頭等又奉 旨三德著每案功加三級四十二年擢興漢鎮總兵四十六年四月蘭州逆回蘇四十三滋事陝西撫臣畢沅派令帶兵由略陽白馬關一路赴甘是月三德偕額森特等由了口進撲水磨溝獲賊

甚眾五月復隨海蘭察帶兵四千抵龍尾山梁閩五月由華林山  
南直壓賊營奪卡四賊復於華林山前山包迤西本布爾廟向爲  
賊巢燬之六月復攻克山溝下賊卡十餘首逆蘇四十三及緊要  
頭目俱被殲戮七月賊勢愈蹙官兵於華林山殲殺餘匪淨盡捷  
聞得 旨議敘四十七年督臣李侍堯奏參三德失察所屬軍裝  
器械積年虧缺部議降二級調用得 旨從寬改爲革職畱任仍  
勒限三年賠補四十九年甘肅逆回田五不靖陝西撫臣畢沅派  
三德帶兵一千由連雲棧前赴鳳翔防堵候調五月至秦州 諭  
曰畢沅等奏接據剛塔札稱擊獲賊匪吳全訊供賊眾卽欲搶奪  
伏羌秦州一帶見已札知興漢鎮總兵三德帶兵前往秦州堵截

賊匪既有搶奪伏羌秦州之語該處必須大員帶兵迎截見在五  
岱等在鹿鹿山紮營堵剿兵勢似單未便再分三德到彼正可斷  
賊人南竄之路並須將該處已入新教回匪詳加查明槩予駢誅  
不可稍事姑息三德奏由秦州一路偵至桌子坪山遇賊剿殺甚  
眾賊夜竄蓮花城見仍率兵尾追 諭曰據三德稱於桌子坪山  
遇見賊匪殺死六七十名是南路之賊所存無幾已不難迅速掃  
淨但三德帶兵由秦州前至伏羌本在賊前面迎剿今賊竄回秦  
安三德與五岱等會合俱在後尾追何以未經兩面夾攻殊不可  
解著傳諭五岱三德等詳查路徑派兵斷其去路毋致稍有疎虞  
六月至田家山抄路截擊復追至雙峴山七月又同巴圖魯侍衛

國朝通志卷之二十一  
章京等分路往底店進攻拔之遂會攻石峯堡賊平先是固原回  
民馬昇貴馬漢龍屋內開挖地窖牧養牲畜固原州知州王棕查  
勘不實以開挖地道報藩司陳步瀛往勘亦未得實情至是督臣  
福康安令三德撤兵回鎮順赴固原搜查餘匪並察訪地窖得實  
會勘各員議處有差五十一年三月得旨廣西提督員缺著三  
德補授五十二年六月卒

右 國史館本傳



李杰龍

李杰龍山東汶上人乾隆十年武進士授三等侍衛十五年十一月擢浙江處州中營遊擊二十六年四月擢撫標中軍參將二十九年二月擢平陽協副將三十五年九月擢處州鎮總兵三十六年五月奏兵丁操演烏槍應檢回鉛子仍給兵丁操習 諭曰昨總兵李杰龍奏兵丁操演烏槍檢回鉛子請給該兵丁操演一摺經兵部議駁已依議行矣但兵部所駁尙就銷三檢七成例而言及細閱李杰龍之奏名爲銷三檢七而實係發三扣七則由該省辦理不善卽兵部亦未經議及於此如所稱每兵定例歲給鉛子四十兩今每年僅得鉛十二兩其七分實皆不發冊報皆屬虛文

等語是誤認銷三成而以檢七之數扣而不發似此操演安得有益夫所謂銷三檢七者乃各兵以歲得四十兩之鉛作爲鉛丸令其操習打準於中准其銷三分而檢回七分非令其扣存七分但以三分試打準頭也兵丁演放烏槍於木靶後設有檔牆常時試演準頭自有定式即使不能中靶不當踰於檔牆之外尋檢鉛子本自無難不致勞苦亦斷不致多有折耗若放槍不願準頭左右高下惟意所適鉛子皆拋棄無存此乃益見習藝不精之故雖多給鉛斤亦何裨乎李杰龍不責令兵丁施放有準惟請多給鉛子已爲不揣本而齊末且據所言每歲止實給十分之三扣存七分所得自不敷操演之用此又奉行之誤會而非成法之

當更也浙省既有此弊恐各省亦復相同著各督撫提鎮嗣後烏槍兵丁照定例鉛子實給令施演有準所需按數備用則藝事既可以勵精勤而檢鉛亦令習於勞勩實爲一舉兩得儻督撫提鎮視爲具文不實力董率咎有攸歸將此通諭知之三十八年七月授浙江提督三十九年十月 陛見 賞戴花翎十一月 諭曰據鍾音奏推升山東武定營遊擊之浙江都司白達色准提臣李杰龍札稱該員感患痰喘病證恐不如前調驗屬實請將白達色勒令休致等語一摺已交該部議奏各省武職人員遇當推升之時卽有老病衰邁者督撫大率姑容不肯據實參劾而提鎮中能實力舉報者尤所罕見今李杰龍於已經推升之都司將該員患

病情由札知督臣奏請勒休可謂能知大體毫無瞻徇實武職大臣之難得者凡屬提鎮不當如是乎李杰龍著交部議敘以爲眾勸將此通諭知之四十三年四月奏岷縣逆民王開經拒捕毆官同撫臣王直望親往按名拏獲 諭曰王直望奏岷縣民人王開經等拖欠錢糧因典史何光曙帶同書役前往查催該犯輒將差役毆打知縣何士映聞信親往查拏王開經復敢糾集多人將該縣毆辱見在將已獲各犯供出之人按名拏獲等語同日並據李杰龍奏報帶同遊守等呈往協拏將陸續拏獲之各犯交司道查辦各等語李杰龍聞有糾眾毆官之事卽帶同弁兵前往協拏甚屬可嘉已於摺內批示矣至該犯王開經於應徵錢糧抗不完納



及該縣親往查辦復敢糾集至五十餘人之多肆行毆辱實屬不法已極不可不大示懲創以儆悍俗而遏刁風著傳諭王直望卽速率同司道等詳悉嚴訊將該犯如何起意糾眾拒捕及何人同謀助惡並見獲各犯外有無未獲之犯各情節徹底跟究無致有一人漏網並著於定案時從重多辦數人無得稍存姑息之見將此諭令該撫並令李杰龍知之十一月奏烏槍試用鐵砂並酌加鉛子 諭曰前據浙江提督李杰龍條奏烏槍兼用鐵砂一摺據稱每槍裝藥二錢六分大鐵砂六錢仍加三錢重鉛子一顆其準頭力量仍與單放相同若在六十弓以內上靶愈多力量愈大一槍卽可當數槍之用請飭各省通行等語朕時臨幸盛京於途次

披閱奏章卽以所言不甚合理蓋鳥槍朕自幼畱心肄習每於山莊獲鹿其火藥鉛彈配合催送之法夙所洞悉素知鉛砂不可並用於一槍中但該提督既有此奏不可不交部議曾向軍機大臣面諭及之嗣據該部議覆時大學士公阿桂畱京辦事暫兼署兵部事務以二錢六分之藥催發九錢重之鉛砂與以一催二之成例不符隨於健銳營內擇施放鳥槍嫺熟之官員兵丁照所奏演放則百弓至八九十弓全無著靶自五六十弓至三四十弓始聞有飛砂著靶亦不能穿透隨議駁並恐該提督或僅據屬員之言卽行入告或該處官兵另有別法可以致遠行令該提督親加試驗如果與原奏符合卽將該處放槍之弁兵內擇一二人送京演

試等語此議覆摺朕亦於行在披閱者回京復諭軍機大臣云阿  
桂果能辦事如此詢問看李杰龍如何措辭因諭令明白回奏意  
該提督必以誤信人言自行引咎本不得謂之大過且提鎮奏辦  
烏槍鉛砂尙屬畱心營務並可置之不問乃該提督覆奏以爲實  
係屢經親試加砂實無礙鉛子之致遠並派弁兵三名攜帶槍藥  
砂彈赴部候試隨令福隆安奎林演試施放據奏令送來弁兵施  
放於六十弓設立牌靶每放一槍看其鐵砂於三十弓外多有落  
地者連放數槍靶上只中有一砂尙未入木至鉛子則均未中靶  
與該提督所奏迥不相同請將李杰龍交部議處等語朕意如此  
完結李杰龍必尙有後言且恐外間無識之徒或疑福隆安等試

驗自然傳會阿桂等原議並恐遇事生風妄逞臆說者甚以爲李  
杰龍未經賄通兵部故旣駁其條陳復抑其技藝不特無以服李  
杰龍之心且有爲之抱屈者其何以示公允因親御紫光閣令該  
弁兵面爲試驗則所放之槍與福隆安所奏無異爲眾目所共見  
李杰龍實無從復行置喙矣此事雖小或以爲帝王不必親細務  
則殊不然事機之乘每由小以致大語云涓涓不息將成江河古  
聖賢所以有謹小慎微之戒也況鳥槍乃軍火重器本非不急之  
務兵可百年不用不可一日不備若以此爲小節而忽之必如何  
方爲切要之圖朕臨御四十三年事無鉅細必躬必親故得綱紀  
肅清是非不紊非好勞亦不肯憚勞此爲君之所以難也若明季



諸君狃於權倖朝臣又各持門戶伐異黨同遂使軍政邊防日益墮廢其君終惛然罔覺因而潰敗難支是以我太祖太宗得以乘時舉事搆成大業設彼時爲君者能如朕之乾綱獨攬諸事親裁則非但勝國之社未必遂墟卽遼瀋要區豈能爲我祖

宗克取乎朕所以兢兢業業雖小勿遺不敢稍存暇逸者實深有鑒於此也至李杰龍尙屬可以辦事之人所見不免卑瑣伊前任處州鎮時曾奏烏槍所用鉛子不必拘定銷三檢七之成例請盡給兵丁實用實銷一摺經該部議駁朕並未加責此次所奏鉛砂並用若伊自知錯誤亦可不與處分乃旣輕信冒昧於前又復飾詞迴護於後而覆奏之摺又涉尙氣取巧難勝提督之任其浙江提

督員缺著劉鑑補授李杰龍著加恩以總兵銜往伊犁代劉鑑管屯田事務並將此事始末明白宣示中外知之四十六年二月因浙江提督任內失察海洋盜犯行劫部議降調三月 諭曰李杰龍著加恩以所降之級仍管理屯田總兵事俟年滿該部再行請旨九月 諭曰劉鑑著加恩以革職提督自備資斧前往伊犁辦理屯田總兵事務李杰龍著來京交部帶領引見再降諭旨四十七年補江西九江協副將四十九年二月擢貴州鎮遠鎮總兵五十年二月緣伊犁屯田總兵任內浮報收成分數以官兵廉俸鹽菜銀扣抵完倉部議革職奉 旨從寬畱任五十三年九月卒

右 國史館本傳

喬沖杓

喬沖杓山西交城人乾隆十年武進士授三等侍衛十三年分發雲貴以遊擊用十四年五月署貴州安南營遊擊十月補清江協右營遊擊二十年遷朗洞營參將二十二年遷遵義協副將二十四年雲貴總督愛必達以苗疆緊要沖杓才識明幹騎射優嫻苗情甚爲熟悉調補清江協副將 允之二十八年愛必達復薦沖杓才略出眾堪膺專閫擢四川重慶鎮總兵二十九年丁母憂三十一年服闋補河南南陽鎮總兵三十二年調雲南開化鎮總兵時用兵緬甸檄赴猛密軍營三十三年二月將軍明瑞在木邦待援參贊大臣額勒登保等令沖杓馳往援應旋於宛頂黑山門等

處禦賊五月 命來京陛見尋調浙江衢州鎮總兵三十四年以  
前任開化鎮總兵誤報兵丁陣亡降三級留任三十七年以朗洞  
營參將任內造報錢糧不實革職留任三十八年調湖南鎮筵鎮  
總兵經湖廣總督陳輝祖奏委統領兩湖官兵馳勦金川旋調湖  
北宜昌鎮總兵仍留軍營三十九年 諭曰總兵喬冲杓自至川  
省從未著有勞績兵丁衣履不能料理軍械殘缺率多掩飾又於  
兵丁蔡惠儒等是否迷失脫逃未能詳查實屬廢弛著革職仍在  
軍前效力四十年隨領隊大臣普爾普常保祿等攻破大海山梁  
沙帽礪柯布曲喇嘛寺諸處四十一年大兵凱旋以年老遺歸五  
十三年卒



右 國史館本傳

國史館本傳  
卷二十一 將帥二十一  
五

國朝文獻通考卷一百一十八

李奉堯

李奉堯漢軍鑲黃旗人閩浙總督侍堯弟世次詳侍堯傳奉堯由  
官學生於乾隆二十八年承襲勳舊佐領二十九年十月授藍翎  
侍衛三十三年十一月遷三等待衛三十八年六月奉 旨 在乾  
清門行走三十九年九月擢山東登州鎮總兵四十一年七月調  
江南壽春鎮總兵四十三年十二月擢江南提督四十五年五月  
李侍堯在雲貴總督任內獲譴視承襲伯爵 諭曰李侍堯伯爵  
如係由別支加恩子襲者其親子及弟固不當承襲其伯爵乃李  
永芳子孫公共世職朕眷念勳舊亦豈肯遽行不令承襲乎著交  
該旗遵照查明辦理十二月本旗將應襲人員帶領引 見奉

旨著李侍堯胞弟江南提督李奉堯承襲四十六年七月調福建  
陸路提督奏巡洋營船被風傷損請照例賠修 諭曰此次沿海  
地方猝遇颶風船隻損壞實屬人力難施所有應行修整之各營  
船隻俱著加恩免其賠修准令官爲修理四十七年六月泉州府  
考試童生尤黃雲等與書吏爭卷單錢文不遵知府約束聚眾哄  
堂奉堯不親往查拏奉 旨申飭十月 諭曰據福康安奏接雅  
德咨會有泉州府盜犯林先和經管汛千總陳景泰於九月十五  
日拏獲解送被夥盜林耀林隱林允德等執持刀械將犯搶奪斫  
傷兵丁並將千總及親丁等扭回禁錮見在飛咨提督並委臬司  
譚尙忠星夜馳往督同搜捕等由本日又據王進泰奏八月二十



九日有漳浦縣民黃茂拒捕槍傷兵役經汀漳龍道姚棻聞信往  
拏該犯情急自刎身死一案閩省漳泉一帶習俗素稱犷悍拒捕  
抗官種種不法最爲可惡提督李奉堯駐劄泉州接據營汛稟報  
自應帶兵親往協同地方官實力查拏方是況九月內有泉州府  
童生尤黃雲抗官哄堂一案李奉堯僅委員彈壓曾降旨申飭乃  
不數月閒又有此等抗官傷差之案該提督所司何事著卽交雅  
德會同李奉堯迅速親身前往查拏毋得一名漏網嗣經福建巡  
撫雅德奏臺灣地方有漳泉二府民人聚眾械鬪 上以奉堯仍  
未親赴各該處督同查拏嚴飭之並交部嚴加議處部議降二級  
調用得 旨李奉堯俟來京之日再降諭旨尋奏訪聞林石氏被

盜案內指控盜犯林先和經水師提標後營千總陳景泰拏獲後被夥盜林耀林隱林允德等持械奪犯並將弁兵毆傷禁錮旋經釋放該犯等逃避無蹤因糾眾奪犯地方營汛均係水師所轄臣所屬陸路營汛員弁無從稟報當委幹弁飛往密查臣卽於本日由泉州起身親赴該處督率查拏疏入 諭曰本日據李奉堯奏林耀等糾眾拒捕搶犯一案所奏恐未確實且摺內稱該犯等率眾奪犯地方營汛均係水師所轄並非陸路所屬等語顯有推諉之意尤屬非是地方遇有此等糾眾拒捕傷差之案卽應無分疆域帶兵親往迅速查拏況該提督駐劄泉州見在又有漳浦縣民黃茂槍傷兵役並泉州人廖口被漳人毆殺互鬪之案俱在漳泉

陸地經該督撫等奏報節次降旨令其實力飭拏乃李奉堯身任提督於林耀拒捕重案則推爲非陸路所管而於黃茂等兩案又不一並奏明竟若置身局外者試思刁民犯事及事後聞風竄跡豈轉在水師營汛地方而不在陸路耶李奉堯除業經降調外著再傳旨嚴行申飭四十八年正月奏拏獲臺灣聚眾在逃首犯謝笑一名咨明督撫審訊諭曰李奉堯前因查辦此案意存推諉朕本欲將伊治罪今在廈門地方訪得該犯逃回晉江縣之信卽馳抵該處設法搜查會同常青拏獲首犯尙屬知過奮勉李奉堯著加恩補授馬蘭鎮總兵兼總管內務府大臣事務五十年正月奏蘭溝行宮正月二十六日夜有賊進院外委張文俊往拏被

賊拒捕斫傷文俊帶傷獲犯見咨直隸督臣審辦 諭曰行宮重  
地賊人竟敢潛匿起意偷竊復敢拒捕傷官尤爲不法外委張文  
俊帶傷旋卽將賊拏獲甚屬可嘉著傳諭李奉堯如該外委傷痕  
平復卽送交總管內務府大臣帶領引見至賊犯旣經拏獲不必  
復解至保定交直隸總督審辦卽著李奉堯派委妥弁將該犯嚴  
行押解來京交內務府大臣審辦將此傳諭知之尋覆奏賊僅入  
張文俊住房院內並未進 行宮干總尹得利具報舛錯請將該  
員革職並自請議處報 聞五十一年十一月奏參內務府主事  
雙林保列一等承辦事務並不奮勉請 旨革職 諭曰雙林前  
經李奉堯保列一等今因該員怠玩卽行據實奏參並不迴護所



奏是五十二年三月署理直隸提督七月山東學政劉權之眷船  
至靜海縣被劫部議降調 上曰該處地方相近畿輔竟有此等  
肆行劫盜之事該管地方文武各員漫無查察非尋常失察疏防  
可比李奉堯署事未久且隨從熱河尙有可原著降三級從寬留  
任五十三年七月李侍堯在閩浙總督任內辦理臺灣軍務有功  
命賞還原襲伯爵 諭曰李奉堯自承襲以來並無過失今既將  
伯爵給還伊兄李奉堯著賞給提督銜宜倍加感激奮勉以副委  
任五十四年二月大名府逆犯段文經聚眾滋事緝捕未獲部議  
銷去尋常加一級免其降調報 聞三月卒 賜祭葬如例諡愼  
簡子毓文乾隆六十年正月因李侍堯前在雲貴總督任內與局

國朝通志卷之三十一

三

員通同偷減錢文革退伊子毓秀兼襲伯爵嘉慶元年十二月  
命毓文承襲見任三等待衛

右 國史館本傳

陳大紘

陳大紘陝西南鄭人乾隆十三年武進士授三等侍衛十七年三月發往福建以遊擊試用十二月補海澄營遊擊十九年四月改補漳州鎮標右營遊擊二十年九月調臺灣鎮標中營遊擊二十五年八月擢河南衛輝營參將三十七年四月擢湖廣黃州協副將三十八年定西將軍阿桂進攻金川奏請添調漢營官兵協勦諭署湖廣總督陳輝祖將湖北附近川省綠營兵內抽撥一千名料理前往於副將內揀派熟諳帶兵之人令其統領趨行十二月大紘帶兵赴川三十九年二月阿桂奏楚兵赴南路軍營聽明亮調用是月抵軍營明亮令守絨布七月參贊富德奏桂林調總兵

英泰辦理後路明亮分路時已將經練得力之人盡數帶往請將  
英泰爾辦軍營副將陳大紘爲人謹慎辦理後路尙能勝任 諭  
曰富德處得力將領頗少朕亦早爲念及英泰旣係熟手仍畱富  
德軍營幫辦一切因思哈清阿見在偕格宗一帶後路防守著卽  
令哈清阿前赴覺木納宗同副將陳大紘在彼加意防範大紘駐  
守卽車爾宗四十年八月帶川陝兵六百餘名赴丹東是月 上  
以桂林熟悉番地情形令選兵三百名迅速帶赴吉地駐守大紘  
隨往堵禦十一月檄赴北路大營隨明亮移營駐紮巴布朗谷四  
十一年正月明亮檄委大紘代辦湖南永州鎮總兵事務並總統  
湖廣官兵二月大兵四面圍攻噶拉依阿桂以金川卽日蕩平奏



酌撤湖廣官兵一千二百餘名令總兵仁和帶領起行檄大紘分  
領回楚尋部議楚兵赴川出境迅速各員并分別優敘得 旨陳  
大紘著紀錄三次四十二年九月俸滿引見得 旨回任四十三  
年十二月擢雲南臨元鎮總兵四十四年赴京 陛見四十五年  
正月元旦與太和殿宴四月回任五十年正月 陛見與千叟宴  
聯句 賞賚五十三年七月兩廣總督孫士毅奏安南國嗣孫黎  
維祈眷屬被土酋追殺叩關籲訴請 旨令雲貴總督富綱卽飭  
陳大紘孫起蛟於開化臨元二處與安南相接隘口多派弁兵巡  
防八月大紘奏臨元接壤外境祇有斗姆閣大石礮二汛曲嘴橋  
那黃渡金子河三卡離宣化興化自三四百里至七八百里不等

煙瘴僻徑原駐兵少今派兵三百名並酌添土練九十名委幹練  
員弁分撥協防仍親往督率操練遙爲聲勢 諭曰實力行之緣  
旗虛僞之習徒增己罪何益五十四年二月撤兵回鎮五月卒

右 國史館本傳

黃仕簡 子秉直

黃仕簡福建平和人由曾祖黃梧率眾投誠封一等海澄公准襲十二次梧子芳度復以闔門殉難准世襲罔替俱有傳仕簡於雍正八年襲爵乾隆九年引見諭曰海澄公黃仕簡著賞給資治通鑑康熙字典上用紬緞仍令回籍伊係功臣之裔朕深望其成立以繼家聲在籍之日勤勉學習閒至督撫衙門聆其教導俟可以來京效力之日再行奏聞請旨十六年上南巡二月在蘇州接駕請當差諭曰黃仕簡奏請當差情辭懇切甚屬可嘉然伊係公爵用以提督總兵方爲允稱但看來年紀未壯若在京賞給差務未免路途遙遠盤折多有不便著總督喀爾吉善再

爲教導學習俟才識堪以勝任之時奏聞請旨三月 賞戴花翎  
十九年授浙江衢州鎮總兵二十三年四月丁母憂二十四年  
命署湖廣提督軍門二十五年服闋實授九月調廣東提督二十  
八年調福建水師提督二十九年三月奏廈門商船雲集相沿索  
取陋規每船花邊銀一千五百圓不等督撫將軍提督及道府州  
縣中軍等官各有收受今據提督中軍參將溫泰開送清單事屬  
確鑿仰懇簡派大員赴閩徹底清查 硃批嘉悅之汝可謂知恩  
朕亦可謂知人五月 命尙書舒赫德等往訊尋奏督撫並無收  
受陋規事惟屬員代購物件屬實 上以仕簡所奏尙屬有因免  
議處八月調廣東提督三十一年調福建陸路提督三十三年



陸見命在乾清門行走復授其子黃秉淳爲藍翎侍衛三十四年以失察古田縣奸民蕭日安爲匪降一級畱任十二月調水師提督三十五年正月以浙江衢州鎮任內失察嘉興縣陸添餘傳習邪教降一級畱任二月奏漳浦縣民在詔安地方謠言惑眾拏獲匪犯蔡烏強等搜出偽劄據供漳浦下會村李阿閔與平和縣朱姓謀不軌阿閔給與劄付令糾夥見獲供出各犯臣隨赴漳浦詔安嚴拏餘黨 硃批好已調汝水師矣此次水師雲南出師者竟不堪已有旨諭崔應階及汝汝宜勉力整飭三月奏在梅子坑獲李阿閔審明該犯因貧苦起意糾人搶劫先約蔡烏強入夥輾轉糾集多人並捏造朱振興姓名希圖煽惑經漳浦縣獲蔡烏強阿

閩聞風脫逃臣親往緝堅供朱振興姓名係捏造並無其人見經督臣親提嚴訊疏入報 聞三十六年因福建省甄別年滿千總過少降三級留任三十七年六月疏言臣標五營每營額兵九百六十內前後二營戰兵各四百六十守兵五百與營制符合中左右三營全屬戰兵緣前任福建水師提臣萬正色於康熙十八年在湖南岳州帶戰兵三千來閩援剿海氛卽撥入提標中左右三營奏准仍給戰餉彼時爲憂遠涉積勞起見迨各兵陸續開除就閩召募應照例分別戰守方無岐異請將中左右三營戰兵照前後二營例減去戰額五百改爲守兵卽將各營內考技藝稍次者儘數改補如不足俟五營出有戰缺通融援補另募守兵足額議

行三十九年十月兵部奏降革處分奉 旨准開復四十四年十  
二月 陛見四十五年正月 上南巡扈 蹕出京 賞黃馬褂  
三月回任是年 恩詔加一級四十七年十月奏臺灣有漳泉二  
府人械鬪流匪乘機搶殺把總林審被戕親赴臺灣督拏 諭曰  
如此辦理方是此案關係重大黃仕簡一聞報卽帶兵渡臺查辦  
迅速完結自當交部議敘著傳諭黃仕簡卽督同將弁等勉力將  
首夥各要犯嚴拏務獲十一月 諭曰黃仕簡奏抵臺查辦漳泉  
人械鬪一案先後拏獲要犯多名恭請王命正法各於犯事地方  
傳首示眾尙有未獲各犯見在查拏務獲等語所辦甚好同日又  
據雅德奏到看來此案先後獲犯及辦理情形已有八九成未必

致更生事端但尙有未獲聚眾首夥要犯殺官重犯等見在曾否  
就獲並此外餘黨不可不儘行搜緝務獲以淨根株著傳諭黃仕  
簡楊廷樺徹底跟查將未獲各犯逐一擒獲永除後患四十八年  
正月奏先後拏獲臺灣械鬪刁民及殺害汎弁首夥要犯二百餘  
名分別置法臺灣甯帖 命交部議敘加一級 諭曰據黃仕簡  
奏督拏械鬪刁民及殺害汎弁首夥要犯先後共拏獲二百餘名  
見在民人並無再敢互鬪滋事臺灣所屬均屬甯帖等語所辦甚  
好已交部議敘矣此案未獲餘黨及焚搶流匪仍著黃仕簡楊廷  
樺上緊逐一嚴加捕獲審辦完結黃仕簡不可因臺地見已甯帖  
稍存將就了事之見旋奏遵 旨查臺灣府知府蘇泰於漳泉刁



民械鬪並不逮捕嚴懲輒出示諭和實屬姑息貽誤 諭曰漳泉械鬪一案前經雅德具奏稱該府蘇泰前往面加曉諭各莊民遵心服一摺朕卽慮及該府或竟不知事體輕重有央懇和息之事因諭令黃仕簡等查明據實奏參今據黃仕簡等查奏蘇泰果有勸和出示情事竟不出朕之所料是蘇泰罔顧大體姑息養奸非尋常玩延貽誤可比蘇泰著革職拏解刑部治罪二月奏會同臺灣道楊廷樺續獲械鬪人犯二百六十名見赴諸羅起事處嚴拏餘匪 諭曰據黃仕簡奏會同楊廷樺赴各莊連日搜捕前後拏獲各犯二百六十名將審明起意糾黨焚莊搶殺各要犯先行正法示眾見在漳泉人心帖服各屬甯謐等語所辦實屬可嘉已

於摺內批示矣臺灣刁民械鬪一案黃仕簡一聞稟報卽帶兵渡臺查辦將首夥要犯拏獲多人陸續審明正法地方甯靜辦理甚屬妥速前已降旨交部議敘著再給黃仕簡上用荷包以示嘉獎又奏訪聞鳳山縣屬小岡山地方有匪徒倡亂隨往搜查並無蹤跡嗣據該縣知縣徐英稟報盤獲形迹可疑之林弄陳虎二名研鞫並無證據諭曰諸羅彰化二縣奸民不法聚眾械鬪甫經嚴拏重治乃又有奸匪豎旗可見臺灣諸事廢弛刁風未息不可不嚴拏究辦從重懲治以靖海疆而安良善至所稱形迹可疑之林弄陳虎二名是誰見其可疑有何形迹如果審明此二人並非豎旗奸匪或卽應問此二人或素有仇人挾嫌藉端陷害嚴切開導

詢問從此跟究或可得實何以摺內全未奏及而但云毫無證據  
乎黃仕簡等查辦奸民聚眾一案甚爲妥速今審辦此事未免疏  
漏著卽督飭所屬勒限嚴拏奸匪豎旗之人務獲解究不得以查  
無蹤跡了事三月 諭曰據黃仕簡奏拏獲鳳山縣編造逆詞豎  
旗圖搶之首犯分別辦理一摺著交三法司覈議速奏至此案首  
犯陳虎等經鳳山縣知縣徐英因該犯形迹可疑卽行拏獲尙屬  
能事見在正有查辦之事未便令其引見著加恩加一級以示優  
獎俟該縣任滿調回內地時著奏聞請旨六月稽楊廷樺奏臺灣  
兵丁楊祐曾篤等因挾彰化縣民林文韜糾眾抵制夙嫌曾篤設  
計戕擒楊祐用刀剗瞎文韜右眼擬楊祐等罪如例 諭曰此案

兵丁楊祐曾篤屢次糾人挾嫌爭毆並用刀剗瞎林文韜右眼實屬兇橫不法且林文韜等素被兵丁欺凌希圖抵制該處小刀會卽由此而起是楊祐等實爲此案罪魁自應從重定擬乃黃仕簡等僅照尋常爭毆折傷人肢體者一律科斷殊屬輕縱黃仕簡楊廷樺著交部議處尋議銷去加一級免降調十一月奏訪聞臺灣淡水屬奸民林淡等焚燒斃命隔兩月營員未曾具報見將諱匿玩延之副將左英移督臣題參並囑鎮臣柴大紀到臺督辦 上是之十二月入 覲 賜雙眼花翎黑狐端罩四十九年正月命在御前侍衛上行走 上南巡仍扈 駕出京三月回任五十年正月與千叟宴五十一年正月因失跌請解任調理 諭曰據雅



德奏福建水師提督黃仕簡自上年失跌染患風疾乍痊乍發心神恍惚氣體虛弱一時恐難全愈已委福甯鎮總兵何俊前往廈門幫辦水師提督事務並據該提督具奏患病情形請解任調理等語黃仕簡久任水師提督經理妥協而查辦械鬪一案尤著勞績方資倚任今因失跌染患風疾朕篤廬念著賞給人蔘二斤高麗清心丸二十九御用大荷包一對小荷包二對用示恩眷並諭令該提督加意調養不必開缺以冀就痊至該提督宣力年久偶患風疾固不忍卽令開缺但海疆重任關係緊要若該提督在任總理營務仍不免勞勤精神朕心更有所不忍見在雅德已委何俊前往代辦水師提督事務廈門距漳州不遠該提督自揣於病

勢有益不妨與雅德商酌竟行回籍調理卽令何俊暫署提督事務並著雅德將該提督近來病勢如何曾否全愈迅速覆奏以慰懸注二月奏臺灣淡水同知潘凱赴貓裏社相驗中途被賊戕害並斃跟役十餘人見調官兵船隻軍火器械如係生番逞兇當力疾渡臺督剿 諭曰朕聞有黃仕簡五百里奏報恐伊病勢加劇深爲軫惻及披閱奏摺乃係此事轉覺慰幸但官員竟被殺害不法已極不可不嚴加究治係刁民謀害裝點生番形迹卽嚴拏首從各犯務獲嚴審確情立正刑誅毋使一人漏網若係生番所殺卽帶兵搜捕速拏正犯嚴辦以儆兇頑黃仕簡一聞信息卽欲力疾前往甚屬奮勉可嘉續奏接鎮道等咨報同知潘凱係生番殺

害卽督官兵渡臺進剿 諭曰福建水師提督黃仕簡於查辦生  
番一案一聞稟報卽力疾前往督辦實屬奮勉出力殊堪嘉獎著  
加太子太保銜以示優眷旋奏同知潘凱係被直加未南及目懷  
二社生番殺害臣渡臺後會同鎮道督兵分投剿捕先後殺獲兇  
番首級三十八中槍落崖身死者百數十業將二社巢穴剿洗  
諭曰生番膽敢戕害官役實爲兇橫不法黃仕簡等聞信後卽渡  
臺剿捕殲戮無遺辦理甚爲妥速俱著交部議敘旋議加一級九  
月奏請羅縣民楊功懋等兄弟因爭財起釁糾眾立會經臺灣鎮  
道飭屬查獲匪徒張泮等十四名石溜班汛把總陳和擊獲張烈  
解縣行至斗六門突被數十人持械奪犯陳和被戕卽督飭文武



員弁嚴拏據鎮臣柴大紀等報稱陸續拏獲首從各犯楊功懋等五十三名 諭曰楊功懋等覺起家庭膽敢私立會名結黨聚眾經把總陳和拏獲匪犯張烈復敢奪犯戕官實屬不法所有見獲之首從各犯楊功懋等五十三名著常青黃仕簡等審訊明確一面具奏一面將首要各重犯卽在該處正法示眾十二月臺灣逆匪林爽文滋擾黃仕簡奏帶兵由鹿耳門飛渡進剿 諭曰黃仕簡甫經病愈一聞匪犯滋事之信卽帶兵渡臺殊屬奮勉可嘉著賞給荷包等件以示優眷並著於辦理剿捕諸務外仍加意調攝勿過勞勩至賊匪么麼烏合黃仕簡到彼督率該鎮道盡力堵剿無難立就撲滅時陸路提督任承恩奏帶兵渡臺會剿 諭曰此



等奸民不過么麼烏合上年臺灣卽有漳泉二處匪徒械鬪滋擾等案一經黃仕簡帶兵前往督辦卽撲滅今林爽文等結黨橫行情事相等卽使該提督病後精神未能周到亦只可添派能事總兵一員協剿任承恩本不應前往今已渡臺亦不必拘泥回任務須會同黃仕簡分路夾攻以期剋日蕪功五十二年正月 諭曰昨據徐嗣曾奏稱黃仕簡到臺後礮打死賊匪二千餘人賊俱星散奔逃內山等語內山係生番巢穴賊匪被官兵追剿窮蹙逃竄或將所掠財物賄結生番容畱藏匿或恃其人眾脅制生番尤不可不預行籌辦見在水陸兩提督帶領多兵自當乘此兵力搜剿殲除勿令賊匪得以逃匿負隅又 諭曰黃仕簡抵臺迄今一

月有餘尙未據奏報剿賊消息卽待厚集兵力剋期進攻亦應將賊情隨時奏報乃目今總無消息所辦何事看來黃仕簡於剿捕事宜不能得力著常青卽速渡臺督同黃仕簡等剿捕旋奏臣於正月初四抵臺先督兵守禦郡城十二日金門南澳銅山等標兵續到遣海壇鎮郝壯猷率同副將丁朝雄等領兵往南路恢復鳳山又遣臺灣鎮總兵柴大紀率同參將潘韜等帶兵往北恢復諸羅彰化臣同臺灣道永福帶兵在南北處策應 諭曰前據常青奏彰化縣城久經陳邦光等收復其鳳山等處亦經柴大紀等分路剿捕郡城已無事矣何以黃仕簡摺內僅稱派委總兵等分赴南北二路進剿恢復縣城竟似該處情形全未知悉者看來黃仕

簡竟是安坐郡城並不親赴各該處督率勦捕大屬非是提督爲  
專閫大員領兵是其專責黃仕簡深受朕恩見帶兵勦賊雖係病  
後理宜奮勉出力乃於勦捕事宜奏報遲延全不得行軍要領該  
提督所司何事著傳旨嚴行申飭旋奏臺匪滋事其間迫脅隨行  
者不少經臣檄示民人凡被脅者速行解散 諭曰黃仕簡所奏  
非是此等辦法或因起事之初兵少賊多爲一時權宜之計則可  
若軍威壯盛自當趁此兵力蕩洗賊巢勿使轉圜餘孽若黨羽既  
散將來如何按名究辦況大兵一撤賊夥散而復聚豈不更煩兵  
力此皆平日伊等將就了事之見此次林爽文等糾眾滋事卽由  
從前姑息養癰所致今該犯等肆孽至此豈可不殲戮淨盡以絕



根株二月奏據北路總兵柴大紀克復諸羅林爽文潛回大里杙  
見在相機擒拏 上以其遷延觀望再行嚴飭又柴大紀奏仕簡  
派同剿賊之參將潘韜兵丁三百名畱駐郡城自衛 命常青查  
明據實奏參三月奏總兵郝壯猷見已克復鳳山南路岡山崙仔  
頂各處係賊藪臣飛遣官兵往捕又淡水之新園等處賊勢猖獗  
飛咨郝壯猷派兵往剿並令遊擊鄭嵩赴援查各路賊勢雖疊被  
官兵剿戮餘匪尙東徙西奔必須分頭剿捕除淨根株不遺餘孽  
諭曰黃仕簡奏報剿洗南路賊匪克復鳳山縣城一摺其所陳功  
案俱係罪案摺內旣稱南路之岡山崙仔頂等各處俱係賊藪勢  
甚猖獗自應一舉撲滅何不親率弁兵前往剿捕乃惟添遣官兵



飛檄該鎮將等進攻似此東堵西禦疲於來往適足爲賊所輕么  
麼草竊自然毫無顧忌日積日多至遊擊鄭嵩等分路進攻鳳山  
收復城池時伊仍安然坐守又不親往是誠何心又摺內稱官兵  
疊次剿賊餘匪東徙西奔四處皆有賊蹤等語黃仕簡並不親剿  
賊巢將首逆擒獲致賊夥蔓延團結乃尙稱除盡根株不留餘孽  
伊試自思數月之久所辦何事賊勢尙如此鴟張惟與任承恩互  
相推諉非伊二人貽誤而何尙靦顏爲此語乎黃仕簡任承恩始  
終貽誤緊要軍機其咎甚重必須拏問常青到臺灣後先將伊二  
人摘去花翎令其由北路回至內地廈門並著李侍堯於任承恩  
到後卽行委員解京黃仕簡留廈門候旨時新授閩浙總督李侍

堯渡臺灣奏南北兩路提臣互相推諉復命將任承恩革職拏  
問仕簡到廈門時一併傳旨革職旋李侍堯又奏仕簡駐守郡  
城不能督率剿捕以致賊匪嘯聚諭曰本日李侍堯奏到並鈔  
錄海防同知楊廷理原稟據稱賊匪滋事以來大兵僅屬固守皆  
以兵單難於遠捕爲辭黃仕簡駐守郡城致賊匪嘯聚等語昨經  
降旨將任承恩革職拏問尙以黃仕簡年老有病僅令革職撤回  
內地今伊等如此遺誤則二人厥罪維均黃仕簡亦難稍爲寬宥  
著李侍堯一俟黃仕簡回廈門著傳旨一併革職拏交刑部治罪  
四月常青奏臣到臺灣遵將欽奉上諭付仕簡閱看並詢以剿  
賊機宜仕簡言語不清步履艱難病憊屬實接見在城員弁訪問

見在賊勢與該提督等從前咨報迥殊請將仕簡等治罪 諭曰  
昨已降旨將黃仕簡撤回內地俟伊到廈門時著李侍堯卽傳旨  
將伊一併革職拏交刑部治罪若論黃仕簡任承恩遺誤緊要軍  
務之罪均應按律卽行正法但念黃仕簡年老又係病後且伊從  
前辦事尙屬勉受恩最久所有公傳係伊祖所立功績自應承  
襲卽照黃仕簡從前原奏令伊長孫黃嘉謨承襲六月 諭曰臺  
灣逆匪林爽文糾眾滋事黃仕簡駐守郡城任承恩安坐鹿仔港  
僅派委將弁等零星打仗彼此觀望遷延以致賊匪日久未能撲  
滅遺誤軍機較郝壯猷之遇賊退避棄城潛逃者厥罪維均本應  
一體賞以重典因念黃仕簡年老患病且伊從前辦事尙屬奮勉



受恩最久是以貸其一死未卽在臺灣一律正法僅令常青將黃仕簡革職孥問解赴行在今據常青等委員將仕簡解到令軍機大臣訊問伊供認各罪情甘重典但供詞尙有支吾狡展避重就輕難以憑信之處已降諭旨令常青藍元枚等查明據實覆奏黃仕簡著交刑部嚴行監禁俟常青查明到日若伊二人既貽誤於前又復巧飾於後是卽不知朕恩仍應照律治罪十月 命大學士九卿等會同嚴審定擬具奏尋奏黃仕簡業將貽誤軍機自行供認不諱請依統兵將帥致誤軍機例擬斬立決奉 旨從寬改爲應斬監候秋後處決十二月 諭曰本日句到朝審官犯內黃仕簡究係老年抱病一聞逆匪滋事之信卽力疾渡洋猶知以公



事爲重其按兵株守漫無籌畫實由老病昏憤尙非出於有心是以姑從寬典免其句決但溺職辜恩致逆匪負嵎猖獗該處兵民受戕者不少今剿捕事務尙未完竣皆伊之罪茲雖曲加恩貸已屬格外從寬未便卽行釋放黃仕簡仍著革職監禁五十三年二月諭曰前年臺灣逆匪滋事黃仕簡因循延玩貽誤事機覈其情罪本應按律正法但念伊祖父世有勞績而黃仕簡向來辦事尙屬奮勉此次帶兵渡洋因循玩誤究因老病昏憤尙非出於有心是以上屆朝審句到時從寬免其句決見在臺灣已屆歲事黃仕簡著加恩釋放飭回原籍閉門靜居思過以示法外施仁至意五十四年卒於家子秉清乾隆三十一年授藍翎侍衛三十八年

授江南督標中營都司四十四年擢湖南沅州協副將四十八年  
二月 諭曰福建提督黃仕簡之子黃秉淳見任湖南沅州協副  
將平日於營伍諸事是否能畱心整飭量其才具將來堪勝總兵  
與否之處著傳諭舒常秉公據實覆奏 諭曰據舒常奏黃仕簡  
子秉淳氣體薄弱步箭騎射未能出色是以從優保列三等又稱  
總兵大員有整飭將弁之責不僅以本身技藝爲長若以黃秉淳  
辦事才具將來尙堪勝總兵之任等語所奏兩歧不無觀望之意  
殊屬非是仍著傳諭舒常究竟黃秉淳平日辦事若何是否能勝  
總兵之任並見任沅州協副將是否不形竭蹶令其另行詳悉覆  
奏七月 諭曰前據舒常覆奏沅州協副將黃秉淳於訓練操防

各事宜俱能實心辦理營務亦頗整飭其才具尙可勝總兵之任等語仕簡之子黃秉淳才具既可勝總兵之任自應給咨送部引見見在黃仕簡奏請陞見已令其於臘底到京黃秉淳亦應於彼時來京可以順便見伊父仕簡隨傳諭舒常屆期給與黃秉淳咨文令其於十二月到京引見將此諭令知之四十九年擢河南南陽鎮總兵五十年調江蘇狼山鎮總兵五十一年卒 諭曰據李世傑奏狼山鎮總兵黃秉淳病故黃秉淳係黃仕簡長子今患病身故黃仕簡聞之自必傷感但修短有數亦屬無可如何且黃仕簡病愈未久亦不可過於悲悼勉自節攝以慰廬注著賞給黃辦天荷包一對以示體卹至黃仕簡辦理海疆甚屬出力所有公爵

應令何人承襲之處著黃仕簡自行酌量或於伊諸子中選擇一人或令其長孫承襲均聽黃仕簡之便酌定具奏朕當俞允也奏准以長孫嘉謨承襲五十五年兵部帶領引見奉旨黃嘉謨著在頭等待衛上行走嘉慶四年五月命爲散秩大臣十月授浙江温州鎮總兵

右 國史館本傳

乾隆五十三年春臺灣逆匪林爽文等平 天子賞功黜罪一一視諸臣所應得者以昭 國典前太子太保福建水師提督一等海澄公黃公以緩師獲重譴 皇上念其先以病軀莅事素著勞績 恩命回籍越一載夏五月考終於家公之家孫襲封海澄公



嘉謨諸子中書混通判秉哲生員湘等以公閉門思過感愧時深  
遺命勿從厚葬勿乞誄銘惟令世世子孫咸誌生成異數是以行  
狀墓誌俱無聞焉夫獲罪之餘不敢復稱前功者臣子愧懼之思  
也受 恩之至必將圖報於後者合存沒有同情也無已則紀公  
之厚遇以明報稱未盡之志迺爲作家傳公諱仕簡字立齋先世  
自忠恪公膺公爵暨忠勇王忠襄公襄愨公溫簡公世篤忠貞傳  
之 國史載於家乘茲不復述公爲治中諱應縣公子雍正八年  
蒙 世宗憲皇帝命嗣溫簡公後襲海澄公爵時方十歲卽感激  
自勵不敢稍有弛縱 皇上御宇之九年初入 覲 聖主眷念  
忠裔 賜御批資治通鑑康熙字典及 上用緞匹奉 旨慰諭

回籍勤學以期成立公歸卽以立齋銘其室且以爲字示不忘

聖訓也乾隆十六年春 聖駕南巡赴江蘇迎 鑾蒙 召見疊

頒克食 賜花翎貂皮緞匹筵宴公之叨 恩於龔爵之時者已

如此十九年奉 命鎮衢州是冬 陛見 賜克食珍品鞍馬二

十二年 翠華重幸浙江總理景亭橋梁道路 大閱陸操諸務

賞賚優渥三月內卽 命提督江南軍務二十四年 命提督湖

廣軍務二十六年 命提督廣東軍務二十七年 陛見蒙 賜

御書福字疊頒克食珍錯二十八年奉 命調任福建水師提督

二十九年復奉 命提督廣東軍務三十二年奉 命調任福建

陸路提督三十三年 陛見 賜乾清門行走長子秉淳 恩授

侍衛在京效力三十九年及四十五年冬俱 陛見 恩賞優渥  
四十六年春扈 蹕南巡江浙 賞黃馬褂途次壘 賜筵宴  
錫賚駢蕃四十八年冬 陛見 賜御前侍衛上行走並賞雙眼  
花翎元狐端罩四十九年春隨 駕至江浙 臨幸錢塘江 大  
閱福建水師 御製詩章獎勵四十九年冬赴京五十年正月預  
千叟宴 賜鳩杖朝珠緞匹等物公之叨荷 恩榮爲獨至矣是  
年十月公以失足致疾據實入告奉 旨以公宣力年久不忍卽  
令解任但海疆重地在任綜理營務仍不免勞勤更有不忍因令  
委員暫署辦理五十一年正月適有淡水同知被兇番殺害重案  
公仍力疾渡海查辦由驛奏 聞方公以 天自陳後 皇上時加

脊念迨聞海澄公有五百里驛遞至 聖意慘然 覽奏知爲生  
番事則彌加憫恤時公長子秉瀄已在江南狼山鎮總兵官 命  
馳驛渡臺省親並 賜人蔭二斤高麗清心丸一匣公具摺陳謝  
御批忠誠之意溢於言表但願汝速痊照常辦事也欽此公跪誦  
感泣至不能起立期治兇番事竣奏 聞 恩加太子太保回廈  
後病未全痊仍勉視軍事遣長子秉瀄回狼山鎮是年秋秉瀄卒  
奉 上諭據李世傑奏狼山鎮總兵黃秉瀄於閏七月初間染患  
齒痛足腫八月愈甚兼又氣喘於二十一日病故等語黃秉瀄係  
黃仕簡長子今患病身故黃仕簡聞知自必傷感但修短有數亦  
屬無可如何且黃仕簡病愈未幾亦不宜過於悲悼勉自節攝以



慰廛注並著賞黃辦大荷包一對小荷包二對以示體恤至黃仕  
簡辦理海疆事務甚爲出力所有公爵應令何人承襲之處著黃  
仕簡自行酌量或於伊諸子中揀擇一人或奪其長孫承襲俱聽  
黃仕簡之便酌定具奏朕自當俞允也欽此隨遵 旨覆奏以秉  
涇長子黃嘉謨請襲公爵奉 旨允行而先是三十一年六月公  
於提督福建陸路任內奉 恩諭改承襲公爵十二次爲世襲罔  
替此則 深仁厚澤尤臣子夢想所不到者千古主臣之契罕有  
倫比公雖病義不容他諉適十一月臺灣逆匪林爽文等聚眾作  
亂戕官踞縣公聞變立奏報赴臺咨會制府酌調官兵先帥本標  
兵登舟渡海值東北風盛發鼓舩駛行除夕抵澎湖明日五十二

年正月初一連朝風浪大作日焚香祝海神幸初四日抵安平入港公未抵臺之先賊攻城者數矣臺郡環竹爲城兵少力乏守者幾於難支自公至扶病激勵官兵義民人有固志槍礮火器齊張賊遂不敢薄城下次日公卽欲親馳北路剿賊緣官兵未集臺鎮道及士民籲公暫捍危城以固全臺根本乃先遣臺灣海壇二鎮一赴北路克復諸羅縣一赴南路克復鳳山縣當是時賊出沒無常旋散旋聚公憤甚議就臺急募義勇數千人以滅賊而倉庫匱乏號召無資陸路提督同時率兵東渡由北路應援又爲賊阻不果至焦急愈甚病勢愈加所不敢於此時據實馳告請代者懼貽憂於君父且勢不及待也公尙冀勉力支持往南北二路盡殲

羣醜而不知 天兵迅速 皇上已料提鎮諸臣緩不及事 特  
簡重臣以張如雷如霆之威而膚功立奏矣公於是時奉 旨解  
任自謂罪大必無可追迺荷 聖主曲賜矜全於五十三年臺郡  
平定後 恩命回籍感切再生日惟有持佛號祝 聖壽無疆而  
已次年疾愈甚夏五月考終臨終囑諸子澁秉哲湘等及長孫嘉  
謨曰吾家世受 國恩吾感沐 聖慈天高地厚俯賜矜全今已  
不能圖報汝子孫其各奮勵矢志承家報國無負吾志又囑曰吾  
獲罪之人功不足以補過汝等體吾愧志勿從厚葬勿乞諫銘以  
爲人臣負 主恩者戒言訖而逝公生康熙六十年十二月初八  
日酉時卒乾隆五十四年五月初一日寅時享年六十九歲葬某

論曰公嗣爵六十年莅官三十四年內行外績班班可考自江浙楚粵以逮十閩頌功德者眾矣最著者於閩奏革廈門海口陋規於粵平黎匪黎天喜破獲潮州至安南界三起海洋大盜曾德度李阿三等於閩擒漳浦逆首盧茂詔安逆匪李阿敏浦城奸僧覺圓古田奸民蕭日安及臺灣漳泉人械鬪劫奪諸眾至淡水同知被兇番殺害一案公已以病入告力疾渡臺剋日蒞事不以署辦有人稍存自愛之意此皆 聖主所深眷者何以不載曰公志也人臣受非常之遇宜力報 主不足以稱功不幸事機乖違萬死莫贖喘息餘生皆恐懼修省之日也噫推此志也可以傳公也已

右家傳蔡新撰



國朝耆獻類徵初編卷二百九十二目錄

將帥三十二

剛塔

積福

馬鎮國

羅江燾

普爾普

海祿

尹德禧

舒濂

劉鑑

奎林



國朝耆獻類徵初編卷二百九十二

通奉大夫前署江西巡撫江西布政使司布政使湘陰李桓輯

將帥三十二

剛塔

剛塔滿洲正藍旗人姓烏濟克忒由前鋒委署筆帖式從征準噶爾回部有功授雲騎尉世職乾隆三十年授直隸岔道城守備三十一年擢多倫營都司三十八年擢秦甯鎮中營遊擊三十九年九月隨大學士舒赫德勦平山東臨清逆匪王倫有功山東撫臣楊景素奏畱東省補用十二月署萊州營參將四十一年四月奉旨賞戴花翎十一月調補撫標中軍參將四十四年遷文登營副

將尋擢直隸天津鎮總兵四十六年四月擢直隸提督四十七年  
四月兼署 東陵總管內務府大臣馬蘭鎮總兵七月奉 旨常  
青著署理直隸提督剛塔著以提督銜管理馬蘭鎮總兵兼總管  
內務府大臣十月仍授直隸提督兼署馬蘭鎮總兵四十八年正  
月 諭曰剛塔不必兼署總管內務府大臣四十九年正月調陝  
西固原提督四月二十二日奏甘肅鹽茶廳小山逆回田五等聚  
眾滋事攻破安西州城堡 諭曰甘肅逆回新教自前歲大加懲  
創之後田五各逆等復敢自起新教糾夥聚眾甚至傷害百姓攻  
破城堡不法已極自係前因人數眾多搜捕未盡所致卽應迅速  
剿捕以靖地方二十五日奏賊在山波溝店子一帶劫掠一面飛



咨督臣李侍堯派兵堵禦帶兵二百名馳赴追擊 諭曰據剛塔所奏見在賊匪不盡竄匿山內尚有逸在他處滋事者與李侍堯所奏情形不符固原鹽茶廳一帶回民較多賊匪既竄往雞窩山等處恐有潛相煽動糾約入教情事該督等務宜迅速帶兵堵截擒拏剿捕淨盡二十九日 諭曰剛塔前經奏報由固原起程追躡賊蹤見在該提督究至何處曾否遇賊擒殺何以日來未據奏報著傳諭該提督卽將追剿擒捕情形迅速馳奏五月初一日李侍堯奏剛塔帶兵迎剿斃賊四五十名親射死騎馬賊目一受箭傷一處得 旨剛塔奮勇殺賊受傷殊屬可嘉著加恩賞給御用玉韞並賞給大小荷包用示獎勵仍著交部從優議給世職以旌

勞勇初五日奏於浪山剿賊首逆田五傷重自殺餘賊竄往官川  
見在帶領甯夏涼州二鎮官兵追剿報 聞初九日奏於郭城驛  
詢知賊回占據頭寨子黑莊子等處卽派兵迎擊賊踞馬家堡見  
同甯夏總兵吉爾泰涼州總兵蘇靈阿於要路防堵 諭曰據剛  
塔奏賊眾占據馬家堡黑莊子兩處與經略李侍堯昨日奏到情  
形相同賊匪雖見據山上官兵已繞溝前進然則既入山中四面  
堵截如釜底游魚株守空山食盡自斃但當嚴密堵截防其別尋  
路徑逃逸見在西安及甘州甯夏各處官兵俱已齊集兵力旣厚  
自可設法四路會剿堵截去路無難剋期撲滅十四日奏官兵圍  
困馬家堡遙望賊營周而細察方知均係木棒撐罩衣帽全夥業

經翻山竄逸見在踞蹤追趕於馬家灣拏獲賊屬多名據稱賊回已往安定及蘭州會甯等處卽督兵追剿 諭曰據剛塔所奏總不成話賊人困守馬家堡官兵圍攻紮營自必相距不遠剛塔等非瞽目之徒何至賊人詭設人形熟視無覩至今乘閒遠颺李侍堯剛塔俱著傳旨嚴行申飭復 諭部停其議敘十五日奏賊匪自初四日由馬家堡夜遁於初六日追至馬家灣賊已先竄西鞏 諭曰賊匪不過四五百人旣已困守馬家堡剛塔帶兵數千名在彼剿捕乃一味怯懦無能又不知嚴防去路以致賊人乘夜潛逃肆行劫掠尙復有何顏面若再不努力向前剿滅賊匪淨盡其罪更不可問十七日奏追賊至馬營街督兵奮擊斃賊四十餘名斬

首級二十五 諭曰剛塔奏初九日在馬營街剿賊一摺看此光景較前稍有起色但賊見既遁聚馬營街剛塔俞金鼈圖桑阿等所帶之兵俱已齊集自應各領將弁分布前後左右將賊人四面合圍併力進攻方能一舉集事盡數殲除不致仍前翻山逃竄乃閱摺內該提督等仍會集一處並不籌算及此若復致賊人翻山而遁更屬不成事體著再傳旨嚴行申飭時李侍堯奏賊回餘黨復竄據石峯堡西安副都統明善剿賊陣亡 上以李侍堯剛塔屢次失機 命大學士公阿桂尙書福康安馳往督師未到之先著護軍統領五岱總理軍務 諭曰剛塔率領各處官兵不下數千名軍勢不爲不盛而馬營街石峯堡俱係通渭縣地方相距又



不甚遠何以剛塔由馬營街一路追賊而於通渭縣城失守之處  
竟毫無策應且副都統明善於石峯堡遇賊打仗亦以單軍失利  
中矛陣亡剛塔亦並未派兵救援近在一縣之內彼此音信隔絕  
其故殊不可解著阿桂福康安到彼時細查當時實在情形如果  
有貽誤之處卽行奏參二十五日奏固原州報提標兵丁馬如林  
馬如海皆新教回民卽拏交按察使陳步瀛審辦 諭曰剛塔縱  
令賊人竄逸以致到處聚集滋事肆行無忌該提督此時尙有何  
面目覩然身列戎行至伊所奏拏獲兵丁馬如林馬如海俱係新  
教回匪旣係新教卽當正法何必解交地方官行軍之時豈可拘  
例若是乎二十四日奏賊匪旋散旋聚見在鹿鹿山紮營又於附

近通渭縣城伏羌等處屯踞與石峯堡之賊互相聯絡再訊據獲賊吳全供賊眾踞石峯堡後商議搶奪通渭伏羌秦州潼關等處以斷文報 諭五岱等曰本日據剛塔奏見在賊匪情形內稱擊獲賊人吳全據供有聞得賊眾商議搶奪通渭伏羌秦州潼關等處以斷文報之語此供斷不足信賊匪聚眾滋事伏羌秦州一帶回匪素多或思竄往該處爲勾結接應之計尙爲情事所有至潼關遠在西安省城之東諒此草竊技倆豈敢離其巢穴不畏官兵迎截剿殺徑至潼關之理此必係賊人故爲散播謠言希圖煽惑眾心此等匪徒一經擊獲剛塔等原應嚴密審鞫訊明後卽行正法何得於軍營眾廣之地任其信口混供此時賊勢蔓延皆剛塔

疏縱之罪今於審訊賊人又全不小心詳慎剛塔何不曉事至於此極又據奏稱賊匪旋散旋聚見在鹿鹿山紮營數處約有數千人又於附近通渭縣伏羌等處紮營與石峯堡之賊互相聯絡等語既紮營數處何不帶兵奮勇單剿其一營別令截其來援之賊此或一法也徒擁兵坐視以待其翻山而逃乃引兵尾追其後而又不及尙復成何事體有如此用兵之理乎附近通渭伏羌等處紮營又係何項賊匪何以李侍堯等節次摺內均未奏及伊等竟係張皇失措一味怯懦遂至漫無主見任聽賊匪妄供輒信爲實再傳諭五岱等務宜遵照前旨於官軍見紮營盤處所倍加小心防禦並當設法緝拏回賊送信之人以斷其互相聯絡之勢但盤



獲後當密訊供詞迅速正法不可又如剛塔之拘例審辦二十六日諭曰剛塔於賊匪竄入馬家堡時並不堵截後路縱賊潛逃復札會總督輾轉耽延迨賊遠颺始帶兵尾追以致賊人四出勾結日益滋蔓擾害地方且於賊人攻破通渭縣城及至石峯堡肆行紛擾之處毫無策應失機債事其罪更無可追剛塔著革職拏問解交刑部治罪六月十五日福康安至靜甯奉命革剛塔職解交刑部治罪尋劾其種種遺誤罪無可追得旨命畱京王大臣會同大學士九卿科道覈議定擬具奏上諭福康安曰近來五岱李侍堯剛塔等數次剿賊頗有起色伊等自必商同辦理但究係何人主意爲多著福康安秉公詢訪確實不可稍存袒護阿



桂福康安合奏剛塔帶兵剿賊射賊受傷追至狼山馬營街殺賊數百餘名田五傷重自戕其時餘賊不過八九十名使剛塔奮勇追剿卽可及早完結乃馬家堡爲賊所詭致令翻山逃逸各處賊眾四出滋擾雖竭力尾追其毫無籌畫以致賊勢蔓延剛塔亦不能無罪奏入經大學士九卿會奏定擬剛塔照玩視軍務律斬決得旨剛塔本係武夫有勇無謀甫到固原提督之任卽值逆回起事不能先期覺察及賊人竄聚馬家堡時剛塔在山前紮營不思設法堵截後路致墮賊計迨賊已潛逃又不能繞出邀截惟知在後尾追予以重辟亦係罪所應得但究係甫經到任未悉地利時各路官兵尙未到齊伊所帶之兵不過數百尙能殲斃賊首田

國朝正史卷之三十三

六

五並於馬家灣殺獲賊人家口牲畜且身受箭傷覈其情罪尙可  
量從末減剛塔著免其死罪發往伊犁效力贖罪以觀後效五十  
四年閏五月卒

右 國史館本傳

積福

積福克勒特氏蒙古鑲黃旗人乾隆五年由親軍投藍翎侍衛七  
年升三等待衛十三年命在乾清門行走二十年三月升二等  
侍衛六月升頭等待衛二十一年擢御前侍衛二十二年授正  
紅旗蒙古副都統二十三年正月命帶領侍衛扎拉豐阿等往  
西甯辦理青海事務諭曰去歲進剿額魯特餘黨分路逃竄近  
據阿里衮奏稱沙喇斯瑪呼斯賊人俱逃向愛什瑪山之東南察  
其蹤跡應在呼爾塔克山羅布諾爾等處藏匿羅布諾爾與噶斯  
相近可通青海或賊人逃往彼處亦未可定特派積福等與副都  
統德爾索青海郡王索諾木丹津貝子納木扎勒車凌等會同辦

理積福等至西甯德爾索卽同往青海令索諾木丹津派兵一千聽候調遣仍派熟識路徑兵丁交扎拉豐阿等帶往噶斯一路跟尋賊人蹤跡二月奏稱前至烏蘭和碩值索諾木丹津巡卡未回因與納木扎勒車凌商議卽飭傳派兵丁一千名齊集札噶蘇臺諭曰前諭酌量派兵不過豫備賊人闖入並非卽應起行今當春令牲隻疲瘦之際將兵馬指定處所齊集一處不得覓廠牧放勢必愈加疲瘦且亦苦累蒙古人等此皆積福等未悉朕旨辦理錯誤所致積福奉到此旨毋庸傳集兵丁卽令在各游牧豫備量給扎拉豐阿等兵丁前往偵探如無賊人蹤跡此兵卽可不用三月奏稱奉到 諭旨卽傳諭索諾木丹津令其散遣據稱若盡行撤



回恐倉卒難於調發酌將近地者散遣遠道者仍在烏蘭等處駐劄水草甚佳並無勞苦 上嘉允之十一月奏稱孟固勒津部勒烏爾津策塔爾扎烏土百戶吹塔爾等交納馬匹銀兩至青海之伊瑪圖地方爲郭羅克賊匪劫奪已咨四川總督查辦台吉納木錫哩等四扎薩克因避郭羅克賊匪棄其舊游牧內徙得 旨郭羅克賊匪行劫積福旣咨行川省開泰自必查辦至納木錫哩等四扎薩克應各居舊游牧何得遽行內徙著積福曉諭青海扎薩克等令其退居舊游牧於郭羅克經過要路設卡防守遇賊擒剿俾知儆惕又奏青海今歲雨澤透足水草豐美牲畜肥壯 命曉諭眾扎薩克挑馬二十匹按數給價解赴肅州二十四年 命爲

駐藏辦事大臣二十六年 召回京二十七年正月奏衛藏北沿邊一帶西自阿哩起東至喀喇烏蘇安設十三臺站乾隆二十三年將軍伯伍彌奏裁經軍機大臣等議以見值進兵葉爾羌喀什噶爾防逆匪竄越令照舊設俟應撤時再奏今大功告蕪外夷安靜實與內地無異復據噶隆公班第達等呈稱準噶爾葉爾羌等俱蒙 聖化安享太平衛藏臺站可無庸設但撤後各處邊界仍令稽查今酌議嗣後嚕托克齊木納克藏騰格哩諾爾等處交本處第巴頭目等每年派人巡察穆什哲爾根琿噶哩瑪爾阿哈雅克等處每年於棟科爾達木之蒙古官各派一員巡察將原設臺站裁撤得 旨嘉獎二十八年調鑲藍旗滿洲副都統尋調正

紅旗滿洲副都統二十九年授歸化城副都統三十一年七月奏稱喜峯口監督兼理歸化城牲畜稅務未免鞭長莫及請由理藩院派章京一員駐歸化城辦理又疏言歸化城旗民雜處事務繁多若統歸綏遠城將軍辦理轉多掣肘請 頒給副都統印辦事較爲簡易均如所請行八月調察哈爾副都統十月 諭曰土默特蒙古伊犁策楞爭控施捨廟宇地畝一案朕因積福始由副都統來京命軍機大臣詢問據稱伊犁策楞如何在將軍前呈控及將軍如何辦理之處俱未聞知將軍行交達部亦未由歸化城轉行等語看來各省將軍竟有蔑視副都統之意各省駐防設立將軍副都統原爲諸事以將軍承辦副都統協辦副都統如不循分

與將軍爭執妄爲將軍卽當奏參將軍如蔑視副都統諸事自行專主副都統亦應據實陳奏嗣後各省將軍副都統等必須和衷共濟凡請安奏事俱令副都統列名將軍固不可蔑視副都統副都統亦不可任意與將軍爭執三十三年調熱河副都統尋命爲科布多參贊大臣三十六年正月 召來京授鑲紅旗滿洲副都統兼署鑲藍旗護軍統領二月烏梁海副都統莫尼扎布總管塔思哈互相構訟 命偕領侍衛內大臣巴圖濟爾噶勒往訊尋還京署正紅旗護軍統領七月奏稱汗哈屯等處有鄂羅斯之烏梁海潛赴耕種恐易滋事請將三年稽查一次改爲每年稽查一次 上允之九月調鑲黃旗滿洲副都統尋署理藩院侍郎三十



七年四月授鑲黃旗蒙古都統六月署理藩院侍郎三十八年署領侍衛內大臣三十九年命往辦理策伯克多爾濟游牧事四十年召來京四十三年調鑲紅旗蒙古都統四十九年授察哈爾都統九月授綏遠城將軍五十一年調甯夏將軍五十二年入覲以年力衰邁畱京尋授正白旗蒙古都統五十四年二月原品休致閏五月卒

右 國史館本傳

匡見者及列作不辨

卷二十一

馬鎮國

馬鎮國甘肅固原州人由行伍於乾隆十年考補陝西提標左營經制外委旋授右營把總十三年隨征金川赴孫克宇地方防堵進攻昔嶺冒雪衝殺受石傷節次奪碉卡數十處擢千總事平列一等議敘二十六年升涼州鎮右營中軍守備三十一年升都司三十四年升甘肅提標遊擊三十六年小金川土舍僧格桑滋事陝甘總督文綬以鎮國曾經打仗出力令剋期赴川進剿三十七年正月抵資哩寨二月攻克資哩寨阿克木雅山梁奪碉卡十餘處六月調赴車布德北山梁攻克美美卡並卡旁大碉數處殺賊多名生擒賊一名七月攻色渠克其大寨及周圍碉卡數十處九

月因賊逃竄撤赴資官寨攻兜烏山梁及色布龍角山梁皆克之  
以領兵奮勇保列超等功奏入 賞戴花翎十一月攻克明郭宗  
山梁十二月克得兒寨燒燬賊寨十餘處生擒賊七名獲牛羊口  
糧軍械無算進攻美諾復攻克之賊首僧格桑竄布朗郭宗鎮國  
隨參贊大臣豐昇額帶兵進剿獲小金川頭人虎兒及土舍安堵  
兒進攻底木達大寨擒僧格桑之父澤旺僧格桑竄入大金川鎮  
國復從豐昇額進剿三十八年屢攻達爾圖大礪未克三十九年  
隨陝西提督馬彪冒雪攻奪橫互山梁七處四十年進攻得楞一  
帶礪卡克之列超等功復攻斯年木咱耳槍傷右卵四十一年凱  
旋四十二年擢陝西宜君營參將旋授陝西潼關協副將四十六



年甘肅撒拉爾逆回蘇四十三等滋事進逼蘭州陝西巡撫畢沅以鎮國久在戎行令就近調兵由西安前赴四月抵蘭州軍營檄赴河州所屬劉家峽屯紮截賊後路九月收復河州授四川重慶鎮總兵 命赴新任查辦咽喉賊匪四十七年拏獲咽喉匪父隆等四十八年劾右營千總曹福壽久病不痊借餉不繳偽捏名姓置產營私福壽亦砌詞具控四川總督李世傑奏請解任嚴審尋以福壽所控各款屬虛復任四十九年領年班番子入 覲五十年正月 命赴干叟宴 賜壽杖貂皮朝珠大緞玉如意 諭令仍帶領年班番子回任五十四年卒

右 國史館本傳

168-290

11

168-290

羅江鱗

羅江鱗湖南桃源人由武舉分發貴州以千總用乾隆三十三年補撫標右營千總三十六年十月奉調隨征金川十二月隨大兵攻斑斕山及斯當安獲賊碉三十七年正月攻北山梁獲賊卡二又克石碉二數月內先後經二十三戰多斬獲復於資哩寨等處進剿戰功列超等者三 恩賜藍翎六月隨攻美美寨賊番於碉旁掘深溝外築厚牆官兵從旁繞過仰攻江鱗領兵接應克之三十八年正月擢朗洞營右軍守備三月隨攻達札克木城江鱗奮勇撲入奪西嶺第五碉負重傷九月補上江協都司十月參贊大臣海蘭察由北山梁進攻色木寨等處江鱗奪碉卡十八遂獲兜

烏山八角礮占固地十一月復由大板昭收降番四百餘三十九年正月隨大兵進征大金川攻克谷噶了口力戰二月攻羅博瓦寨獲木城一擢銅仁協遊擊六月攻色湖普遜克爾宗日爾等處焚賊寨百餘功列超等又由格隆古奪險追殺直抵大河與北路日旁官兵相應四十年正月攻克空薩爾山殺賊數名獲軍械無數四月補元江營參將十一月攻科布曲克之十二月攻西里山梁克之又克則朗噶克了口等處四十一年二月大兵進攻噶拉依獲賊酋索諾木大功告成江鱗隨征數載身經百餘戰屢被重傷 上嘉其勞績 賜銀二百四十兩擢騰越協副將四月署臨元鎮總兵敘平賊功 恩賜花翎四十二年五月調補龍陵協副



將四十四年十月授鶴麗鎮總兵四十六年七月赴京 陛見  
恩賜銀百兩命赴甘肅隨剿逆回六月用火攻賊卡撲入賊營賊  
窮蹙走保華林山山險絕賊倚大佛寺爲巢窟四面累木石拒守  
官兵攻圍之斷其汲道賊無所得水因欲突圍出輒擊殺之江鱗  
駐山後防守水道旋率所部兵奮勇登山焚其寺逆回走匿寺後  
搜獲之餘黨就殲凱旋 諭令仍回本任先是逆回於華林寺山  
後盜水部議江鱗防範不嚴應降三級 上特宥之五十五年正  
月卒 諭曰羅江鱗從前出師金川打仗出力茲因傷病交發在  
署身故情殊可憫著照從前總兵劉倬之例交部議卹給與千總  
恩廕以示朕軫念前勞之至意尋議卹如例入祀昭忠祠子愛襲

國史館本傳

千總

右 國史館本傳

普爾普

普爾普蒙古正黃旗人姓額爾特肯父巴圖濟爾噶爾本額魯特人乾隆十九年以都爾伯特部宰桑來降入正黃旗蒙古隨征四部於和闐立功官都統自有傳普爾普由閒散於二十九年授藍翎侍衛在乾清門行走三十三年正月遷三等待衛二月隨征緬甸三十六年七月擢御前侍衛尋授公中佐領三十七年九月命領額魯特兵赴金川西路軍營交定邊右副將軍溫福委用十一月大兵攻取達克蘇賊礪普爾普奪據山卡斷賊來路十二月隨參贊大臣豐昇額攻明郭宗賊棄礪遁奉旨溫福一路派普爾普爲領隊侍衛尋偕頭等待衛巴雅爾攻克明郭宗南寨賞

副都統職銜三十八年正月進攻噶爾拉取道了口盡占賊番卡  
寨得 旨褒獎三月攻昔嶺偕副都統海蘭察等力戰克要路賊  
碉二 諭曰此次官兵不避槍石盡力攻剿均屬可嘉其中海蘭  
察額森特巴雅爾烏什哈達普爾普馬全阿爾納素尤爲奮勇出  
力著交部從優議敘十一月復偕海蘭察等分兵攻斯達克拉阿  
噶爾布里碩藏噶爾山梁克之尋攻色布色爾山梁擊敗賊番克  
碉座十餘 諭曰羅博瓦爲賊酋緊要捷近門戶屢經阿桂等相  
機進剿今復將其山峯全行占住殲賊甚多皆由阿桂調度有方  
將領等奮勇直前海蘭察普爾普額森特等尤爲奮勇故能所向  
克捷實屬可嘉阿桂著加授太子太保海蘭察授爲內大臣普爾



普額森特授爲散秩大臣以示獎勵嗣賊劫副將常祿保營普爾  
普分兵兩翼進擊賊敗遁五月繞喇穆喇穆賊營後與海蘭察合  
攻殲賊十餘被傷竄者甚眾六月攻色湖普多斬獲七月攻喇穆  
喇穆北面潛上山梁賊驚竄高礪固守發礮擊斃甚眾旋攻東面  
第一賊礪射中紅衣賊目一又攻該布達什諾拔木城二均得  
賞御用黑狐冠三十九年二月由羅博瓦山梁進見礪外有伏賊  
殲之三月克羅博瓦第一山峯得 旨嘉獎八月賊劫外委王世  
貴鍾新所守卡普爾普與二等侍衛副都統職銜烏什哈達往援  
賊潰奉 旨普爾普著給一等功牌一箇九月攻遜克爾宗受傷  
一處十二月攻舍圖旺斷遜克爾宗去路四十年六月攻克占搶

修木柵二十六直據榮噶爾博第八峯七月攻章噶偕侍郎台斐  
英阿土舍爾都拉後山獲寨落二十餘八月攻賊貯鉛藥之隆斯  
得寨拔之尋偕台斐英阿等攻克勒烏圍 賜什勒瑪咳巴圖魯  
名號閏十月進取阿禳曲強達巴連克大礮三木城四十一月抵  
西里山峯大兵仰攻賊越礮竄普爾普帶兵追躡多殺傷旋抵舍  
勒圖租魯克礮一寨二又攻克開布智章賊寨一十二月克薩爾  
丕及阿結占寨盡據勒隈勒木通及科木曲一帶山梁普爾普斬  
獲甚多四十一年正月賊退據雍中喇嘛寺大兵分三隊普爾普  
由右進賊驚竄尋合兵圍噶拉依賊巢同海蘭察等壘卡截其右  
克之金川平捷 聞得 旨普爾普著賞給三等男世襲罔替

復命圖形紫光閣 御製贊曰父是日殫子非弄兒命往勦賊盡  
力無遺金戈鐵衣冰山雪窖能入能出敵不敢校四月 郊勞禮  
成 賜御用鞍轡馬一五月授正紅旗護軍統領六月兼正白旗  
滿洲副都統七月 賞戴雙眼花翎四十二年十月調鑲白旗護  
軍統領四十三年正月扈 蹕謁 泰東陵離營住宿經御前大  
臣福隆安等奏參奉 諭普爾普著革去御前侍衛護軍統領並  
拔去雙眼花翎加恩在副都統上行走仍罰副都統俸一年五月  
授管理健銳營大臣六月 命在乾清門行走四十六年三月因  
侍衛瑪達里誤班不行揭參退出乾清門四十九年九月授正白  
旗護軍統領五十二年八月奉 諭授領隊大臣隨將軍福康安

赴臺灣勦逆匪林爽文十一月大兵由鹿仔港進普爾普由茅港尾勦諸羅至郡城一帶屯聚賊匪十六日遇賊四五千人擊敗之追奔二十餘里殺賊三百餘生擒二十餘復帶兵疏通郡城大路奮勇衝殺賊潰奔三功店諸羅縣圍解奉 旨從優議敘嗣大兵克斗六門普爾普帶兵沿十四甲山一帶搜勦二十五日大兵克大里杙十二月初四日克集集埔普爾普偕總兵普吉保等攻克草嶺賊卡得 旨交部議敘爽文逃小半山頂十八日大兵分三隊普爾普同海蘭察等由前山進賊抵死拒山路險惡普爾普率所領廣東兵及屯練降番攀木柵奮勇先登賊潰爽文潛匿裏社埔尾等處普爾普偕普吉保等由內山木柵入於西北面截勦二



十四日大兵於要路追殺普爾普由樸仔離東山進徒步穿林箐殺賊無算五十三年正月初四日擒爽文遂進軍瑯嶠追剿賊目莊大田十九日夜賊潛劫營普爾普於大武壠隘口帶兵衝殺百餘生擒七十餘二十一日由東勢莊往北面內山搜剿二月初二日諭於臺灣郡城及嘉義縣建生祠事見海蘭察傳初五日大田就擒臺灣平奉旨普爾普給予一等功牌四月諭曰此次剿捕臺灣逆匪大功迅速完竣其帶兵出力之巴圖魯侍衛等昨已降旨交福康安查明勞績茂著者奏明交部查照功牌酌給世職內鄂輝舒亮普爾普三人俱係大員奮勉出力朕所素知卽著軍機大臣會同該部查明鄂輝等三人節次打仗勞績查照應得

功牌酌量議給世職以示酬庸延賞至意尋遵旨議普爾普加  
一雲騎尉併前所得三等男爲二等男准其承襲一次仍將原得  
之三等男世襲罔替五十五年三月卒子托布濟圖襲

右 國史館本傳

海祿

海祿蒙古正藍旗人姓齊普齊特由前鋒於乾隆二十年隨領隊大臣莽阿納出師伊犁二十一年隨定邊右副將軍兆惠駐濟爾哈朗二十四年委署筆帖式六月隨副將軍富德攻葉爾羌七月攻伊西洱庫爾淖爾均在事有功八月奉 旨賞給噶卜什海巴圖魯名號並 賞戴花翎二十七年擢三等侍衛三十年經參贊大臣尙書永貴奏請派往烏什辦事六月隨領隊大臣鄂津在烏什勦賊得頭等功奉 旨擢二等侍衛三十四年隨永貴往伊犁辦事九月隨鄂津差哈薩克三十五年隨征緬甸三十六年調赴金川帶兵四百攻斑斕山及斯當安俱有功三十七年三月攻日

耳寨六月攻固北濟山梁九月補鑲黃旗前鋒參領十月克路頂  
宗喀木色爾等寨十一月攻明郭宗溝內礮卡十二月副都統海  
蘭察由布喇克取明郭宗海祿帶兵接應三十八年正月 諭曰  
陝西固原鎮總兵員缺著海祿署理六月木果木師潰海祿從美  
諾赴巴朗拉固守八月定西將軍阿桂奏美諾失守請褫海祿職  
得 旨從寬畱任十月由資哩南山進攻奪獲阿喀木雅山上礮  
一十一月進抵路頂宗山陡峻夜半潛入賊巢殲賊三十餘滾崖  
死者相枕藉遂拔路頂宗督兵進攻明郭宗克之直抵美諾寨賊  
驚潰獲大礮十餘米糧百餘石 諭曰署總兵海祿攻剿明郭宗  
奮勉出力著加恩實授固原鎮總兵又奉 諭革職畱任之案准



其開復其各任養廉照舊支給三十九年正月隨阿桂由薩爾赤  
鄂羅山進剿又偕署興漢鎮總兵保甯攻克登石礮卡二月從喇  
穆喇穆迤西進獲石卡一三月攻得斯東寨賊巢六月攻色溯普  
山梁拔之得 旨議敘加功一等紀錄二次又加功三等七月攻  
喇穆喇穆山梁占據日則了口要路又攻該布達什諾木城連克  
礮寨議敘加功三等十月攻遜克爾宗賊出伏兵衝擊之賊潰旋  
偕副都統富興進至達爾沙朗攻克大礮五並克伊格爾瑪迪等  
礮卡十一月偕副都統烏什哈達奪羅卜克鄂博溝內礮寨十二  
月攻克格魯克古山梁議敘加功三等四十年正月攻康薩爾督  
兵躍鹿角濠進直抵礮根賊窟二月攻克勒吉爾博山梁三月乘

勝勦沿河羣泥等處大破之四月大兵攻木思工噶爾了口海祿  
以兵接應殲賊甚眾五月攻克邁過爾山梁議敘加功一等紀錄  
二次復同烏什哈達攻了口左木城石碣拔之七月從舍圖枉卡  
分攻巴占各寨官兵攀林援石從山腰斜上遂奪據毘色爾進攻  
章噶大碣克之並奪木城一閏十月同襄陽鎮總兵官達色攻黃  
草坪賊奔潰占其地十二月調補直隸天津鎮總兵旋領土兵搶  
獲兜窩碣卡復將莎羅奔甲爾瓦沃雜爾所居之拉布咱占奪取  
又同副都統書麟等攻則朗噶克聞克爾噶木勒烏果木得克  
烏等賊寨四十一年金川平凱旋入紫光閣筵宴 賞銀五百兩  
大緞十二匹四月策功海祿加功三等奉 旨列入功臣畫像

御製贊曰資哩美諾皆樹奇績奪昆色爾攀林援壁固資眾力率先以親自定酬庸命鎮天津六月給騎都尉世職十月擢雲南提督四十六年入 覲抵湖南聞薩拉爾回蘇四十三叛奏請前往協勦六月賊占華林山領侍衛內大臣海蘭察等在卡外設伏令海祿帶兵策應七月同海蘭察等攻華林山正面多斬獲旋進至華林寺燬賊巢賊竄濠內官兵殲之逆回平仍回原任四十八年六月 諭曰烏魯木齊都統事務著海祿由雲南馳驛前往署理四十九年正月奏參鎮西府兼攝宜禾縣祥泰採買兵糧浮開價銀並擅動庫項借給當商取利各款奉 旨革審議祥泰罪又奏瑚圖斯地方私開金廠恐聚眾滋事請禁止 諭曰古城迤北瑚

圖斯地方偏近土爾扈特遊牧與內地不同豈容聚集多人在彼私開金廠海祿能畱心訪察委員前往將該犯等按名拏獲辦理認真實屬可嘉海祿著交部議敘加三級又奏參迪化州知州觀成將經費銀動用一千三百餘兩私助甘省派往出口聽差人員鎮迪道保年率行咨請交部分別議處其那移之項應著觀成賠補奉 旨著照所請行三月奏烏魯木齊各屬運送餉鞘茶封遣犯及撥運糧石等項歷任各員於運價每多浮銷請分別著追又奏管屯都司朱緯於播種麥地及屯地畝數含糊不報顯爲秋收時交兌糧石朦混地步請革朱緯職查從前議定屯田章程收成十二分以上功過相抵十五分以上官員議敘兵丁給賞新疆地



本膏腴若督率有方每歲均可得二十分以上緣累任提臣辦理漫不經心是以提標中左右營節年俱祇報十五分以上似宜酌量加增每兵收穫細糧十五石以上功過相抵二十石以上者議敘賞給二十四石以上者從優議敘賞給報聞閏三月奏烏魯木齊所屬交收糧石應照數歸公將外加斛面及淋尖跌斛等弊嚴行禁止從前各廳州縣並守備以上管屯大員剝下營私互相通融請交部議處領隊大臣圖思德提督彭棟等降調有差又奏吐魯番廳供支滿營兵糧不敷應採買查從前採買弊竇多端必須確覈時估不使絲毫浮買請嗣後一體奏聞辦理上是之四月奏籌畫裁汰經費一摺查巴里坤總兵檔房雜費應行裁減者

歲省銀九千六百餘兩一過往官兵鹽菜等項宜總歸哈密駐劄大臣隨時據實支領由臺車運送無須開銷運腳一奇臺濟木薩解交迪化州買補倉糧一項見在倉糧足敷備貯毋庸買補每年約扣糧價銀七千五百餘兩各廳州縣房租地課牲稅每年約收銀二萬八千餘兩二項共三萬五千五百餘兩解交迪道庫足敷該處辦事大臣司員筆帖式養廉鹽菜紅白賞項及軍臺驛站修補農器車輛一切支領所有內地撥解經費銀二十萬餘兩應停止一各屬採買冒銀侵虧及私開金廠案內查抄變價共雜項銀七萬二千六百餘兩亦請解道庫備用其節年所賸經費銀四十餘萬兩應解交伊犁作爲正項下軍機大臣議行又奏烏魯木齊

宜照內地編保甲加意盤詰再各屬官廠空金民人並馱販口糧貨物等客民應令地方官給照票以防奸匪議行又奏奇臺縣知縣陽桑阿冒銷運腳侵蝕租稅共銀八千五百餘兩並革任迪化州知州觀成那移庫項虧短二萬七千餘兩俱審明抵罪又奏臺灣匪犯向例撥入烏魯木齊鐵廠效力此等械鬪案犯賦性獷悍聚集易於滋事請撥巴里坤等處給兵丁爲奴 上嘉其言是月調補烏什參贊大臣授鑲黃旗漢軍都統十月調鑲藍旗漢軍都統先是海祿在烏魯木齊都統任內奏哈密至精河等站酌設臺車一百五十輛又奏從前雇用商車一輛每百里價銀一兩六錢請減去銀一兩照六錢覈算並將從前報銷車價各員按每兩六

錢例勒限追賠至是 諭曰雇用出口車輛從前給價稍優俾小民運費之外略得盈餘以資餬口相沿日久視爲固然海祿請減去銀一兩並將歷任經手各員一體革職治罪之處所奏未免過當前已據烏什辦事大臣綽克托奏喀喇沙爾以西戈壁頗多車輛甚少若照新定六錢之例實難雇覓請照從前一兩六錢銀數支給而塔爾巴哈臺辦事大臣惠齡亦復咨請到部是新定車價省減過多各該處勢屬難行紛紛咨奏自係實在情形理應通盤籌畫覈實酌中定價方可行之永久陝西總督福康安奏新疆辦事大臣均稱口外雇車若照六錢咨給實有不敷且設立官車抽撥兵馬挽運必致兵丁技藝生疎營馬瘦乏運送各項銀鞘必致



稽遲不若雇車便易 上命軍機大臣議定雇車價值嘉峪關以  
北一兩二錢以南一兩四錢其造車工料銀著海祿賠交十二月  
福康安又奏新疆各處屯田頻年增加收成分數致兵丁竭蹶究  
於邊政無裨 諭曰新疆屯田日闢歲穫豐登原定賞罰章程伊  
犁每兵收穫細糧至十八石烏魯木齊每兵收穫細糧至十五石  
官員議敘兵丁加賞嗣經海祿奏准古城吉布庫二處須報至二  
十四分滿木薩須報至二十分如再能加增方准從優敘賞其意  
雖爲裨益倉儲多收糧石急於見長但地方土有肥瘠水泉亦有  
盈絀在地肥水足之處或可豐收而地瘠水少之區鮮能及額以  
致屯員顧慮處分虛報分數兵丁懼干責處賠累多端殊非朕體

卹兵丁之至意著交伊犁將軍及新疆辦事大臣各按該處實在情形酌定屯田收成分數另行妥議具奏至本年烏魯木齊所屬屯田收成有不及分數者屯員兵丁均毋庸照新增之例議處懲責將軍伊勒圖等奏准仍照舊定屯田章程辦理又奏停海祿所奏遣犯派入鐵廠捐貲效力例仍遵向例辦理詳伊勒圖傳五十年九月 諭降補副都統伊犁額魯特領隊大臣五十一年授伊犁參贊大臣五十二年十月劾將軍奎林任性乖張毀棄佛像辱罵職官非刑致斃罪人及聽情得受遣犯高姓銀兩縱令回籍又於哈薩克市易羊隻採買布匹濫受餘價銀三千兩各款 上命烏魯木齊都統永鐸查覈據實陳奏十一月 諭曰據海祿奏參

奎林各款見在查訊已有證據數款奎林著卽革職拏解來京審訊五十三年二月諭曰朕以奎林受恩深重身爲將軍大員乃率意妄行甚至聽情受賄侵蝕價銀殊堪駭異而海祿所奏各款詢之伊犁回京人員已有數款指實遂深惡奎林曾面諭軍機大臣等若審明奎林贓款屬實必將奎林卽行正法斷不宥因其係孝賢皇后之姪稍爲寬宥因降旨將奎林革職拏問並諭令永鐸海祿等訪查奎林有無別項款蹟續行奏參嗣據永鐸查奏奎林爲人倨傲嗜酒性情躁急實所不免其原參內毀棄佛像及將罪犯斷折手足拋入河內並用重枷致斃等款奎林曾有是事俱尙爲整飭地方懲治兇惡起見至於得受遺犯贓銀侵用布匹餘價



銀兩及穢言詈罵職官實無其事並據該處領隊大臣等僉稱奎林並無向各營索取銀物之事惟海祿曾向額魯特總管私行換馬一百餘匹而海祿續奏奎林之摺於原參款蹟語涉含糊挽回已自相矛盾見在奎林業經解到海祿率領干證亦已來京特命諸皇子軍機大臣會同刑部將各款逐一研訊並令海祿與奎林當面質對據奎林供認毀棄神像致死有罪遣犯等款屬實其罰出高姓銀兩及將布匹買換羊隻餘價俱屬畱克公用修補城署添買馬匹等項皆有經手官員冊案可憑質之干證各員確鑿有據卽詢之海祿亦不能指出奎林絲毫入己款項其爲挾嫌誣捏情節顯然茲軍機大臣會同該部定擬具奏將奎林照擅殺罪人



例問擬滿杖海祿照誣告人死罪未決律問擬杖流固屬按律辦理但海祿係原奏之人今所擬罪較奎林爲重恐外間無識之徒以朕於孝賢皇后之姪有所偏倚而承審之大臣等又多與奎林熟識且不無心存迎合將奎林曲爲寬縱而於海祿有意從嚴或致妄生議論自應將奎林海祿一律定擬以示平允因念伊二人俱曾帶兵出力尙屬有用之才不忍令其終於廢棄但奎林乖張任性豈可復任將軍海祿著革職免其杖流俱罰令在上虞備用處拜唐阿上效力行走以贖前愆而觀後效伊等當差如果勤勉出力將來尙可加恩酌量棄瑕錄用或令隨圍約束兵丁可資得力奎林海祿二人當倍加感愧痛改前非無負朕格外矜全至意

三月本旗奏將海祿軍功議敘騎都尉世職 敕書交部銷燬旋  
奉 旨補授藍翎侍衛擢山海關副都統五十四年正月 諭曰  
廣東提督員缺著海祿補授六月調福建陸路提督五十六年二  
月卒 賜祭葬如例嘉慶四年奉 旨海祿子希朗阿襲騎都尉  
六年補授散騎郎

右 國史館本傳

尹德禧

尹德禧鑲黃旗包衣人初名色喀通額由領催撥守綏遠城乾隆二十年隨副都統鶴山出師伊犁二十一年隨副都統阿爾斌討叛賊青滾雜布二十三年擢鑲白旗驍騎校二十九年升防禦十一月開戶出旗發湖南以守備用三十年補臨武營守備三十六年擢四川川北鎮標右營都司更姓名入籍密雲縣三十八年調征金川四十年經將軍阿桂保題擢貴州荔波營遊擊四十四年擢撫標中軍參將四十六年擢定廣協副將五十年升湖廣鎮筸鎮總兵五十二年五月鳳凰廳屬苗匪石滿宜滋事帥師進剿燬賊巢生擒石滿宜多有斬獲撫臣浦霖以聞得旨優敘並賞戴

花翎又諭曰湖南鳳凰廳屬苗匪石滿宜等搶奪拒捕滋事不法一案經總兵尹德禧會同該道親率將備官兵前往直擣賊巢立時平燬生擒首犯石滿宜等所辦妥速可嘉已降諭旨將該總兵交部從優議敘並賞戴花翎以示獎勵矣此案該總兵本屬有功無過但尹德禧有奏事之責於所屬苗匪滋事不法帶兵前往勦捕應一面查辦一面具奏由驛馳遞何以該鎮於此事並不專摺夫奏事原不獨藉悉地方情形且據伊等所奏朕隨事可以觀其才具器識如該鎮等有喜事見長之人干預地方事務越俎妄陳者奏到時自難逃朕洞鑒至其本分應奏之事理應隨時據實陳奏乃近來各省總兵所奏不過具報到任及查閱營伍等事卽



雨水收成亦不過聞有奏及者但該鎮等果能將實在情形據實以告披閱之下設所奏與督撫不同或督撫有諱飾之處原可參互察照降旨詢問以收兼聽並觀之益乃該鎮等即使奏及雨水收成亦不過倣照督撫所奏敷衍塞責又安用此具文爲耶著通諭各省總兵此後遇有緊要事件皆須專摺奏聞卽尋常雨水收成情形亦應隨時據實奏報毋得循照舊例虛應故事並著尹德禧於苗匪滋事一案何以不將查辦情形自行具摺之處據實覆奏尋奏請交部議處得旨寬免時臺灣勦捕逆匪未歲十月命德禧督湖南兵赴臺五十三年正月至水沙連大營林爽文已就擒將軍福康安督兵勦捕莊大田派德禧帶兵堵竹仔港等處

海口截擊逸賊旋擒莊大田於柴城臺灣平四月起程回任十月  
諭曰湖南鎮筵鎮總兵尹德禧前因辦理鳳凰廳滋事一案尙爲  
出力曾降旨賞戴花翎復令帶湖南官兵前赴臺灣協同剿捕逆  
匪見在該省官兵早已各歸營伍該總兵自五十年陛見後雖距  
今未滿二年但尹德禧曾有微勞加恩之處與各省總兵不同著  
卽來京陛見十二月入 覲五十四年署湖南提督五十六年十  
月卒遺疏懇 恩賞准子孫入旗十二月 諭曰原任總兵尹德  
禧曾經出師伊犁臺灣金川等處前在湖南鎮筵鎮總兵任內辦  
理鳳凰廳苗民滋事一案尙屬出力所有尹德禧子孫准其入旗  
子朝相隸鑲黃旗包衣

右 國史館本傳

國史館本傳

三

MILITARY SERVICE RECORD							NO.

168-324



舒濂

舒濂舒穆魯氏滿洲正白旗人乾隆四十年由兵部筆帖式升戶部主事充軍機章京四十三年遷戶部員外郎四十五年隨大學士公阿桂堵築儀封漫口出力下部議敘四十六年隨大學士公阿桂剿捕甘肅逆回蘇四十三受矢傷事竣敘功 賞戴花翎四十八年四月授山西道監察御史十月兼公中佐領五十一年授鑲紅旗蒙古副都統五十三年二月授伊犁參贊大臣六月廓爾喀侵擾後藏 上命成都將軍鄂輝等督師申討十月調舒濂駐藏大臣 諭曰舒濂雖係滿洲不諳蒙古語然在軍機處行走多年尙能通曉藏事調至藏內庶有裨益又 諭達賴喇嘛係主持

黃教之人藏內番眾及蒙古諸部落莫不尊崇敬奉駐藏辦事大臣亦應稍加優禮固不可過於崇奉俾擅事權亦不可微露輕忽致失眾望務須畱心體察處置得宜五十四年二月調鑲紅旗滿洲副都統六月偕鄂輝等奏大兵甫抵賊境廓爾喀旋畏罪輸誠藏地全行收復並條陳善後各事宜下軍機大臣議行旋以達賴喇嘛兄弟孜仲綏綳等同居聚處易至滋弊借駐藏大臣巴忠奏請各賞予經典名號俟有別廟堪布缺出卽行補放奉 上諭達賴喇嘛兄弟近年並未聞有恣意妄行之處如此辦理未免情事張皇舒濂等識見短淺致有此奏傳諭嗣後仍令同居舒濂等亦照常看待祇須密爲畱心體察儻伊等有滋事舞弊之處卽行

奏聞治罪如無別故不得妄事紛更以示體恤五十五年三月授戶部右侍郎四月前藏達賴喇嘛之弟商卓特巴等在各商上漁利舞弊舒濂與辦事大臣普福彼此互相參訐上命將軍鄂輝等查辦革舒濂戶部侍郎職五月革副都統摘去花翎以三品銜幫辦藏務尋復諭曰舒濂奏參普福濟隆呼圖克圖又擅行奏請達賴喇嘛弟兄辦理達賴喇嘛瑣屑事務已屬錯謬今第穆呼圖克圖懇請遣伊徒等赴內地京城之處又並未具奏尤屬冒昧舒濂竟不可令其辦理緊要地方事務著雅滿泰赴藏辦事雅滿泰抵藏後舒濂再由彼自備資斧前往阿克蘇以領隊大臣效力行走八月鄂輝等訊明舒濂辦理藏務未能周妥達賴喇嘛弟兄

商卓特巴等七人肆行舞弊占人地畝斂取銀兩 命將商卓特  
巴等解京令舒濂押送十二月至都 諭曰舒濂辦理藏務諸凡  
不妥又與達賴喇嘛之弟兄結交其咎甚重本應交刑部治罪姑  
念伊此次照料達賴喇嘛之弟兄來京尙屬妥速著加恩賞給員  
外郎職銜在軍機處效力行走以贖前愆五十六年九月廓爾喀  
復侵擾後藏 賞副都統銜 命馳驛前往辦事十二月卒 諭  
曰舒濂甫經到藏旋即病故殊堪憫惜著加恩賞銀五百兩辦理  
喪事仍交該部查照副都統應行卹典照例辦理尋 賜祭葬子  
喀爾弼善官遊擊噶爾弼善官筆帖式

右 國史館本傳



劉鑑

劉鑑漢軍正黃旗人由武生中式乾隆庚午科武舉辛未科進士授藍翎侍衛在鑾儀衛行走二十年放甘肅城守營都司二十七年擢提標右營遊擊三十三年八月升花馬池營參將九月派辦雅爾屯田三十六年擢沙州協副將三十八年五月游升浙江衢州鎮總兵十月來京  陛見調陝西甯夏鎮總兵是月署陝西提督四十二年奉  旨往伊犁管理屯田事務因辦理妥協  賞戴花翎尋授浙江提督四十六年五月提標右營遊擊李雲彪私載貨物出洋被劫兵丁袁永金落水淹斃雲彪捏稟巡洋遇盜鑑信爲實咨會督撫委員緝訊閏五月獲犯審訊係兵丁買魚無錢起

釁爭鬧致將兵丁扭結落水並非夥眾行劫鑑以雲彪原報支飾  
奏請革審旋經總督陳輝祖訊出營私捏報各情奏入 諭曰此  
案前據提督劉鑑因李雲彪所稟情節與地方官獲盜審訊緣由  
互異將李雲彪奏參業經降旨革職茲據該督審出李雲彪營私  
牟利欺詐誣捏種種情節殊爲可惡李雲彪著革職拏問交與該  
督提集案內人犯秉公嚴審定擬具奏提督劉鑑平日既漫無覺  
察及知事難掩蓋始以一奏塞責又不自請議處尤屬不合並著  
交部嚴加議處八月輝祖奏審明雲彪欺詐屬實從重擬以絞監  
候九月部議褫職得 旨劉鑑著加恩以革職提督自備資斧前  
往伊犁辦理屯田總兵事務四十八年賞二品頂帶四十九年授

烏魯木齊提督五十年四月  陞見詢及李雲彪案奏對含混部  
議奪職  諭曰劉鑑係棄瑕錄用之人昨來京召見時經朕將遊  
擊李雲彪巡洋販貨一案面加詢問該員並不將從前實在情形  
據實具奏含糊支飾意存取巧本應照部議革職姑念伊在新疆  
辦理屯田有年著加恩畱京以漢軍副都統補用仍帶革職畱任  
五月署鑲黃旗漢軍副都統十一月因伊犁總兵任內浮報屯田  
收成分數經軍機議革職得  旨從寬畱任五十一年三月授正  
黃旗漢軍副都統五十六年卒

右  國史館本傳

Handwritten text in the right margin, possibly including a date or page number.

Handwritten text at the bottom right of the page.



奎林

奎林滿洲鑲黃旗人姓富察氏曾祖米思翰官戶部尙書祖李榮保官前鋒參領追封公爵米思翰自有傳父傅文封承恩公奎林由拜唐阿襲雲騎尉乾隆二十七年授整儀尉尋升治儀正三十年擢雲麾使三十二年挑在乾清門行走三十三年正月襲公爵五月授御前侍衛尋授奉宸苑卿六月兼鑲白旗蒙古副都統七月調正白旗滿洲副都統三十五年五月授鑲白旗護軍統領管理健銳營三十七年十二月授領隊大臣隨副將軍阿桂征金川三十八年二月偕侍衛和隆武進攻納圍正面山梁乘勝抵當噶爾拉殲賊百餘得旨交部議敘加一級閏三月復從納圍

進越石卡二毀其礮俘馘甚眾六月色木則賊番夜劫營擊退之  
是月木果木師潰 命阿桂爲定西將軍 召奎林入 詢軍務  
旋 命赴副將軍明亮南路軍營十月由墨壘溝進攻得里賊築  
礮山巔奎林帶兵晝伏夜行克之 命交部議敘軍功加一級十  
一月攻拉約夜渡河鼓譟登賊巢斃數十人番眾阿塔安明等降  
遂抵僧格宗連破賊礮獲軍糧火藥時阿桂克復美諾明亮派奎  
林率兵往會三十九年三月隨明亮攻斯第奎林領第一隊兵先  
占班得古水泉與賊持兩晝夜涉險屢戰飛石傷脊 溫旨慰勉  
七月攻達爾圖賊礮繇互數里奎林冒雨先登力拔第一礮官軍  
乘勢疾擊克礮十五俘賊自八獲糧械無算 諭曰明亮奎林皆

孝賢皇后之姪乃竟如此出力甚爲可嘉八月從木克什山梁克賊礮一中槍傷頂 諭曰奎林平日打仗最爲勇猛今辮頂受傷部位最關緊要卽幸而調養無虞自不便仍帶兵行走惟是明亮處能帶兵之人本屬無多今奎林見須養傷則得力之人更少因思奎林雖不宜勞力而坐守尙可優爲莫若令赴富德馬爾那軍營代其防守換富德迅至明亮軍營協同進剿十二月授鑲紅旗漢軍都統四十年二月擊敗斯聶斯布羅及沙壩山等處賊番三月隨明亮攻宜喜阿桂遣侍衛內大臣海蘭察會奎林察看地勢約兩軍隔河夾擊直搗勒烏圍賊巢四月分攻甲索壘破堅礮八自薩克薩若下壓得楞賊棄礮竄乘勢追躡墮崖死者相枕藉五

月攻基木斯丹當噶奪碉二卡九又奪茹寨麥田十餘里先後得  
旨獎勵 賞綳武巴圖魯名號七月趨噶喇嘛寺拔沙爾巴溝一  
帶碉卡八月阿桂破剿勒烏圍明亮等攻扎烏古未克請益兵  
諭曰阿桂奏因勒烏圍已得整兵直取噶拉依賊巢爲擣其心腹  
之計自不得不注以全力勢難復分兵幫助明亮第恐明亮見阿  
桂攻得噶拉伊自忖未能寸進及向阿桂求助又不肯應允添兵  
未免有礙顏面而奎林和隆武亦各懷勇往好勝之心設因愧忿  
所激毅然不顧輕率一往於事甚爲關係雖云不入虎穴焉得虎  
子但亦須審度機要權其利害而行切不可冒昧攻撲今大功已  
屆垂成一切倍宜慎重明亮等惟當斟酌妥爲之十月由什扎古



進偕和隆武等自山溝潛行登其巔礮內賊無一脫 諭曰此次  
攻礮殺賊奎林和隆武二人出力尤多頗屬可嘉見在西路將領  
隨將軍阿桂屢次克捷立功建績者甚多將來自膺懋賞而明亮  
北路久未能前進卽此攻得什扎古亦不過尋常所勝不能遽邀  
錄敘奎林和隆武各宜黽勉立勳豈可專讓西路成功而不知奮  
勉但遇進攻之時當度其利害籌及萬全又不可一味輕進閏十  
月初七日攻克扎烏古山梁得 旨嘉獎初九日進據納木通斯  
底葉安奪三十餘寨十八日由耳得谷下壓鼓勇衝卡斃賊百餘  
十一月自碾古進所向克捷十二月初八日攻撒谷拔礮卡三十  
斃賊百十四趨獨古木思得賊望風奔潰平山上下八十餘寨十

五日進逼乃當大頭人達固拉得爾瓦禽土舍痛中旺嘉勒以獻  
十六日抵甲雜俘賊酋遇布星根降番眾千一百交部優敘加三  
級四十一年正月十九日攻卡拉爾斷賊歸路降大人格卜爾章  
等二十日抵舍斯滿賊眾皆乞降奎林等繞山巔行三百里至抵  
角河沿撫定寨落數百遂與阿桂軍合圍噶拉依 上以大功告  
成於奎林本襲公爵外加賞一等男 命其子崇倫承襲並世襲  
罔替又 賞戴雙眼花翎二月逆酋索諾木就俘金川平四月凱  
旋上郊勞 賜文綺十二銀五百 御用鞍轡馬一圖像紫光閣  
列前五十功臣 御製贊曰兄終王事至今爲恨屢請效力披堅  
斫陣心源落落膽氣堂堂世家英器是予所臧九月授右翼前鋒

統領尋擢理藩院尙書紫禁城內騎馬十月加議政大臣四十三  
年十二月扈 蹕盛京議敘加一級四十五年三月授烏魯木齊  
都統四十六年二月奏庫爾喀喇嘛烏蘇精阿歲需兵八百給屯  
差今改派眷兵六百四十六尙缺兵百五十四請撥齊木薩馬納  
斯兵攜眷移駐下軍機議行三月奏請將烏什葉爾羌駐防兵照  
喀什噶爾英吉沙爾例三年一換議行七月劾驍騎校常福杖斃  
披甲多羅請將該驍騎校及行刑人役分別責革 諭曰披甲多  
羅不率父教其父錫昌阿回明常福處治此等不孝之徒理宜杖  
斃何致將眾人如此辦理該章京驍騎校及用刑人等俱著寬免  
奎林著嚴行申飭是月授烏里雅蘇臺將軍十月哈密辦事大臣

福德奏通判經方侵用庫項 諭曰奎林曾任烏魯木齊都統所  
有各屬員經營之項尤應畱心稽查乃一任劣員侵用花消全無  
覺察其罪甚大著奎林將此項銀兩照數賠繳十一月失察脫逃  
遺犯降二級畱任四十七年正月烏魯木齊都統明亮奏各州縣  
採買糧石浮開價值請 旨分別革審 命侍郎喀甯阿往鞠

諭曰此案係索諾木策凌奎林任內之事奎林不過糊塗失於覺  
察且在任不久與該處州縣或不致有交通情弊著傳諭喀甯阿  
到彼時卽將此案告知明亮一面將各州縣解任嚴鞫毋得瞻徇  
四月喀甯阿偕明亮奏訊明各州縣侵冒及餽送索諾木策凌屬  
實奎林並無交通情弊 諭曰奎林接任後雖據訊明德平等各



犯並無送過銀兩但何以不據實查參其中有無染指自應徹底  
根究明亮係奎林之兄如稍涉欺隱其罪更大恐明亮不能當也  
五月喀甯阿明亮奏覆訊各州縣實無餽送銀兩事 上以奎林  
不能覺察屬員 命將所襲公爵給伊叔傅玉承襲五十年三月  
仍授烏魯木齊都統四月借陝甘督臣福康安劾奏巴里坤總兵  
佛喜不知地利妄請加種屯田致被旱虧糧復隱忍認賠 命福  
康安奎林會同勘議具奏六月覆奏巴里坤水泉僅溉地萬八千  
七百畝請照舊額令原派丁戶分種佛喜等率意更張請交部議  
處報 允八月授伊犁將軍九月借福康安會議巴里坤在屯遣  
犯三百五十名請與兵丁一律支糧並著照塔爾納沁例於例給

口糧外每月加給麪十斤每年增衫袴銀一兩九錢二分在工馬  
牛照烏魯木齊等處酌減定例馬每百准倒十五匹牛每百准倒  
十二隻下軍機議行五十一年十二月參贊海祿劾奎林任性乖  
張毀棄佛像辱詈職官非刑致斃罪人及聽情得受遺犯高姓銀  
兩縱令回籍又於哈薩克市易羊隻採買布匹濫收餘價三千兩  
命烏魯木齊都統永鐸查覈據實陳奏十一月 諭曰據海祿奏  
參奎林各款見在查訊已有證據數款奎林著卽革職拏解來京  
審訊五十三年二月 諭曰朕以奎林受恩深重身爲將軍大員  
乃率意妄行甚至聽情受賄侵蝕價銀殊深駭異而海祿所奏各  
款詢之伊犁回京人員已有數款指實遂深惡奎林曾面諭軍機

大臣等若審明奎林贓款屬實必將奎林卽行正法斷不宥因其  
係孝賢皇后之姪稍爲寬宥因降旨將奎林革職拏問並諭令永  
鐸海祿等訪查奎林有無別項款蹟續行奏參嗣據永鐸查奏奎  
林爲人倨傲嗜酒性情躁急實所不免其原參內毀棄神像及將  
罪犯斷折手足拋入河內並用重枷致斃等款奎林雖有是事俱  
尙爲整飭地方懲治兇惡起見至於得受遣犯贓銀侵用布匹餘  
價及穢言詈罵職官實無其事並據該處領隊大臣等僉稱奎林  
平日並無向各營索取銀物之事惟海祿曾向額魯特總管私行  
換馬一百餘匹而海祿續奏奎林之摺於原參款蹟語涉含糊挽  
回已屬自相矛盾見在奎林業經解到海祿率領干證各員亦已



來京特命諸皇子軍機大臣會同刑部將各款逐一研訊並令海祿與奎林當面質對據奎林供認毀棄神像致死有罪遺犯等款屬實其罰出高姓銀兩及將布匹買換羊隻餘銀俱屬畱充公用修補城署添買馬匹等項皆有經手官員冊案可憑質之干證各員確鑿有據卽詢之海祿亦不能指出奎林絲毫入己款項其爲挾嫌誣捏情節顯然茲軍機大臣會同該部定擬具奏將奎林照擅殺罪人律問擬滿杖海祿照誣告人死罪未決律問擬杖流固屬按律辦理但海祿係原參之人今所擬罪名較重恐外間無識之徒以朕於奎林係孝賢皇后之姪有所偏倚而承審之大臣等又多與奎林熟識且不無心存迎合將奎林曲爲寬縱而於海祿



有意從嚴或致妄生議論自應將奎林海祿二人一律定擬以示  
平允因念伊二人俱曾帶兵出力尙屬有用之才不忍令其終於  
廢棄且奎林乖張任性豈可復任將軍海祿居心如此亦不可復  
畱參贊之任除奎林業經革職外海祿著革職免其杖流俱罰令  
在上虞備用處拜唐阿上效力行走以贖前愆而觀後效伊等當  
差如果勤勉出力將來尙可加恩酌量棄瑕錄用或令隨圍約束  
兵丁可資得力奎林海祿二人當倍加感媿痛改前非無負朕格  
外矜全至意五月授藍翎侍衛六月擢三等侍衛尋諭曰臺灣  
甫經平定一切撫綏善後事宜正資整飭因念奎林前在伊犁所  
處人犯本係有罪之人其獲咎尙非貪贓玩法難於原宥者可比

且伊曾經委任久歷戎行人尙體面臺灣正當需人鎮撫整飭之際不妨棄瑕錄用所有臺灣鎮總兵員缺著加恩將奎林補授並著卽馳驛前往奎林當倍加感激朕恩力圖報效十一月又諭曰奎林在烏魯木齊都統任內尙有未完賠項茲補放總兵應將廉俸扣繳第念臺灣遠隔重洋奎林至彼一切需用所有應得總兵廉俸著加恩准其支領五十四年三月偕臺灣道鍾傑奏審明搜拏賊匪乘機搶奪之兵丁柯鳴鳳等問擬斬決諭曰臺灣甫經懲創該兵丁等輒敢乘機肆搶實屬目無法紀奎林等審明定擬卽應將柯鳴鳳等立置刑誅再行具奏若拘泥成例候旨遵行卽臺灣遠隔重洋往返稽遲時日儻該犯等在監病斃轉得倖逃

法網甚或因防範稍懈別滋事端更屬不成事體奎林等嗣後如遇此等重案審明後卽將該犯一面正法一面具奏俟三年後該處刁悍之習日漸斂戢然後於命盜等案再照舊例辦理七月擊獲傷斃事主之盜犯蘇魯等及同謀殺人之首犯何涉分別審明正法 諭曰向來在臺灣居住之漳泉各村居民人等素性獷悍搶劫械鬪之事不一而足雖經奎林等節次擊獲嚴辦而本日所奏又有因搶劫傷斃事主及同謀殺人之案可見該處積習一時未能悛改奎林鍾傑務須實力湔除有犯必懲勿稍姑息是月劾笨港守備李文彩索詐僉越船隻請 旨革審八月審明文彩得賊屬實問擬絞決 上以臺灣制法宜嚴改斬決九月兵部敘獲

盜犯功加一級十一月奏擊獲會匪李效等審明正法 諭曰臺  
灣搶劫械鬪之案經奎林等擊獲多犯疊次嚴懲前已交部議敘  
今於李效以邀會糾眾該鎮等一經稟聞卽行擊獲訊明正法辦  
理甚爲妥速著交部議敘尋議加一級五十五年二月劾署嘉義  
縣知縣唐時勳輕縱頂兇重案褫時勳職三月奏擊獲抗逃投誠  
股頭區捷及偷渡出洋之王儼然糾劫毆斃事主之黃筍等審明  
分別正法得 旨賞提督銜十二月因伊犁將軍任內失察鄂羅  
斯烏梁海等在內地遊牧降一級畱任五十六年二月擊獲彰化  
縣會匪張標等三十六名議敘加一級旋擢福建水師提督三月  
奏續獲會匪審辦緣由 諭曰此摺尾僅寫至恭摺具而止奏字



以下應寫字據全行脫落特用硃筆點出該提督於此等陳奏事  
件何漫不經心錯誤如此著傳旨嚴行申飭九月以廓爾喀滋擾  
衛藏奎林授爲正紅旗蒙古都統前往西藏辦事十一月授成都  
將軍作爲參贊大臣帶兵會剿五十七年二月行至江卡得疾三  
月卒 諭曰成都將軍奎林秉性肫誠持躬端謹久經行陣爲國  
宣勞實爲奮勇出力上年以廓爾喀滋擾衛藏特命奎林爲參贊  
令其馳赴藏地會同福康安等帶兵剿捕昨據孫士毅奏稱奎林  
行至江卡地方因頭患熱癩精神委頓當經降旨慰諭令其在江  
卡地方安心調攝不必過於焦急並賞給大小荷包奶餅一匣用  
示眷注冀其速痊茲據孫士毅奏奎林於三月初九日在江卡身

國朝典章考卷之三十一  
故聞之深爲悼惜雖係因病身故究屬沒於王事著加恩賞給銀二千兩辦理喪事伊子崇倫見已馳抵江卡卽令沿途照料入城治喪仍著入祀賢良祠所有應得卹典該部察例具奏尋賜祭葬如例謚武毅子崇倫二等待衛襲一等男佩倫四品廕生刑科八品筆帖式

右 國史館本傳

公名奎林姓富察氏大學士忠勇公傅恆之姪傅公行十三爲孝賢皇后之□□傅文行四生明瑞及公公年十七卽以勳貴子弟從征準噶爾彎弓躍馬刻苦自奉閒讀書能小詩人不覺爲戚畹也性剛果尙廉潔志節凜然豁達英邁尤遠於權勢與忠勇公

弗善也其他直唾涕視之獨以兄事予嘗以署伊犁將軍過余西  
安官署深夜置酒快飲數十盞歷數當代人才罕所當意予問以  
如此則何者而可公曰吾何好但好王保保耳保保者元廓廓帖  
木爾明太祖以爲勝於常遇春天下奇男子也緬甸金川軍興幾  
十年俱在行閒身經百戰被創不動有疾亦不介意騎馬飲酒自  
如待將領嚴而於士卒甚恕統兵所至遇移營取一褥坐營門內  
視各士卒帳房行李畢至然後卽安否則不先入幕也每日肉一  
盤菽乳湯一盂與下同甘苦下皆樂爲之用金川之役將軍溫福  
兵潰於木果木而阿公達烏之軍不動由公守隘口與賊日夜數  
十接殺傷過當故也凡奉 旨移鎮他所時春夏則出毛罽之衣

及其被禡悉以賞左右及秋冬亦如之飛車危坐晝夜遘行身無  
長物家計尤不問也不憲佛法最惡番僧搜捕盜賊及奸宄不法  
者有殺無赦而必不濫及無辜世俗所傳嗜酒好殺之事多失其  
實者公由侍衛以功歷官至都統金川平圖形於紫光閣襲封

皇后承恩公出爲伊犁將軍被參贊大臣海祿劾削公爵久之復  
爲福建臺灣提督尋西番廓爾喀犯邊奉命以參贊大臣往西  
川比及江卡而卒上惜之祭葬有加禮焉諡壯烈子二一出爲  
弟明瑞後

右書事王昶撰

奎壯烈林爲孝賢純皇后之姪以椒房甲第勇力過人其兄果



烈公明瑞嘗殉節滇南故 純皇帝不欲使其臨戎而公乞恩者  
再至痛哭 殿陛間惟願殺賊復仇 上爲之動容其後從征緬  
甸金川皆以趨捷建功後任伊犁將軍公乃縱酒指揮爲海祿所  
劾罷職其後復從征廓爾喀疽發於頂仍力疾從軍孫文靖公士  
毅往候其疾公執其手曰疾何必問大丈夫不能馬革裹屍乃至  
殞歟牀第亦可醜也至卒惟以軍務未蒞爲憂語不及他性耽書  
史好作小詩有曹景宗之風嘗讀元史王述庵侍郎問其所向慕  
公曰耶律文正公非余所及得及王保保之忠貞足矣亦可覘公  
之志矣

右錄宗室昭棟撰



國朝耆獻類徵初編卷二百九十三目錄

將帥三十三

永安

瑚尼勒圖

張芝元

存泰

孫起蛟

常泰

俞金鼈

蔡鵬

劉國棟

寶琳

梁朝桂

五岱

三十三卷之三十三



國朝耆獻類徵初編卷二百九十三

通奉大夫前署江西巡撫江西布政使司布政使湘陰李桓輯  
將帥三十三

永安

永安蒙古正白旗人姓西魯特先世博博圖爾自科爾沁來歸以  
功授三等輕車都尉子明安達哩襲官至吏部尙書軍功累授一  
等輕車都尉自有傳子都克襲征噶爾丹有功授雲騎尉合所襲  
世職爲三等男子明福襲生永安降襲一等輕車都尉加一雲騎  
尉由乾隆元年六品廕生十三年補三等侍衛二十七年擢二等  
侍衛三十七年擢頭等侍衛三十九年七月補鑲紅旗漢軍副都

統十月授古城領隊大臣四十五年調巴里坤領隊大臣四十九年進京 陸見抵山西境聞甘省逆回滋事奏請前往會剿得旨嘉允五月帶西安兵剿賊於馬營街從北山梁進殲斃四十餘割首級二十五帶傷者甚眾旋奏初十日派協領和興額剿賊於西山頂游擊阜王保攻中開山頂賊營佐領德亮搶賊山卡土司楊宗業帶番兵攻東山頂各路俱有斬獲天晚紮營賊潛遁偵知逃往石峯堡派兵合力分路追擊時副都統明善赴山峯堡中途遇賊陣亡永安奏臣等迫欲進剿見在兵力單弱賊在鹿鹿山藏匿伺隙下撲須添調川省屯練兵報 允二十三日奏官軍移駐鹿鹿山相機進剿賊從山後繞出移營烏家坪距伏羌縣百餘里

縣城緊要剛塔帶兵往截鹿鹿山尙有賊數千畱永安紮營堵禦  
諭曰賊人狡詐多端於山前牽綴官軍潛分賊黨從山後起伏羌  
滋擾該處領兵大員所司何事竟不及早籌畫分兵堵禦此時務  
當於要隘處所嚴密防堵或繞出烏家坪之前以截賊人去路勿  
使又得乘閒遠颺四出滋擾二十九日奏鹿鹿山賊眾乘雨霧奔  
竄 上以永安堵禦不力嚴飭之時賊從伏羌竄往秦安復繞回  
靜甯六月 諭曰賊人初次竄往伏羌時永安等帶兵在鹿鹿山  
紮營空守猶可藉詞牽綴賊勢今賊竄往秦安又由秦安繞回靜  
甯永安帶兵在鹿鹿山住劄自應就近遏其來路乃竟一無策應  
坐守空山殊不可解著福康安速卽查明奏參二十一日偕西安

將軍傅玉奏言臣等接准欽差大臣福康安來咨約定進攻石峯堡同日進兵卽由鹿鹿山前進在石溝莊紮營有賊千餘由石峯堡越山梁來撲大營整兵奮擊殲斃百餘傷者一二百向石峯堡敗走七月逆回平議敘得一等功八月  陸見仍回巴里坤領隊大臣任五十四年九月代回五十五年三月補正藍旗滿洲副都統五十六年六月調山海關副都統五十七年三月卒於任子喀隆阿見任湖北德安營參將孫噶布唐阿襲世職兼三等待衛

右 國史館本傳



## 瑚尼勒圖

瑚尼勒圖黑龍江人姓鄂納乾隆二十五年以護軍入鑲黃旗滿洲二十六年擢護軍校累遷至護軍參領三十五年征金川三十六年隨將軍溫福攻克巴朗拉 賜多卜丹巴圖魯名號三十七年三月派剿資哩南山五月從喇楚卜楚克山梁繞至高峯奪卡二旋又直上山頂奪卡二三十九年二月將軍阿桂派內大臣海蘭察等帶兵攻羅博瓦前山有賊二百餘從右首山梁斜衝而上瑚尼勒圖擊斃十餘賊遁七月同海蘭察攻布達什諾克之加副都統銜八月攻遜克爾宗焚賊平田內寨落十餘處是月十九日黎明賊擾營前卡倫督兵擊敗之十月賊援遜克爾宗瑚尼勒圖

奮力擊回大兵將攻勒烏圍派瑚尼勒圖搶占默格爾山梁旋帶  
兵直占日爾巴當噶爾西面突起高峯海蘭察等向西面密拉噶  
拉木山巔下壓遂先奪凱立葉得 旨嘉獎十一月乘勢攻克日  
爾巴當噶山陽左右五礪又同海蘭察等攻取桑噶斯瑪特一帶  
山梁寨路十二月同領隊大臣福康安等帶兵將出箐邊見有賊  
礪二奮勇躍入殺賊數名餘潰散克之四十年正月擢鑲藍旗蒙  
古副都統三月大軍攻達佳布安吉兩處礪寨帶兵接應瑚尼勒  
圖從山腰賊礪中間攀越而過奮勇爭先直入礪寨遂攻克之四  
月攻木思工噶克派搶了口山峯左右礪座十四瑚尼勒圖潛師  
攀越先登遊擊梁朝桂等乘勢擁入呼聲四合木思工噶克峯左

右礪座同時攻克得 旨議敘加一級六月大軍至榮噶爾博有  
巴占一道山梁爲勒烏圍緊要門戶賊人捨死防護官兵擬從舍  
圖枉卡一帶開道進攻派瑚尼勒圖屯兵巴占以牽賊勢七月大  
兵克章噶瑚尼勒圖擁上山梁將山峯全行占據八月分攻降斯  
得寨斧劈寨門全獲所貯鉛藥是月進攻至勒烏圍克之閏十月  
攻西里山梁同領隊大臣烏什哈達等督兵勇突衝上連克大礪  
三木城四十一月大軍攻西里正寨同福康安等帶兵攻入放火  
焚燒使賊不能逸出大軍乘勢合兵衝壓遂克之十二月同海蘭  
察占據朗阿古攻克得拉古礪卡復由巴薩沙進攻奇什礪官寨  
俱獲全勝又同福康安等攻克雍中喇嘛寺四十一年金川平凱

旋回京繪像紫光閣列前五十功臣 御製贊曰木思工噶躍入  
賊礮督眾鞞膊勇才因逃巴占牽敵俾無遮刼番人望之弗戰辟  
易八月轉補鑲紅旗蒙古副都統四十二年授散秩大臣管理健  
銳營五十七年四月卒

右 國史館本傳



張芝元

張芝元四川清溪人由行伍投把總尋擢千總乾隆三十八年隨征金川七月以戰功擢越嶲營守備十一月隨副將軍明亮攻喇嘛寺日寨礮率眾進撲指麾步兵奮勇殺賊攻占得里策爾丹色木等處乘勝奪南山梁礮卡時賊番據宅壘固守芝元親往招降許以不殺並將驛諭轉付安布木安本令其親信阿囊潛往賊寨曉示小金川番眾尋官軍渡河阿囊遂以拉約番眾阿塔安明等七戶隨芝元出降奏入 賞戴花翎給扎敦巴圖魯名號三十九年二月隨明亮攻庚額特東北穆谷山梁領兵繞卡卡角山背循溝密進賊沿山設寨奮攻一晝夜奪平礮五賊上庚額特山追擊

之復斃賊十餘遂據穆谷三月明亮攻期第分兵爲三隊芝元領  
五百兵爲一隊先進攻班得古水泉至思覺山破其護水卡礮又  
破山梁戰礮燬平寨賊竄七月帶屯練及綽斯甲布士兵與都司  
崔文傑分攻俄坡格魯克古破其七礮是月擢維州協右營都司  
四十年五月遷泰甯協阜和營遊擊四十一年金川平擢越嶲營  
參將四十五年四月隨成都將軍特成額駐兵江卡辦理三暗巴  
番人夾壩五月圍本背賊寨順攻支巴郭木二寨六月領漢兵並  
西藏昌都士兵攻賊不備從山巔疾馳下克山寨縱火焚三十四  
礮斃賊五十餘賊降疏入得 旨獎勵賞副將職銜遇相當缺出  
補用四十七年十二月擢懋功協副將五十二年八月臺灣逆匪

林爽文滋事帶川省屯練降番赴勦十二月勦斗六門參贊海蘭  
察恆瑞分攻大埔林中林大埔尾三莊芝元帶兵策應五十三年  
正月芝元往諭生番擒獻林爽文家屬賊酋懼逃入內山餘匪據  
半天山將軍福康安等由前山進芝元與領隊大臣普爾普領廣  
東兵及屯練兵另爲一路夜半先登繞大山夾攻賊後黎明諸軍  
同抵山麓攀援而上殺賊百餘賊恃柵木礮石抵拒芝元攀倒柵  
木奮勇先登賊潰斃賊目十餘奪取器械馬牛無算悉焚木柵草  
簣於西北面堵賊去路旋擒林爽文是月擢建昌鎮總兵二月官  
軍由內山趨大武隴擒莊大田於柴城臺灣平將弁次第撤回芝  
元派查投誠賊目奏明事竣赴京  陸見旋論平臺功  命畫像



國朝通志卷之三十三  
紫光閣列前二十功臣 御製贊曰金川隨征超熊羆旅茲領番  
兵以通番語賊屬生縛賊路嚴禦卒獲生俘厥功允巨六月調松  
潘鎮總兵七月赴熱河 陛見適廓爾喀掠附藏交界之濟隴等  
處 命芝元馳驛回任聽調遣 諭曰昨因慶林等奏廓爾喀調  
集人眾有搶占附藏之濟隴聶拉木情事已降旨該督等於綠營  
並明正裏塘德爾格爾等處番兵調撥速往堵禦並諭令張芝元  
迅速兼程赴四川帶兵前往矣裏塘巴塘德爾格爾等處番兵久  
未檄調見派伊等赴藏防堵或伊等不知出兵大有便宜未能踊  
躍從事上年屯練降番派往臺灣協勦節次得賞頗多此張芝元  
之所深知者而該總兵於裏塘番情又爲熟悉著傳諭該總兵接



奉此旨卽於途次加緊趨行向該番等傳知該番兵知有利益自必爭先效命該總兵卽可帶往應用至該總兵不諳漢文途次祇須趕緊行走不必繕摺覆奏以致轉有耽延也十一月成都將軍鄂輝提督成德先後統兵抵藏 上以理藩院侍郎巴忠熟悉後藏情形 命馳赴會辦番眾旋降芝元往聶拉木收復侵地遂班師五十六年八月廓爾喀圍聶拉木四川督臣鄂輝奏芝元在川年久素爲紅衣喇嘛及廓爾喀頭目所信服請同往軍營時班禪額爾德尼退居前藏後藏戒嚴 命選維州懋功協屯番二千由章谷至打箭鑪口俟芝元至統領前進時將軍福康安究出五十二年廓爾喀侵藏界噶布倫聽巴忠主持許歲給元寶三百私與

賊議和廓爾喀退侵地芝元與聞其事巴忠畏罪自溺死 上以芝元聽從巴忠定議曲宥之五十七年正月偕成德進至聶拉木督兵環攻拋火彈燬其屯糧賊踰牆竄者盡殲之又領屯練兵丁守拍甲嶺隘口斷賊援旋從西牆角挖地道密貯火藥火繩火撚藥發轟動牆屋半成灰燼僅存西北屋數層我軍擁上賊四竄悉就圍擒遂克聶拉木三月大兵勦濟隴由第里浪古徑趨宗喀五月抵擦木兩山夾峙中互山梁賊憑高俯瞰福康安率芝元等力戰破其要隘賊眾殲之得 旨獎賞六月福康安至濟隴促諸路同時進兵令芝元等相機接應副都統阿滿泰繞賊寨乘勢銳進芝元繼之先後殺賊六百餘遂據熱索橋進至密哩頂以山徑險

仄令芝元帶兵修道遂抵旺噶爾七月攻東覺由噶多普閒道行  
兩日至普渡河遇賊戰敗之直趨頭座木城屯兵鼓勇先登克之  
八月攻噶勒拉分軍三路芝元由中路從雍雅山直下賊遙望官  
兵從對山疾馳迎敵至半山左右軍從林箐出奪其東西二卡中  
路軍排列槍箭迎截賊逃回木城攻克之進至堆補木奪橋渡河  
賊眾往來馳突芝元奮力衝殺殲賊目十三賊匪六百餘生擒十  
七賊首拉特納布都爾悔罪乞降廓爾喀平九月觸瘴癘撤回濟  
隴病卒 諭曰張芝元向來帶兵打仗尙爲出力此次進剿廓爾  
喀亦屬奮勉雖前次許銀說和伊曾與聞但究屬巴忠主持伊職  
分較小不能不聽從差委尙有可原今觸染瘴癘在濟隴地方病



國朝通志卷一百一十三  
故殊爲可憫著加恩賞給銀五百兩以資喪葬之費並著查明伊子內如有年已長成者於服闋後送部帶領引見以示軫惜五十八年論平定廓爾喀功復畫像紫光閣列後十五功臣 命儒臣擬贊四川督臣惠齡奏芝元無嗣

右 國史館本傳

張總兵芝元川中人少爲小校隸宋總兵元俊麾下宋撫恤甚厚公感其德後宋公以枉獲罪佗僚而卒其二子皆遭戍公復隨明參政亮征大金川有番僧某爲賊偵凡軍中事無不洩漏公進言明將軍曰軍中機宜動爲賊覺兵家大忌也今番僧受我朝封號乃陰爲賊謀非翦除之則賊無滅日矣明公偉其言會大風雲



乃命公率數十人故爲出差狀投宿寺中公故通番語自取囊中脯鮓與僧烹煮酒痛飲情甚歡洽番僧皆醉飽眠去公出寺聚柴焚之風火酷烈番僧輩皆熱死賊謀乃斷後公屢立戰功洊至參將丙申春金川平凱旋時公書宋總兵戰狀抱一冊哭陳軍門阿文成公訊之公曰非宋公芝元無以致此敢不報其大德況宋公所以獲罪者乃觸怒閫帥羅織其愆天子不知其功也故今陳其戰績乞公轉奏於朝若猶以功微罪重則賞罰出自朝廷芝元心無憾矣文成公笑曰壯士也因代爲奏聞邀恩赦其子歸人皆以爲宋公知人公能報德云辛亥冬廓爾喀再亂搶據札什倫布公率數百孱卒轉戰山崖中時大雪彌漫山谷皆平而

公手大刀指揮番卒皆感激用命卒禦賊歸集孫文靖公曰達賴喇嘛之杵轉不如張總閫之刀靈也時人傳為笑談公以勞瘁卒福文襄王奏於朝上甚悼惜之

右錄宗室昭榘撰

按張公故土酋從征金川以功游擢總兵果羅喀素梗頑經其大創終公世不

敢為邊患

存泰

存泰滿洲鑲黃旗人姓博爾濟吉特康熙六十一年襲其祖桑賽  
所遺輕車都尉世職雍正八年授鑿儀衛冠軍使乾隆十五年擢  
直隸張家口副將十九年十一月調督標中軍副將十二月擢頭  
等侍衛二十年八月擢直隸宣化鎮總兵十月丁父憂二十四年  
補甘肅河州鎮總兵二十七年調陝西延綏鎮總兵二十八年二  
月丁繼母憂九月 命在侍衛班領上行走十月署直隸天津鎮  
總兵三十年署古北口提督三十一年 命往喀什噶爾辦事三  
十三年二月補巴里坤總兵十月奏所屬遊擊富崑馬場被劫戕  
害兵丁遣把總魏進功捕犯行至烏蘭托落海地方逃犯被蒙古

人等所殺。兩禡富崑職自請交部嚴加議處。上以存泰不能嚴緝賊匪。又不飭令富崑親自追捕。以致凶犯潛逃。爲蒙古人等所殺。斥革存泰任。發伊犁效力。三十四年九月。賞總兵銜旋署巴里坤總兵。三十五年四月。實授。三十六年二月。奏發往巴里坤效力贖罪之原任知縣奇山。原任佐領李濤。原任筆帖式吞多。到巴里坤行走奮勉。請賞給奇山職銜李濤吞多。或再畱一二年。或卽令回京之處。將伊等原犯案情繕寫清單進呈。諭曰。奇山係貪婪財物。永不敘用之員。何得奏請賞給職銜。李濤吞多。因飲酒行止卑污。經部議由發遣拉林阿爾楚哈加重改發巴里坤人犯從前若不將李濤吞多加重治罪。僅發遣阿爾楚哈。又何由具奏免



罪令其來京因按例定擬不足蔽辜始加重改發巴里坤豈有轉  
得免罪回京之理且拉林遣犯數年來從無有以行走奮勉奏請  
回京之例存泰此奏殊屬非是存泰著交部議處部議降二級調  
用得旨改爲革職畱任十月調延綏鎮總兵三十七年四月  
陸見上以存泰不勝總兵之任命在頭等待衛上行走十月  
授冠軍使旋賞副都統職銜命往庫爾喀拉烏蘇辦事四十  
年三月將軍伊勒圖奏存泰革職畱任已滿四年可否開復報  
允四十二年九月來京補正黃旗漢軍副都統四十六年二月調  
四川成都副都統四十八年五月遷廣東廣州將軍五十年正月  
與千叟宴五十二年十二月奉旨來京候用上以存泰年雖

老而精神未衰仍留廣州將軍任五十三年七月 諭曰聞此次  
由臺灣回京大臣官員等皆稱廣東綠營兵尙好滿洲兵轉不如  
綠營兵各省駐防滿洲兵丁應操練健銳爲綠營表率如有戰事  
尤當奮勇向前鼓勵綠營今廣州滿洲兵反不如綠營實屬可恥  
存素身爲將軍不知平素如何訓練著嚴行申飭並交部議處部  
議降二級調用奉 旨改爲革職留任十二月 陛見 命署理  
正黃旗漢軍副都統五十四年六月因廣州將軍任內失察副都  
統博清額私用閒房租銀部議降二級留任五十七年閏四月以  
原品休致十一月卒

右 國史館本傳

孫起蛟

孫起蛟甘肅武城人乾隆二十年由行伍補涼州鎮標中營外委二十三年正月隨征庫車打仗受傷補甯夏鎮標前營把總二十八年擢右營千總三十三年調前營千總三十七年六月隨甯夏鎮總兵張玉琦勦金川進攻超越山梁七月隨領隊大臣明亮進攻甲爾木山梁十月遷甯夏鎮標右營守備十一月復隨明亮進攻阿噶木爾拉木山梁殺賊二名奪獲賊卡五處又進攻多公山手膀均受槍石傷又攻阿布爾則日本則單申等處奪獲石城一座礮卡數十處三十八年遷西甯鎮臨洮營都司三十九年隨明亮攻克日旁擢甘肅固原鎮標左營遊擊四十年七月隨欽差大

臣公領隊奎林進攻石真噶有功 賞戴藍翎復進攻郎谷割烏  
右阿爾台等山梁奪碉寨十餘處殲獲賊人三十餘名十二月進  
攻窩勒烏山梁克獲賊人木城二座碉寨十餘處又攻乃帶一帶  
山梁殲斃賊番頭目一名生擒始禍頭目羅爾吉復克達撒谷山  
梁奪獲碉卡二十餘處日夜追殺連克獲獨松金鼎喇嘛寺甲雜  
一帶地方四十一年擢湖北興國營參將四十二年署湖南永綏  
協副將 賞換花翎四十四年遷雲南開化鎮總兵五十一年七  
月調雲南騰越鎮總兵十月 命仍回開化鎮任五十三年出師  
安南五十四年事竣回營五十六年擢廣東提督五十七年卒

右 國史館本傳



常泰

常泰滿洲正藍旗人姓卓佳氏由健銳營前鋒投護軍校乾隆二十一年征準噶爾隨定西將軍永常出師西路在事有功二十三年回京二十九年授護軍參領三十二年三月擢甘肅提標中軍參將三十六年派征金川三十七年二月抵打箭鑪三月由額勒塔爾進攻覺拉喇嘛寺復分兵取黨哩革布什咱番目安邦等內潰殺番眾數十人來歸餘黨奔竄乘勝殲五十餘遂據黨哩九月領兵抵木城十一月擢甘肅洮岷協副將四月因陝兵陳義德乘間脫逃部議降調得旨暫停開缺三十八年正月將軍阿桂奏查革布什咱防兵以所餘陝兵千名飭常泰帶領合爲一營駐紮

斯甲布三十九年七月攻舍衛格羅領兵直趨山頂賊據石卡抗  
拒分兵繞卡後夾攻賊遁入第二卡乘勢深入斬級數十奪碉三  
奏入 命以應升之缺升補四十年四月偕領隊敖成攻甲索克  
其要隘三碉賊驚潰又占左右兩山賊碉七並接連俄坡之東山  
四碉克之七月攻碾占賊棄碉遁十二月由達撒進克險要山梁  
并攻取沿河格爾則砦落奉 旨賞戴花翎四十一年金川平四  
十二年三月擢福建福甯鎮總兵四十三年丁母憂四十四年授  
浙江衢州鎮總兵四十五年 恩詔開復降調處分四十九年調  
福建漳州鎮總兵五十年九月因奏收成糧石分數違例用漢字  
摺部議降調 諭免十二月閩浙總督常青奏南靖縣民人陳薦

等糾眾行劫常泰親率兵役擒獲首夥各犯得 旨議敘加一級  
五十三年正月漳浦縣匪徒張憑求等焚搶鹽場衙門戕殺兵役  
經常泰擒獲首犯督臣李侍堯以 聞得 旨議敘加一級五十  
七年十月奏准 陸見旋以見屆年終稽查地方緊要請 旨暫  
停來京部議降調得 旨降二級從寬畱任五十八年八月卒

右 國史館本傳

UNIVERSITY OF MICHIGAN

ER



俞金鼇

俞金鼇直隸天津人乾隆七年武進士授藍翎侍衛十二年七月發往山東以守備用十五年二月補高唐營中軍守備十七年十月擢甘肅西甯城守營都司二十一年閏九月擢蘭州營游擊二十二年五月調肅州鎮標中營參將二十七年正月擢西甯鎮鎮海營參將二十八年二月擢廣東澄海協副將二十九年十二月調陝西西鳳協副將三十年九月擢廣西左江鎮總兵三十一年正月調甘肅肅州鎮總兵三十二年十月奉旨往伊犁辦理屯田事務奏報起程用驛馳遞諭曰肅州鎮總兵俞金鼇派往伊犁奏報起程一摺由驛馳遞殊屬非是向來各省督撫等於地方

尋常公事俱不准輕用驛馬至以本身私事而由驛遞馳奏於例更爲不合前以總兵吳士勝擅動驛馬奏摺謝恩並請陞見業經交部議以降調今俞金鼇於肅州奏報起程日期自應遣人齎奏何亦擅用驛遞本應一體交部察議但吳士勝屢用總兵屢干吏議且動驛不過因謝恩私事若俞金鼇則係初任且前赴新疆辦理屯務是以姑從寬免三十四年屯田收穫豐裕議敘奉旨加一級三十六年四月伊犁將軍伊勒圖奏綠營兵二千二百名每人收穫米二十八石有餘較往年尤爲奮勉請將總統屯田之總兵俞金鼇交部議敘奉旨加二級三十七年調巴里坤總兵七月奉諭辦理屯田事務三十八年六月調福建漳州鎮總兵九

月擢烏魯木齊提督十一月奏鎮夷營游擊羅爾博多本年例應  
換班請暫畱烏魯木齊幫辦屯務又原任巴里坤游擊富昆原任  
廣東提督王希曾前緣事發往伊犁效力該員等隨同辦理屯田  
不辭勞瘁懇請量賞職銜令駐烏魯木齊專司屯務 諭曰據俞  
金鰲奏鎮夷營游擊羅爾博多前在伊犁跟隨辦理屯務又隨副  
將喬照辦事本年冬底例應換班撤回該員先經豫保應赴部引  
見懇請暫畱烏魯木齊幫辦屯務等語羅爾博多著暫畱烏魯木  
齊隨同俞金鰲幫辦屯務一年後辦有就緒再行給咨赴部又稱  
據革職游擊富昆革職參將王希曾均係發往伊犁效力之員俱  
能實心不辭勞瘁等語富昆咎因失察尙無大過著恩加守備銜

在烏魯木齊專司屯務一二年後如果奮勉出力再行奏聞請旨  
至王希曾前因修理衙署箭道侵冒銀兩以致經手之守備情急  
自戕其情節較重與富昆不同未便一體賞銜但據稱該員見在  
效力奮勉業已三年著加恩賞給千總銜調赴烏魯木齊協理  
屯務該提督仍留心察看如果實在感奮出力俟二三年後再行  
據實具奏請旨三十九年二月奏籌辦春耕事宜見在烏魯木齊  
各屯種地丁五千三百名今春雨雪調勻地土滋潤飭令乘時耕  
種仍派游擊羅爾博多等專心經理以期秋收豐稔 上嘉之四  
十一年八月奏請將沙州副將都司移調安西參將守備原額兵  
數移調沙州綠安西地當孔道差務殷繁稍爲變通防守差役可



兩無貽誤再巴里坤迤西至瑪納斯幅員三百里向未設有墩塘  
須擇有水草地或三四十里或五六十里酌量安設下軍機大臣  
等議行九月會同署烏魯木齊都統永慶奏烏魯木齊提標移駐  
營兵上年秋間以該兵鹽菜銀既經裁汰生計不無竭蹶照安西  
舊例每石以二兩二錢全數折銀實給令其自行買食俾得通融  
日用衣履伏思糧價每至秋成平減值青黃不接則必昂貴若按  
季領銀聽其自行買食勢必隨價低昂仍與生計無益查官兵一  
歲糧餉銀折例於年前秋季委員赴鎮迪道庫領交迪化州存貯  
按季支放莫若乘糧價平減時將一歲應折銀兩酌定鎮兵眷屬  
一年應用糧米若干預將價銀提出選員發給及時買貯營倉按

月散放至採買長贖銀兩同正餉並貯州庫仍按季給發俾各兵日食足而衣服有資再瑪納斯新設眷兵二千名本年冬初先到一千名其應關糧餉亦照提標科則以二兩二錢折銀實給見隨提標糧餉額銀請領該兵等眷屬一例用度口糧勢所必需應請將一歲糧石一體預爲買備 上嘉之四十二年十一月調江南提督四十二年七月調福建陸路提督四十六年閏五月 陸見七月調甘肅提督四十九年正月疏言准督臣李侍堯咨稱固原回民李化玉等隨從河州新教回民田五聚眾滋事著派甘肅提標兵六百名聽候檄調遵卽照數選派預備並密行各鎮營嚴加防範嗣接署涼州鎮副將五十八紮稱表家堡分水鎮有賊滋擾

該署鎮帶兵前往堵禦查裴家堡分水鎮乃固原所屬與涼州甯夏接壤臣率領隊兵三百卽日起程往黃河渡口三眼井蘆塘等處堵截途次接蘭州布政使馮光熊札稱有賊四千餘攻擾靖遠縣城督標兵恐不敷用臣思督臣見帶兵赴固原等處又派督標兵六百名往靖遠一帶防禦見在存兵無多省垣關係緊要況與靖遠相距僅二百餘里臣卽帶兵兼程赴蘭其督臣檄派候調兵亦飛飭赴省協同堵禦再令本標派兵五百候督臣檄調遣發

諭曰據俞金鼇奏報帶兵兼程赴蘭是西路有俞金鼇哈當阿帶兵堵截東路有西安續調滿漢官兵可資策應李侍堯剛塔乘此兵勢厚集會同剿捕賊匪窮蹙無難刻期撲滅尋督兵赴川爲剛



塔後路接應旋因賊人會集馬家堡借涼州副都統圖桑阿由靖遠進剿賊竄馬營街與剛塔等督兵前進多有斬獲因大雨撤兵與賊相對 又諭曰剛塔奏馬營街剿賊情形一摺看此光景較前稍有起色但賊既屯聚馬營街剛塔俞金鼇圖桑阿等所帶之兵俱已到齊卽應各領將兵布置前後左右將賊人四面合圍併力進攻方能一舉集事盡數殲除不致仍前翻山逃竄乃閱摺內該提督等仍會集一處並不籌算及此剛塔惟知在賊後尾追全不想及繞在賊前並督官兵分布左右以期四面圍賊不致竄逸俞金鼇圖桑阿等則以剿賊爲剛塔一人專責伊等如幫辦者然彼此推諉竟無一人實心承辦剛塔俞金鼇圖桑阿著傳旨嚴行



申飭偕五岱奏言臣等督兵分搶賊人所占山頂山卡往返擊壓  
殺賊多名惟時土司楊宗業所帶番兵仰攻東山賊營賊憑高衝  
壓番兵敗走臣等迎擊救護賊方退值天晚賊夜遁偵知竄往石  
峯堡又奏石峯堡賊糾合會甯回民同往堡內四路糾眾至數千  
人又奏副都統明善帶兵往石峯堡進剿賊從高阜撲下明善受  
傷陣亡俞金鼇等復奉 旨嚴行申飭旋帶兵進剿烏家坪又追  
擊伏羌賊匪斃頭目三生擒二十九人轉戰至秦安縣屬之土鼓  
山賊敗竄蓮花城六月追賊至雙峴隨五岱李侍堯由中路進又  
福康安奏大兵進剿石峯堡底店一帶係糧運後路令俞金鼇帶  
兵扼要防範又經阿桂奏稱底店乞降之士著回民見畱俞金鼇

國朝通志卷之三十三  
帶兵在彼駐劄彈壓七月逆回平凱旋回京金鼇調湖廣提督是  
月 上命軍機大臣傳諭福康安曰昨召見提督俞金鼇據奏稱  
經過逆回地方所有廟宇俱被焚燒神像亦多殘毀皆逆回惡貫  
滿盈以致獲罪神明白取殲滅其有廟宇未經焚燒而神像殘毀  
者自當量爲修葺裝塑整肅若所燒各廟宇基址全無者卽不必  
另行建蓋著傳諭福康安查明辦理又據奏稱聞得從前陝甘兵  
丁平日皆預備乾糧一遇征調卽可剋期起身自平定準噶爾回  
部之後遂因循不復儲備等語兵丁乾糧自當平時籌辦以備緩  
急之需如恐有霉朽原不妨出陳易新抵放兵餉並著畱心妥辦  
以復從前舊制五十年正月入千叟宴五十一年四月調直隸提

督未起程適湖南辰州府鳳凰廳所屬句捕砦苗人石滿宜等聚眾搶奪拒捕滋事聞報卽親往查拏疏入 諭曰鎮筸鎮所屬各砦苗人安居向化已久與編氓無異何以有此等搶奪勒贖負隅抗拒之事或係聞臺灣賊匪聚眾滋事從而效尤不法亦未可定俞金鼇等一聞稟報卽親身馳往查拏審究所辦甚是此案固不可過事吹求波及無辜亦不可將就完案使苗民無所做畏日後又滋事端俞金鼇亦曾出兵自能相機妥辦諒不致如黃仕簡任承恩之貽誤也見在直隸提督有李奉堯署理俞金鼇不必急於前往候查辦事竣再來新任亦不爲遲旋奏鎮筸鎮總兵尹德禧督率將備兵丁直搗賊巢生擒首逆石滿宜等 諭曰湖南句捕



此賊人石滿宜等搶奪拒捕滋事不法一案經總兵尹德禧親率將備官兵前往直搗賊巢立時平燬生擒首犯石滿宜等並殺賊苗五十餘名所辦妥速可嘉已降旨將該撫提鎮交部分別議敘並賞給大小荷包以示獎勵矣此案起事之初提督俞金鰲已調任直隸一聞稟報卽親帶兵馳往該處嗣聞鎮道等業已擒獲首惡平毀賊巢俞金鰲所帶弁兵撤令歸伍仍行親往查辦所見甚是見令查明出力官弁及搜拏逸犯該提督於楚省苗地情形素所諳悉著仍畱湖廣提督之任以資駕輕就熟俞金鰲會同浦霖將一切事宜詳悉籌辦俾苗疆永資綏靖方爲妥善十月因臺灣勦捕逆匪林爽文尙未戡事挑湖南兵二千派鎮筵鎮總兵尹德



禧管帶赴閩 諭曰湖南鳳凰廳地方前因苗匪滋事甫經尹德禧搜捕淨盡該處雖係苗疆緊要必須大員在彼駐劄以資彈壓著俞金龍卽行前往該處駐劄兼理總兵事務十一月部議湖南派往閩省兵丁辦理遲延奉 旨俞金龍免其察議五十四年十二月 陸見奉 旨在乾清門行走五十五年正月 賜紫禁城騎馬三月回任五十八年六月奉 旨俞金龍奏二麥收成一摺已於摺內批示至該提督於上年冬間曾患駁疾降旨詢問雖已就痊旋據覆奏連服補劑但近日精神是否復元一切營伍事宜能否照常辦理不致貽誤著傳諭該提督卽據實覆奏以慰廑注七月奏病勢刻難復元奉 旨該提督平日尙爲出力不忍擯置

但營伍關係緊要亦未便任其貽誤著畢沅察看其精神若何據實覆奏九月湖廣總督畢沅奏俞金鰲體疾未能卽痊懇請解任回籍 諭曰俞金鰲在提督任內年久今因年老患病懇請解任著准其解任回籍並加恩賞給左都督銜以示優眷是年十月卒

右 國史館本傳

俞金鰲直隸天津人乾隆五十一年任湖廣提督當調以熟諳苗情復畱在任九年寬嚴並濟遇地方紛擾事雅善調劑軍民交德之

右傳李元度撰

蔡鵬

蔡鵬江南丹徒人乾隆二十五年武進士授藍翎侍衛三十年七月授貴州仁懷營都司三十二年七月出師緬甸戰老官屯尋遷提標右營遊擊三十六年十月調赴川省隨將軍溫福征小金川保列超等三十七年二月攻日爾砮受槍傷列爲超等三次時賊屯聚資哩官兵由南北山梁分勦鵬帶兵力追賊躡水奔竄殺傷淹斃者甚眾克資哩 賞戴花翎十一月官兵攻明郭宗鵬隨往南山自恪什底下壓與東面山梁兵會合夾攻賊棄礮竄克明郭宗一帶山梁議敘加一級三十八年正月隨攻大金川保列超等三十九年正月擢朗洞營參將先是鵬將貴州戰兵席開基作爲

家人差回黔省令人頂食名糧伊子曾帶開基赴軍營中途迷失事在三十八年至是鵬恐敗露呈報脫逃將軍阿桂查知奏參請旨革職解赴成都交文綬轉解黔省審辦 諭曰此案情節業已詢明毋庸解往黔省質訊蔡鵬卽著革職作爲兵丁畱於軍營自備資斧效力贖罪四十年四月隨攻木思工噶克及得式梯等處阿桂奏鵬自獲罪後力思報效於西路勦賊奮身受槍傷請以鵬補授湖南辰州協都司照革職畱任例扣滿年限再請實授得旨准其補授十一月遷長安營游擊四十四年十月擢提標中軍參將四十六年九月擢長沙協副將四十九年正月署永州鎮總兵三月署鎮筵鎮總兵五十年八月丁母憂五十三年服闋授山



西蒲州協副將五十六年四月署太原鎮總兵五十七年七月奉  
旨雲南開化鎮總兵員缺著蔡鵬補授五十八年十一月卒

右 國史館本傳

國朝通志卷之三十三

三

--	--	--	--	--	--	--	--	--	--

劉國樑

劉國樑直隸任邱人乾隆十九年武進士授三等待衛乾清門行走二十六年授雲南提標都司三十五年從征緬甸有功定邊右副將軍阿桂奏請議敘三十六年升雲貴督標左營遊擊尋遷騰越營副將四十年二月擢陝西延綏鎮總兵隨征金川四月進攻木思工噶克了口偕總兵官達色等奮勇截殺各路援賊五月官兵進克下巴木通等處國樑偕副都統烏什哈達總兵海祿等連破了口左首木城石礮復帶兵直上榮噶爾博大山梁占奪礮座連戰二日自第一峯至第七峯悉下之擒斬甚夥獲器械無算七月偕著總兵特成額帶兵進攻榮噶爾博第八九峯及巴占穆古

一帶碉卡所向克捷進至冷角寺從高下壓悉焚寺旁砦落直逼勒烏圍賊巢四十一年兩金川大功告成調雲南永順鎮總兵賞戴花翎圖像紫光閣列後五十功臣內 命儒臣製贊四十二年五月調騰越鎮總兵九月雲貴總督李侍堯奏前據總兵劉國樑稟稱守備蕭掄第精力就衰意欲乞休其詞意似有畏懼調考情事嗣以該員雙目昏盲詳請勒休復經批駁不准始將蕭掄第送驗見其兩目並不昏盲惟騎射實屬不堪請將蕭掄第革職總兵劉國樑既經姑息於前復思回護於後請交部嚴加議處部議降三級調用上改爲革職畱任 諭曰總兵有督率營弁之責李侍堯將劉國樑附參理所宜然第念該鎮在金川軍營效力奮



勉若因此遽行降調未免可惜著李侍堯諭知該鎮此案本應照例降調念其在軍營曾經出力是以此次姑從寬畱任劉國樑當感激朕恩倍加勉勵毋致終蹈綠營惡習若不知悛改再有過愆不能復爲寬貸矣四十三年調開化鎮總兵四十四年九月李侍堯奏參開化鎮標右營軍械局於本年六月十三日被火焚燒幾及一日該地方文武等員匿不具報總兵劉國樑並不據實揭參請交部議處 上以其遷延一月不卽揭參 命交部嚴議並諭李侍堯卽將劉國樑辦理營伍才具如何能否勝總兵之任據實具奏尋奏劉國樑辦理營伍才具平常難勝總兵之任 命解任來京交部帶領引見旋發往伊犁效力年滿請 旨 命再畱二

國朝人物志卷之三十三

三十三

年五十一年釋回 命在巡捕營當差尋署東河沿河守備以母老請終養回籍五十八年卒

右 國史館本傳

寶琳

寶琳伊爾根覺羅氏滿洲正黃旗人乾隆十一年投固山額駙十九年保送鑾儀衛整儀使二十一年補治儀正二十五年升雲麾使三十年遷冠軍使三十四年發貴州以副將用三十五年補貴州清江協副將三十八年金川滋事經貴州巡撫覺羅圖思德提督拜凌阿檄令帶兵由西路進征六月抵軍營尋隨參贊大臣海蘭察雲南提督常青由北山梁進攻克復小金川鄂什克美諾等處寨落礮卡三十九年正月隨領隊大臣伍什哈達進征大金川搶過谷噶了口並占據喇穆喇穆左右山梁又攻克僂巴拉克色依登古對面山梁及羅博瓦等處礮寨六月隨海蘭察進克邁過

爾山梁及格魯古了口各處寨落四十年七月隨領隊大臣伍什  
哈達威甯鎮總兵特成額由榮噶博搶至勒烏圍攻克賊巢經定  
西將軍阿桂等保奏 賞戴花翎十一月擢甘肅肅州鎮總兵四  
十二年丁父憂回旗四十三年署直隸正定鎮總兵四十四年調  
署秦甯鎮總兵奏 秦東陵新添堆撥周圍地面共三十餘里僅  
設額外外委二員巡防恐有未周請在原設馬兵內再挑額外外  
委二員慎重防護得 旨俞允是年服闕實授秦甯鎮總兵四十  
六年調天津鎮總兵四十九年署山海關副都統五十年二月奏  
從前原賞山海關旗員地畝內餘地三十八頃有奇每年差兵收  
取糧食多有遲延不給向交該處地方官轉催交納而責成不專



反致兩誤嗣後應請將此項糧石徑交地方官催齊變價暫存本署由副都統處按季出具印結支領所有口外冷口喜峯口二處地畝亦請一律辦理下部議行十月擢浙江杭州將軍五十二年以臺灣林爽文滋事 命挑駐防滿兵一千五百名派令赴剿五十四年奏乍浦旗兵自乾隆三十三年裁披甲一百名迄今年久生齒浩繁未免拮据請於閒散內仍挑補披甲一百名每名每月給銀一兩以資生計 從之五十八年十一月以奏參杭州駐防協領咨參佐領以下各官降革勒休並註銷記名者四十餘員上恐其有意苛求以爲見長地步 命閩浙總督長麟浙江巡撫吉慶等確查密奏尋覆奏將軍寶琳平日御眾嚴明操防勤慎復

密訪其所參各官輿情亦稱平允並言杭州乍浦滿營婚嫁論財相沿成俗往往有髫年許字因男家無力納采婚嫁失時而該管章京狃於積習並不設法催辦自寶琳到任後查明各旗婚姻已定因索財而不能迎娶者數百餘家俱經勒限官爲完配其有孤兒寡婦惻獨無依者據實查明按月給與養膳 上嘉之寶琳又以歲費不敷請將從前裁馬案內所餘廠地賞還一萬五千畝每歲收租以濟孤寡養膳之費得 旨允行五十九年二月調吉林將軍九月卒 諭曰寶琳在將軍任內年久辦事尙屬妥協今來京陛見遽爾溘逝甚屬可憫著加恩賞銀五百兩辦理喪事其應得卹典該部察例具奏尋 賜祭葬諡勤恪

右 國史館本傳

國朝書目

卷三十三 將帥三十三

三

月才在才港

二九二五二二二

二二



梁朝桂

梁朝桂甘肅中衛人由行伍拔補甯夏鎮中營外委三十七年派  
剿金川六月隨將軍溫福攻路頂宗布朗郭宗等處功列超等三  
十八年正月補陝甘督標中營把總同官兵攻剿噶爾拉賊碉直  
抵了口奪卡三月進攻昔嶺第五碉受石傷五月遷甯夏花馬池  
千總九月擢涼州鎮番營守備十月隨將軍阿桂攻阿喀木雅賊  
碉多斬獲十一月擢陝甘督標中營都司三十九年六月克色布  
湖普木城石碉進攻喇穆喇穆山梁碉卡並奪取日則了口四十  
年二月剿勒吉爾博賊砦朝桂奮勇先登受槍傷擢甘肅西甯鎮  
歸德營遊擊四月攻木思工噶克山峯潛師深入賊眾聞聲抵禦

各礮槍石齊發朝桂先搶東北隅戰礮呼聲四合盡克木石礮將  
康薩爾至了口一帶山峯擊柵占據得 旨梁朝桂著加一等卽  
行升用並賞戴花翎七月擢江南鎮江營參將閏十月官兵搶上  
西里山梁並攻克礮卡出力將弁下部議敘得 旨梁朝桂著加  
一等紀錄二次四十二年二月擢陝西潼關協副將金川平凱旋  
上錄朝桂功爲後五十功臣 命儒臣擬贊圖像紫光閣四月擢  
江西南贛鎮總兵七月 陛見調陝西興漢鎮總兵四十二年十  
一月調甘肅肅州鎮總兵四十六年十月李侍堯劾都司福昆守  
備臧應隆年力就衰總兵梁朝桂不早揭報至檄調考驗始請解  
任勒休請交部嚴議得 旨降三級調用四十七年二月 諭梁

朝桂前在肅州鎮總兵任內因不將年力之衰頽都司福昆等揭報經李侍堯奏參部議降調總兵職司行伍考察將弁是其專責乃一任衰朽戀棧不行揭報予以降調實屬咎所應得第念梁朝桂曾經出兵打仗頗爲奮勉尙堪棄瑕錄用著加恩補授福建福甯鎮總兵其降級之案帶於新任八年無過方准開復四十八年十一月調廣東高廉鎮總兵五十二年三月臺灣逆匪林爽文滋事命帶粵兵會剿六月抵軍營賊目莊大田夥匪焚劫蔦松督臣常青檄朝桂領二隊兵往擊斃賊二百餘七月賊眾七八千人圍大營三面朝桂督戰斃賊三百餘八月賊復犯大營朝桂擊退之常青恐南路賊潛往北路合擾諸羅檄朝桂帶兵堵截敗賊於

南潭中洲又往正南十三里莊巡哨遇賊邀擊槍斃二三百人九月常青派朝桂帶兵二千同道府駐守郡城營盤自與參贊恆瑞帶兵五千往北路剿鐵綫橋及附近鹽水港等處尋有賊三四千來犯營並分攻桶盤棧擊退之十月恆瑞在鹽水港剿賊常青檄朝桂帶兵往援十一月抵鹽水港即日領兵剿捕燒毀賊寨 諭曰總兵梁朝桂帶兵前往鹽水港一帶剿捕賊匪甚爲奮勇著賞給奮勇巴圖魯名號並照例賞銀一百兩以示獎勵是月恆瑞督同朝桂於新店等處剿賊收復鹿仔草開通沿海道路前赴諸羅福建提督柴大紀奏言接總兵梁朝桂咨稱恆瑞已抵鹿仔港統計征兵不過一千餘須再稟恆瑞於各營酌調方能進援並聲明



凡事皆恆瑞主見事之能行與否不敢自專等語奏入 諭曰據柴大紀奏接總兵梁朝桂咨稱凡事皆由恆瑞主見等語是梁朝桂亦知柴大紀處望援甚切急應前進而語意之間似不免有掣肘之處梁朝桂職係總兵自不能不聽參贊調度其不敢自專之語自非飾詞伊見恆瑞觀望不前卽稟請抽調營兵思欲攻打前進尙屬具有良心何以恆瑞轉若視同膜外恐竟係心忌梁朝桂先往得功故以是爲掣肘且柴大紀所奏惟以恆瑞普吉保不卽前往應援爲言而於梁朝桂稟請恆瑞撥兵之處代爲聲敘是柴大紀亦知梁朝桂實有赴援之心而於恆瑞不能不舉其有心牽制設使梁朝桂亦屬虛詞何以柴大紀不一並斥言其非況梁朝

桂並未與柴大紀共事一方可見其言並非有所迴護看來恆瑞竟係按兵不舉或因不能親自往援柴大紀而梁朝桂稟請赴援竟至有心阻止著福康安卽確切查明並訊問梁朝桂及隨營將弁儻恆瑞果有此等情節卽據實嚴參不得稍有徇隱十二月兩廣總督孫士毅駐劄潮州奏朝桂在正平莊剿賊身受重創猶力戰得勝 諭曰梁朝桂在鹽水港帶兵奮勇曾經賞給巴圖魯名號此次剿捕賊匪又能奮勇出力實爲綠營鎮將中出色之員但前據柴大紀接到梁朝桂咨內以所帶征兵不敷攻剿面稟恆瑞於各營盤酌量抽調再行前進並稱凡事皆由恆瑞主持事之能行與否不能自專等語已降旨令福康安查訊具奏今看梁朝桂

打仗受傷情形是伊頗能勇往直前身先士卒前次稟請恆瑞抽撥官兵攻打前進之語自係急欲應援柴大紀而恆瑞不能用彼或竟有心忌梁朝桂先往得功故爲掣肘之處著再傳諭福康安切實訪查覆奏將軍福康安抵鹿仔港令梁朝桂帶兵仍駐鹽水港鹿仔草兩處防守五十三年正月以麻豆莊大武隴等處係通郡城要道南路賊尙屯踞檄朝桂帶兵堵剿旋擢福建陸路提督二月賊目莊大田等據大武隴負嵎死守派朝桂駐劄茅港尾帶兵繞至阿里港一帶迎截尋赴打狗港竹仔港海口截擊逸匪福康安由風港進剿直至柴城官兵分六隊層層圍逼賊衝突不能出莊大田及頭目四十餘名全數就擒臺灣平 上定爲二十功



臣圖像紫光閣朝桂與焉 御製贊曰金川勦逆又奪了口鹽水  
恆瑞未免掣肘及防麻豆禦賊堅守受創力戰嘉哉鮮偶六月赴  
本任十月 陛見五十四年五月朝桂奏臺灣水師陸路原設戍  
兵一萬二千一百七十六名新添戍兵一千二百名經福康安奏  
明分四起更換陸路與水師提督互相稽查臣於三月內赴廈門  
點驗並無老弱及技藝生疎丁卒於四月配渡完竣一面咨臺灣  
鎮總兵奎林將征戍各兵預行擬定俟內地兵船到日查照更換  
回營再聞省營伍急應整頓臣自廈門順查汀州漳州鎮屬點驗  
軍裝器械馬匹濱海之區早晚氣候清涼兵可操演至福甯建甯  
二鎮俟秋閒前往巡閱奏入 上嘉之六月奏查閱營伍至邵武



據左營兵丁馬雲等稟守備糧房字識符章串通參將衙門傳號馬成功剋扣領餉使費差銀右營兵丁陳文彩等稟都司糧房徐助等剋扣運硝腳費並各兵出征借給裹帶銀兩請將參將張潮署都司守備余朝佐等革審得 旨交伍拉納嚴審定擬具奏是月閩浙總督伍拉納奏金門鎮標巡洋兵船被劫獲犯彭庇等五十五名審擬抵法 諭曰伍拉納奏金門鎮標巡洋兵船被盜行劫一案審明正法共五十五名之多可見該省肆劫之風雖屢經嚴加懲治尙未能斂跡朕心深爲廬繫必須能事提督大員會同該督認真整頓方足以戢盜風而靖海疆梁朝桂才具不如海祿之歷練而廣西見又無緊要事件已明降諭旨將海祿調補福建

提督其廣西提督員缺著梁朝桂調補五十八年九月調補湖廣  
提督五十九年六月 諭曰據彭承堯奏巡閱通省營伍關隘情  
形一摺所辦俱屬認真至摺內稱千總把總外委等弁騎射生疎  
咨部革休又參將胡松阿遊擊阿爾綳阿都司齊東冠俱老病不  
能騎射咨會督臣題參請旨勒令休致等語粵西爲邊疆要地所  
有該處營伍自宜勤加訓練隨時整飭千總把總等官雖係微末  
亦不當以騎射生疎之人任聽濫年至參將遊擊都司爲營中表  
率而旗員更不應令其戀棧尤應畱心考覈如有精力衰憊弓馬  
平常者自當卽時參劾毋令遺誤營伍今提督彭承堯甫經調任  
所奏革休各員除千把外委竟有參將遊擊都司等員均因衰老

患病不能騎射而胡松阿及阿爾綳阿俱身係旗員更不應任其  
衰老遺誤可見該省營伍廢弛已非一日各省營伍事務總督提  
督俱有總轄之責似此大小營弁技藝生疎皆由總督提督平時  
因循積玩所致提督梁朝桂見已調任湖廣而從前粵西任內不  
能整頓營伍咎實難辭梁朝桂著交部嚴加議處以爲廢弛者戒  
部議革職得 旨梁朝桂著改爲革職從寬畱任八年無過方准  
開復十月卒

右 國史館本傳

梁提督朝桂少爲黔中步卒從征金川時勒烏圍爲賊壘之險峻  
處兩次捷伐皆阻於其險不能進攻阿文成公圍之經年未得進

取梁公奮然進曰朝桂聞將恃鬪才不藉鬪力今賊壘堅礮叢立我兵仰而攻之彼據建瓴之勢下以擊我人非木石焉能抵槍礮之險是殃民也今不若覓他嶺嶂爲賊所不守者繞道以攻其後可使賊進退失險我勒兵以擊之可收功於旦夕此狄東美所以下崑崙關之故策也阿文成公奇其言與之數百卒立授參將劄付公因率眾卒草衣卉服自叢嵐疊嶂閒以刀掘路士卒各懷一鐵釘踵跡相接攀釘而上至夜半抵賊壘於營後攻之賊以爲自天而降倉卒奔竄官兵仰攻其下賊遂盡殲後公游至廣西提督征臺灣時亦著績云

右錄宗室昭榘撰



五岱

五岱黑龍江人姓瓜勒佳乾隆十八年以前鋒入滿洲正黃旗二十年隨征準噶爾阿睦爾撒納叛逃五岱被掩襲力戰得脫特賞藍翎侍衛二十三年四月以勦恩克圖塔爾巴等功授三等侍衛五月 賜墨爾巴圖魯二十四年以葉爾羌戰功授二等侍衛二十五年正月投頭等侍衛在乾清門行走嗣因護送霍罕使人奉 命至齋里克額德格納霍罕等處宣示 聖諭十月回京授正黃旗漢軍副都統二十六年 賞騎都尉世職三十六年九月征小金川奉 旨授參贊大臣十一月 諭曰溫福見已馳至巴朗拉扼其要害而五岱又係優於帶兵之人自能制勝但其地山

嶺險峻並與賊巢相近礮卡又多進剿亦非易事溫福務當善體  
朕心加意慎重十二月將軍溫福奏臣等向陽平地方察看巴朗  
拉山勢險峻賊建大礮七上有二峯較各礮更高官兵進攻連奪  
賊礮六占據東面礮後高峯嗣因賊屢次衝突綠營兵怯懦將已  
占山峯失去黔兵到日再相機攻剿 諭曰五岱進攻巴朗拉殊  
爲黽勉著加恩補授正黃旗蒙古都統軍功加一級紀錄二次旋  
偕溫福攻克巴朗拉三十七年正月偕溫福取達木巴宗分兵由  
別斯璊瑪爾瓦爾濟會合資哩俱降二月奏臣遣副都統烏什哈  
達駐守色布色爾地方截殺竄賊又令總兵馬彪帶兵協剿二人  
不遵節諭坐失事機請革職畱營效力 諭曰據五岱奏參烏什

哈達馬彪不遵號令請一併革職令其效力贖罪溫福奏內又稱  
烏什哈達私離汎地卽欲辦理烏什哈達遂帶兵復往占據山峯  
等語伊等不遵將軍號令固不得謂之無罪但溫福卽欲辦理烏  
什哈達亦覺過當烏什哈達馬彪俱著加恩革職畱任令其出力  
贖罪又諭曰五岱密奏摺內有溫福自以爲是不聽伊言頗寒  
官兵之心等語朕謂將軍參贊大臣在營辦事必彼此一心方於  
軍務有益今五岱所奏則已露彼此不睦之意朕已將其摺片焚  
燬並降旨詢問阿桂若使溫福亦如當日訥親在軍營時偷安退  
縮足不一至接仗之地但知嚴促兵丁進攻則不但五岱應行奏  
參卽阿桂亦當聲明其故一同奏參昨日密寄阿桂諭旨竟不必

機密卽令溫福五岱阿桂同看或果係溫福性暴輕視五岱致寒將士之心溫福卽當自悔從前之失朕意五岱在軍營較之溫福更多歷練或因一時不能攻取資哩恐溫福委罪於伊乃以此密奏爲先發制人之計其欲自占地步已屬顯然著溫福五岱阿桂據實奏聞又奉 旨嚴飭溫福又奏五岱剛愎自用不與會銜並攻取巴朗拉時綠營兵驚退五岱不能禁約詐稱受傷昏暈又五岱自成都來營沿途騷擾搶換驛馬 諭曰溫福奏五岱種種任意乖謬妄行著派御前大臣公豐昇額參贊大臣固倫額駙色布騰巴勒珠爾前往軍營將所降諭旨至溫福處當面曉諭並訊問五岱此等情事如果屬實卽革去參贊大臣作爲兵丁自備資斧



效力此旨到時阿桂卽代五岱領兵將五岱換至溫福隊內如五岱之意以爲難攻地方派其攻剿亦未可知令阿桂統兵阿桂若能攻克其處五岱更有何說四月色布騰巴勒珠爾等奏嚴訊五岱巴朗拉打仗詐傷退避並成都起程搶換驛馬俱不認復傳訊五岱隊內之侍衛等亦稱並無其事請將五岱革職畱軍營效力贖罪 諭曰色布騰巴勒珠爾豐昇額辦理此事甚爲錯謬摺內但將無關緊要之事審實數款其有關係緊要者如五岱奏參溫福僅圖安逸並不親身打仗致有失機如果屬實則罪在溫福若無此事卽係五岱居心奸險自占地步事之有無皆軍營官兵其見其聞有何難於剖白何以伊等皆未詳悉卽或溫福誣奏五岱

伊等亦當並參溫福勘取兩造合詞定案不可徒執一面之供作爲證據再如五岱奪取驛馬之事五岱不肯承認卽當查明更換何驛之馬提同質審斷無不得實情之理若祇將五岱之侍衛官員審訊伊等訐告五岱卽係訐告自己且旁無證見自不肯承認凡事務得實情斷不可以顛預了事著傳諭色布騰巴勒珠爾豐昇額另取兩造供詞其孰是孰非之處務在逐一審明具奏五月色布騰巴勒珠爾等奏詳查五岱溫福彼此互劾實由溫福輕視五岱起釁報聞溫福旋奏五岱色布騰巴勒珠爾朋比爲奸陷臣於罪諭曰溫福奏五岱搶馬詐傷種種妄行不可仍在軍營著將五岱鎖拏卽交色布騰巴勒珠爾同軍機章京明德押解來

京又奉 旨五岱解赴熱河交軍機大臣嚴審具奏時福隆安等  
又奉 命赴川奏臣訪查五岱並無搶奪馬匹詐稱受傷等事色  
布騰巴勒珠爾亦無袒護實情報 聞七月軍機大臣奏嚴訊五  
岱言多支飾屢經研詰語塞不能置辨 諭曰五岱意欲奏參溫  
福自占地步亦屬小人常態但無顯然實證朕亦豈肯以未形之  
事苛求治罪五岱著發往伊犁自備資斧效力贖罪十二月 諭  
曰五岱雖有烏拉齊習氣曾經閱歷行陣昨在西路軍營尙無大  
過著加恩授爲藍翎侍衛派往西路交阿桂酌量差遣三十八年  
六月副將軍阿桂奏五岱帶兵熟練見令帶土兵星赴美諾明郭  
宗等處相機夾擊尋奉 旨授頭等侍衛木果木師潰七月大兵



駐宜喜 命五岱爲頭等侍衛帶黔兵赴宜喜軍營嚴防後路八月 命阿桂爲定西將軍九月同副將軍豐昇額領兵從丹壩進攻三十九年正月 命爲參贊大臣授正藍旗蒙古副都統尋偕豐昇額奏臣等攻凱立葉奪卡因山峻未能准阿桂咨谷萬地方可進兵臣豐昇額隨分兵往剿 諭曰凱立葉一路旣難進不可過於株守畱五岱在凱立葉牽綴賊勢而豐昇額前赴阿桂軍營合力進攻兵威更盛於事更屬有益著傳諭五岱於撥兵前往時務須妥爲照料勿使賊人得以伺我兵之隙方爲妥善四月奏後路孟拜拉等地方各派兵駐守臣領兵一千七百餘駐凱立葉賊屢次來衝俱被官兵擊退 諭曰五岱將凱立葉一路所餘兵



丁分駐防守並兩次擊敗賊眾甚屬可嘉凱立葉一路雖暫不能  
深入然嚴守地方實爲緊要如稍不畱意以致失利於全軍聲勢  
關係匪輕將此傳諭五岱嚴飭各處官兵晝夜嚴防至阿桂處聲  
息尤當時刻探聽如彼處得利五岱亦可相機直入並將此傳諭  
阿桂知之五月奏軍營陸續所出護軍校等缺揀選應升人員請  
旨補放 諭曰軍營所出之缺固當揀選人員請補但參贊大臣  
俱係協同將軍辦事之人凡事自應會同商酌斷無自專之理五  
岱所辦非是又奏臣見於凱立葉山梁至達哩克山谷營柵俱擇  
要地安設又於谷萬凱立葉中間設卡三座畱兵防守 諭曰五  
岱所辦甚屬可嘉十一月阿桂等奏遜克爾宗爲勒烏圍緊要隘

口擬令五岱移駐日則了口尋帶兵協攻珠寨并鳴朗鳴各寨大  
兵克勒烏圖五岱從東北入遂率兵駐守金川蕩平畫像紫光閣  
列後五十功臣 命儒臣擬贊四十一年二月 命爲塔爾巴哈  
臺領隊大臣四十五年授正白旗護軍統領四十九年五月從塔  
爾巴哈臺回京至蘭州聞逆回滋擾奏請赴督臣李侍堯處候調  
協勦得 旨嘉允 諭曰從前五岱在西路金川屢著勞績曾爲  
參贊大臣於行軍事宜最爲諳習朕所深悉李侍堯正當委其領  
兵進勦經陝甘總督李侍堯奏五岱已至靖遠臣以其久在軍營  
人亦老練特令帶滿洲兵二百赴提臣剛塔行營報 聞嗣偕副  
都統永安固原提督剛塔等奏臣等追馬家堡竄匪殲數十獲賊

兵供稱石峯堡見有賊千餘並脊口數千將竄往伏羌秦州一路隨率兵追勦至鹿鹿山賊踞山頂劄營道路險狹當設法取之諭曰據五岱等奏賊匪家眷既有數千口踞石峯堡前往伏羌秦州伊等此時何不派兵分路前赴該處截住賊人並將賊犯家屬盡數擒斬勿使又得與賊人聚會著五岱等卽遵旨於永安八十五玉柱等數員內酌派一員迅速帶兵前往勦辦西安將軍傅玉等奏官兵見在鹿鹿山勦賊因大雨霧相持數日偵有賊千餘從山後繞往烏家坪離此七十里臣等另分兵進勦 諭曰前以五岱等奏賊人藏匿鹿鹿山朕恐賊復翻山逃遁並慮石峯堡之賊繞出我軍之後滋擾屢有旨訓諭五岱等當加意防範今思軍營

見在兵力已不爲少五岱等何不分遣遊兵於賊人出入要隘四路分投偵探旣可以得賊營實在情形兼可以斷賊勾結匪徒接濟糧食之路正在降旨飭諭聞復據五岱等續行奏稱有賊千餘名從鹿鹿山後繞出果不出朕之所料總由五岱係客官不能作主而侍堯剛塔失志張皇毫無籌辦昨已有旨傳諭福康安星速馳赴該處督辦此時五岱等務當於要隘處所嚴密防堵或繞出烏家坪之前以截賊人去路勿使乘閒遠颺四出滋擾旋命署固原提督六月勦賊於伏羌城外殲斃三百餘奏聞又偕李侍堯等奏官兵在伏羌勦賊殲斃頭目三賊竄山梁隨督兵搜捕其獲二百三十餘名內有良民分別釋放餘俱正法上嘉之又偕



李侍堯等奏伏羌賊竄往雲霧山我兵分兩路直搗賊營殲二百餘賊回山支守 諭曰五岱等見在剿賊漸有起色賊人經官兵兩次殲戮已有五六百名三德又帶兵到彼遏其前路與五岱等兩路會剿是伏羌城外之賊匪不滿千名無難迅速殲除該處賊匪剿捕淨盡官兵無庸兼顧南路更可專心進剿又偕李侍堯等奏雲霧山賊追至秦安縣屬之土鼓山據靜甯知州涂躍龍報有逆回二三千在城下焚掠查賊人從土鼓山竄往蓮花城有兩路一走石峯堡一走靜甯州當派兵赴靜甯州蓮花城迎剿報 聞又偕李侍堯等奏賊匪共有四路一據馬家堡一屯石峯堡一在伏羌糾眾助逆一在播隴山合聚滋擾今查播隴山賊人在靜甯

州劫掠餘三路俱會於伏羌經官兵屢次剿殺賊勢窮蹙沿途拋棄器械並說稱官兵煽誘良民臣等出示曉諭民間爭擒首賊來獻見在駐田家山賊卽在對面山梁劄營當相機進剿 諭曰據五岱等奏稱賊人所過村莊輒說稱官兵剿洗回民藉此煽誘經五岱等出示曉諭是以各處多不肯從賊並有拒擊賊匪割獻首級及生擒解送者此等更當查實是賊見已無從四出勾結諒福康安數日內卽可將底店之賊剿盡肅清後路與五岱等會赴石峯堡設法四面堵截攻圍竚聽捷音之至又偕剛塔奏查回民充各標營兵者甚多其中難保無暗從新教之人當隨勢訪察至賊匪眷口見擒獲正法者五百餘人報 聞又偕李侍堯等奏臣等

於初六日行抵靜甯正擬攻勦接福康安來咨於初七日到隆德與臣合兵大舉隨即咨覆先將由靜甯至底店進兵路徑繪圖封寄俟福康安到即合兵分路進勦 諭曰五岱等奏近來籌勦賊匪較前略有主意福康安卽日到彼有所倚仗精神漸能振作福康安抵靜甯後與五岱等併力進勦底店賊匪無難卽時殲盡是月尙書福康安等攻克底店殲戮甚眾遂進攻石峯堡七月帶兵搜捕黑吃塔白楊嶺二處餘匪陸續擒獲四十餘名並遣兵拆毀牀子灘禮拜寺八月回匪平 諭曰五岱係塔爾巴哈臺班滿回京之人路過甘省卽自奏畱該處協勦且於福康安未到之先在伏羌等處擊退賊匪頗爲奮勉著授爲都統給予騎都尉世職尋

授蒙古都統乾清門行走侍衛充上書房總譜達五十八年授領侍衛內大臣五十九年十二月卒長子伍明阿承襲騎都尉嘉慶三年伍明阿卒長孫阿克敦布襲七年阿克敦布卒次孫木克額襲次子佛楞保見任鑲黃旗漢軍副都統兼乾清門侍衛

右 國史館本傳



國朝耆獻類徵初編卷二百九十四目錄

將帥三十四

丁朝雄

三全

策卜坦

百順

彭楚克林沁

額勒登額

彭廷棟

馬定肅

諾穆親

宗室嵩椿

閻正祥

海蘭察

段秀林

噶塔布

那丹珠

豁隆武

阿克棟阿

陸廷柱

任承恩



國朝耆獻類徵初編卷二百九十四

通奉大夫前署江西巡撫江西布政使司布政使湘陰李桓輯  
將帥三十四

丁朝雄

丁朝雄江南通州人乾隆二十四年由行伍升補蘇松鎮標右營  
把總二十六年授千總二十九年擢蘇松鎮標前營守備三十年  
失察洋盜行劫降補把總三十八年復任守備洊升遊擊四十六  
年擢福建水師提標中營參將四十八年遷臺灣水師副將五十  
一年赴部引見行抵省垣聞臺灣匪徒林爽文滋事稟知閩浙  
總督常青迅卽渡臺常青令帶兵隸海壇鎮總兵郝壯猷由淡水

前進五十二年二月郝壯猷同朝雄等帶兵二千餘名進勦南路賊匪擊斃三百名生擒二十五名日既暮賊匪復來撲營朝雄又斃百餘賊賊始退三月賊匪窩聚西園莊地方朝雄偕遊擊蔡攀龍參將瑚圖禮三路夾攻賊逃竄奪獲槍礮器械燬賊寮數百旋督兵攻鳳山東門朝雄首先入城殺賊無算復鳳山四月提督黃仕簡因安平海口緊要調朝雄回安平扼守六月賊犯府城朝雄與知府楊廷樺等率領兵民施放槍礮力戰擊退賊復攻小南門之桶盤棧朝雄禦之臺灣道永福同知楊廷理帶兵領義民隨後接應斃賊百餘名奪獲器械二十餘件賊敗走十一月朝雄偕遊擊倪賓帶兵一千二百名義民二千餘名攻東港朝雄潛遣人將



賊所設大礮灌溼分兵三路登岸殺賊獲守港賊目吳豹請添兵  
進勦常青以無兵可撥檄令駐劄港口以通糧米入郡之路奏入  
諭曰丁朝雄帶領兵民將東港賊匪奮勇勦殺實爲出力可嘉著  
福康安歸入出力之副將參將內比較功績奏請升用以示獎勵  
常青旋令朝雄帶弁兵由海道乘機進攻於鳳山縣屬之竹仔港  
見有賊船數隻施放槍礮打破賊船一隻賊匪百餘棄船奔岸朝  
雄偕革職參將那穆素里等登岸追殺斃賊數十名將賊船燒燬  
仍帶兵回船候風五十三年正月進抵東港暗令兵目李奇林光  
海浮水登岸先將賊匪設放大礮灌溼率將備弁兵直攻渡口賊  
驚竄官兵追殺奪獲槍礮弓刀無算搜捕賊匪多名復東港三月

將軍福康安奏丁朝雄帶兵收復東港海口與莊糧米得以運至  
府城數月以來堵禦賊匪防守極爲嚴密堪勝專閫之任請補海  
壇鎮總兵得旨俞允五月福康安奏查明提督柴大紀得受陋  
規副將丁朝雄前在安平協任內亦曾收受朝雄以駐防海口大  
員並不鈐束備弁轉又按月分贓應請革職問擬杖流從重發往  
軍臺效力贖罪上以丁朝雄聞逆匪滋事卽趕回臺灣督兵剿  
捕復進攻南路收復東港以通運米來郡之路節次打仗禦賊甚  
爲勇往出力改爲革職從寬畱任五十四年閏二月福建巡撫徐  
嗣曾奏總兵丁朝雄巡洋至汜澳地方生擒盜犯林勳舵等九名  
起獲礮位器械與羅源營等處遺失之件多有相符上獎其能

命送部引見五十五年 諭曰海壇鎮總兵丁朝雄於署臺灣水師副將任內失察天地會邪教一案議以降調因該鎮有革職畱任之案無級可降請旨革任已降旨將丁朝雄送部引見矣丁朝雄由福建水師參將歷升副將總兵在閩年久於水師營務是否熟悉平日約束兵丁督緝巡洋諸事能否出力及居官如何之處著伍拉納秉公切實具奏毋得稍有瞻徇俟該員引見再降諭旨尋奏丁朝雄歷任水師海洋情形最爲熟悉至整飭營伍緝捕洋盜均屬認真 諭曰海壇鎮總兵丁朝雄於前署臺灣水師副將任內失察天地會邪教因該鎮有革職畱任之案無級可降兵部議以革任是以降旨令將該鎮送部引見今據伍拉納奏丁朝

雄在閩年久熟悉水師情形歷經拏獲洋盜五十餘名老成歷練  
整飭營伍實爲得力之員並詢之福康安亦據奏稱前年出師臺灣  
該鎮堵禦海口著有勞績是丁朝雄於閩省水師營務尙屬實  
心出力且海壇鎮員缺緊要未便遽易生手丁朝雄不必赴部引  
見著加恩改爲革職畱任又 諭曰丁朝雄如交卸起程於何處  
接奉此旨卽由該處迅速仍回原任該鎮嗣後益當感激朕恩奮  
勉出力於一切整飭營伍緝捕洋盜等事加倍認真辦理如或心  
存懈弛始勤終怠則是自取咎戾決不能再邀寬宥也五十八年  
正月護理水師提督七月回海壇任事五十九年十一月 諭曰  
蘇凌阿奏福建海壇鎮總兵丁朝雄進京陛見在清江浦患病甚



重懇請轉奏敕部開缺請旨簡放等語丁朝雄著准其解任回籍  
調理十二月卒

右 國史館本傳

匡  
章  
下  
房  
文  
信  
不  
系  
一  
卷  
二  
百  
九  
十  
四

四

三全

三全富察氏滿洲正紅旗人由熱河駐防馬甲考取筆帖式乾隆二十二年補驍騎校二十四年升防守尉二十六年擢本旗佐領二十七年授保定府城守尉三十四年授熱河副都統三十五年命偕內務府員外郎全德往木蘭圍場查辦樹株三十六年命偕全德永和管理熱河各廟喇嘛事務三十七年奏添設委署前鋒翼長等俱請 賞給花翎藍翎得 旨委署前鋒翼長二員前鋒章京八員俱賞戴花翎委署翎長十員俱賞戴藍翎三十八年奏熱河滿洲協領四佐領十六除協領各兼一佐領缺外實各管轄佐領三而八旗蒙古協領二佐領四每協領亦各兼一佐領外

欽定大清會典事例

五

僅管轄佐領一辦理未能畫一請於蒙古協領內裁一其一令與滿洲協領一體管轄佐領三改鑄管轄八旗蒙古協領關防下部議行三十九年 命總管熱河額魯特所養之海青鴉鶻四十年授甯夏將軍四十一年奏甯夏平羅兩縣黃河沿一帶有甯夏滿兵牧廠從前滿兵每名拴馬二匹經前任將軍傅良奏准照西安涼州例每名實拴馬一匹此項廠地多有閒曠應將平羅廠地仍畱牧馬其甯夏廠地勘丈定界聽民認墾下部議行四十三年因在熱河副都統任內借用木商銀兩並動用馬圈銀兩 命革職五十五年 賞三品銜五十九年卒

右 國史館本傳



策卜坦

策卜坦鈕祜祿氏滿洲鑲黃旗人乾隆十三年由親軍授藍翎侍衛洊擢二等侍衛三十五年授甘肅甯夏鎮標游擊旋升參將四十年升哈密協副將旋調洮岷協副將四十六年三月撒拉爾回匪蘇四十三等滋事圍蘭州陝甘總督勒爾謹令策卜坦駐蘭州防守賊攻蘭州策卜坦偕甘肅布政使王廷贊竭力守禦經大學士阿桂等保奏 諭曰副將策卜坦同王廷贊竭力守城奮勇出力不愧滿洲甚屬可嘉著賞戴花翎從優議敘六月升陝西延綏鎮總兵隨阿桂等攻賊於華林寺阿桂令策卜坦帶兵相機進攻以牽賊勢策卜坦偕總兵三德等帶領土練由華林山西覓路

進剿奪溝卡賊於溝內掘壕縱橫數十道立木柵抵死抗拒七月  
阿桂復令策卜坦由華林寺西攻撲乘賊不備焚其柵遂克華林  
寺阿桂分飭帶兵剿殺竄匪蘭州平四十九年四月回匪田五等  
滋事陝西巡撫畢沅檄令帶兵赴定邊堵禦時甘肅賊匪在靜甯  
通渭一路抗拒官兵秦川爲陝西門戶賊有東竄之信畢沅復調  
策卜坦移駐隴州堵截時固原提督剛塔奏鹿鹿山賊眾約有數  
千附近通渭伏羌等處與石峯堡之賊互相聯絡必得重兵分路  
剿捕已飛咨興漢鎮總兵三德派精兵由秦川一路迎擊又飛咨  
延綏鎮總兵策卜坦帶兵赴靜甯一路圍剿疏入 諭曰畢沅酌  
量情形如汧隴一帶可毋需策卜坦在彼防禦卽咨會該鎮前赴

靜甯合勦尋策卜坦以靜甯一帶急需兵力接濟仍帶兵赴平涼會齊陝甘總督福康安等進攻底店賊匪分兵四路令策卜坦偕法靈阿等攻其左克之福康安復令策卜坦督率查拏白楊嶺等處賊匪獲賊馬如龍馬如勝並馬六之子賊首馬守正七月以署副將玉柱搜捕不力在彼三十一日未獲一賊策卜坦並不督率實力查拏經福康安奏參 諭曰玉柱帶兵搜捕徒事尾追以致賊人竄入深山著革職至策卜坦爲總兵大臣並不督率將備親身赴各處安速勦辦竟安坐靖遠遷延觀望著交部治罪尋奉旨發往伊犁效力贖罪五十四年 賞給藍翎侍衛五十九年卒于福克精阿見官刑部郎中孫穆揚阿候補吏部員外郎

右 國史館本傳



百順

今鄂羅斯北有洪豁爾國國勢富強護軍統領百公順嘗至其境  
謂其人善於騎射有三韓之風其國自言先世係由索倫遷移者  
按遼史西遼耶律太后自天祚被擒後遂率眾西移凡萬餘里自  
稱西遼其後爲愛烏罕所滅今其國豈其苗裔耶

右錄宗室昭槩撰

國朝書目考卷之二十四

八

彭楚克林沁

敖漢部落爲元太祖第四弟某王裔其台吉額駙彭楚克林沁者  
尙簡親王郡主通文藝熟習遼金元諸代事嘗與裘文達公談三  
史事裘爲之瞪目然以他書卷詢之彭亦不能驟答也 純皇帝  
呼之曰敖漢先生見 御製詩註中彭既習漢俗不樂居本土故  
典宿衛數十年卒於京邸

右錄宗室昭樾撰

--	--	--	--	--	--	--	--	--	--	--

168-460



額勒登額

額勒登額滿洲正白旗人姓棟鄂父永常官陝甘總督授定西將軍額勒登額於乾隆六年授三等侍衛十三年隨提督岳鍾琪鎮金川列一等功擢二等侍衛十七年晉頭等侍衛十八年授鑲紅旗漢軍副都統二十年隨征準噶爾五月領索倫兵千渡伊犁河與定邊右副將軍薩喇爾降宰桑得木齊等六月領兵堵禦達瓦齊諭曰此次進兵無折鏃遺矢之勞眾俱降服不應使達瓦齊反得逃遁額勒登額等既豫先領兵堵禦卽將達瓦齊擒獲亦未可定如果遠逃至布魯特境班第須詞嚴義正責其獻出是月霍集斯擒達瓦齊及其子羅卜扎定北將軍班第令額勒登額帶兵

接應九月扎哈沁宰桑鄂爾奇木齊背叛 命額勒登額相機擒  
獲時叛賊阿睦爾撒納有屬人葉克明安宰桑扎木參等率所部  
來歸永常疑懼挾其宰桑置軍中爲質兼程卻走 命革職解京  
治罪並褫額勒登額職在軍營立功自贖永常道卒二十一年八  
月阿睦爾撒納逃往哈薩克隨定西將軍達勒當阿往捕屢與哈  
薩克接戰多斬獲復授頭等侍衛九月捕賊於雅爾拉哈薩克伏  
兵山溝盡殲之追賊至庫爾默圖嶺閏九月 命在領隊大臣上  
行走十月授正藍旗漢軍副都統十二月授御前侍衛二十二年  
二月隨定邊右副都統兆惠勦額魯特叛賊六月至扎哈沁敗賊  
黨巴哈蔓集收其牲畜又勦博羅通古賊眾敗之時將軍等議撤

兵至濟爾哈朗 命隨巴里坤辦事大臣雅爾哈善在濟爾哈朗  
至巴里坤適中之地駐守尋因額魯特賊黨琿齊等乞降縱之歸  
復叛 諭曰額勒登額既將琿齊等傳至軍營卽應看守乃轉爲  
賊所欺令其復回因而猖獗致總管巴甯阿等遇伏陣亡仍未能  
奮勇進剿著交部嚴察議奏部議革職 諭曰額魯特朝降夕叛  
眾所深悉而額勒登額受其欺詐倉猝回兵以致琿齊等脫逃但  
額勒登額追剿扎哈沁賊眾頗知奮勉著革去副都統降爲三等  
侍衛效力贖罪二十三年二月兆惠偵賊在額卜推河飭額勒登  
額等合兵圍之生擒賊目達爾扎巴朗額勒登額緣馬踢傷脛不  
能行 命回京調治九月以侍衛瑪常圖倫楚等在巴里坤年久



派額勒登額往代十一月噶爾臧多爾濟舊游牧昌吉等處有藏  
匿之瑪哈沁額勒登額往捕收獲二十餘人二十四年正月征回  
部定邊右副將軍富德勦賊於呼爾璊賊酋霍集占領騎五千餘  
迎戰富德張左右翼令額勒登額等擊之轉戰五晝夜賊潰奏入  
得旨優敘仍擢二等待衛八月富德追霍集占於阿爾楚爾分  
兵爲三破之賊退據高山額勒登額等自山麓橫衝賊巢大破之  
賜鄂爾楚克巴圖魯名號九月回部平凱旋回京二十五年五月  
授鑲黃旗蒙古副都統二十七年三月授公中佐領五月論平西  
域功給騎都尉世職九月授武備院卿十一月授正黃旗護軍統  
領三十年四月因疾致仕六十年五月卒子德昌襲世職



右 國史館本傳

國史館本傳

卷三十四 將帥二十四

三

Table with 10 columns and 1 row. The table is mostly empty, with some faint markings in the rightmost column.

--	--	--	--	--	--	--	--	--	--

Vertical text on the right side of the table, possibly a header or label, oriented vertically.

彭廷棟

彭廷棟甘肅甯夏人乾隆二十二年武進士授三等侍衛二十六年授貴州都勻協左營遊擊二十九年擢丹江營參將調提標中軍參將三十二年七月緬匪滋擾隨雲南提督譚五格勦賊普洱永昌間屢立戰功三十三年六月擢遵義協副將三十六年三月調大定協四十一年六月署安籠鎮總兵四十二年四月實授四十六年七月擢烏魯木齊提督四十九年三月都統海祿奏查近歲營屯居民交糧該管官弁每石浮收三四升至一斗不等積習相沿以致官兵應得米糧未能一律精潔請將該廳州縣並守備以上管屯大員交部議處 諭曰彭廷棟於該處多交糧石並未

查辦既經失察於前及海祿查奏時又復面爲懇阻非尋常瞻徇屬員可比彭廷棟著照部議降三級調用尋有旨仍授烏魯木齊提督其降級之案改爲革職畱任五十一年閏七月丁母憂五十四年正月服闋命以提督銜署山西大同鎮總兵五十五年正月授貴州提督五十六年正月奏部頒行軍紀律各營兵有能記五六條或全能背誦者請分別獎勸諭曰提督大員平日督率將備訓練兵丁當令各營伍騎射精純技藝嫻熟咸成勁旅至頒發紀律不過各標營遵曉大略參將遊擊以上能知亦可矣原不在兵丁之能否背誦以定等差卽該兵丁等於紀律各條全能背記設行軍時騎射弓馬俱未精嫻雖背誦亦有何益況行軍之



道全在臨時相機不可拘守成法卽將備等未曾親履行閒亦不能洞悉機宜豈兵丁能背誦紀律卽謂通曉兵法耶如士子服官效用讀書原當知律例若必令人人將律例背誦又復成何政體彭廷棟所奏不過藉此以見其認真整飭殊屬多事著傳旨申飭五十九年十一月黔匪曾不保等私鑄事發部議該管上司總督富綱巡撫馮光熊提督彭廷棟等分別降革奉 旨此案曾不保等糾約多人聚眾私鑄該管上司毫無覺察本應照部議分別降革但念該督等究係統轄與專管者有間富綱馮光熊彭廷棟俱著從寬免其革任仍註冊六十年正月黔楚苗匪石柳鄧吳隴登等句結銅仁辰州各屬苗匪滋擾廷棟帶兵馳赴正大營衝開賊

圍入城登埤固守與鎮遠總兵珠隆阿合兵協勦斬獲甚多會總督大學士公阿桂自盤塘坳帶兵赴援城中鼓譟出圍遂解旋設卡堅守賊不敢復窺得 旨嘉獎交部議敘加二級紀錄四次七月十七日卒 諭曰貴州提督彭廷棟於本年苗匪滋事時卽馳赴正大營衝開賊圍進城堅守屢次打仗殺賊甚爲出力卽染患時證經福康安等囑令前赴銅仁調養而該提督堅意不肯仍復力疾駐守竟在正大營身故實堪憐憫著加恩追贈太子太保並賞銀一千兩料理喪葬其長子賞給頭品廕生所有餘子著甘肅總督查明年已長成才具較優者一名送部引見以示軫卹而嘉忠蓋嘉慶四年十一月子溥以廕生引 見交本省督標以都司補

用

右 國史館本傳

國史館本傳

四

國朝文獻通考卷一百四十四



馬定齋

馬定齋陝西長安人乾隆十三年武舉十四年會試後揀選千總分撫標學習二十二年補沙州協千總二十四年調哈密協千總二十九年軍政卓異註冊候升三十年派管塔爾納沁屯田三十一年因總理屯田官薩瀚揭報定齋等減報收成分數及盜賣屯糧題參革職奉 旨交陝西總督吳達善等查訊旋審明所參並無實據奏請開復薩瀚以誣參革職三十二年八月補安西瓜州營千總三十四年補湖廣提標左營守備三十八年正月征金川十月將軍阿桂派隨都統海蘭察等領兵由達木巴宗北山取道攻斯達克拉阿噶爾布拉碩蕨噶爾三處以壓別斯璊官兵分三

路進同時攻克旋據美諾官砦收復小金川定肅功列超等三十九年正月奉派頭敵隨副都統額森特等進勦大金川攻克贊巴拉克各山峯遂據色依谷山三月擢湖南沅州協都司四十年二月賊據喇穆喇山梁劫定肅營卡定肅卡兵三十餘擊退之得旨獎賞三月擢湖北漢陽營遊擊閏十月隨參贊海蘭察等搶上西里山頂十一月攻克西里第二山峯礮砦並奮勇殺賊功列超等四十二年領凱旋官兵回營四十二年升署撫標中軍參將四十五年三月實授四十六年擢鄖陽協副將五十年因督緝金川逃兵不力部議革職畱任五十一年十一月調湖南辰州協副將是月奉旨開復督緝逃兵不力處分五十二年擢湖北宜昌鎮

總兵五十五年正月 恩詔加一級七月來京恭祝 萬壽五十  
九年因病來京奏請解任得 旨俞允六十年八月卒子大雄由  
武進士任廣東增城營守備五十一年隨征臺灣五十二年擊賊  
西門外陣亡廕雲騎尉長孫瑤琨襲入忠義傳

右 國史館本傳

圖書集成醫部全錄卷之六十一

十一



諾穆親

諾穆親納喇氏滿洲正藍旗人父諾岷任山西巡撫自有傳諾穆親由官學生考中繙譯筆帖式雍正十一年補授中書科筆帖式乾隆六年中繙譯舉人十七年中繙譯進士十八年擢戶部主事二十年遷工部員外郎二十六年擢戶部郎中二十八年三月授直隸清河道三十年調河南開歸陳許道三十二年調雲南鹽驛道時緬匪滋擾邊界隨總督明珠往軍營辦事三十三年擢雲南按察使以隨營功列超等三十五年七月署雲南巡撫十二月劾黑鹽井已故提舉黃輔任內虧缺存倉鹽四百餘萬斤薪本銀一萬五千餘兩又前署白鹽井降調提舉高其人任內虧缺薪本銀

二萬四千餘兩預放柴薪腳價各款無著銀六千餘兩請將高其人革職并提已故提舉黃輔之子黃京榮等徹底究追 諭曰鹽斤薪本俱爲國帑所關乃竟虧空如許之多殊干法紀高其人著革職與黃輔之子黃京榮等俱交該撫一并嚴審定擬三十六年正月 諭曰彰寶覆奏黑白二井提舉虧空鹽斤薪本一案見據查報高其人名下共少交銀三百七十三兩餘係接任官郎嘉卿勒指浮開其黃輔名下所缺之數因由井員墮煎兼由地方官墮運從前籠統詳報並未逐細聲明不但預先本無見聞卽揭後亦未悉其情弊等語閱彰寶所奏情節是諾穆親急於奏參未及詳查在諾穆親一聞井員虧缺至數萬兩之多立時參劾亦未爲過

當但以提舉微員虧損多至逾萬其理原不可解自應將侵虧之  
故查覈明確分別糾參方爲周到卽略遲數日亦何不可待之有  
至於墮運一節由鹽道及地方官經理不善亦此案所必當查辦  
者該撫原參摺內並未提及亦未免於疏漏矣今此案業已飭審  
其是否高其人先侵後吐抑係郎嘉卿勒指浮開並黃輔之是否  
侵用入己及係伊子乘機侵隱或由預放之項追補未清均須徹  
底嚴查自無難水落石出而歷來墮運之員亦應查究明晰予以  
處分始無滲漏著交彰寶會同諾穆親秉公查審確情據實覈擬  
具奏黃輔名下虧銀一萬五千三百餘兩高其人虧銀四百一十  
二兩定罪有差並申明郎嘉卿接收交代因款項繁多拘泥詳報



尚無勒指浮開情事請免議墮運各員職名另摺奏請處分報

聞三月奏銅廠調劑各事宜一滇省各廠宜帶辦餘銅以清預發  
工價一廠官預發工本銀兩宜入交代以嚴推諉一報開新廠宜  
將督辦之地方官酌加獎勵一廠員勤惰宜責成該管道府稽查  
交部議上 諭曰戶部等會議諾穆親調劑事宜各條已依議行  
矣朕覽此內預發工本扣繳餘銅一款從前劉藻辦理時係預放  
一季工本銀兩每銅百斤每月扣收餘銅五斤所借多而所扣少  
廠民自覺寬裕所以不能如期完繳今諾穆親止請移放兩月而  
每月扣至六斤是借頂較前既少而扣數轉多廠民需利無幾豈  
所樂從且分限僅有三年又較劉藻前所定五年十年之期加迫



恐承領各戶此時卽存畏難之見或致觀望不前而日後藉口遷延更所不免籌辦未爲妥協著傳諭彰寶會同諾穆親就銅廠實在情形另行妥議具奏嗣彰寶議奏預借之數仍以兩月爲止每百斤仍照往例止扣五斤其預借銀兩應令該管道府督率廠員查鑪戶中誠謹殷實之人驗其往月實在獲銅數目查其籍貫來歷取具連環保結借分四年扣清下部議行三十六年五月奏南掌國遣使進象到滇當據司詳照向例派委佐雜武弁等官伴送貢使並護象隻進京茲查新例應於同知通判中遣員伴送一面知照前途地方按省派委同知等官更替毋許一人長送臣未能詳查新例以致辦理錯誤請議處 諭曰此事禮部辦定之例

國朝典章考卷之四  
未爲妥協該部因福建伴送琉球貢使到京逾期議令派出伴送  
之員更替毋許一人長送意在防其沿途稽滯而未能切當事情  
如福建之於琉球雲南之於南掌貢使初至該省皆有應行照料  
事宜旣派有承辦伴送之員卽當始終其事而派員與貢使伴行  
日久一切與之相習途中屢易生手亦覺非宜若慮派員在途託  
故遷延只須於經過各省添派委員護送趨行自不慮其任意遲  
延若以此議停長送專員何異因噎廢食所有外國貢使來京及  
由京歸國派員伴送及各省添員護送之例著該部另行定議具  
奏諸穆親雖未照禮部新例而所辦未爲錯誤毋庸交部議處六  
月辦理滇省軍臺議敘七月奏滇省每年額運京銅向因瀘店存

貯銅百萬餘斤如運員抵瀘時銅未運到先將存銅兌發運到抵補至乾隆三十年瀘店存銅撥給陝西採買僅存銅數十萬斤見在湯丹大碌等廠每年所辦京銅均係以本年辦供本年之用而東川尋甸兩路亦係本年趨運本年京銅隨辦隨運期限迫促難免遲延竊思京局原可配用板銅今臨安府屬尖山廠見存板銅四十二萬餘斤每年約可辦銅六七十萬斤成色頗高請將此項板銅添撥一百萬斤陸續運往瀘店以備兌發運足停止下部議行十一月奏請將乾隆三十四年大計展至三十七年補行其三十七年大計展至三十八年秋舉行上曰該撫此奏殊於事理未協滇省三十四年屆當大計因辦理軍務未及舉行展期固所



應爾今既節年遞展至三十七年適與該年大計之期相遇自應合併辦理具摺奏明以歸簡易方爲妥協乃必拘定期限分年遞辦其間僅一載服官之人無多更易該撫將於三十七年察覈時預畱地步以待來年乎抑第就此一年內新任未滿三年之數員中謬加舉劾乎殊覺拘泥可笑督撫辦理地方事務宜諳曉大體卽有應行酌量變通之處亦宜酌理準情奏聞請旨胥歸允當似此刻舟膠柱殊非實心任事察吏程材之道諾穆親著傳旨申飭三十七年正月 諭來京陛見時總督彰寶以諾穆親才具未能開展入告 諭曰所奏甚是諾穆親本一拘謹之人前爲司道時尙能黽勉供職及令署巡撫屢形竭蹙其才具自難勝封疆重寄



見已令其來京陸見授李湖爲雲南巡撫二月又奏據管理義都  
廠官宜良縣知縣朱一深揭報上司同寅遇事需索致虧所領工  
本銀四萬餘兩按其摺開數目自巡撫藩臬道府以及同寅幕友  
長隨書吏均有需索查朱一深管理義都廠每年所領工本等銀  
不過二萬餘兩在長隨等需索陋規原不能保其必無至巡撫兩  
司何致向廠員婪索且所控藩臬多人均係見任而摺開三十六  
年巡撫門上索銀三十二兩係臣任內之事懇 特派大臣來滇  
查審 上命侍郎袁守侗前往會同李湖查辦三月奏大理等屬  
行鹽積年墮運墮銷及盜賣無著共欠課銀五萬七千餘兩應於  
屢任各員名下追賠歸款部議上 諭曰戶部議覆諾穆親奏行

鹽各屬墮運墮銷及盜賣無著鹽斤請分別查辦追賠一摺已依議行矣運銷鹽斤例應年清年款何以滇省積年墮運墮銷欠課至五萬七千餘兩之多固係承辦各員經理不善亦由督撫等平日不實力整飭所致諾穆親日坐省城所司何事乃惟一味因循不早爲釐剔直至將離滇省始以一奏塞責殊屬非是至彰寶雖駐永昌亦難辭咎所有此案應追銀兩除按歷任各員名下勒限嚴追歸款外扣完不足數卽著於彰寶名下分賠四分諾穆親名下分賠六分以清款項四月到京 命軍機大臣傳諾穆親將彰寶所奏摺交與閱看諾穆親自認識見拘泥於封疆重任不能稱職旋奉 旨諾穆親著降爲頭等侍衛前往烏什自備資斧辦理

領隊事務十月袁守侗等查審藩司錢度受贓屬實諾穆親失於  
覺察部議降三級調用得旨著帶所降之級仍畱軍營效力四  
十二年十月回京賞給主事銜在軍機章京上行走十一月  
命在理藩院司官上行走四十五年三月擢鑲白旗滿洲副都統  
兼署兵部侍郎六月授右翼監督七月奏參縣億門上太監攜羊  
四隻進門並不納稅反將書吏嚇打撕毀告示阿桂遣人請託私  
結奉旨令阿桂明白回奏奏入諭曰茲據阿桂奏稱遣人請  
託實有其事等語甚爲駭異阿桂軍機處行走多年深知朕之辦  
事向來此等事件朕豈肯寬貸伊係大學士之子朕不同滿洲大  
臣結親向誰聯姻阿桂係縣億之岳祖豈可如此徇情若按事擬



罪雷將阿桂之公爵寶石頂雙眼花翎四團龍褂黃帶槩行革去  
姑念伊究在金川軍營宣勞格外施恩免其革去不必從重治罪  
著將阿桂罰公俸十年伊既如此徇情亦不必在總師傅上行走  
諾穆親尋 賞戴花翎十一月補工部侍郎四十七年四月 上  
行 常雩禮壇內安設草率 命革去翎頂仍帶革職畱任十年  
無過方准開復是月山東巡撫國泰貪縱事發 命偕尙書和珅  
左都御史劉墉馳驛前往查辦旋 諭曰昨據御史錢澧奏國泰  
于易簡等貪縱營私一摺已諭令和珅等嚴切查究摺內所稱倉  
庫虧空比對印冊盤查尙屬易辦至各屬賄求美缺一節行賄各  
劣員明知與受同罪豈肯和盤托出惟在委曲開導俾伊等供出



實情此事不得不辦然除一二正犯外朕實不忍似甘省之復興  
大獄惟當秉公查究據實奏聞嗣奏查明歷城等縣庫項虧缺山  
東巡撫國泰婪索通省州縣藩司于易簡於各屬庫項虧缺扶同  
弊混屬實各擬罪如律 命諾穆親暫署山東巡撫十月 命往  
錦州查審莊頭名下親丁高瑾赴提督衙門控莊頭高旺常甯私  
賣官地並錦州修理城工科派親丁錢文各情旋奏審明所控屬  
虛擬高瑾戍十二月 賞還頂帶花翎仍帶革職畱任四十八年  
二月調吏部右侍郎七月調戶部右侍郎管理錢法堂事務九月  
奏參雲南省委員趙州知州彭煥解運京銅共短少二萬餘恐有  
侵虧盜賣情弊請將彭煥交刑部審訊所少銅斤行文雲南巡撫

照例補解並將該督撫及詳委不慎之各上司交部分別議處  
諭照所請行五十一年轉戶部左侍郎五十四年間五月奏雲南  
辦運京銅每年正加入運計得餘銅數十萬斤向給解員領售見  
在局中銅斤短少請將此項餘銅留局備用 諭曰近年以來京  
城錢價平賤於民間實爲便益今若因局中銅斤稍短不准售賣  
餘銅使奸民間知乘機牟利必至錢價遽昂況銅斤爲器用所必  
需而私銷之弊雖嚴密查禁尙所難免茲復將餘銅不准售賣則  
民間無處得銅私銷勢必日多且委員等向藉售賣餘銅從中需  
潤以爲回任盤費若俱留局備用將來委員等必不肖運帶到京  
於途次先行賣去亦無從查察試思每年卽無沈溺所贖餘銅亦

不過數十萬斤歷來准令出售戶工二局鼓鑄錢文並未聞因此  
缺卯今添此數十萬之銅官銅亦未驟臻充裕諾穆親等此奏名  
爲調劑局務起見而未計及滋弊實多所謂知其一不知其二斷  
不可行著將原摺發還並傳諭該侍郎等卽不動聲色妥爲辦理  
當如無其事者然卽局中短銅之說亦不可稍有聲張致啟市僧  
居奇之漸五十六年調理藩院侍郎五十七年正月調倉場侍郎  
七月吏兵兩部將文武大臣所積處分五年屆期查明具奏得  
旨諾穆親著加恩卽予開復旋奏全漕起卸告竣較五十六年無  
閏之年更早四月交部議敘八月奏坐糧廳吉綸見屆期滿請再  
卹一年以資糧運 諭曰坐糧廳有稽查督催之責若一時滿漢



國朝通志卷之九十四  
三十一  
廳員并行更換或可酌畱熟手以資經理今漢員張灼到任已逾  
半年原係倉差更換本年糧運即已經手辦理何必又將報滿之  
員率行保奏向來坐糧廳得頂優厚人皆視爲美缺豈可任意奏  
畱聽其戀棧嗣後無論滿漢廳員凡屆報滿之期俱不准奏請畱  
任以杜營競而勵官方五十八年調吏部右侍郎兼正紅旗滿洲  
副都統五十九年調鑲白旗副都統六十年正月 賞給都統職  
銜調刑部左侍郎並管右翼稅務旋擢鑲藍旗蒙古都統十月卒

右 國史館本傳



宗室嵩椿

宗室嵩椿鑲藍旗人乾隆六年襲其高祖多羅貝勒芬古所遺奉  
恩輔國公爵十二年授散秩大臣十三年擢正紅旗漢軍副都統  
尋調正藍旗護軍統領十四年遷鑲黃旗漢軍都統十五年四月  
調蒙古都統 命管理圓明園八旗官兵事務十月授宗人府右  
宗人十一月調鑲黃旗漢軍都統二十二年授荊州將軍二十五  
年調西安將軍二十六年調察哈爾都統二十七年仍授西安將  
軍二十八年二月奏西安有滿洲漢軍副都統各一員滿洲副都統  
管兵七千餘名漢軍副都統管兵二千餘名數目懸殊請改滿洲  
副都統爲左翼副都統改漢軍副都統爲右翼滿洲副都統 諭

臣等謹將原奏各節開列如左  
三  
曰西安副都統二員分爲左右翼固是但必欲將漢軍改爲滿洲  
所奏非是滿洲蒙古漢軍俱係朕之臣子何必過示區別嗣後滿  
洲蒙古漢軍人一體補放見在西安副都統維山作爲左翼副都  
統將此永著爲例六月奏涼州擬駐馬兵一千三百名步兵二百  
名並派協領二員分左右翼八旗設防禦八驍騎校八筆帖式二  
歸副都統管轄莊浪擬駐馬兵四百名步兵一百名設城守尉一  
卽以莊浪副都統改用設防禦驍騎校各四筆帖式一歸涼州都  
統管轄各員俱於西安駐防官內移改其兵分作三起每年移駐  
一起至西安兵移居後爲數無多應酌減協領佐領等官 從之  
二十九年九月與副都統成德以揀選不公互相參劾 上命伊

率將軍阿桂陝西巡撫明德會鞫並詢出嵩椿有差官接取家眷  
事疏入視將軍職仍畱公爵三十年授綬遠城將軍三十一年有  
土默特蒙古伊什策楞爭控地畝之案適歸化城副都統集福來  
京 陸見 上問以伊什策楞控案嵩椿如何辦理集福稱並未  
聞知 諭曰此係土默特蒙古事體將軍自當與歸化城副都統  
一同商辦今嵩椿一人專主並不令副都統與聞甚屬非是嗣後  
各省將軍副都統必須和衷共濟將軍不可蔑視副都統副都統  
亦不可任意與將軍爭執將此通諭知之十二月奏歸化城距綬  
遠甚近請將歸化副都統移駐綬遠同將軍管理滿洲蒙古二城  
及土默特官兵 上以歸化城土默特官兵甚眾必須大員專管

綏遠城滿兵一千五百名將軍一人足敷管理不若將綏遠城副都統裁去於右衛歸化城兩處各設副都統一員尋常事件申詳將軍大事公商辦理尋以綏遠城相沿有驕役人等錢糧未經遵例裁革革任回京三十三年補正白旗蒙古都統三十五年仍授宗人府右宗人三十六年授內大臣三十七年授江甯將軍四十六年復調綏遠城將軍時有旨禁民間私存鳥槍嵩椿奏土默特等兵丁見有私槍請一併銷毀上以禁民私存鳥槍並非蒙古滿洲亦不許存況歸化城尤非他省可比而土默特蒙古等俱以打牲爲業鳥槍禁止則於打牲有礙嵩椿所辦錯謬申飭之四十九年調甯夏將軍五十一年仍調綏遠城將軍五十二年復調



西安將軍五十四年因病解任回京六十年卒 賜諡勤儉長子

景熠襲爵別有傳景熠卒孫祿義襲次孫祿晉三等侍衛

右 國史館本傳 按嵩椿見宗室王公功績表傳卷九貝勒芬古傳後



閻正祥

閻正祥漢軍鑲黃旗人以武舉效力巡捕南營期滿以千總用乾隆二十三年補北營千總二十六年遷中營守備二十九年遷南營遊擊三十二年擢北營參將三十七年補十五善射三十九年加副將銜調南營參將四十年加總兵銜四十三年升署江南壽春鎮總兵四十六年實授四十七年十月調福建漳州鎮總兵諭曰昨降旨將閻正祥調補漳州鎮總兵該處見有奪犯傷差聚眾械鬪等案要犯尙未弋獲著傳知閻正祥卽迅速馳赴新任不必來京請訓到任後卽督率將弁實力妥協辦理十二月奏臺灣奸民聚眾械鬪一案水師提督黃仕簡前往查辦臣以漳州地方

在在均有海口可通船隻臺匪不無喻渡潛回情事且林耀一案  
尙有逆犯未獲臣到任後卽前赴沿海各處親加督察嚴飭文武  
員弁各帶兵役梭織巡邏無分疆界上緊訪緝得 旨勉力實爲  
之汝不比他人也四十八年奏漳州盜案繁多臣到任後弋獲盜  
犯三十一名其在逃者務期拏獲不使漏網至械鬪奪犯毆差  
等案多出族大丁多之戶向來徒委末弁前往易致輕視必須大  
員帶領兵役親往拘拏不獨人犯可獲且使奸匪知懼 諭曰亦  
不必欲速過急不動聲色消存此心有犯必懲不可化大爲小勉  
之四十九年閏三月擢湖廣提督六月調甘肅提督會石峯堡逆  
回滋事大學士阿桂檄同甯夏副都統旺沁班巴爾帶兵赴固原



鹽茶一帶搜捕餘匪五十二年復任湖廣提督旋調直隸提督五十四年三月滴水汛火藥局失火燒斃都司沃計渾並兵丁多名命正祥勘訊旋據奏並無虧空掩飾情弊惟未能按年出陳易新致經夏回潮積壓成塊該管官兵入局盤藥因缸底之藥堅實難起用鐵槍頭在缸內戳藥缸鐵相擊因而生火將失察之鎮協奏請議處並自請處分 諭曰此案既無別項情弊閣正祥等著交部照例分別議處尋 諭曰嗣後營中火藥可否減少儲備著會同總督酌議辦理嗣偕直隸總督梁肯堂會奏直隸各營火藥自雍正八年定議後均係儲備三年今按三年操用合計間有盈絀不同追溯其由或因裁汰兵額仍照原數製備或因添設新兵火

藥未能添造請將火藥歲需斤數均照例儲備三年其有盈餘之  
營分卽先儘餘藥動用俟用完再於額備火藥內動支其儲藥不  
敷之營分照例每年動用營中公費隨時添補統於年底備足三  
年之數如此酌量辦理旣於儲備之定例相符而火藥亦可無陳  
積成塊之虞報 聞五十五年正月 命在紫禁城騎馬六月  
命在芑清門侍衛上行走仍畱提督任五十七年正月 上巡幸  
五臺正祥途次患病奏請給假調理 諭曰此次巡幸五臺該提  
督理應隨扈今旣患病著准其給假所有沿途一切事宜有總督  
梁肯堂隨往足資照料閻正祥竟可無庸前來接駕令其安心調  
養並派太醫院醫官一員前往看視以期速就全愈二月因舊病

未痊奏請解任回京得旨允行八月諭曰梁肯堂奏查薊州永平一帶營房墩臺被衝傾圮州縣營員均未具報請修前任提督閻正祥亦未移會有案等語塘汛爲防守之地自當修理整齊以壯觀瞻乃該處文武各員並不隨時報修閻正祥並不移會總督任其傾圮所有薊州永平一帶塘房墩臺卽著落閻正祥分賠一半該地方官分賠一半勒限速修以示懲儆六十年卒

右 國史館本傳

皇朝通志卷一百一十四

三



## 海蘭察

海武壯名蘭察黑龍江人面鐵色生有殊力矢命中中者輒死圍場兩虎出帶三矢發二矢斃之囊一矢歸天下傳其勇而不傳其智予在覃懷與河北鎮呢公交始得聞其軼事征西藏科爾喀時至吉龍兩大山間隔深溪岸劣容一足駕橋則賊爭之礮石雨下聲若雷計無所出武壯笑謂將軍曰此易擒耳予我五百人八日糧勿問我所往乃囑翼長速備橋材八日後駕之當無一人敢爭者武壯令故嚴及駕橋賊爭如故皆曰不意海參贊今乃妄語賊填山來何謂無一人正疑慮間賊亂左右奔山上火發見我兵矣羣指曰若巖閒端坐者非參贊耶急渡合而殲之將軍設酒問其

故曰用兵無他在善思耳此澗水也非江非河源近發源處山必相連沿澗行流漸細百里外果得山梁踰梁行兩日望見賊營眾伏草間待期如獸遇獵不敢動戒兵勿語恐邏者聞五百人塊然如木石顧日長似年耳糧盡而期至賊空營爭橋據其營斬守營賊以上攻下雖賁育不敵況驚蛇亂竄哉他所爲多類此武壯不肖言不妄交一人故世鮮知者在朝恂恂如鄙人口不能出辭或問兵間事曰事過輒忘強之則曰吾不能作漢人語武壯獨不識漢字耳語絕佳一二語中肖繁利口不能答滑稽時使人騰笑不止尤識時務凱旋在途謂偏裨曰諸君歡耶歡勿盡數年後西南有事諸君努力我老不及見矣眾曰蘇四十三王公不旋踵滅何

足慮武壯搖首曰非若輩比也蜀楚邪教滿地有司持之急必蠢動始盛中亂末甚勇非數年不能定言至此呢公憮然曰海武壯神人也吾親嘗之矣吾帶楚兵且七年與賊大小百餘戰二三年間賊脇從至數萬使之前驅我兵犯之輒奔賊不能禁亦奔所謂中亂也最後苟文潤僅五百人皆賊死黨對陣時低首猱而入左右跳盪雖慣勝之兵當之亦敗嘗乘勝犯楚疆吾帶百餘兵持之以靜賊至若弗見者賊不敢入又遲之年餘合諸路兵圍之賊黨斬文潤以降乃平武壯殆神人也吾每讀古名將列傳未嘗不神馳古人往矣爲將者一識武壯可無恨 御製功臣像贊曰勇而有謀洵不愧也

右書事熊寶泰撰

國家捷伐四夷開闢新疆二萬餘里南驅緬夷西翦金川惟賴索倫輕健之師風颯雷擊耐苦習勞難授其銳其中勇往絕倫以功名終者惟海超勇公爲巨擘公諱海蘭察索倫人幼從征西域以顯生平惟服阿文成公任其驅使辱詈聽命惟謹嘗告人曰近日大臣中知兵者惟阿公一人而已某安敢不爲其下其餘皆畏懦之夫使其登壇秉鉞適足爲殃民具耳某安能爲其送死也後南征臺灣福文襄王趨拜下風公始爲之盡力三日攻破鹿耳港賊人以爲天人從空而降自相踐蹋以斃後征廓爾喀回京未弔月卽以病歿 上深悼惜後川楚教匪叛 上浩歎曰使海蘭察在



此賊不足平也公善知兵每遇戰陣兵旣接公乃敝衣布帽騎  
繞自賊隊後觀其瑕可乘者然後集兵攻之或以數十騎闌入賊  
隊左右射之使賊隊紊亂我兵因以致勝又能枕弓臥地聽之知  
賊馬之眾寡及嗅馬矢知敵去之遠近皆與古人暗合其長子安  
祿隨征川楚教匪殉節川中其次子安成少年白皙美如冠玉喜  
聲伎日游狹巷中然勇幹有父風癸酉林清之變余日覩其殺賊  
無算焉其婿岳祥理藩院郎中亦以武力稱職蓋幼稟岳氏訓也  
海超勇公蘭察從征西域金川臺灣諸戰功超封五等爲近日武  
臣之冠直內廷時與蒙古巴林郡王巴圖相善二人皆有駿驥扈  
蹕木蘭王欲以己馬易公騎公不許王曰余夜間使人盜去公勿

曠也公笑應之此大佳晚間王果使人往竊見駿馬獨立荒原斫草因潛捕之前土窟中一健夫執馬韁伏其內蓋公預爲之備也因大呼曰寄語汝王吾公行當竊王馬矣使者歸告王命防閑嚴密夜半忽聞帳外大呼盜馬者乘馬遁矣俄而萬帳齊呼捉賊如山岳崩勢王馬皆驚逸出棧及追轉而名駿已失蓋公潛至王帳後使從者羣呼及防者出視而公乘馬行矣事雖猥瑣亦一兵機也次曉二人相見歡飲竟日王卒以馬贈公蓋深服其智也按太平廣記柴紹弟盜馬事與公正同古今豪傑皆未可繩以法度也

右錄宗室昭棟撰

超勇公海蘭察不檢細行和坤與之齟齬一日於純聖前訐其

在甘肅勦賊回京收受皮張等物 純聖諭云海蘭察能殺賊皮張收以禦寒何必詰責汝等既不能殺賊亦豈能謝絕人情乎和坤語塞

乾隆朝名將以超勇公海蘭察爲冠邊功戰略炳燭旂常無待述矣其行軍實由天授有爲自古名將所未嘗到者自結髮從戎每臨陣微服率數十騎繞出賊後知何處有瑕可蹈輒衝入賊隊左右疾射使其陣亂而我兵乘之又能望雲氣決賊勢之盛衰此戰之勝負察山川脈絡知安營汲水之宜聽地窖識賊馬之多寡驗馬矢料敵去之遠近卽倉猝聞手彈弓弦亦能預測利鈍以故進必殲敵退亦全師操縱神奇不可殫述

按望氣之說屢見史策古將皆能之北齊時斛律

金行兵用匈奴法望塵知馬步多少嗅地知軍遠  
近超勇蒙古人或得祕傳不知今尚有傳者否  
魏氏聖武記稱  
天生海公以成就福康安之功名康祺謂是直天生李晟爲社稷  
耳豈獨文襄一人福命致之哉

羅貫中三國演義多取材於陳壽習鑿齒之書不盡子虛烏有也  
太宗崇德四年命大學士達海譯孟子通鑿六韜兼及是書未竣  
順治七年演義告成大學士范文肅公文程等蒙 賞鞍馬銀幣  
有差 國初滿洲武將不識漢文者類多得力於此嘉慶間忠毅  
公額勒登保初以侍衛從海超勇公帳下每戰輒陷陣超勇曰爾  
將材可造須略識古兵法以翻清三國演義授之卒爲經略三省  
教匪平論功第一蓋超勇亦追溯舊聞也



右紀聞陳康祺撰

國史館藏書

1111

同治庚午年

正月

廿

段秀林

承平將帥專尙騎射段提督秀林官古北口時扈從熱河高宗  
召見問爾年踰七十尙能射否對曰騎射武臣職也臣雖老尙能  
跨鞍彎弧爲將士先一日上在宮門懸鵠命秀林射秀林一發  
中侯心上甚喜賜穿黃馬褂

右紀聞陳康祺撰





噶塔布

噶塔布正黃旗滿洲人鄂拉氏由閒散於乾隆十三年挑補前鋒二十二年遷藍翎長二十三年升前鋒校二十八年遷前鋒侍衛尋授前鋒參領三十三年兼公中佐領三十八年出師金川三十九年正月副將軍明亮派同侍衛德赫布於格藏橋之對河木底格魯克兩處各用兵二百人預備皮船隨土兵前往夾攻七月至達爾圖山梁賊築礮凡七噶塔布率兵攻其第七礮克之事聞諭部優敘四十年四月總兵敖成攻甲索噶塔布進自宜喜以兵七百人爲之援遂克甲索其取戰礮十是年七月押送喇嘛達固拉僧格等賊至京旋授鑲白旗蒙古副都統八月奉諭明亮一

踏正當用人噶塔布卽由驛馳赴閩十月帶兵於納木迪添立木  
柵一座黎明賊至我兵石矢並發斃賊甚眾尋進攻勦扎烏古山  
梁噶塔布先於什克琅谷兩處統師奮擊官軍併力先登勇氣百  
倍連克三碉九卡十一月復分兵七路進攻克爾甲爾古其地爲  
碾占向南山梁克其碉五其東曰日格德木牛有碉二賊竄入其  
中我兵四面設伏夜將半賊棄碉遁伏兵並起擒戮殆盡十二月  
進抵達撤谷噶塔布攻其東分隊爲伏官兵由西面上山卽合力  
夾攻破其碉門斃賊無算噶塔布遂由達撤谷而東攻斜坡上木  
城獲碉寨數處賊之在乃當也依獨古木思滿得以守領隊大臣  
奎林等攻敗之噶塔布進據山頂適領隊大臣和隆武等攻克獨

古木思滿大軍鼓勇繼進攻布吉魯及達那兩道山梁並克之殺賊百餘獲其鐵礮奏入得旨嘉獎交部優敘四十一年四月凱旋圖像於紫光閣命詞臣擬平定金川後五十功臣像贊噶塔布得贊曰揚威卡腳旋據山梁率兵銳進於碾占陽或圍或撲制賊死命甲索聲援頗稱後勁五月管理健銳營事務四十七年調鑲紅旗蒙古副都統四月授伊犁領隊大臣奏請赴石峯堡軍營陝甘總督李侍堯以勦捕有人札令仍往新疆換班奉 上諭勦辦逆回需人之際噶塔布經歷戎行軍旅尙稱曉悉著傳諭卽會同剛塔等奮勇進勦六月率甯夏阿拉善兵二百人赴馬家堡擊賊八月將軍阿桂參贊福康安奏以噶塔布分捕竄匪於軍前投

國朝名臣傳卷之四十一  
順之犯一百七十餘名遽令保領安插所辦不善撤回仍往伊犁  
五十三年回京 恩賞頭等侍衛副都統銜五十四年授鑲黃旗  
虎槍營總管五十六年補正藍旗蒙古副都統五十七年以副都  
統銜爲呼倫貝爾總管嘉慶元年正月病卒子哈隆阿二等侍衛  
見任喀拉沙爾辦事大臣

右 國史館本傳



那丹珠

那丹珠鑲白旗滿洲人章佳氏由烏槍隊長於乾隆三十九年補烏槍護軍校四十年派往軍營隨參贊大臣海蘭察征金川攻克利布曲索隆古等處山梁打仗奮勇經將軍阿桂等保奏奉旨賞戴花翎四十三年二月署烏槍營護軍參領十二月授直隸居庸路都司五十一年升安籠鎮遊擊五十四年擢長寨營參將五十七年擢定廣協副將六十年黔楚苗匪滋事隨大學士雲貴總督福康安帶兵勦捕閏二月派兵分路從上地洲下地洲等處攻克賊寨勒通嗅腦又派赴松桃後路巡查五月大兵進克蘇麻寨那丹珠分駐黃瓜山梁牽制賊勢旋由黃瓜山進勦大烏草河一

帶奏入 諭賞哈齊顯巴圖魯名號七月在古哨營山梁殺賊有功經福康安奏請署理安籠鎮總兵 諭曰副將那丹珠此次隨征苗匪亦爲奮勇著補授安籠鎮總兵八月由老烏廠一路進克苗寨三十餘處從塔金地方與大兵會合又於古丈坪奪據山梁殺賊甚眾十月大兵取鴨保平隴那丹珠沿途勦殺賊匪廓清後路復攻克摩手寨山梁合兵圍高多寨首逆吳半生就擒得 旨議敘又連克龍角碉鴨保山十一月進攻賊巢生擒賊目吳八月得 旨嘉獎十二月由爆木寨至地良坡於普定寨生擒賊目廖老慕隴老西餘匪四十餘名屢得 賞火鏹資翎管資搬指套碧玉四喜扳指大小荷包等嘉慶元年正月進克擒頭坡騾馬崗及

吉吉寨連雲山二月 上以帶兵出力 諭賞蟒袍一襲大兵進  
攻平隴復於高吉地平逆坳殺賊數十名三月逆匪分擾擒頭坡  
營卡奮力迎擊斃賊甚眾 賞大小荷包等物四月在軍營以  
疾卒 諭曰總兵那丹珠打仗殺賊殊爲得力茲因病故雖與臨  
陣捐軀有間而奮勇素著殊堪憫惜著加恩優卹 賜祭葬長  
子達靈阿由藍翎長補授前鋒校次子阿克當阿由太僕寺主事  
游補刑部員外郎

右 國史館本傳

The image shows a document page with a large, empty table structure. The table is defined by multiple vertical lines, creating approximately 11 columns. The content within the table is completely blank. The page is oriented vertically, and there is some faint, illegible text visible along the right edge, possibly representing a page number or header.



豁隆武

豁隆武瓜爾佳氏鑲藍旗滿洲人乾隆三十二年由烏槍護軍授護軍校三十五年升委護軍參領三十七年授陝西雙山堡都司四十二年擢湖南鎮筵標遊擊五十年擢桂陽營參將五十一年擢江南督標中軍副將六十年正月授雲南騰越鎮總兵閏二月入覲 諭曰昨召見新授騰越鎮總兵豁隆武看其人甚老實拘謹騰越鎮路通緬甸爲邊疆要缺恐該員不能勝任已降旨將蘇爾相調補騰越所遺鶴麗鎮總兵員缺著豁隆武調補時湖南苗匪石三保等在永綏一帶附首逆吳半生爲亂 上命雲貴總督福康安督兵進剿福康安以黔楚交界地方苗匪滋事奏請

添調滇黔官兵以資攻勦豁隆武呈請隨征七月首逆果半生在  
大烏草河古丈坪各處往來出沒福康安等攻克大烏草河賊踞  
古丈坪豁隆武偕貴東道常明總兵朱隆阿晝夜並進連克魚井  
喇叭塘三十餘處賊寨尋隨福康安等分兵五路冒雨搶占古丈  
坪南面山梁奮勇勦殺殲斃多名八月攻蝦蟆崗賊巢進抵烏龍  
巖賊於石坎上築卡放槍抵禦我兵直前攻撲賊匪五六千由山  
巖小路迎拒豁隆武等分投奮擊接戰三四時殲戮無算賊攢聚  
茶它地方豁隆武偕都統額勒登保等分兵四路搶占山梁連奪  
賊卡六處九月賊於鴨保平隴各寨添聚五六千人欲從狗腦坡  
一路抄截我兵之後豁隆武偕額勒登保常明等整兵豫備見賊

匪於山溝石坎中攀援扒越而來我兵槍礮齊發殲斃甚多賊首  
吳半生從鴨保寨至高多寨糾聚苗眾希圖抗拒福康安督同豁  
隆武等分路競進嚴密攻圍吳半生詣軍前投首豁隆武等奉  
旨交部議敘尋由得勝寨繞至龍角崗南面山梁隨勦隨進殲斃  
無數苗眾倚仗賊首吳隴登在鴨保平隴等處屯聚十月豁隆武  
偕額勒登保等晝夜迎擊連克大腦坡得勝山雷達山一帶大小  
木城石卡三十餘座官兵進逼鴨保賊巢賊恃地險黨多抵死守  
拒福康安督率豁隆武等從黑暗中覓徑進發先抵西面山梁木  
城拋擲火彈燒燬寨柵頃刻間各山賊寨卡火光齊發苗匪惶駭  
官兵立時撲開木城七座石卡五處乘勝將垂藤董羅等寨全行

攻克平隴賊目吳八月聞首逆吳隴登窮蹙惟恐巢穴一破餘寨亦因以不固乃於鴨保一路招聚夥黨抗拒官兵並挾制吳隴登不令投出十一月豁隆武偕額勒登保等由鴨保山直撲賊巢分投攻勦殲戮無算吳八月欲乘間竄遁爲降苗百戶寨長等密圍擒縛尋復偕額勒登保等攻克擒頭坡騾馬崗等處險要賊寨豁隆武自隨勦苗匪以來疊奉 恩賞翎管扳指火鏢大小荷包等件七次嘉慶元年六月以疾卒於軍 諭曰總兵豁隆武雖係染患時證非陣亡者可比但究在軍營病故仍著咨部議卹子西蘭泰見任烏槍護軍校額勒渾二品廕生見任理藩院員外郎兼公中佐領車勒亨廕監生見任驍騎校



右 國史館本傳

國史館本傳  
卷之二十一  
二十一

--	--	--	--	--	--	--	--	--

DATE  
 10/11/50  
 10/11/50

10/11/50

阿克棟阿

阿克棟阿正黃旗蒙古人烏朗罕吉勒們氏乾隆二十五年由閒散挑補拜唐阿三十二年補鑾儀衛整儀尉三十四年升治儀正四十年授公中佐領四十一年授雲麾使四十六年晉冠軍使五十四年外補陝西潼關協副將六十年擢河南南陽鎮總兵嘉慶元年湖北教匪滋事調赴軍營三月賊據當陽城帶兵攻勦用礮轟城東門毀其牆丈餘助惡逆僧心愚及夥黨數百人皆殲斃總統永保奏入 諭曰阿克棟阿董率弁兵悉力攻打實屬出力可嘉著賞戴花翎四月賊擾長坂坡西營阿克棟阿自北而西帶兵接應殺賊二百餘人賊目熊道成等三人伏誅生擒張仲選等六

人奪獲旗幟礮位擄牌刀矛火彈甚多六月官兵克當陽東門賊  
匪仍退守西北半城憑依龜背山抗拒督官兵奮力進剿直上山  
梁層層圍裹斬馘賊首一千餘級擒獲賊目多名當陽平阿克棟  
阿以有功奉 旨賞給年昌阿巴圖魯名號並玉扳指大小荷包  
八月帶兵赴鍾祥堵禦分路埋伏焚燒賊寨九月帶兵冒雨進剿  
斃賊數千生擒一千餘人均奏入 上嘉之 賞玉扳指大小荷  
包再 諭曰鍾祥賊匪糾夥屯聚經官兵分路進擊四面攻剿掃  
除殆盡皆係阿克棟阿奮勇所致著加太子少保銜俟有提督缺  
出卽行升用是月卒 諭曰阿克棟阿自帶兵協剿楚北逆匪以  
來甚屬奮勇今因患病歿於軍營著加恩照提督銜交部議卹部



議照陣亡減半 賞給卹銀四百兩子恆春廕六品二年六月奉  
上諭阿克棟阿之子六品廕生恆春著加恩在藍翎侍衛上行走  
五年病故

右 國史館本傳



陸廷柱

陸廷柱江蘇通州人乾隆二十一年由行伍拔補狼山鎮標右營把總二十二年升千總二十九年遷吳淞營守備三十三年遷南匯營都司三十九年遷京口水師左營遊擊四十四年擢浙江鎮海水師營參將四十七年擢瑞安協水師副將四十九年擢閩粵南澳鎮總兵五十年調福建臺灣鎮總兵五十一年三月調汀州鎮總兵尋命仍回南澳任十一月臺灣逆匪林爽文駐大田糾眾滋事五十二年三月閩浙總督李侍堯奏調粵東兵四千協勦廷柱以曾任臺灣自願帶兵前往經李侍堯奏入命廷柱分帶兵二千五百名赴鹿耳門會勦八月賊匪焚劫臺灣城外三坎店

廷柱偕侍衛烏什哈達等帶兵迎勦賊阻河抗拒廷柱等渡河奮  
擊敗之斬賊二百餘級奪獲礮械無算燬賊寨二百餘間五十三  
年二月林爽文就擒時莊大田潛匿大武壠爲負隅計官兵分路  
進攻廷柱偕副都統博清額等於竹仔港海口堵截先後擒獲賊  
黨張益光蔡助等三十餘名三月臺灣平五月回南澳任尋因在  
臺灣鎮時於前任總兵柴大紀貪婪款蹟不行揭參下部議處降  
三級調用五十四年正月 上加恩仍授廷柱南澳鎮總兵十月  
調廣東雷瓊鎮總兵五十五年參將錢邦彥巡洋遇盜被害事  
聞 上以廷柱於所轄洋面不能先事豫防事後又不實力追捕  
命革職畱瓊州協緝六十年獲洋盜歐阿錠陳亞一等 命兩廣



總督長齡查廷柱連次獲盜是否他人拏獲隨同列名抑係親身  
躡獲尋究明係遣家丁往緝 諭曰陸廷柱係棄瑕錄用之員不  
思報效祇遣家丁出洋則平日情耽安逸可知著發往伊犁效力  
以示懲儆嘉慶元年故

右 國史館本傳

四庫全書  
卷一百一十四

五

任承恩

任承恩山西大同人父名舉四川重慶鎮總兵征金川戰沒自有  
傳承恩廕都司乾隆十四年詣闕謝恩諭曰原任總兵任舉  
奮勇捐軀前經加恩優卹廕襲其子令伊子任承恩來京謝恩召  
見時看來頗有出息但年齒尚幼著暫行回籍令伊祖伊母善爲  
教導撫養俟成立後來京當差二十四年命在三等待衛上行  
走仍用都司頂帶二十九年授福建陸路提標左營遊擊三十二  
年調臺灣鎮右營遊擊三十六年遷江南六安營參將三十七年  
調淮安城守營參將四十年升江南河標左營副將四十一年調  
漕標中軍副將四十四年擢山東兗州鎮總兵四十七年以催漕

出力 諭部議敘四十八年調江南壽春鎮總兵四十九年二月  
升江南提督 賞戴花翎四月調福建陸路提督五十一年六月  
閩浙總督雅德奏參汀州鎮總兵武隆阿廢弛營務 上以汀州  
鎮係任承恩所轄交部嚴議部議革職 上從寬改爲革職畱任  
十二月承恩奏漳州南靖縣獅頭山匪徒糾集夥黨屢劫傷人隨  
委鎮道親率兵役拏獲三十餘名搜獲器械多件又在平和縣瑯  
溪地方拏獲盜首陳薦等七名搜獲匪歐敢等十餘名 上嘉之  
時臺灣彰化縣屬大里杙奸民林爽文糾眾戕官滋事水師提督  
黃仕簡由廈門開洋往剿承恩調發官兵亦奏請自行由蚶江對  
渡鹿仔港進攻 諭曰黃仕簡帶兵前往督辦匪黨自必望風潰



散豈有水陸兩提督俱遠渡重洋置內地於不顧之理今既已渡  
臺不須拘泥回任務須實力勇往會同夾攻速擒逆匪以冀剋日  
蕪功復 諭其鎮定持重厚集兵力一舉蕪事毋得零星打仗致  
有挫失時署鹿仔港守備陳邦光率義民先期克復彰化賊仍據  
大里杙四出滋擾五十二年正月黃仕簡赴郡城防守南路承恩  
駐營彰化防守北路以兵單賊熾不敢遽進師久無功 上以任  
承恩自請赴臺勦賊既由鹿仔港進兵卽應督同陳邦光等上緊  
追捕並知會黃仕簡分路夾攻何以駐守彰化漫無籌畫又以任  
承恩與黃仕簡均係提督不相統率有互相觀望之意屢飭之  
命來京陛見二月承恩奏分派員弁進勦將偏近鹿仔港之賊莊

十餘處盡行燒燬又義民兵役社番人等擒獻僞將軍林望生及賊夥高玉等十三名並呈繳賊渠王棻首級又被害臺灣府知府孫景燧彰化縣知縣俞峻鹿仔港巡檢馮啟宗之家人等呈繳印信三顆 上命總督常青爲將軍渡海督師 諭曰任承恩所辦雖有頭緒但殺賊甚少著常青察看情形如果任承恩奮勉得力卽令在彼督率弁兵追捕賊匪若不甚得力仍遵照前旨飭令赴京陛見候朕面訊一切承恩又奏拏獲奸僧西葉心向新法三名訊知林爽文攻府城不克復由諸羅斗門潛回大里杙因派遊擊海亮都司馬元勳等赴馬鳴山虎仔阡各路防守海亮至柴仔阡遇賊斬殺數十人進至荊仔尾賊從竹園突出千總葉榮吳聯貴

戰沒 諭任承恩既知林爽文潛回巢穴自應親往勦捕乃僅分派遊擊都司等零星堵禦殺賊甚少而千總葉榮等轉被傷陣亡更屬不成事體任承恩輕分兵力損失威重惟就已得之處駐劄觀望是誠何心著嚴行申飭 諭曰黃仕簡任承恩並不親臨行陣貽誤事機著常青查明奏參先行摘去花翎嗣承恩以賊眾各路蔓延派都司張奉廷埋伏大肚山田坎誘賊至山下三面攻殺斃賊甚眾又派都司馬元勳至瓦窰莊勦殺放火賊匪數十人生擒賊犯陳鞭何晏二名又鄉勇陳喜隆擒獲賊目謝華林芳等奏入 諭曰任承恩所奏各路之賊動稱數百數千而斬獲首級不過一二十顆生擒者亦不過一二名看來皆不實在著常青嚴查



母任朦混三月奏稱爽文匪眾繞過大肚山由番婆莊來攻鹿仔港臣卽令遊擊莫騰額等帶兵堵禦總兵普吉保用槍礮橫擊賊大敗四竄生擒賊夥十六名奪獲銅鐵礮烏槍藤牌無數並於賊尸內搜獲結盟書信五紙 諭曰林爽文旣親至鹿仔港滋擾任承恩正當親率弁兵迎頭痛勦何以僅派遊擊等打仗且與普吉保見在一處普吉保旣帶兵勦賊而任承恩竟安坐鹿仔港豈欲因人成事抑待自斃乎殊出情理之外任承恩斷不可再畱該處著常青卽傳旨將任承恩解任飭令卽行赴京候旨尋賊匪窺伺八卦山普吉保乘勢搶上山梁掘賊來路承恩親督副將林天路清查彰城內外窩藏賊匪忽有賊七八千人從山凹突出承恩與



普吉保督兵夾攻殲賊甚多生擒二十七名奪馬五匹獲鳥槍藤牌旗幟長槍多件 諭曰任承恩一味遷延直至此時始同普吉保親往進剿此次亦因普吉保進攻八卦賊柵任承恩不過從後策應著常青將任承恩是否親赴八卦山打仗及所報殺賊數目確實秉公嚴查如有捏飾虛報情弊卽行據實奏參嗣新任總督李侍堯抵任奏報軍務情形亦以南北兩路提督各有牽掣不免坐廢時日 諭曰任承恩經朕屢加拔擢用至提督年力正富理應加倍奮勉乃亦逡巡畏葸與黃仕簡互相諉卸實屬孤負朕恩卽著傳旨革職拏問四月李侍堯奏任承恩雖未能奮勇殺賊然鹿仔港至今得以無恙亦藉此兵勢隱爲聲援鹿仔港不守則蚶

江遂無進兵之日於臺地全局大有關係常青亦奏黃仕簡任承恩雖坐守不進然正在用兵緊要之時仰懇 聖恩令其帶罪奮勇殺賊以贖前愆 上不許交刑部治罪 諭曰任承恩係任舉之子任舉前在金川出兵時受傷陣亡其次子任承緒又以巡捕營遊擊因救火得傷身故無子任承恩見無子息若將伊正法是任舉臨陣捐軀竟至絕嗣朕心實有所不忍俟到部時可加恩貸其不死嗣刑部擬罪如律十一月 特恩免旬五十三年二月 諭曰任承恩若仍令永禁罔圉則伊父任舉終不能有後殊非軫念勞臣之意見在臺灣已屆歲事任承恩著加恩釋勒回原籍閉門靜居思過五十五年恭遇 八旬萬壽承恩與罷職諸員建設

經壇祝嘏 命以巡捕營參將用尋升京營副將嘉慶二年卒

右 國史館本傳

國史館本傳

皇朝通志卷之八

三

--	--	--	--	--	--	--	--	--	--



國朝耆獻類徵初編卷二百九十五目錄

將帥三十五

博斌

雅爾泰

格綳額

德光

巴克坦布

王林

宗室安慶

彭承堯

鄭國卿

額勒伯克

舒亮

徐昭德

保成

敷倫泰

蔡攀龍

特靈額

圖書集成醫部全錄卷之六十一

--	--	--	--	--	--	--	--	--	--

國朝耆獻類徵初編卷二百九十五

通奉大夫前署江西巡撫江西布政使司布政使湘陰李桓輯

將帥三十五

博斌

博斌鑲黃旗滿洲人達呼哩氏由黑龍江兵丁於乾隆三十八年從征金川打仗奮勉四十一年凱旋 恩予入宴駐京授藍翎侍衛四十六年擢三等侍衛四十七年擢二等侍衛五十二年臺灣林爽文構逆隨陝甘總督福康安往勦旋以攻取斗六門等處奮勉出眾 予晉級升用尋遷頭等侍衛 賞給呼嵩額巴圖魯名號五十三年二月福康安奏賊目莊大田在極南之瑯嶠潛匿督

兵由風港越箐穿林約行二十餘里賊從樹叢中突出抗拒前隊侍衛博斌等奮力追擊斃賊三百餘名生擒二百餘名追至柴城卽飭四面合圍水陸並進自辰至午殺賊二千餘名其被水師槍斃并投海者無算餘皆向山溝樹林中伏匿分頭搜捕將莊大田及有名頭目莊大韭等四十餘名全數生擒並獲大田之母莊黃氏及零匪八百二十餘名並槍礮刀矛藤牌旗械甚夥 諭曰賊目莊大田就擒所有在事出力之將弁等著咨部從優議敘其首先擒拏莊大田者究係何人據實具奏尋奏係博斌等一同圍拏恩賞副都統職銜在乾清門行走又 諭曰博斌等隨福康安剿捕逆匪能奮勇出力或於北口堵截擒殺賊眾或於南路搜拏首



逆各著勞績甚屬可嘉博斌等俱著交部查覈伊等所得功牌酌予世職臺灣平圖像於紫光閣 命詞臣擬平定臺灣後三十功臣像贊博斌得贊曰蝟集榛莽路截崎嶇經一晝夜頓開通衢突騎衝擊賈勇長驅全軍直達摧朽折枯十一月投爲英吉沙爾領隊大臣五十八年正月 命回京尋授呼蘭城城守尉十一月奉旨博斌著以頭等待衛兼副都統銜在乾清門行走尋授正紅旗蒙古副都統五十九年調鑲白旗蒙古副都統六十年管理健銳營事務嘉慶二年三月卒長子哈豐阿見任黑龍江驍騎校次子哈芬泰見任藍翎侍衛三子柏爾泰見任三等待衛

右 國史館本傳



雅爾泰

雅爾泰正藍旗滿洲人郭絡羅氏乾隆二十九年由領催補印務筆帖式三十四年授驍騎校三十五年升印務章京三十八年晉副參領十一月補印務參領四十四年又兼公中佐領五十年署鑲黃旗蒙古副都統調補荊州左翼副都統荊州滿營被水從將軍圖桑阿總督舒常察勘分別撫卹之五十六年調浙江乍浦副都統五十九年授烏什辦事大臣奏阿克蘇存倉麥石例給官員兵丁以及往返經過路費值換班之歲支給不敷而烏什舊例每年春季於倉內撥麥子二千石與阿克蘇回子秋收後易交大麥二千石爲銅廠餵牛馬之用頗有盈餘嘉慶元年雅爾泰奏請將阿

克蘇倉每歲所餘之麥除作各驛站餵養牲料搭放外其烏什撥借阿克蘇回子之麥歲依需用實數停止二百八十石悉運至阿克蘇以資官員兵丁等項支用仍於烏什增運大麥二百八十石以濟其所不給 從之二年逆回大和卓木之子薩木薩克會合延齊之弟鄂布三等率賊數百人欲擾喀什噶爾之境喀什噶爾辦事大臣長麟統兵往剿雅爾泰得報亦調兵三千名馬二百匹派防禦參將遊擊等員帶往接應由烏什西界取徑迅發並曉諭伯克使分諭諸小回各自安居無生疑懼又於烏什西界通喀什噶爾要路駐劄巴什雅哈瑪伍卡倫及阿奇木伯克玉蘇布按卡倫各添派小伯克一名回子十五名以備防守地方遂臻安輯旋



因私出部議存倉之麥二千餘石爲平糶之用經長麟劾奏奉  
旨交長麟等審辦接任大臣烏爾圖那遜議以雅爾泰家產變價  
買補得 旨報聞雅爾泰旋病故四月奉 旨雅爾泰見已病故  
所有監追銀四百兩等著加恩寬免

右 國史館本傳

三ノ目ノ事ノ行ハレテ

口

格棚額

格棚額蒙古鑲黃旗人瑚魯克氏襲其曾祖薩滿達雲騎尉世職  
乾隆三十三年授副護軍參領四十四年擢護軍參領四十五年  
發閩浙以副將委用四十八年授福建興化城守副將四十九年  
因脫逃人犯部議降二級調用奉 旨仍畱該處效力五十二年  
正月因林爽文滋事調赴廈門二月隨總兵普吉保統水師六百  
名渡臺灣駐北路馬鳴山三月率延建等營官兵赴諸羅彰化一  
帶會同柴大紀等併力剿捕五月堵禦埔心莊要隘先後殲賊五  
名生擒十七名九月擊敗虎仔坑賊眾陳泮等四五千入奏入  
諭曰格棚額於賊首陳泮帶領賊夥下山滋擾時督率兵民將賊

匪殺退甚屬奮勇前因出有温州鎮總兵一缺諭令福康安於帶  
兵出力之副將內保舉一員奏明升補著將格綳額亦歸入出力  
副將內一併察看比較何人最爲奮勇卽行奏明補用以示鼓勵  
尋督勦大武隴南仔港等處屢獲勝仗五十三年正月帶兵赴清  
水溝堵勦分投搜緝以追捕逆首林爽文等旋就擒獲蒙 恩賞  
戴花翎五月隨護軍統領普吉保由山徑截賊自內山大埔至大  
武隴隘口賊首抵死抗拒由山溝內分兩路來攻我兵分路出迎  
乘勢殲賊四百餘人生擒一百二十餘人賊黨皆潰竄復由東勢  
莊往北面山內搜捕旋經官兵拏獲首逆莊大田得 旨議敘四  
月自牛莊進山由大武隴直至岡山一路搜查逸匪並慰諭各莊



義民歸農耕作旋經將軍福康安等奏格綳額隨同打仗殺賊屢  
著勞績堪勝專閫之任請將格綳額補授汀州鎮總兵又因前在  
軍營丁母艱持服已過一年請照黃巖鎮總兵王柄之例令其署  
理俟服闋再行賞授奏入 上從之五十五年實授汀州鎮總兵  
五十九年四月因病回旗調理嘉慶二年四月卒

右 國史館本傳

日本書紀卷之三

卷之三

三

德光

德光鑲白旗滿洲人伊爾根覺羅氏乾隆九年襲騎都尉世職二十二年授三等侍衛兼公中佐領三十三年補貴州撫標中軍參將四十二年升雲南維西協副將四十四年調永昌協副將四十七年擢雲南普洱鎮總兵五十一年調甘肅肅州鎮總兵五十五年調伊犁總兵六十年調陝安鎮總兵嘉慶元年調甘肅涼州鎮總兵時湖北逆匪滋事德光隸署湖北巡撫惠齡軍營赴榔坪會勦適聞賊聚孝感甚眾遂駐營孝感之楊店驛奏入 諭曰德光前此於惠齡催赴榔坪時因孝感關係緊要並不拘泥即將所帶之兵全數帶往協同明亮攻勦尙有見識尋隨署廣州將軍明亮

進攻胡家寨德光帶甯夏兵別立一營賊人乘我兵初至一日撲營者三我兵盡力勦禦始退次日賊匪三千餘復渡河抗拒德光帶兵擊敗之我兵乘勝會聚山岡直偪松棚賊遁入寨我兵直進毀其木城二奪械無算焚其巢餘匪皆燒斃及投塘死奏入得

旨嘉獎 賜號達衝阿巴圖魯八月遇賊於土門衝我兵先奪據山岡時賊分爲四我兵亦分路進賊先撲西南營德光偕副將觀祥由東北營突出橫擊之賊敗嗣於宋家衝山岡防禦甚力賊不敢犯隨明亮會勦鍾祥由南路進敗之先後奏入疊 賞玉掛指大小荷包旋由吉龍山進攻夜抵雙溝適遇賊北竄擊斃無數十一月繞草店北截殺殲獲甚眾偵知賊沿江東津灣一帶西竄遂



夜赴沿河防禦十二月賊屯聚紅土岡德光攻其東路殺賊甚眾  
參將穆克登布自後窮追爲伏匪所圍德光馳援之始破圍出餘  
匪潰散又由官潭進攻賊匪踞山岡德光由對面山凹撲上賊竄  
我兵追至五桂井遂棄寨而逸嗣於槐樹岡等處進攻皆克之二  
年正月克賊於吳家店殲執旗賊首三名賊夥四五百人次日賊  
竄趙家岡德光躡後沿途擒剿伏匪三千餘人奏入復 賞大小  
荷包賊竄杏兒山一帶我兵進剿賊遁於沿途村莊暗伏多賊翼  
掩襲我兵德光偵知密圍其村賊據村口抗拒我兵施放火箭火  
彈賊冒火突出千餘人我兵擊之餘皆燒斃洪河之賊由正西山  
上奔下適黑虎嶺有潰匪數百人來應德光尋蹤掩擊乘夜窮追

又偕副都統六十七等分路勦殺克之奏入 賞金盒銀絲盒大  
小荷包二月帶兵赴鄭家河邊賊北竄之路殲三百餘人三月賊  
將西竄由黃陂縣之河口盡數掩殺生擒吳湘等二十三名先後  
奏入復疊 賞玉搬指大小荷包四月克賊於落花溝追三十餘  
里賊竄入鄖西縣德光隨都統巴克坦布攻勦各有斬獲餘匪涉  
水奔隔岸賊匪數千來援我兵槍礮齊發賊卽南竄鄖西久爲賊  
踞至是始復旋由東南山溝進攻途中生擒張大明等五人斃賊  
數百餘人六月卒於軍 賜祭葬子慶廉任江甯協副將騎都尉  
世職孫積善襲

右 國史館本傳

## 巴克坦布

巴克坦布正藍旗滿洲人嵩佳氏乾隆八年由閒散襲雲騎尉世職三十五年授副護軍參領往喀什噶爾三十五年擢健銳營前鋒參領出師雲南三十七年四川總督桂林進剿金川分兵屬巴克坦布由喇嘛寺進攻郭松路三十八年冬大兵既攻克拉約前至策爾丹色木尤險峻巴克坦布進擊之賊棄礮遁三十九年攻庚額特據要地槍矢刀矛並發殲賊甚眾奏入 上嘉之授副將銜尋補直隸山永協副將四十年攻穆谷四十一年攻馬爾邦皆力戰有功金川平圖像後五十功臣於紫光閣巴克坦布與焉命詞臣爲之贊曰前鋒參領簡列行陣屢戰折衝洵授協鎮搃庚

額特槍箭並發料勝心精扎烏夜突四十二年 賞戴花翎四十  
八年擢雲南昭通鎮總兵五十三年入 覲 命畱京署鑲黃旗  
漢軍副都統旋授正白旗蒙古副都統五十四年授管理火器營  
大臣補公中佐領五十六年授鑲藍旗護軍統領尋調鑲紅旗滿  
洲副都統五十九年授正紅旗蒙古都統嘉慶元年豫省邪匪滋  
擾於九月 命巴克坦布帶兵赴都統永保營 賞銀一百兩十  
一月賊聚黃龍壩官兵擊敗之餘匪復煽引襄陽棗陽村中降賊  
渡河分竄巴克坦布率兵由東南截剿至萬店賊西竄去永保奏  
入 諭曰巴克坦布帶兵甫抵該處究非總統之人暫免治罪仍  
傳旨嚴行申飭十二月追賊於趙家集賊竄回襄陽得 旨姑令



戴罪立功二年正月偕河南南陽鎮總兵王文雄於禹山湯山兩路夾擊適河南巡撫景安兵至大兵四合殲賊千餘追至丹江生擒張正林等三百四十三名斬級八百二十餘奪糧食牛馬刀矛無數二月進剿劉家港賊謀越山竄巴克坦布隨工部尙書惠齡等繞出賊後殺賊百餘生擒劉文舉等七名奏入得 旨優賚四月隨大兵收湖北鄖西五月擊賊於黃龍鋪殲斃六百餘人閏六月猝中暑卒於軍中奉 諭曰巴克坦布在軍營中暑病故雖非歿於行陣究係病故可憫著該部查例議卹如例子富英承襲雲騎尉見任三等待衛

右 國史館本傳

西曆三月廿六日未

名二百九十五

十

王林

王林正紅旗漢軍人由閒散於乾隆三十五年補授鑾儀衛整儀尉三十六年升治儀正四十年擢雲麾使四十二年授廣東提標後營參將五十年升廣西梧州協副將五十三年擢右江鎮總兵五十七年調左江鎮總兵嘉慶二年四月西隆州所屬村寨多被苗匪勾結游擊特通額駐守八渡卡賊由粵岸山後奔至北岸狎匪乘閒擁眾過江助之特通額受傷王林駐守西隆舊城相距二十餘里聞信帶兵馳救行不數里卽遇匪眾萬餘我兵奮勇抵擊斃賊百餘名王林右臂受有槍傷經兩廣總督吉慶奏入 賞戴花翎六月進攻亞彙賊巢行至上下夏雄苗匪千餘迎拒王林偕

副都統和星額等分兵三路攻撲直擣賊巢槍礮並發擊斃苗匪六百餘名復從小路繞至亞橐之後分三路壓攻王林等由東面進和星額等由西面進提督彭承堯由山梁壓下各兵拋擲火彈焚其寨屋一面施放槍礮擊斃賊匪千餘我兵一擁而入生擒六十九名餘匪突煙冒火而出死者甚多亞橐賊巢全行掃蕩奏入賞玉喜字搬指黃緞火鑷包大小荷包尋搜勦賊首龍登連於附近亞橐之那地等處分路進攻賊將隘口三處斫樹排柵復疊石牆固守和星額等由東柵進彭承堯由西柵進王林隨吉慶攻其北柵另派員弁搶據寨頂拋擲火毬火彈焚其寨中房屋三路官兵乘勢拆柵搶入刀矛並舉立斃賊匪二百餘名追殺數百名八



芒弄深宮塘夏貴夏農巖隘苗人千餘戶赴營投誠吉慶旋派王  
林於西隆州城之西者浪地方搜撫閏六月勦周洞村率參將劉  
榮慶等帶兵八百名乘夜冒雨擒上山梁槍礮齊發匪眾千餘出  
村抗拒我兵奮攻擊斃百餘名賊始退林等斬關直入殲斃無算  
追擒匪目王亞丰七月在軍營受瘴病卒

右 國史館本傳

四庫全書  
卷一百一十五

三

## 宗室安慶

宗室安慶正藍旗人乾隆三十二年授三等侍衛三十五年擢副護軍參領四十年授護軍參領四十九年授德州城守尉五十八年授齊齊哈爾副都統六十年因私受貂皮賤價收買並收木杆作爲柴薪及折收價銀等款經打牲總管杜爾圖等呈控上命福長安等審實各款並查從前給發賤價收買貂皮至今親隨官兵等呈交皮張等事起自前任將軍都爾嘉安慶等均相沿舊習奏入諭曰安慶身任副都統並不潔己任事膽敢任意索取貂皮多張甚屬無恥著鎖拏派策拔克小心解交宗人府軍機大臣刑部從重治罪尋擬絞監候秋後處決嘉慶元年二月因勦辦湖

南苗匪將次告竣預籌善後事宜 上以安慶年力方強前在黑龍江副都統任內沿習都爾嘉惡習尙非伊自作俑者可比 命往湖南效力贖罪七月四川總督和琳征勦苗匪以軍營辦事人員奮勉可嘉奏請獎勵奉 旨安慶著加恩賞給二等待衛九月官兵進攻平隴賊巢安慶隨巡撫姜晟等從牛心地象心地至山家坳將正面山口截住用礮轟擊殲獲多名十月隨湖廣提督鄂輝由甲式溝進勦攻克平隴奉 旨交部議敘十二月進攻石隆巢穴安慶隨署廣州將軍明亮等由兩又灣繞出左手山梁借各路官兵圍剿梟斬賊首石柳鄧生擒其子石老喬蔽功獻馘奉 旨交部從優議敘嗣因川陝楚教匪滋事四川達州賊首徐添德



等屯踞重石子香鑪坪二年五月安慶隨領侍衛內大臣德楞泰等攻奪火石嶺賊卡斃賊甚多東鄉賊首王三槐率眾撲毛坪一帶營卡官兵分路攻擊安慶偕總兵達音泰由張家山截殺賊敗走六月擢頭等侍衛八月因勦賊冒暑成疾畱夔州調養尋卒

右 國史館本傳



彭承堯

彭承堯湖北松滋人乾隆二十五年武進士授藍翎侍衛二十八  
年分發四川以都司用三十三年補督標中軍都司三十六年隨  
征金川功加二等四十年四月賊匪據甲索礮卡總兵敖成分兵  
三路直逼礮根賊併力抗拒承堯冒矢石奮力攻之遂破賊礮礮  
斃無算閏十月攻克扎烏古等處山梁 賞戴藍翎四十一年升  
貴州提標前營遊擊四十三年遷廣西全州營參將四十五年升  
浙江台州協副將四十七年保舉堪勝總兵引 見賞換花翎四  
十八年補江西南贛鎮總兵四十九年調廣東潮州鎮總兵五十  
一年署廣東提督五十二年正月賊擾臺灣承堯率兵於黃岡彈

歷五十三年丁母憂五十六年服闋引見時廓爾喀賊匪滋擾後藏奉旨候補總兵彭承堯著馳驛前往四川交孫士毅調遣委用十二月諭曰原任廣東潮州鎮總兵彭承堯起復來京經朕召見看其人尙好且曾經出師見已令其馳驛前往四川交孫士毅酌量委用若帶兵乏員卽令該鎮分帶土兵赴藏若因四川總兵張芝元等俱帶兵赴藏卽將彭承堯畱於川省署理鎮篆五十七年署理重慶鎮總兵孫士毅飭領弁兵三千名赴打箭爐聽候福康安檄調旋因福康安奏請彭承堯人尙去得見在軍營亦須大員帶兵仍令該鎮來藏六月帶領頭起沃什黨壩瓦等官兵赴藏十一月自藏督兵回寨補川北鎮總兵五十八年擢四川提



督時廓爾喀蕩平圖十五功臣於紫光閣 上嘉承堯功 命儒  
臣爲之贊曰金川從征偏裨克臯西江東粵累昇專閩陳請協勦  
已屆凱旋防守後路與有力焉九月調廣西提督五十九年六月  
奏巡閱通省營伍關隘情形凡參將以下衰老患病不能騎射者  
俱參革得 旨所辦俱屬認真嘉慶二年正月貴州南籠府狝苗  
不靖與廣西西隆州毘連承堯率弁兵馳赴隆林以資救援行抵  
舊州聞苗匪用竹筏渡江至北樓白山等處滋擾揚言由八達渡  
至舊州遂率兵疾馳北樓白山勦捕斬獲甚多賊始遁舊州距南  
籠二百餘里上通西隆下通百色爲邊防總匯之區向無城垣遂  
令打華八渡北樓白山分兵設卡嚴爲防堵三月率大兵於沙犁

扁牙盡力搜捕賊乃竄旋馳抵西隆州有黔苗二千餘人驟至夜  
襖寨屯聚遂率守備羅嘉升由小路越山直超賊營之右飭總兵  
尙維勳由大路超賊營之左兩路夾攻乃克之 諭曰見在西隆  
州屬有成林尙維勳足以防堵吉慶當與彭承堯帶領官兵前赴  
黔省將冊亨收復四月苗匪聚集西隆州之花貢河坭洞塘焚掠  
各村並舍上各甲土民亦被煽惑經羅升率兵力撲賊始逸承堯  
督兵追捕勝之奏入 諭曰八達附近之花貢地方聚集賊匪既  
經彭承堯馳往剿捕諒已殲捕淨盡有鼠回黔省者彭承堯即可  
隨吉慶帶兵與勒保會合剿捕是時泗城府一州二縣村寨多被  
黔省賊匪煽惑脅從首逆龍登連倡率猥獩大肆焚掠必分路剿

除沿江堵截始可開通道路會黔合剿入達土城賊匪亦多窺伺  
雖屢經殲戮其平廣亞稟等寨箐密山深蜂屯蟻聚出沒無常因  
計由入達至西隆遂加搜捕旋與吉慶分路巡查飭鎮將備弁防  
堵周密乃突有賊匪於粵岸山後肆出而北岸狎苗乘閒擁眾渡  
江石江鎮總兵王林左江道永慧聞信馳救吉慶亦率兵應援遇  
賊萬餘我兵奮勇爭先賊抵死拒敵適承堯與廣州協副將德昌  
先後馳至奮力擊之始潰奏入 諭曰此次吉慶與彭承堯分路  
巡查督兵設法搜捕所辦尙好五月賊匪竄入渡一帶山梁百  
却拔雅委后等隘俱被侵掠平廣亞稟那地等寨亦爲黔苗糾結  
承堯與吉慶等議於卡隘稍緩處抽調勇幹鎮將派官兵二千飭



都司井汲泉由口廠至祥讀山梁都司和順武佟樞分兵由大雅山後十里坡板堅兩路進攻副將王模都司李林貴前至弄江村口山梁堵截以壯聲勢吉慶於後路督兵接應承堯由中路進剿直抵八渡各路官兵會集賊不及防大兵奮力攻之承堯率兵赴百扣等處乘勢搜捕賊望風潰八渡悉平惟亞稟一寨岡嶺重複鳥道紆迴屯聚甚眾必厚集兵力開闢道路方得深入時所謂東省官兵二千名俱至以隆或一寨距舊州僅七十里爲亞稟之後路乃督兵由此進剿遂撲賊於板仰山梁焚燬殆盡六月率參將劉崇慶遊擊張翊豐都司那延泰永祿統領兵勇與吉慶分路進剿取道隆德察賊踞山抵拒大兵直撲山梁殺賊無算 諡曰此



次吉慶與承堯分路進攻所辦甚好西隆邊界苗寨惟亞稟隆或  
聚集較多今隆或既經攻克止亞稟一處諒可即日掃蕩肅清後  
路帶兵渡江會黔夾擊种苗一帶易於完竣閏六月由八達進攻  
亞稟行抵安那地方其山梁路口賊俱攔用木柵且於深箐中放  
槍隨勦羅嘉升永祿守備胡俊鴻等分兵三路斫柵前進斃賊甚  
眾燬寨柵二十餘尋將溝坎挖加深伏兵以待因思正路進勦  
急切未能勦淨乃躡覓小路一綫可繞亞稟之後隨令各兵於隘  
口佯放槍礮作進撲狀遂率員弁沿小路躡山而進直抵亞稟從  
南路進攻賊伏千人於對面山梁滾木礮石承堯將弁鼓勇先登  
賊失其險吉慶由東路夾擊承堯遂由山梁下壓火其寨大兵遂

擁上山梁殲斃苗匪一千餘名生擒六十餘名餘匪潰散龍登連奔逸於亞稟之附近那地小河等處奏入 諭曰彭承堯首先搶上亞稟南面山梁使各路官兵乘勢入寨尤爲出力宜沛殊恩用昭賞賚著加太子少保銜賞戴雙眼花翎並賞玉喜字牌一箇玉喜字扳指一箇黃辮大荷包一對小荷包四箇二十日進攻那地小河其地四面崇山隘口賊斫木立柵累石成牆守甚堅固承堯由西柵進攻吉慶攻北柵和星額攻東柵賊奮力抗拒千總張天仲等搶踞西面山寨拋擲火彈賊多焚斃三路官兵乘勢斫柵入併力搜剿又克小河上下馬蟻石板等寨是時承堯屯駐亞稟突有賊撲營率兵力敵賊立潰首逆登連力窮投出遂選員解京西

隆全境肅清惟岩蕩一寨山梁等密濱臨江水尙有黔苗賊匪承  
堯率兵四面圍攻投順甚眾巴結一印亦舉境乞降因籌渡江會  
黔合勦緣江水泛漲亂石嶙峋湍急水涌對岸崇山壁立賊眾恃  
險負隅不能驟攻計入渡下游三十里之百扣地方山勢稍平屯  
賊亦少因令總兵德昌密備船筏由尾後暗渡繞越山梁從後攻  
擊知府李昉由百扣潛渡繞入渡對江山頂縱火且於入渡江口  
備船設礮以備攻擊二十六日承堯與吉慶率兵江口施放火礮  
對江賊匪驚竄遂乘勢爭渡分搶山梁四路會勦斬獲二千餘人  
奏入 諭曰由八渡下游密備船筏出其不意擁渡過江殲賊二  
千餘人實屬可嘉彭承堯著賞玉喜字扳指一箇大荷包一對小

荷包四箇以示獎勵黔省冊亨永豐一帶與粵西毘連今督師渡江卽獲大勝諒冊亨永豐之圍無難立解時黔匪知粵兵進取冊亨乃自和平山至板蚌由板蚌至板堵日添賊拒守承堯乃率兵由小路圍烘寨越山而上繞板蚌之後吉慶會兵夾攻賊腹背受敵捨命奔竄遂乘勢直上山梁下克之賊夜率眾偷營又伏兵以勝之賊大潰旋竄踞新會山梁九月十八日由板堵直取新會克之時勦保已攻破洞灑賊勢甚孤遂遵諭旨勦撫兼施凡冊亨永豐所屬八果等寨計一萬二千餘口前後悉降奏入上嘉賞之二十三日抵冊亨城外分兵進剿燬賊卡斬獲甚眾遂統大兵直進冊亨州城平之諭曰吉慶奏勦除黔苗收復冊亨所辦亦



好彭承堯著賞玉扳指一箇大荷包一對小荷包四箇以示獎勵  
十月承堯由冊亨督兵凱還行至百色染瘴病卒長子朝龍乾隆  
四十年乙未科一甲二名武進士授二等侍衛補福建汀洲左營  
遊擊緣事謫戍烏魯木齊嘉慶元年釋回隨承堯軍營效力以攻  
克那地小河得功奏入得 旨賞復原官畱粵東補用二年隨軍  
凱旋以染瘴卒次玉龍以廕生授主事見任戶部郎中嘉慶三年  
經兩廣總督吉慶奏朝龍前在軍營著有勞績染瘴病故請 予  
賞卹廕朝龍子紹齡監生

右 國史館本傳



鄧國卿

鄧國卿雲南阿迷人乾隆十年武進士二十年揀發貴州以守備用二十二年署貴州提標右營守備旋補陝西提標右營中軍守備二十七年升四川太平營都司三十一年升阜和營遊擊三十五年遷越嚮營參將三十六年四月金川逆酋索諾木戕害革布什咱土司國卿將明正木坪土兵調齊於喀勒塔爾章谷兩路分守八月偕參將薛琮帶領綠營土練並巴旺布拉克底土兵從山梁往下夾攻兩路會合收復小金川所占之納頂裏谷礮寨一百五十餘所續因攻得之納咱小礮三座賊番於昏夜爬山潛來偷奪將備等率兵迎剿國卿受石傷旋回營調養三十七年六月傷

愈復調赴軍營十月參贊大臣阿桂以甲爾壟壩爲金川要隘奏  
令國卿與參將楊發育管領附近漢土官兵由格爾格堡前進是  
月阿桂督兵進攻水碓對面之南山梁國卿同侍衛阿坦保帶兵  
接應與侍衛普吉保林奪取木柵三十八年將軍阿桂等奏鄭國  
卿自三十六年派赴軍營於攻獲章谷約咱各碓寨時打仗殺賊  
身帶石傷四處上年九月復派由革布什咱進攻甲魯等處亦經  
攻獲石碓水寨殊屬奮勉請授四川永甯協副將得 旨允行三  
月隨阿桂等前赴當噶爾拉山梁奪獲碓卡木柵六座十月參贊  
大臣明亮等奏革布什咱各要隘漢土官兵不敷分布酌抽川兵  
三百名令國卿分派駐守續又札令會同藩司李本將甲魯一帶



可通賊卡要隘加意巡邏四十年十二月帶領後路土漢官兵前赴噶拉依攻賊巢四十一年十二月金川平畱營派辦善後事宜旋丁母憂回籍四十五年服闋授湖廣督標中軍副將四十九年擢福建建甯鎮總兵嗣值臺灣逆匪林爽文滋事五十二年九月國卿統泉州兵三千調赴鹽水港援剿旋因大武隴賊匪千餘在大客莊搭藁居住侍衛烏什哈達進剿時國卿遣都司吳壯圖領兵接應過河直衝賊隊賊卽沿山敗走五十三年二月南路賊匪莊大田等占據大武隴地方爲負隅計國卿奏派駐劄白水溪一帶進剿賊匪復阻截十八重溪國卿偕烏什哈達吳壯圖等分路帶兵義民熟番等進剿追過山後殺賊數百名擒拏活賊二十餘

名五十五年春總督福康安以國卿患病未痊請以原品休致  
上以國卿前曾出師金川等處屢著勞績且熟習行伍命於病  
痊後來京陛見酌量錄用嘉慶三年在籍病故子永江嘉慶戊午  
科舉人

右 國史館本傳

額勒伯克

額勒伯克蒙古正白旗人卓特氏由前鋒於乾隆三十三年授前鋒校三十五年署烏槍護軍參領三十七年授烏槍副護軍參領三十八年遷烏槍護軍參領尋隨征金川四十年八月官兵渡河而東取路至扎烏古山梁對面復渡而西額勒伯克等分隊攻克丹扎木各賊寨殲戮無算閏十月率兵分路攻扎烏古山腰破其三礮四卡矢石斃賊甚多扎烏古山者河西門戶賊守禦至嚴至是爲我兵所得乘勝進抵斯底葉安地周圍可二十里額勒伯克等奮勇追勦賊人喪膽奔潰攻破寨落三十餘處遂進兵至日期滿日期滿之南地名耳得谷深溝密箐賊於山上結大寨前後周

設礮卡以自衛額勒伯克將兵一鼓直前突圍而人斃賊目錫拉木并殲賊番五十餘人無得脫者副將軍明亮以聞奉旨賞給甲圖布巴圖魯名號十一月領兵取阿彌古先克其山半大卡四座卽奮力下壓賊寨痛加勦戮拋入火彈煙燄蔽天遂克阿彌古十二月官軍分道攻達撒谷額勒伯克等分隊設伏其西面兵丁鼓銳直撲礮卡額勒伯克等卽由達撒谷而東攻取斜坡上木城二座奏入諭交部議敘又進攻布古魯達那其地與獨木古思滿昆連實地當險隘額勒伯克等以兵克之復將布古魯及達那兩道山梁同時攻克殲賊百餘人奪得鐵礮一位旋奉諭交部優敘四十一年大軍凱還圖繪後五十功臣像於紫光閣命



詞臣爲額勒伯克贊曰甲圖布陣是三云百勝用命獻功實與名稱  
乃復帶兵直登山頂連克要隘厥志斯逞四十五年授掌關防營  
總四十六年升獨石口副將四十七年丁母憂回旗屆百日引  
見奉 旨暫在頭等待衛上行走五十年授阿勒楚喀副都統五  
十四年調三姓副都統嘉慶二年擢黑龍江將軍三年卒子多隆  
武見任直隸副將

右 國史館本傳

--	--	--	--	--	--	--	--	--	--

168-598

168-598

舒亮

舒亮正白旗滿洲人蘇佳氏由前鋒於乾隆三十三年補前鋒校  
三十七年委署前鋒參領從副都統齊里克齊征金川三十八年  
升副護軍參領三十九年二月升前鋒參領七月官軍攻穆谷舒  
亮伏軍山下待賊殲斃甚多又進攻卡角賊匿兵山溝舒亮先於  
密箐中望見火光以火器就擊之賊潰敗奏入 賜緞兩匹以功  
加副都統銜遂授鑲白旗滿洲副都統十二月調補荊州副都統  
四十一年二月再調鑲黃旗滿洲副都統又以克噶拉依功 賜  
穆騰額巴圖魯名號六月授管理健銳營大臣及金川凱旋圖形  
紫光閣 御製贊曰率健銳營訓練有素節制之師五步六步礮

確叢中鼓勇身先勞而不伐是用稱賢四十一年補鑲藍旗護軍統領四十六年五月大學士阿桂勦撒拉爾逆回蘇四十三舒亮從至卽敗賊於華林山賊懼掘濠設卡以自固閏五月阿桂督令領隊大臣海蘭察由山西橫衝賊卡舒亮從南山進當賊鋒賊竄出抗拒箭射舒亮傷左骹拔箭裹創而戰奪賊卡四座斃賊百餘得 旨優獎並賞大小荷包銀百兩六月與海蘭察乘賊不備以土袋填賊濠渡軍擊之守濠之賊斃殆盡復奪十餘卡賊首蘇四十三爲我兵所戮舒亮勦華林寺餘匪事平回京供職四十八年調正黃旗護軍統領五十二年林爽文叛擾臺灣七月舒亮與領侍衛內大臣海蘭察護軍統領普爾普並授領隊大臣從協辦



大學士陝甘總督福康安渡海征之爽文圍諸羅久福康安議官  
軍至後卽取路笨港救諸羅舒亮由烏日莊夾攻以分賊勢十二  
月賊方踞北大肚山拒我舒亮迎擊破之連破南大肚王田莊瀨  
涓莊以至半山莊坑子莊遂達烏日莊賊巢得 旨從優議敘五  
十三年二月爽文逃入內山匿東勢角福康安督舒亮及成都將  
軍鄂輝由歸仔頭偏之至麻著社分軍鄂輝由樸仔離東山路進  
舒亮直取東勢角山徑峻險諸將皆步上殺賊二千餘名獲軍械  
無算爽文窘甚復走至老衢時舒亮督軍急進獲之奏入 諭曰  
此次臺灣逆匪滋事至一年之久福康安等帶兵渡洋旬日之內  
卽將逆匪痛加殲戮擣穴擒渠各村莊得以安堵如舊該處地隔

重洋五方襟處風俗素稱刁悍經此一番懲創若不明示威武恐民人等事過卽忘不足令其怵目儆心常思安分畏法將來事竣後如福康安海蘭察及鄂輝普爾普舒亮等之勇略最著者應於臺灣郡城及嘉義縣兩處共建生祠塑立像貌俾該處民人望而生惕日久不忘舒亮隨押爽文並各賊目入京賊黨賴大病困舒亮在途誅之以六百里奏聞奉旨申飭時已授爲鑲紅旗蒙古都統命仍回正黃旗護軍統領任四月敘功給雲騎尉世職再圖形紫光閣御製贊曰金川之役已爲領隊事定功成統軍歸內搜捕逸賊不遺醜輩生致逆渠其能不昧冬調鑲黃旗護軍統領五十五年擢荊州將軍五十八年調黑龍江將軍六十年坐

私買貂皮革任去世職會川陝楚邪匪滋事叛據當陽縣 命以  
三等待衛赴軍營自效嘉慶元年三月總督畢沅至當陽舒亮統  
河南兵至襄陽策應先擊斬賊目孫應元等再戰劉家集擒賊目  
朱正英升二等待衛四月會軍圍當陽乘賊困憊雷西門一面縱  
之舒亮自北擊之殺賊目熊道成等三名擒賊目張仲選等六人  
是月擢頭等待衛五月舒亮由東門缺口登城賊目王正統執白  
旗指揮迎敵擊以火槍立斃舒亮左額亦受槍傷進剿不已毀賊  
所築子牆礮臺進占東門賊退守西門依龜背山爲巢穴官軍乘  
勝直進賊易服將遁官軍四面蹙之凡斬馘生擒一千餘人獲賊  
首陳德本遂復當陽奉 旨加副都統銜 賞戴花翎並有玉扳



指大小荷包之 賜尋授鑲藍旗漢軍副都統 命赴鍾祥協同  
永保辦賊九月鍾祥賊分東西路竄唐縣鄧州舒亮伏軍呂堰驛  
待之賊至伏發西竄之賊殲焉乃合兵追東竄之賊十月有草店  
之捷舒亮爲槍所中 賞銀絲盒大小荷包獎勵之十一月賊偵  
知官軍在蕭家岡乃詭稱難民渡滾河逸去舒亮坐堵勦不力革  
去花翎及巴圖魯名號 命總督惠齡訊問奏參二年正月敗賊  
於興隆店又敗賊於都司街及吳家店 賞鑲玉如意一次大小  
荷包二次適惠齡以帶兵需人請 命畱營效力二月屢敗賊於  
劉家港小阜街曾家店 賞銀絲盒一大小荷包各二三月統軍  
至河南張博士店鎮遏賊勢四月移駐李家橋五月以賊渡漢江



降爲三品頂帶副都統三年二月復坐勦白巖山賊不力總督  
勒保劾奏請褫革治罪奉旨舒亮官職全行斥革作爲兵丁留  
營效力贖罪尋卒於軍

右 國史館本傳

國朝文獻通考卷一百一十五

五

徐昭德

徐昭德漢軍正白旗人由馬甲於乾隆三十三年補鑿儀衛整儀尉三十四年補治儀正三十六年授山西懷仁城守都司四十五年擢陝西綏德城遊擊調河州鎮標中軍遊擊五十四年遷循化營參將五十八年遷甘肅永固城營副將旋調蘭州督標中軍副將六十年擢巴里坤總兵嘉慶元年統兵千名抵湖北襄陽時當陽邪匪嬰城固守四月分兵五百偕總督畢沅攻城進兵勦殺潰之振師還襄忽有賊匪從南漳穀城交界之茨河潛來撲城卽分守南門等三處施放槍礮殲賊甚多奏入 諭曰閱圖內九龍池賊巢外祇有賊卡三處官兵擊卡緊逼看來賊勢亦斷不至竄入

竹山竹谿劉君輔馬瑀徐昭德竟不必在彼株守速赴大甯與觀成會合夾擊一經竣事馳往西鄉一帶幫同宜縣等迎剿楚匪七月禦賊於老木園生擒賊目葉仁宣馮文龍二名斬級三十四乘勝夜奪賊人頭卡殲斃守卡賊匪三十餘人遂於大甯分路剿賊八月進剿菁林口賊官兵冒雨觸霧奮勇競進燒燬賊巢殺獲二十餘名九月攻後山要卡突有賊匪五六百人撲陰晴山附近之義首文生饒明楚卡座昭德馳往援應斃賊三十餘人老木園之賊恃樵風洞爲保障當直攻賊卡之際卽分兵進剿以牽綴賊勢旋又同德齡勦辦青莊坪一路十一月由三寶山黃草嶺分爲兩路跟蹤追賊賊匪抗拒殲斃百餘人追至馬家壩三年二月賊匪



占據白沙河大小山梁總統勒保等督同帶兵進剿奮勇追擊相持數時殲賊無算賊越山溝遁復追殺五百餘人生擒賊目三名餘匪七十五名三月卒於軍營奉 旨予卹子恩福六品廕生見官三等侍衛

右 國史館本傳



保成

保成滿洲鑲黃旗人佟佳氏由義學生考取中書乾隆二十一年補內閣中書尋調戶部銀庫司庫二十四年擢內閣侍讀二十九年調戶部緞匹庫員外郎三十二年調刑部員外郎三十四年擢郎中入直軍機處四十五年授光祿寺卿四十七年命以副都統銜往喀什噶爾辦事四十八年布魯特伯爾克私逃命保成擒治之嗣以不赴安集延爲伊犁將軍伊勒圖所劾得旨免罪四十九年三月奏據阿奇木伯克散秩大臣鄂斯璠來告有薩木薩克者私遣回人托克托素丕巴爾哈特素丕寄喀什噶爾回人默羅色怕爾等五人書旋遁去書中稱默羅色怕爾前曾通賄旋

報薩木薩克今已執默羅色怕爾俟托克托素不等就獲卽究治  
上以保成不先鞠默羅色怕爾等五人不曉事 嚴飭之閏三月  
奏訊知薩木薩克在色默爾罕鄂斯璊議遣可信回人相機誘致  
之或以計勦除 諭以致則可毋妄議勦除以失遠人心旣英吉  
沙爾阿奇木伯克阿里木布魯特散秩大臣阿其睦誣訐薩木薩  
克與鄂斯璊寄書保成鞠得寶奏請安撫嗣後奏令阿里木與鄂  
斯璊謝罪議和 嚴旨飭其誤 命械阿里木等至京師五月執  
阿其睦以來子燕起遁奏入 命部臣議罪尋獲燕起 詔免之  
燕起旣獲復爲阿哈拉克齊穆拉特私縱喀哩提金部落布魯特  
比薩瑪齊畱之五十年十一月燕起率布魯特和扎布由裕都巴



什路來盜馬保成擒和扎布五十一年十二月 上以喀什噶爾  
要地宜駐參贊大臣以明亮雅德移駐 命保成歸京師五十二  
年授內閣學士正白旗蒙古副都統五十三年擢吏部左侍郎調  
鑲白旗蒙古副都統五十六年調熱河副都統五十九年遷甯夏  
將軍嘉慶元年以舉堪升城守尉之甯夏協領貢達色年老猥懦  
有 旨嚴飭三年四月卒子三長德克精阿候補知府次福克精  
阿三等侍衛三喜延祝兵部筆帖式

右 國史館本傳

日本書紀卷之六十四

三三

敷倫泰

敷倫泰鑲藍旗滿洲人完顏氏乾隆十五年由西安駐防披甲考取將軍衙門候補筆帖式二十五年題補筆帖式三十二年俸滿願改武職以該處驍騎校用三十三年坐補西安鑲紅旗滿洲驍騎校三十五年遷防禦三十六年隨大學士舒赫德赴伊犁辦土爾扈特投誠事三十七年因舒赫德保舉改給員外郎職銜三十八年九月回京得旨准在戶部行走挑入軍機處十二月補戶部員外郎三十九年九月左都御史阿思哈奏查辦山東逆匪王倫一事案件需人繕寫請帶同敷倫泰前往十月諭曰據舒赫德奏山東道府內人多中材請將隨辦此案之戶部員外郎敷倫

泰發東差委著照所請交山東巡撫楊景素遇有道府缺出酌量  
補用是月授兗州府知府四十三年擢山東督糧道四十四年緣  
知府任內失察金鄉縣減損城垣工料部議革任出具考語引

見以戶部主事用其革任之案帶於新任四十五年五月仍挑入  
軍機處六月補戶部主事四十六年四月甘省撤拉爾逆回蘇四  
十三等滋事占據河州 上命大學士阿桂尙書和珅馳驛前往  
並 諭曰見在甘省事務紛繁派司員敷倫泰等六人前往甘省  
交阿桂和珅差遣委用八月阿桂等奏甘省添建倉廩惟永昌撫  
彝張掖三處糧石較多軍機司員敷倫泰勘驗所添廩座均經蓋  
造預備開徵之用十月回京四十七年七月擢戶部員外郎四十



八年擢戶部郎中四十九年擢鑲藍旗滿洲副都統派往喀什噶爾辦事 賞戴花翎五月 諭曰敷倫泰不必前往喀什噶爾伊父母在西安俱有年紀著加恩補授西安副都統嗣 命軍機大臣傳諭曰聞逆回在馬營街其明善所帶後隊之兵著交敷倫泰帶領馳赴副都統永安駐劄之處與五岱等并力剿賊是月奏言原擬速赴甘省但提臣來札賊匪有東竄之信則撥兵前至隴州等處刻不可緩又無大員帶兵再酌商見在存營兵五百名卽星夜帶赴隴州相機堵截六月奏查隴州東汧陽麟遊一帶險隘旣多小路亦復不少業將所帶兵分設卡倫其續派滿兵到來並派令嚴防仍曉諭居民毋得惶恐各安本業時圖薩布奏汧隴各處

數倫泰分別屯守復於諸隘口安劄大營以資策應布置周密七月阿桂奏賊匪已平飛咨數倫泰撤回本任九月丁母憂 諭曰數倫泰因伊母故丁憂例應卽行出缺但伊父尙在西安著加恩不必開缺卽照在京副都統例在任丁憂俟百日期滿仍辦理副都統事務十一月署西安辦事大臣五十年三月 諭曰福祿至西甯數倫泰將事件交代馳驛赴西安署將軍印五十六年奉恩旨開復金鄉失察之案六十年調涼州副都統嘉慶三年六月擢甯夏將軍旋病卒孫善成見係六品廕生

右 國史館本傳

蔡攀龍

蔡攀龍福建同安人由行伍拔補水師把總升千總乾隆四十七年升閩安左營守備四十九年升海壇右營遊擊五十年調澎湖右營遊擊五十一年臺灣奸民林爽文糾眾滋事巡撫徐嗣曾檄攀龍帶兵赴軍營調用五十二年正月鳳山被陷總兵柴大紀飭令帶兵往南路剿捕賊匪分路犯臺灣郡城攀龍連日打仗得勝賊匪由南擁至復率兵民奮勇截殺殲斃多名經徐嗣曾奏入上嘉之 命事竣後送部引見二月賊匪三四千窩聚西園莊地方攀龍偕參將瑚圖里副將丁朝雄分三路攻之槍斃三百餘名三月總兵郝壯猷奏鳳山克復派攀龍入城安民防守旋赴南路

進剿復調回郡城堵禦時因鳳山復陷賊犯府城總督常青派攀龍偕遊擊孫全謀黃象新等帶兵分營堵剿賊眾五六千撲府城東南二門攀龍等督兵力戰自辰至未槍礮擊斃五六百名奪獲九節礮一座四月常青奏請升補北路協副將 諭曰遊擊蔡攀龍前據孫士毅奏稱聞伊帶兵打仗頗爲賊匪所畏今據常青奏稱該遊擊於防守郡城歷經打仗無不身先士卒且能審度機宜弁兵用命義民悅服是以屢次均獲勝仗殲斃甚多實屬奮勇出力宜加恩擢著照常青所請卽超補臺灣北路協副將賞戴花翎若再能感激奮勇打仗俟續有總兵缺出卽奏請升補以示獎勵六月南路賊匪糾約七八千圍繞大營三面攀龍等奮勇督戰施



放槍礮弓箭斃賊三百餘名 賞給健勇巴圖魯名號七月陸路  
提督柴大紀在諸羅城被圍常青派攀龍偕副將貴林參將孫全  
謀帶兵由水道前往援應八月 諭曰蔡攀龍自到臺灣屢次奮  
勇殺賊著有勞績甚屬可嘉所有海壇鎮總兵員缺卽著蔡攀龍  
補授並著常青傳諭蔡攀龍令其加倍奮勉見在帶兵援應諸羅  
務將府城抵諸羅一帶屯聚賊匪悉力剷除廓清道路使糧餉火  
藥隨同官兵運送接濟尋總督李侍堯奏據知府楊廷理稟稱本  
月十七日蔡攀龍等抵鹽水港分八隊前剿遇大雨賊乘勢包圍  
幸柴大紀帶兵接應入城又探得到諸羅之兵復自諸羅打出以  
通道路九月奉 旨柴大紀調水師提督蔡攀龍補授陸路提督

並命授爲參贊尋李侍堯奏接常青來札並將參贊恆瑞摺稟寄來蔡攀龍等抵諸羅後仍未能殺出將軍福康安奏攀龍救援諸羅會同遊擊楊起麟等前進行至湯元店被賊阻截惟攀龍孫全謀遊擊邱能成帶兵七八百名到縣其餘多有損失十二月福康安奏攀龍到諸羅後在西門外劄營彼時兵力已疲祇能防守並無復自諸羅殺出打通道路之事前因郡城消息阻隔知府楊廷理率以傳聞之辭具稟李侍堯卽稱諸羅圍解據稟入告今臣確切查明復傳攀龍面加詰詢因係損失多兵賊仍不能解攀龍據實陳明懇請革職觀其人尙奮勉且籍隸泉州情形亦頗熟悉可否酌畱海壇鎮總兵原任令在軍營效力諭曰蔡攀龍前

此應援入城雖未能帶兵出城剿殺賊目但伊屢次與賊打仗奮  
勇出力業已加恩擢用提督其過尙可寬免尋福康安攻破大里  
杙賊巢諸羅圍解五十三年正月柴大紀逮問攀龍調水師提督  
官兵進剿南路賊匪擣大武隴賊巢福康安派令攀龍駐劄灣裏  
溪進偏時首逆林爽文就擒其弟林勇及賊目莊大田在郡城一  
帶出沒並令牛莊賊匪攻擾灣裏村莊希圖斷截郡城要路福康  
安令攀龍帶兵前往與官兵分路進攻殲斃多名仍令攀龍駐劄  
灣裏巡防石子瀨三月大功告成圖像紫光閣 御製贊曰臺灣  
戰將巨擘惟茲向嘉大紀乃被所欺賞罰各當弗濫弗遺惟明克  
允奉三無私六月 諭曰福建水陸兩提督其水師員缺所轄皆



係外洋地方責任尤重而見任提督蔡攀龍詢之由軍營回京大臣侍衛等僉稱其人平庸福康安前亦奏其未能勝任若令其久任海疆恐有貽誤朕意陝甘二提督哈當阿蘇靈阿俱尙能事近年甘省地方甯謐蔡攀龍至彼尙可將就勝任並著福康安於哈當阿蘇靈阿二人內量其才具孰與水師員缺相宜者奏聞調補七月 諭曰蔡攀龍著來京引見再降諭旨時江南狼山鎮總兵出缺 上命攀龍暫行降補五十八年江南山東交界之黑水洋有連劫各案江蘇巡撫奇豐額奏派攀龍會同山東登州鎮總兵恩特赫默親往查勘 諭以毋得諉卸六月攀龍奏報收成分數於出洋會勘一事並未提及得 旨該鎮實力查察毋得推諉取



咎尋奏於六月十五日前往會同恩特赫默出洋會勘並自請交部嚴加議處 諭曰蔡攀龍此次如果能帶同事主船戶舵工人等將各案失事洋面地方孰爲江南所轄孰爲山東所轄逐一秉公確指不少存回護遷就之見其自請嚴議處分尚可將功折罪若不能實力查辦定將該鎮等重治其罪九月偕恩特赫默奏勘明黑水洋面情形江南山東以牛車山爲界立定緝盜責成 諭曰恩特赫默蔡攀龍親身直勘遠涉外洋尙屬冒險出力著各賞緞二匹嘉慶三年七月卒

右 國史館本傳

UNITED STATES DEPARTMENT OF JUSTICE  
FEDERAL BUREAU OF INVESTIGATION  
WASHINGTON, D. C. 20535

116

168-626

特靈額

特靈額納喇氏滿洲鑲紅旗人由護軍承襲三等輕車都尉兼世管佐領乾隆三十一年授十五善射三十三年補印務章京三十八年四月揀發四川以參將委用時徵兵征金川檄赴軍營六月官兵潰於木果木賊番乘勢據喇嘛寺劫阿斯通營卡侵占底木達特靈額隨四川總督富勒渾帶領黔兵抵蒙固橋賊番屯河口抗拒我師遂駐守明郭宗扼其要隘合力堵禦並於西北山梁分設卡隘斷賊兵前進之路八月由榮經縣赴桃關巴郎拉一帶夾擊克之十月委署岷溪營遊擊調赴羅博克駐紮掣獲小金川賊番尋赴阿斯通搜山疊有俘馘三十九年連獲賊匪於三道灣喇

麻寺四十一年正月兩金川平二月將軍阿桂彙保軍營出力員  
 弁特靈額與焉授江南鎮江城守營參將四十二年調安徽撫標  
 中軍參將五十一年遷安慶協副將五十九年擢福建汀州鎮總  
 兵六十年調浙江衢州鎮總兵嘉慶三年二月因病乞休旋丁母  
 憂八月卒子文冲前官河東河道總督緣事革職遣戍孫雲海襲  
 三等輕車都尉兼世管佐領

右 國史館本傳



國朝耆獻類徵初編卷二百九十六目錄

將帥三十六

永德

傅玉

富爾賽

勒禮善

德甯

穆維

宗室恆秀

高璠

愛星阿

齊哩克齊

哈當阿

黃大謀

翁果爾海

普吉保

進財保

蘇爾相

岱森保

國朝耆獻類徵初編卷二百九十六目錄

國朝書目考卷之二十一

一

國朝耆獻類徵初編卷二百九十六

通奉大夫前署江西巡撫江西布政使司布政使湘陰李桓輯  
將帥三十六

承德

承德滿洲正紅旗人姓富察由黏竿處拜唐阿於乾隆四十年授  
藍翎侍衛四十六年擢三等侍衛四十九年擢二等侍衛五十一  
年兼授公中佐領五十六年大兵征廓爾喀 命承德馳驛前往  
由川赴藏隨成都將軍成德總督鄂輝差委五十七年正月成德  
圍賊匪於聶拉木官寨用火攻擊燒燬寨房賊猶死守承德偕侍  
衛阿呢雅布踵至率兵攻其西南各兵乘勢同力進攻擒獲殲斃

甚眾又於雪夜隨鄂輝成德擊其寨官兵潛置火器入地道越日  
午火發轟其西寨賊有竄出者永德偕侍衛珠爾杭阿等發矢射  
盡磔之擒獲無算五月兩廣總督福康安議由濟隴進兵遂趨宗  
喀奪擦木要隘遣永德率兵三千攻聶拉木爲偏師以牽綴賊匪  
之勢賊於德親鼎山築卡三永德由正路前進率同屯弁官兵從  
山坡壓下連攻克之進至下木薩橋戮賊目一賊數十擒乃勒興  
等七名尋隨成德等由哈那衮木山擊賊破其卡二攻克扎木殲  
賊百七十復隨福康安攻克熱索橋協布魯等處賊礮殲擒賊匪  
多名奏入 上以永德奮勇可嘉賞給伊青阿巴圖魯名號賊乞  
降福康安奏將官兵撤回永德回京嘉慶元年擢頭等侍衛三年



正月 賞副都統銜爲英吉沙爾領隊大臣會四川邪匪滋事賊首高均德等竄入陝西境永德適至軍巡撫秦承恩奏請畱軍營領所調山西兵二千名以資防禦 諭曰此時新疆本無要事永德自應畱於該處帶兵以資得力俟賊匪剿淨再前往英吉沙爾三月賊首高均德經都統德楞額等於藍田等處剿殺賊奔散北竄永德偕提督王文雄分路兜剿斃賊三百餘生擒賊劉全仁等四十六人尋由寶雞取道入山於五郎洋縣諸要隘迎擊賊且護棧道四月因防堵竄匪移駐漢中五月賊竄甘肅境永德馳赴兩當偕王文雄擊斃賊千餘生擒四十二人賊窮蹙復竄川界六月永德率所領兵還赴西鄉罐子山防守時江水淺涸賊潛由通江

之竹峪關竄入永德偕王文雄堵擊之賊西遁八月卒於西安軍  
營賜卹如例子果爾明阿見充上虞備用處拜唐阿

右 國史館本傳

傅玉

傅玉富察氏鑲黃旗滿洲人追贈一等公李榮保之子乾隆五年由閒散授藍翎侍衛洊擢二等侍衛十五年擢前鋒侍衛二十一年遷鄭家莊城守尉二十二年授黑龍江副都統二十八年賞戴花翎二十九年調山海關副都統尋調鑲黃旗滿洲副都統三十年擢正黃旗護軍統領三十一年管理健銳營事務補左翼前鋒統領仍兼鑲黃旗滿洲副都統三十三年授黑龍江將軍三十五年八月改鑲紅旗漢軍都統十月授荊州將軍三十七年調江甯將軍尋調黑龍江將軍四十二年奏參佐領錫庫爾特等芟除索約勒濟圍場荒草未能芟淨失火延燒請交部議上以傅玉

卽應將錫庫爾特等竟行革職定擬枷罪乃僅請交部議處辦理糊塗嚴飭之四十四年五月奏黑龍江地方例禁流民棲止因積年發遣人犯及放出旗奴所帶子女俱漸長成相聯姻戚在各城居住者已有數百名之多邊陲以積貯糧穀爲要請於齊齊哈爾地方增設官屯數處領催一名餘丁俱載入各城官屯冊內以備挑補所需農器牛具俱於各城庫貯糧價內撥給初種之年免其交納次年交半三年交全奏入 從之八月鄂羅斯人越境經卡兵擒獲佐領袞布章京達璘瑪婪索財物私行釋放傅玉擬罪失出部議革任 上寬之調補杭州將軍仍帶革職畱任四十五年調廣州將軍四十六年奏廣州駐防向未另立城垣地處邊要兵



民錯處難於稽查恐日久生事旗員與地方官互相推諉請將見  
在旗人界內之廟宇鋪戶人口造冊交理事同知每月清查兩次  
並將戶口姓名懸牌各門以便查對如有匪徒混迹卽交理事同  
知會同地方官審辦得 旨允行四十七年四月傅王之姪三等  
承恩公奎林獲罪 命傅玉承襲公爵五月調西安將軍四十九  
年四月甘省逆回李化玉田五等傳習新教聚眾滋事陷安西州  
城堡陝甘總督李侍堯檄調西安滿漢兵三千名傅玉與副都統  
明善率領赴剿五月駐兵通渭縣明善進攻石峰堡賊巢死之賊  
復踞鹿鹿山深巖恃險搜守傅玉以各營官兵祇有四千餘名不  
敷堵剿奏請調取川省屯練兵三千名甯夏滿兵一千名阿拉善

兵一千名進剿 諭曰所謂之兵非十日半月可到豈有坐待彌  
月之理該將軍所帶之兵見有四千餘名又據李侍堯奏續派兵  
一千六百名前赴軍營聽候調遣是兵力已不爲少又有將軍護  
軍統領副都統及提督總兵各大員在彼何至竟束手無策安坐  
營中必待所調各兵到齊然後再行設法辦理傅玉著傳旨申飭  
賊自鹿鹿山後繞出烏家坪欲擾伏羌傅玉與其婿巴里坤副都  
統永安整兵截之殺賊四五十名六月總督福康安檄赴石峰堡  
附近駐劄遏賊後路傅玉永安等率兵前進距賊巢十五里安營  
賊率眾千餘來襲傅玉等擊敗之殺傷三百餘人獲器械甚夥時  
賊敗欲向東南竄逸 上慮傅玉一路兵單力弱 命福康安派

大員助之尋以傅玉年老不勝將軍之任授爲散秩大臣仍畱甘肅軍營七月大兵攻克石峰堡傅玉偕阿拉善親王旺沁班巴爾等督兵進堡搜捕首逆張阿渾馬四娃及賊目楊鎮四黃阿渾等全數就擒交部議敘五十四年十月授內大臣五十八年 賞食半俸以原品休致嘉慶三年十月卒孫喜倫見任二等侍衛承襲三等承恩公

右 國史館本傳

國朝書牘類後初編

卷三十四

五



富爾賽

富爾賽滿洲鑲黃旗人布雅穆齊氏由前鋒於乾隆三十三年隨征雲南積功授藍翎長三十六年從副將軍溫福征金川以襲班爛山二礮功奉旨優叙授前鋒校三十七年五月隨侍衛額森特攻東瑪寨克之賞戴花翎十一月克路頂宗喀木色爾授藍翎侍衛恩賞杜爾博額巴圖魯名號三十八年隨副將軍豐昇額勒達爾圖擲火彈由大礮攻破護礮短牆殲番賊甚夥擢前鋒副參領六月奪賊礮二座於沙巴山三十九年由綽斯甲布進攻喀烈克拉木拉爾山十月從參贊額森特攻邁果爾喀烈各礮寨盡燬其巢遂由格魯克古了口直抵大金川攻克阿邊作谷頂木

爾金剛諸口卡並奪回黨壩之路十一月克羣泥得竹低焚賊寨  
左膀受槍傷得 旨獎賞十二月隨參贊海蘭察由控薩爾進攻  
四十年四月連克木思工噶克了口石山峯礮樓石卡五月攻克  
噶爾丹喇嘛寺及僧克宗南山梁諸險隘投火器營正參領十二  
月以攻卽憊若斯爾控晝夜力戰賊礮盡奪奏入 敕部優敘四  
十一年攻克噶拉依金川平凱旋日 賜宴 賞緞匹荷包銀線  
奉 旨照平定準噶爾回部之例圖畫功臣像於紫光閣富爾賽  
與焉 命詞臣爲之贊四十五年軍政卓異四十九年帶兵赴甘  
肅攻克石峯回堡五十一年補甘肅金塔協副將尋調靜軍協副  
將五十五年授西甯鎮總兵歷署甘肅提督五十七年三月以承

辦軍需出力奉 上諭勒保奏各起帶兵官員由西甯赴藏所有  
承辦軍需在事出力之西甯鎮總兵富爾賽著交部議敘以示獎  
勵嘉慶二年湖北教匪滋事句結商州等處匪徒乘機竊發經陝  
西巡撫秦承恩調赴協剿四月馳抵商州偪賊於西牛槽時採玉  
窯有賊嘯聚富爾賽率騎越秦嶺兜擊之賊折竄入洵陽之兩河  
關秦承恩統大軍追剿賊竄午峪口富爾賽分兵搜擊後路廓清  
六月賊從鎮安黑洞溝繞至紫陽之沔峪河渡江欲奔川境富爾  
賽選勁卒裹乾糧從閒道設伏截剿邀擊於土地嶺毛壩關大敗  
之八月四川總督宜縣調赴川省九月賊據深溪子鮎魚洞洋子  
岡馬渡關諸卡隘大兵分四路進富爾賽以騎隊會剿殲賊一千

有奇奪卡座十三由邱家堡進剿攻克岳家院追擊於孫家梁生擒張志照等三十七人賊竄入巴州南背山富爾賽星夜繞至賊前與總兵朱射斗百祥等三路夾攻賊驚潰又蹙之於排埡口甫安營賊率其黨來犯我軍併力殲賊無算餘匪徑走蓬州之徐家場富爾賽兼程追撲殲執旗者一人斃賊甚眾十月賊目王三槐因追窮蹙遂由營山之迴龍場直撲縣城富爾賽躡擊之於石山鋪又攻之於永興場蚊蟲溪三匯林壩等處大破之 諭曰此次宜縣奏各路殲斃賊匪自三四百名至千餘名不等亦不爲多而兵力本單所辦尙不遺餘力此時巴州竄往保甯之賊折向蓬州營山有富爾賽在彼截剿通道可保無虞是時分股賊匪羅其



清折回營山屯九子嶺又踞芙蓉廟疊次攻擊先後俱有斬馘三年二月賊踞永興場據對河白山寺窺伺渠縣又分股潛匿石梯坎以防我軍追襲富爾賽設法渡河開除林菁潛夜於上游置礮轟擊下游紮筏徑渡一躍而上占據白山寺對嶺分軍兩翼直抵賊營出其不意殲斃無算其時附近匪徒聞聲麇至我軍往來衝突又斃賊六七百名獲礮位五生擒一百三十有奇富爾賽出兵石埡子遇賊於孫家梁擊退之五月賊向三溪口奔竄富爾賽率兵迎截獲潘九和等三十餘名六月擊賊目王三槐於聖燈寺克楊嶺進奪芝麻嶺八月賊目王三槐遁至安樂坪經略勒保設伏攻剿富爾賽率勁兵斬奪木城痛加殲洗賊窘甚多觸崖石斃十

月賊自祖師親犯我軍富爾賽由李家臺繞至賊後與總兵百祥  
等兩面夾攻賊無路奔竄生擒王良升等六七十名旋以病卒於  
軍營奉 旨富爾賽雖非陣亡者但帶兵日久積勞病故亦屬可  
憫著給予卹典予爾興阿見官三等侍衛次珠爾杭阿見官吏部  
筆帖式

右 國史館本傳

勒禮善

勒禮善滿洲鑲紅旗人納喇氏乾隆三十九年由印務筆帖式委  
署驍騎校四十年補雙騎校四十三年擢印務章京四十四年補  
公中佐領五十年七月擢副參領十月補授印務參領五十二年  
擢參領五十四年游擢頭等侍衛古城領隊大臣五十九年奉  
上諭勒禮善在任將及五載爲時已久著回京六十年四月授本  
旗蒙古副都統十月調京口副都統尋奉 諭曰勒禮善甫自新  
疆換回又無子嗣著與正黃旗漢軍副都統成策對調嘉慶元年  
三月調成都副都統十月勒禮善奏准代管四川總督英善札稱  
所屬達州有教匪滋事因令帶領滿兵固守成都如用滿兵再給

信帶兵前往嗣奏接據四川總督福甯將軍觀成移會令帶成都  
滿兵一千名速往達州以備進剿十一月奉 上諭此時勒禮善  
所帶滿兵自己到彼著英善會同勒禮善務乘得勝之勢上緊進  
攻勿使竄往他處尋勒禮善奏率同署協領努赫校等帶領滿兵  
繞道由檀木場前進抵袁家石壩山腳埋伏遂由小路攻撲經努  
赫校等奮勇爭先拆毀賊卡拋擲火彈賊匪奔潰殲戮不可勝計  
乘勝追殺生擒九十六名內何三元李大儒尹和尚均係要緊賊  
目其餘一併正法復偕英善奏稱由太平寨至桐油坪一路進攻  
官兵會齊併力撲剿賊匪由大東林偷渡卽奔入茅坪張家觀一  
帶山內恃險死拒官兵追剿殺賊千餘將柏樹場天星橋冉家壩



等賊巢全行克復 諭曰英善勒禮善等奏分路痛剿屯聚賊匪情形所辦可嘉著賞玉喜字扳指大小荷包并賞戴花翎以示獎勵勒禮善奏言遵 旨一切皆同英善和衷妥辦竭盡忠誠將竄賊速殲務使地方甯靖二年正月奏由冉家壩進兵用槍礮轟斃賊匪四五十人復生擒十七名二月因東鄉縣賊匪滋擾飛飭代辦縣令劉清廣募鄉勇奮力進剿遂將周家河一帶道路疏通又奏由冉家壩至茅坪一路攻剿擒獲賊匪蕭良久等三百餘人卽督率將弁四面搜山三月奏賊首徐添德等分踞金山等處勒禮善由明月壩翻山至姚家壩冒雨進攻將賊卡克復生擒一百二十餘名奉 上諭此次官兵分路進攻先將冉家壩口及大團包

要卡攻克復於雨夜占據姚家壩要卡賊人門戶已破其勢已孤  
勒禮善著賞給象牙香囊大小荷包以示鼓勵四月都統德楞泰  
奏稱勒禮善分駐東鄉緊要隘口稽查後路遇有急需堵剿之處  
卽可就近派撥十一月陝甘總督宜縣奏賊匪竄過官渡保達州  
後路轉運要處有勒禮善帶兵防守以防折竄三年正月宜縣復  
奏賊匪羅其清等分屯營山儀隴渠縣境內巴州所屬又有匪徒  
竊發俱與巴州接壤卽令副都統勒禮善等督率兵勇保護達州  
十二月病卒於達州軍營無子胞姪額爾炳額承襲廕生見任理  
藩院員外郎

右 國史館本傳

德甯

德甯杭阿坦氏鑲白旗蒙古人乾隆四十四年由前鋒藍翎長補前鋒校五十一年授陝西固原提標後營守備隨征石峯堡逆回在事有功五十七年大兵征廓爾喀自請隨營效力殲擒賊匪甚眾 賞戴花翎升四川甯越營都司六十年三月隨大學士雲貴總督福康安征勦逆苗派駐嗅腦偵知盤朵地近楚境楚苗分路來犯偕各營將領奮力拒敵相持一夜獲賊首麻五西斃賊六百餘人 諭曰嗅腦盤朵地方有楚苗三四千前來攻撲都司德甯帶兵勦殺賊皆逃散殺賊共有六百餘名實爲可嘉著加恩卽以遊擊升補四月補督標左營遊擊十月圍攻逆苗吳半生吳逆就

擒下部議敘十月升成都城守營參將十二月福康安等攻平隴以地良坡一帶爲進剿必由之地派德甯等先擊地良坡對面高斗山克之遂由高斗山進兵復派德甯等爲一路攻剿社神堂嘉慶元年六月升督標中軍副將十月隨護軍統領德楞泰總兵朱射斗等攻克社神堂木城石卡十二月大兵克平隴貴魚坡首逆石柳鄧伏誅敘功 賞確勇巴圖魯名號二年隨總統宜縣剿川省邪匪四月賊踞茨菇梁設卡宜縣派德甯等分路攻之生擒一百一十三人賊棄寨遁大兵遂據其寨五月賊首王三槐分五路來犯大兵分路迎擊德楞泰率德甯等由萬古樓接應賊大敗王三槐中槍逸六月賊竄聚香鑪坪大兵四面圍攻惟迤南一帶山



勢重疊路徑紛歧賊連夜越山遁值德甯偕副將王柱帶兵至截住後起之賊德楞泰等率兵夾擊之殲斃二千人賊敗走陳家壩是月大兵由陳家壩進侍衛明興偕德甯等由天星橋攻冉家壩生擒賊目王德貴等三十一名十一月大兵敗賊於樹河口德甯等搜捕林崗匿匪獲郭長志等九十二名三年三月賊首齊王氏姚之富與高均德分擾商州藍田德楞泰派德甯等從大路截殺賊竄三岔河德楞泰偵知齊姚二逆奔左山梁率德甯等擊之二逆各投崖斃六月高均德由鐵鎖關竄入川境據恩陽河大山德楞泰派德甯等伏兵賊巢之左邊山坎伺賊窺營偕右伏夾擊之生擒張先等三十餘人均德窮竄德甯追勦於西河山遇賊百餘

盡戮之官兵擊冉文僂於大神山德甯帶兵扼賊奔竄之路復由  
鷹嘴巖進勦八月大兵擊高冉二逆於箕山德甯設伏於石花寨  
賊來撲營伏兵兩路夾攻斃賊二千人十一月賊首羅其清據大  
鵬寨領侍衛內大臣額勒登保率德甯等攻寨之南門大破之十  
一月賊竄雙山子德甯偕副都統綸布春等擊之賊潰竄匿蔡家  
梁下溝德甯偕副都統賽沖阿等截溝之南北大兵至殲賊殆盡  
羅逆竄匿濛子洞德甯生擒匪首羅其清及賊弟其秀子泳幅是  
月擢甘肅巴里坤鎮總兵仍留軍營時賊冉文僂竄入拗盤寨總  
統惠齡德楞額率德甯等於四更進兵風雪大作賊猝不及防生  
擒向世榮等戮之冉逆匿麻壩寨寨有四門德楞額率德甯等帶

兵扼其東除日抵寨下斷賊樵汲路四年正月朔大兵至合擊賊  
遂擒冉文偉戮之三月追賊於大梁地方德甯由溝底催兵攀躋  
而上忽吐血不止力疾行至七里壩歿於營事 聞得 旨總兵  
德甯積勞身故深爲可憫著照傷亡例議卹 賞騎都尉世職子  
福注禮襲

右 國史館本傳

民國二十九年六月廿一日

廿

168-656



穆維

穆維直隸清苑人充本省督標兵乾隆三十九年山東逆匪王倫滋事維以槍斃僞總兵楊壘功擢千總先是賊聞京兵南下卽掠糧艘造浮橋以圖西竄官兵運秣稽爲焚橋計賊轟礮抵禦官兵亦以礮還擊維乘閒奪橋而過獲賊礮二座焚其橋 上嘉維奮勇超眾給奮勇巴圖魯名號並 賞戴藍翎十月補直隸督標右營千總四十二年升易州營守備四十七年授靜海營都司五十一年擢山東撫標右營遊擊五十四年升中軍參將五十六年遷膠州營副將嘉慶元年調赴楚省勦捕教匪五月西安將軍恆瑞等攻賊於劉家集維率馬兵橫貫賊陣官兵躡蹤衝擊殲賊無算

上以維打仗奮勇 諭以應升之缺升用六月師次襄河北岸賊  
匪喬之清等於對岸之梁家岡梁家坳等處連營數里維與副將  
王文雄等選精兵五更潛渡先擊之於近河之董家岡奪獲賊卡  
遂移師破其營七月復敗賊於清潭九月隨烏魯木齊都統永保  
等協剿鍾祥賊匪有功 賞給大小荷包十一月分擊襄陽西北  
之上僻家集賊匪敗之十二月與總兵富成剿賊於彭家岡殲  
多名旋與副將丁有成等於上下僻家集等處分堵時湖北巡撫  
惠齡剿敗丁家集黑龍集都司街三處餘匪奔竄經維等截殺擒  
獲甚多二年八月敗賊於官壩塘得 旨賞給總兵銜遇缺卽補  
九月授登州鎮總兵仍畱軍營十月賊首高均德王廷詔合夥二

萬餘分擾斑鳩關等處窺渡漢江維偕副都統銜六十七等迎擊於雙河塘復追勦於土門垵均有斬獲經惠齡奏入得旨嘉獎並賞給綠玉扳指大小荷包時王三槐徐添德二逆闖入川境維與富成六十七隨惠齡馳抵達州之連山池分路截勦三年正月隨總統勒保勦賊於石壩山等處大敗之賞給玉喜字扳指大小荷包二月王徐等逆於豐城場敗創後分竄通江一帶勒保令維同提督富成總兵朱射斗馳赴竹谿關洪口等處攔截去路旋敗賊首冉文傳於石梯坎三月勒保督維等攻黑馬山賊營敗之連敗之於大馬坪關智坡等處四月賊由李家山一路奔逸勒保復令維與富成健銳營翼長七十五由萬甯寨抄出大完山前

國朝三才圖會卷之二十一  
迎朔之維於山巔用礮轟擊官兵乘勢追殺斬馘不可勝計又與  
富成破賊於十佛巖六月冉逆踞李華寺復於任家寨等處設卡  
抗拒維與朱射斗先奪取老木埡山梁復擊破孫家坪賊卡其李  
華寺賊巢會兵攻破之未幾以疾卒於軍四年三月 諭曰穆維  
雖非打仗陣亡但帶兵日久因積勞病故亦屬可憫著交部照例  
議卹子穆承齊廕生見任山東曹州營千總

右 國史館本傳



宗室恆秀

宗室恆秀正白旗人乾隆三十八年由閒散補三等侍衛洊擢頭  
等侍衛四十三年 賞副都統銜作爲西藏辦事大臣尋補鑲黃  
旗漢軍副都統四十七年授熱河副都統尋升黑龍江將軍四十  
九年奏呼倫貝爾與鄂羅斯接壤之朱爾台等處卡座官兵每年  
駐劄巡查請仍派總管嚴防 上是之五十年奏黑龍江職官內  
凡年老殘疾告退員缺例於本處題奏候部覆到後始行揀員送  
部往返需時久懸額缺請嗣後遇有告退缺出卽於題奏時揀員  
送京得 旨俞允五十四年調吉林將軍五十七年七月奉 命  
查辦甯古塔副都統安臨以年老乘轎爲名私行坐轎及開設賭

場以賤價向商人買獲各款鞠實請將安臨發往伊犁效力贖罪  
從之八月奏吉林所屬驛站官助教各二員六年任滿升轉倉官  
六員三年任滿升轉遲速不均請照黑龍江倉站等官之例俱改  
爲四年限滿升轉下部如所請載入例冊遵行十月調西安將軍  
五十二年仍調吉林將軍五十七年奏官兵擊獲欲往乞獲人犯  
八名 諭曰此等人犯自應照偷乞私獲之例治罪失察巡哨員  
弁亦應議處今恆秀摺內稱未暇乞獲未曾過冬之語顯係從輕  
辦理脫卸人罪申飭之五十八年正月調烏里雅蘇臺將軍尋以  
生母年老 命仍回吉林將軍任九月奏民人韓祥生項如賓在  
赫哲等處偷換貂皮業經審明請枷責逐出境外 上以韓祥生

等甚屬不法 命改發煙瘴地方並著爲例十一月奏上年直隸  
歲歉蒙恩聽流民出關求食到吉林地方者萬餘人均獲生全今  
年內地有秋飭令回籍咸以甫經全活移回轉苦失業察其情形  
屬實但人數眾多恐不肖雜處生事請照例造入紅冊歲交丁銀  
兩有願回籍者註明開除 允之又以發遣人犯積年逃亡者總  
計四百餘名彙奏 諭曰嗣後將軍大臣務須嚴飭所屬平素加  
意約束設有逃亡卽上緊緝拏不可恃有年終彙奏由部通行協  
緝之條顛預了事也五十九年正月副都統秀林奏參吉林協領  
諾穆三托蒙阿因辦蕩那缺庫項派令鋪戶攢湊銀兩彌補 諭  
曰該處戶民於蕩務毫無關涉何得因辦蕩那缺庫項勒令攢湊

攤派恆秀何以竟聽諾穆三之言遽行照辦以致民情騰怨紛紛  
控訴 命大學士福康安尙書胡季堂侍郎松筠馳往審訊又  
諭恆秀查知庫項虧短輒向無干民戶勒派彌補卽將來訊無染  
指受賄情弊亦有應得之咎恆秀著卽革職以便提同案內人證  
一併質訊二月福康安等奏恆秀供稱係援乾隆三十二年以前  
舊例將刨夫不能全領之濫票散給鋪戶民戶分領 諭曰吉林  
辦理濫票如三十二年以前曾有散給鋪民之例自必報部有案  
因令戶部查明節年吉林餘贖濫票俱係送部銷毀其三十二年  
以前將濫票散給鋪戶民戶之處並未據該將軍奏咨有案是恆  
秀所稱竟係捏詞狡混全不足信著傳諭福康安等將伊所稱援



引舊例有何依據之處令據實登答毋任狡飾嗣福康安等奏據  
諾穆三等供稱濩局因節年借墊創夫銀兩未能扣還以致輾轉  
虧缺又供稱三十二年吉林原放過民票遂於五十八年稟商恆  
秀暫行試放 諭曰此事總由諾穆三等在濩局年久盤踞把持  
而歷任將軍輕聽該協領等官濩不足之言又見借項日多不能  
出奏輒向攬頭所得餘濩買補扣抵以致庫項虧那已有應得之  
咎而恆秀竟於無干之民勒令攢湊攤派以致眾怨沸騰厥罪尤  
重著福康安於定案時分別覈辦毋稍迴護嗣福康安等審明恆  
秀罪狀定擬杖徒具奏 上以福康安與恆秀誼屬姑表弟兄有  
心徇庇含混了事改 命軍機大臣會同刑部覆奏依律擬絞監

候尋蒙 恩旨釋放六十七年九月黑龍江總管舍爾圖訴稱將軍  
舒亮副都統安慶勒索貂皮之案事連恆秀 命尙書福康安保  
爾等馳往審訊訊明恆秀僅將棚桿變價貂皮實係給價採買  
上以其不能整頓積習亦難辭咎一併交部議處尋議恆秀應交  
宗人府圈禁嘉慶四年 賞三等侍衛作爲副都統往烏什辦事  
四月卒子課普通武見任 東陵員外郎

右 國史館本傳

高琰

高琰漢軍鑲黃旗人乾隆五年襲其高祖尙義軍功所得騎都尉世職二十一年 賞給三等侍衛二十七年授貴州天柱營都司三十五年調赴緬甸軍營三十七年升銅仁協右營遊擊三十八年隨將軍阿桂出征金川擢雲南元江營參將三十九年五月官兵攻喇穆喇穆大碉阿桂令琰伏兵薩斯嘉赤溝木城外與都司鄭起榮合力奮擊敗之擢騰越協副將四十年攻獲舍圖枉碉卡兩座因打仗受傷 賞戴花翎授四川重慶鎮總兵四十一年大兵凱旋經阿桂奏畱辦理善後事宜事竣回總兵任四十六年失察所轄之太平縣屬啣匪滋事經部議降二級調用四十七年五

月 命在頭等侍衛上行走八月授雲南騰越鎮總兵五十一年  
二月升廣東提督五十四年瓊州迤南之外洋地方有洋匪竄匿  
琛偕兩廣總督福康安會議撥舟師於龍門等處分爲八路派委  
副將參游等官分路巡查彈壓而以各鎮總兵官爲之總統平時  
則梭織游巡有盜則彼此照會合力追捕聯絡聲勢奏入報 聞  
五十六年七月琛堂兄高璋攜眷潛赴伊犁居住並不押令回旗  
及其子高崢年已及歲奉 旨指名調取進京當差復託病耽延  
上以其有心庇縱 命解任來京交部治罪尋發伊犁效力六十  
年釋回嘉慶四年二月奉 旨以本旗驍騎校補用閏四月故子  
崢見任江西德興縣縣丞峩拜唐阿



右 國史館本傳

國史館本傳

南唐書卷一百九十六

三

愛星阿

愛星阿正黃旗蒙古人烏朗罕吉勒們氏由聞散承襲二等輕車都尉乾隆二十年補授三等侍衛三十一年授二等侍衛三十四年補山西新平路營參將四十四年擢廣西慶遠協副將四十九年四月補右江鎮總兵七月署提督印務十一月丁母憂回旗守制五十年三月百日服闋本旗帶領引見奉旨愛星阿著暫在頭等侍衛上行走十一月署正紅旗護軍統領五十三年二月補正黃旗護軍統領尋轉正紅旗護軍統領五十四年授直隸馬蘭鎮總兵兼內務府大臣嘉慶元年署古北口提督印務二年八月會同總督梁肯堂奏參袁庸不職之三屯營副將伊蘇泰請革

職以肅營伍 諭曰愛星阿見署提督前任馬蘭鎮總兵時三營副將係其管轄何以於伊蘇泰衰庸不職之處不早參處 命軍機大臣傳詢尋以伊蘇泰初到任時猶能黽勉供職近來精力漸衰難望振作始同總督會參入奏十月奏內務府各缺繁簡不同必酌量更調方足以資料理恭查 孝賢皇后陵寢一切事務必須年力精壯謹慎明白之員方能經理郎中廣福辦事雖無錯誤但該員於此缺差務不甚相當復查得新授 昭西陵郎中廷瓚年富力强辦事詳慎一切均屬妥協請將廷瓚調往 孝賢皇后陵當差郎中廣福調往 昭西陵一轉移間不惟人地俱屬相宜實於公事均有裨益 上允之三年補授古北口提督四年六月



諭曰據愛星阿奏見在患病難於乘騎步履維艱懇請開缺回京調攝愛星阿平日辦事謹慎行走有年今積勞成疾不忍遽令開缺且一時不得其人愛星阿著加恩准其解任來京安心調養俟病愈後仍可回任敬襄 山陵護送事宜旋卒於任所遺疏入

諭曰前據愛星阿患病懇請開缺朕以其辦事謹慎行走有年當經降旨准其解任來京調理方冀速痊茲聞病逝殊堪軫惜所有應得卹典著該部照例具奏是年八月據署提督阿迪斯奏稱愛星阿任內私用兵丁擡轎並虧缺馬匹銀兩 諭曰愛星阿既有應得之咎所有應得卹典自不應仍行給予著該部毋庸具題至應追銀兩著該旗於愛星阿家屬名下按數追出令送交古北口

提督署內歸款子慶普見任湖南永州鎮總兵兼二等輕車都尉

三

右 國史館本傳

齊哩克齊

齊哩克齊蒙古鑲黃旗人初爲額魯特人以地爲氏乾隆二十年大兵征準噶爾齊哩克齊迎降二十二年準噶爾平二十三年五月隨定邊將軍兆惠討逆回霍集占敗之於和洛霍漸地方招降頭目圖魯啟拜等六十餘人以功授藍翎侍衛十一月護送哈薩克使臣來京遷三等侍衛尋回軍營二十四年五月命隸蒙古鑲黃旗八月隨定邊副將軍富德追剿霍逆至色勒庫爾賊踞山抗拒官兵分路堵截齊哩克齊偕前鋒參領喀木齊布率健銳營兵自山北攀援而上盡銳仰擊賊潰霍逆夜逸降回眾萬二千餘人獲軍器駝騾無算捷聞賞布哈巴圖魯名號二十五年

二月回部平凱旋 命在乾清門行走三月 上御豐澤園幄次  
宴資隨征將士齊哩克齊與焉 詔繪像紫光閣 命儒臣爲之  
贊曰行不旋顧戰不待援旣征朔漠還使西苑萬里折衝千夫辟  
易錫號布哈實惟名嚴六月遷二等侍衛二十七年擢頭等侍衛  
賞雲騎尉世職三十二年五月用兵緬甸隨將軍明瑞赴滇進剿  
十一月遇賊於底麻齊哩克齊奮擊之斬獲甚眾奏入 上嘉其  
奮勉 賞副都統銜三十三年三月 召回京授張家口副都統  
尋調鑲藍旗蒙古副都統五月 命在御前侍衛上行走十月調  
鑲黃旗蒙古副都統三十七年征金川 命統健銳火器營兵隨  
參贊大臣阿桂由南路進剿十二月授領隊大臣進攻美諾賊巢



克之小金川平三十八年回京 命管理健銳營事務嘉慶二年  
十月以三省教匪滋事 命護送察哈爾馬匹赴湖北軍營齊哩  
克齊至襄陽交代後卽行回京 諭曰齊哩克齊經朕施恩用至  
副都統此次派往湖北護送馬匹伊係巴圖魯名號旣至軍前不  
圖效力亦不懇請帶兵殊無良心姑念係庸愚額魯特曲全伊命  
著卽革職十一月削世職四年正月仍授鑲黃旗蒙古副都統七  
月卒

右 國史館本傳

四庫全書

三

## 哈當阿

哈當阿蒙古正黃旗人姓把岳忒乾隆三十六年由前鋒補護軍校三十八年從征金川 賞給巴圖魯名號並賞戴花翎授健銳營前鋒參領升陝甘督標右營參將四十五年授陝西靖遠協副將四十六年四月從征甘肅撒拉爾逆回蘇四十三等於蘭州補甘肅固原鎮總兵五月自龍尾山踰溝上誘賊出濠大殲之閏五月擊賊於華林山西拔卡四進剿受傷乃轉戰奪其卡盡殲守卡賊數十 上嘉其奮勇傳 旨褒賞六月賊據險死守大學士公阿桂令諸軍填濠進哈當阿首先跳濠率降番屯練兵火攻賊盡竄我軍疾擊之破賊卡焚其巢蘇四十三等皆陣斃是役也哈當阿

功最大得 旨交部優敘四十八年十月追論前副將任內失察  
弁兵舞弊事降三級畱任四十九年甘肅小山番回田五等叛據  
石峯堡謀句合各州縣新教五月奉 上諭河州一帶係回民巢  
穴不可不畱心嚴爲防範哈當阿著在河州防守毋許賊人得潛  
相煽惑再有蔓延六月授固原提督仍駐河州五十年石峯堡賊  
平四月偕陝督福康安勘奏添兵設汛各事宜俱 允行五十三  
年七月調福建水師提督五十四年五月盜劫金門鎮遊擊徐璋  
以遭風詭報咨揭督臣奏辦得 旨嘉獎五十六年調陸路提督  
九月仍改水師兼臺灣鎮總兵十二月 諭曰臺灣爲五方雜處  
之地匪徒往往滋事近年以來奎林在彼力加整頓積習未能盡



改可見該處民風非一時所能速化見在哈當阿到彼務須督率所屬做照奎林章程認真嚴辦以期綏靖海疆方爲不負委任五十七年正月覆奏入復 申諭認真整頓遇事嚴辦六月奏獲林爽文餘黨優議加一級五十八年正月奏審辦偷渡案犯 上以查拏尙屬認真復交部議敘四月劾鳳山縣令徐英不職罷去又奏拏獲天地會案內遺犯二名奉 旨所辦俱好仍交部議敘五十九年三月請寬免脅從自新人犯報 允六十年二月鳳山縣奸民陳光愛等糾眾結盟攻圍石井汛捕斬之其黨周全復引洋盜入內地十三日攻陷鹿仔港殺同知朱慧昌遊擊曾紹龍十四日陷彰化參將張無咎知縣朱瀾等俱被害哈當阿前往剿捕行

四十里遇雨不得進駐兵灣裏溪賊首周全已爲義民楊仲春貢生吳升等誘擒遂復彰化城二十四日哈當阿入城分捕餘黨焚賊巢三月四日抵鹿仔港籌辦安撫防禦事時盜船尙在洋游奕哈當阿令諸軍用大礮轟擊各散去先是光愛劫汛時首從六十四名應時捕獲 上嘉其辦理迅速交部議敘仍 諭臺灣林爽文事大加懲創之後乃爲時未久匪徒等復敢結會拒捕不得不從重辦理以儆兇頑而靖海疆哈當阿所辦甚是未獲逸犯仍著上緊購緝毋任漏網稽誅及周全再引盜船入 上聞復 諭哈當阿嚴飭各屬文武於各海口嚴密截擊盜匪至是盜逸去 上申飭所辦錯謬交部嚴議並傳 旨詢問七月覆奏入 諭曰該提

督身膺專閫於匪徒滋事既不能迅速追捕於前復種種遲誤於後迨降旨飭訊猶以感愧悚惕等虛詞具奏並不自行請罪實爲糊塗已極哈當阿再交部嚴加議處部臣兩請革戍奉 旨從寬改爲革職畱任其後逸匪等亦節次擒獲嘉慶元年逸盜擾臺灣嘉義彰化等各海口哈當阿令副將陳上高分防鹿仔港而身由大安一帶沿海備禦五月六日盜登大雞籠鳳岸汛弁鄧龍光避匿劫去大礮二及番社埋藏小礮三哈當阿奏請自副將以下皆革究并自請交部治罪 諭曰哈當阿既不能飭屬堵禦於前又不設法追捕於後咎實難辭著交部嚴加議處部議革任 命從寬免其革任仍註冊著督飭水師設法擒拏六月奏劾聽信胥吏

勒派船戶之兼攝同知郡守沈颺等請革處 從之七月奏捕獲  
逸匪井洋盜分別辦理報 聞二年正月周全餘黨廖貴黃親林  
起等復糾眾行劫官兵捕之急潛匿彰化嘉義接界眾山內三月  
初四日偕知府楊兆表漏夜潛進初五日申刻遇賊於茄壩衛賊  
聚眾抗拒入擣其巢生擒賊首林起并其黨十餘人獲木印一刀  
械數十賊遁匿彰化之碧巖隨移兵搜捕奏入得 旨優敘六月  
黃親等俱就擒哈當阿以逸匪內訌未能先事籌畫自請交部治  
罪仍奉 旨寬免三年匪徒楊肇等七十五人焚劫各村堡俱捕  
誅八月劾副將李鈺捕盜不力褫其職十一月奏誅會匪徐章等  
四年正月以臺灣鳳山縣匪徒汪降糾人結會與匪目李南等共



謀不軌剋期擒斬之 上以所辦迅速交部議敘七月戍兵廖林等糾眾抗斷復持械傷斃人命奏請分別斬決 諭曰似此兇悍兵丁自應於審明後立正典刑俾行伍知所炯戒乃哈當阿等拘泥前此奉有各按本律治罪不准用雖但抑揚字面之諭旨卽不問案情輕重一律請旨遵行殊爲失當是年十一月病卒

右 國史館本傳

國事ニ下ル者有テ流ニスニ臣ナリ

三ノ

黃大謀

黃大謀浙江江山人乾隆十九年武進士授藍翎侍衛二十六年授直隸天津城守營都司三十三年升江南江陰營遊擊三十九年五月升直隸固關營參將十一月署大名協副將檄剿山東賊匪王倫擊破賊船奮勇出力經大學士舒赫德保列一等四十二年補山西殺虎口副將四十六年升甘肅西甯鎮總兵尋調直隸泰甯鎮總兵四十七年疏言泰甯爲陵寢重地宜安兵添汛加謹防護前經設立撥汛八十一處內紅椿五十六里圍內各處看守並巡邏之汛共五十七處每處十名六名不等兵數足以周防惟外椿一百五十七里二十四汛俱祇五名內有山溝要區相接

疏密不一應添設九汛每汛均宜十名以資防護謹繪圖入奏

上命軍機大臣會同該部覈議得旨如所請行四十八年調浙

江温州鎮總兵五十一年因本營千總張賢那移公項一案降一

級調用五十五年補直隸山永協副將時永平府河水驟漲城內

水深數尺至丈餘不等城外各村莊水勢浸溢人口被淹卽帶同

兵役拯救復捐廉借支倉米散給戶口諭曰黃大謀於郡城被

水之時帶同兵役協力保救並捐廉借領米石散給災民俾資口

食尙有識見著交部議敘尋議加一級擢廣東右翼鎮總兵五十

九年署提督 陛見 賞戴花翎嘉慶四年以老乞休 上以海

疆重任未允所請旋又因病陳懇奉 旨黃大謀年力就衰見在



患病准其原品休致是年卒子遐年二品廕生工部郎中緣事降  
光祿寺署正

右 國史館本傳

國書三才考卷之三十一

三十一

翁果爾海

翁果爾海鑲藍旗滿洲人噶巴喀氏由親軍於乾隆四十九年補藍翎侍衛五十年襲父莫嫩太騎都尉世職五十二年賊匪林爽文據臺灣不靖八月隨將軍兩廣總督福康安往征之時賊踞大里杙出沒無常翁果爾海隨參贊海蘭察探賊於卦山見對山賊卡甚眾卽奮勇上山迎擊殺賊無算遂遁力追之突有賊於山下竹園內抄截翁果爾海擒賊一人餘俱竄敘功 賜號額騰額巴圖魯十二月補三等待衛五十三年三月授二等待衛四月搜賊於老衢奇經義民高振見林爽文逃逸告知之卽同追擊遂生擒首逆臺灣平 上諭曰翁果爾海等隨福康安剿捕逆匪俱能奮

勇出力或於北口堵截擒賊甚眾或於南路搜拏首逆各著勞績甚屬可嘉翁果爾海等俱著加恩交該部查覈伊等所得功牌酌予世職五十六年隨將軍福康安參贊海蘭察出征廓爾喀五十七年六月賊據擦木其地兩山夾峙路惟一徑可通因夜雨分兵潛進翁果爾海由東西兩山越險直抵擦木山梁堵截與大兵會合疾速先潛至賊寨牆外奮勇踰入率兵轉戰殲賊百餘人奪石礮一座賊遂竄奪據濟隴官寨我兵四面追剿翁果爾海直搶東南山梁賊拒守礮內大兵爭先上礮衝擊立時克復殺賊六百餘人大小頭目七名敘功授頭等侍衛時賊據熱索橋負險抗拒大兵由擺馬奈撒前進與賊隔河相持翁果爾海受密令由峩綠山



繞至上流潛渡大兵越兩重山直至熱索橋上游斫木編筏渡河  
由間道疾馳直撲賊卡擒殺無算隨時攻克奏入 賞給副都統  
職銜賊又竄踞協布魯砌卡屯聚前阻橫河山勢尤峻大兵不能  
卽渡會暮雨伏兵林礮中伺夜半賊退遂接木渡河分兵剿捕翁  
果爾海率眾進擊大兵乘勢繞對山併力下壓賊遂潰迫斬三百  
餘人焚寨五座七月由協布魯進攻東覺分兵三路道出噶多翁  
果爾海爲頭隊隨海蘭察越東南山繞行至雅爾賽拉博爾東拉  
穿林搜箐潛伏步行賊恃險負嶠設木城三座石卡七座翁果爾  
海率眾繞至賊卡之下併力壓擊賊衝突迎敵翁果爾海右臂中  
槍甚重會二隊三隊接應翁果爾海奮力轉戰斬賊目蘇必達那

塔新巴一名咱嗎一名餘賊二百餘名賊始竄焚木城毀石卡疏入得 旨翁果爾海受傷著賞銀五十兩以示鼓勵十一月廓爾喀平凱旋圖畫功臣於紫光閣 命詞臣擬平定廓爾喀後十五功臣像贊翁果爾海得贊曰山越兩重路循一線破空而下取道以閒推堅執醜右臂中傷擁賊紛墮厥功煌煌五十八年授鑲藍旗蒙古副都統嘉慶三年補英吉沙爾領隊大臣四年卒子蘇崇阿見襲騎都尉

右 國史館本傳

普吉保

普吉保滿洲正黃旗人扎庫荅氏乾隆三十五年由藍翎侍衛從征烏什有功補三等侍衛三十七年征四川南路軍營隨參贊大臣阿桂勦金川十月偕提督汪騰龍等由拉古鄂前進攻甲爾木山梁及甲魯正地礪卡克之三十八年隨參贊大臣舒常攻日旁有功三十九年隨副將軍豐昇額攻凱立葉山領兵一千五百殺賊六十餘人抵迪噶拉穆扎山賊分三隊衝截官兵普吉保偕侍衛馮爾占等夾攻殲斃尤眾 賞衝捷巴圖魯名號以功擢遊擊四十年攻勦噶爾丹寺及遜克爾宗摧破木城石礪甚多 上以普吉保勇往超羣 命以副將用尋補廣東惠州協副將四十一

年三月調直隸督標中軍副將四月調張家口副將五十一年擢福建汀州鎮總兵是年臺灣逆匪林爽文滋事總督常青檄令會剿五十二年正月領水師兵六百由廈門渡臺連敗賊於鹿仔港八卦山 上嘉其奮勉尋鳳山復陷以遲誤被劾得 旨交部嚴議仍留軍營督兵以觀後效時逆匪因大兵齊集退守巢穴於斗六門大里杙羣擾普吉保駐鹿仔港偏近賊巢時有斬獲並堵剿淡水彰化諸賊九月由西螺進攻斗六門時逆匪圍諸羅距縣城二十餘里之笨港往來滋擾普吉保督兵赴援由大突溪抵笨港賊蜂擁迎敵普吉保率遊擊海亮等奮勇力戰戮斃數百人奪獲器械賊莊七處賊眾奔潰得 旨嘉獎予以議敘並 賞玉扳指



大小荷包復因偵探賊眾將屯踞附近村莊之賊勦洗 賞蟒袍  
十一月笨港潰散餘匪糾約斗六門西螺夥黨分路繞截普吉保  
領將弁堵禦殲戮甚眾 上嘉之嗣駐兵元長莊移營月眉莊距  
諸羅僅五里逗遛不進屢奉 旨嚴飭旋進攻大埔林收復斗六  
門 予議敘偵知首逆竄匿內山一帶普吉保由山路進攻山徑  
險窄徒步登陟沿山搜捕殲斃二千餘名生擒四十餘名五十三  
年正月分兵駐劄科仔坑口官兵四路圍截林爽文就擒二月南  
路首逆莊大田亦就擒全臺平凱撤後圖像前三十功臣於紫光  
閣普吉保與焉 御製贊曰攻克笨港本有微功未解諸羅賊眾  
難通勇賈贖過奮不顧躬掘科仔坑逸賊路窮先是普吉保克復

鹿仔港 特授臺灣鎮總兵尋以臺灣甫經平定恐普吉保不能  
勝任 諭畱於福建遇有相當總兵缺出補授五十四年授廣西  
右江鎮總兵五十五年因擅責把總黎振乾致振乾投水死革職  
發往伊犁效力贖罪嘉慶五年在伊犁故

右 國史館本傳

## 進財保

進財保滿洲鑲白旗人舒穆魯氏由吉林前鋒於乾隆三十五年秋學園木蘭駐京挑補黏竿處拜唐阿授護軍三十七年授藍翎侍衛時命額駙福隆安選年壯得力之員隨征金川進財保與選從參贊色布騰巴爾珠爾往軍前聽用三十八年從領隊大臣舒常至日旁山率兵潛進奪賊水卡三十九年春與提督馬彪等屢攻達爾圖賊碉四月軍次泥峙岡都司張大儒率兵赴南漳取水遇賊突出接戰進財保往援敗之六月副將軍阿桂舒常等合軍進剿進財保攻賊於舍衛格羅奮力夾擊殲數十人奪其卡捷聞授三等待衛四十年奪科拉木達礪寨有勞績晉二等待衛復

分攻得楞山礮破之又與副將圖欽保攻克茹寨奪據麥田四十餘里復於額爾替城登卡擊賊受傷奉 旨賜銀百兩 賞扎拉克巴圖魯名號時大軍已奪據扎烏山梁爲賊人河西緊要門戶其上斯底葉安周二十里有寨落三十餘處進財保督兵進攻奮勇當先賊眾潰竄悉奪其寨據之遂從耳得谷進兵攻日斯滿礮寨賊人守險進財保麾兵由左右山溝內並進軍旣至礮應時摧陷而溝內策應之賊亦爲進財保擊敗墮崖落箐者甚多餘皆潰散奏入 諭曰此次截賊衝突上山滋擾之賊進財保頗爲出力著明亮存記俟大功告成咨部議敘旋以攻克達撒谷超眾奮勇擢頭等侍衛四十一年金川平凱旋 賜宴賚幣八端銀百二十



兩圍畫功臣於紫光閣 命詞臣擬平定金川後五十功臣像贊  
進財保得贊曰達撒先登遇瀟不貽嗣攻宜喜潛師下壓額爾替  
城槍石如雨努力合圍亦克奪取四十二年授呼蘭城城守尉五  
十八年年班入京授副都統銜以頭等侍衛爲英吉沙爾領隊大  
臣嘉慶三年病足 恩旨准回京五年卒子舒明亮見任 昭陵  
員外郎

右 國史館本傳

國語彙編卷之七

朱江文

三

--	--	--	--	--	--	--	--	--	--

蘇爾相

蘇爾相甘肅靈州人乾隆六年由貴州上江協馬兵隨征南江苗  
匪有功十三年拔補本營外委十八年調古州鎮外委十九年擢  
把總二十二年升荔波營千總二十六年赴部引見得旨以  
守備補用三十二年隨大將軍公明瑞征緬甸帶兵攻蠻結一路  
生擒緬賊四名奪獲長槍刀弩馬匹無算遂進攻猛弄三十三年  
正月攻克猛拜坤戛戶董蠻化等處又轉攻南坡大山城虎布蠻  
猓二月追剿至天生橋猛省地方共接仗二十五次均列爲超等  
功七月補貴州定廣協守備十二月隨副將軍阿桂等進兵奇木  
嶺三十四年六月經略大學士公傅恆等奏蘇爾相出師打仗著

有勞績監造大礮頗知實心用事請授雲南奇兵營都司 上從之十月攻老官屯賊寨奮勇身先槍傷左髀復力疾攻勦兼旬不懈屢蒙 賞賚銀兩是月緬匪懇求解圍傅恆以病奉 旨回京命阿桂辦理撤兵事宜蘇爾相奉檄回永昌三十五年雲貴總督彰寶因緬匪久渝不至差赴老官屯投遞檄文緬日諾爾塔羈留之事 聞 諭曰彰寶等摺內所稱蘇爾相爲彼拘留自應再發檄諭嚴飭諾爾塔向其索還可卽遣送信之外委鍾朝相齎去並令其面諭蘇爾相云爾身爲都司帶有兵丁同行豈無隨身器械前日諾爾塔請爾進城促爾接阿瓦來信卽當同眾兵捨死拚命殺傷彼眾卽不然亦當挺身罵賊何竟束手無策聽其拘絆十月



阿桂等覆奏接到蘇爾相稟詞及諾爾塔書字 諭曰昨冬攻圍老官屯緬酋至軍營懇請解圍情願奉表納貢並送還所畱內地之人我兵始行撤回乃延挨數月杳無信息因諭阿桂派人持檄往彼詰詢而所派之都司蘇爾相至老官屯竟爲諾爾塔所羈蘇爾相不能申明大義罵賊捐軀甘受賊匪拘絆已屬無恥貪生罪無可逭今據阿桂等奏到蘇爾相所遞稟詞惟述賊匪向詢之語並無一言斥責復爲賊人代詢不易交易之故直是與賊詭詞進說實爲國法所不容輕恕該犯情罪如此可惡卽其家屬亦當加之罪譴以昭法紀查蘇爾相籍隸甘肅著諭明山巖飭所屬將伊妻子鎖拏派委委員解交刑部嚴行治罪十二月陝甘總督明山

奏奉 旨拏解蘇爾相家屬當卽委員將伊父母及伊弟蘇爾忠蘇爾福押解赴部並查得伊弟曾經過繼四川譚姓業經飛咨川省拏究 諭曰蘇爾相甘爲賊匪拘留並敢詭詞進說爲國法所不容輕恕其妻子自當加以罪譴至伊父母兄弟原可毋庸緣坐著傳諭明山將見在拏解之蘇爾相父母及伊弟蘇爾忠等並予開釋不必解京至其過繼之弟並著咨明川督毋庸辦理三十六年刑部奏據貴州巡撫宮兆麟委員將蘇爾相之妻蘇張氏及子蘇若霖女二黑三黑等拏解到部查蘇爾相奉差傳檄受賊羈絆稟詞又復悖謬實爲國法所不容其家屬應發往伊犁給披甲人爲奴今其子女均未及歲應請照辦理書敏楊重英等家屬之例

將其妻蘇張氏並其子女暫行監禁俟及歲之日一併發遣得旨允行蘇若霖等先後殞歿蘇張氏發遣歿於途三十七年彰寶奏緬匪大頭目得魯蘊差其親信緬子孟矣等到關稱得魯蘊自阿瓦差到老官屯辦送貢禮並送還內地之人請限於六月初十日親自來見見將孟矣等看守在營至期酌辦 諭曰緬甸水土惡劣非人力所能施是以早經定意不欲於瘴癘之鄉復勞師旅非若兩金川以內地土司負隅逆命必應勦除者可比如果惜駁誠心悔過送還內地之人納貢求降原可允其所請但必先將楊重英蘇爾相及有可稽之員槩行送回方成事體三十八年彰寶以譯出緬匪回信並訊取蠻轟供情具奏 諭曰緬匪狡詐百端



本不足信而蘇爾相所具稟詞仍係綻拉機授意尤不足憑四十年署總督圖思德奏緬酋遣頭目秤官猛等來議入貢事 上命械送京師下獄四十一年平定兩金川逆酋索諾木及黨惡頭人等俱解京正法 命刑部押緬目赴西市看視行刑且告之故秤官猛等惴慄戰慄不敢仰視因械至雲南令其歸諭緬酋俾知中國威武其年緬酋惜駁死子贅角牙襲頗知悔懼頭目得魯蘊等亦深慮獲罪終難安處且因上年商辦還人貢象之事檄諭嚴正屢次擲還稟詞益加畏懼於是誠進表貢並送還蘇爾相等及內地被畱之人兼請開關通市圖思德據以入奏 上命大學士公阿桂往經理受降事宜四十二年正月 諭曰前據圖思德奏聞



得魯蘊見在阿瓦料理貢物並欲將蘇爾相多朝相接往阿瓦要  
同楊重英俱從天馬關送還內地并欲親自到關叩懇納貢等語  
已令阿桂馳驛前往雲南經理受降諸事又調李侍堯爲雲貴總  
督並將籌辦機宜詳諭圖思德矣計此時得魯蘊以辦貢投誠並  
將楊重英蘇爾相等送還內地亦未可定此等送還之人恐其心  
生畏懼圖思德可派委員伴送來京不必加以鎖押惟宜沿途留  
心防範勿稍疏虞四月得魯蘊將蘇爾相及其隨往之弁兵送還  
永昌阿桂等因訊錄他犯供詞及蘇爾相被留八年屢欲引決不  
得情事具奏 上命阿桂傳諭蘇爾相曰伊從前原係奉差前往  
被賊羈留本無過失且聞其曾屢次欲尋自盡情頗可憫到京後

尙欲加恩令其不必憂懼途中並無庸鎖解卽令伴送之員同其  
馳驛來京七月赴部引 見奉 旨蘇爾相著發往雲南交李侍  
堯遇有遊擊缺出卽行補用仍賞假准其暫行回籍省看墳塋部  
署一切再行赴滇候補 賜詩曰差往緬甸因被羈今知悔罪送  
旋歸兵傳後實非佳也事貴先聲信有之瘠地瘴鄉憐久汝冰天  
雪窖豈殊其設如比儼伊家武無子無妻謂過伊翌日 賞大緞  
二匹令馳驛回滇又 諭曰連日命軍機大臣詢問蘇爾相據所  
稱情節與得魯蘊極爲熟識幾成交好因思得魯蘊等如果到關  
進貢還人彼時李侍堯自應差委妥員至關口與之接見交言莫  
若卽令蘇爾相承辦此事爲妥因卽令蘇爾相馳驛回滇聽李侍

堯遇缺補用以資調度並令軍機大臣諭知蘇爾相如果得魯蘊到關進貢卽令蘇爾相前往接受爲之明白宣諭令其隨貢進京瞻覲卽著蘇爾相伴送來京蘇爾相旣與得魯蘊相熟所言自必深信不疑如得魯蘊到時朕必格外加恩並加恩蘇爾相昨曾令其回原籍看視且俟此事辦完再令隨便請假回家八月到滇十月奏補鶴麗鎮標遊擊四十三年六月 諭曰上年秋閒蘇爾相到京朕念其在緬羈留日久加恩升用遊擊並令其回籍看視嗣因其與得魯蘊相熟恐得魯蘊到關進貢應令前往接受伴送來京是以令其俟事畢回籍今當盛夏邊地 發見無可辦之事著傳諭裴宗錫卽令蘇爾相乘此閒暇之時酌給假期回籍看視於



冬間再行赴滇七月雲南巡撫裴宗錫奏據蘇爾相稟稱緬匪進  
貢還人之說尙在觀望恐有信到關伊與得魯蘊熟識易於交言  
集事請仍畱職守俟邊事辦畢再回籍省視 上是之四十七年  
四月經總督富綱保薦四十九年正月請加銜補用 諭曰富綱  
奏遊擊蘇爾相老成歷練熟習邊情見在駐防沙木籠未得送部  
引見請賞給參將職銜俟有缺出奏補以示鼓勵蘇爾相駐守邊  
防得力是以俯允所請嗣後不得援以爲例七月升署順雲協參  
將五十一年實授五十二年升龍陵協副將五十六年保列一等  
閏四月赴部引 見奉 旨蘇爾相准其一等註冊翌日 召見  
賞戴花翎及大緞二匹五十八年授鶴麗鎮總兵六十年三月調



騰越鎮總兵嘉慶元年同巡撫江蘭勦辦威遠裸黑殲斃首犯札  
那及餘匪數百名十二月奉 旨兼署提督生擒首犯札杜並勦  
戮裸匪一千三百餘名威遠平四年隨總督富綱勦辦緬南裸匪  
帶兵攻克南澗河黃草壩丙別青龍山壩卡等處賊寨經總督協  
辦大學士書麟奏 聞 賞喜字玉扳指大小荷包五年奏留緬  
甯辦理善後事宜旋因傷發回鎮調理卒於保山縣右甸鄉子天  
貴元年廕生引 見以主事用籤分刑部行走因奏明無籍可歸  
奉 旨入雲南永昌府保山縣籍

右 國史館本傳



岱森保

岱森保滿洲正紅旗人庫雅拉闊卓里氏乾隆三十六年由黏竿處拜唐阿從征緬甸三十七年移師金川十月授藍翎侍衛旋賞戴花翎三十八年五月隨將軍溫福參贊海蘭察於昔嶺攻剿賊番擲放槍石嶺上賊番迤邐而下以巨礮擊散奮勇被傷授三等侍衛三十九年三月與賊番戰於羅博瓦殲賊三十七名七月攻取喀木喇瑪山碉領巴圖魯兵丁首先衝入殺散賊匪奪獲碉座奉 旨襲獎擢二等侍衛 賞給布隆巴圖魯名號四十年二月帶兵攻勒吉爾博山梁等處木城卡三十餘拔開鹿角躍進濠溝以火彈拋碉頂破之八月隨將軍阿桂攻勒烏圍碉寨礮摧橋

座據第八層高塹仍潛通地道以接擊木柵復於攻得木城後併力進剿遂破賊巢九月授頭等侍衛四十一年大功告成凱旋後賞賚甚優圖像於紫光閣 命詞臣擬平定金川後五十功臣像贊岱森保得贊曰掘地擊柵出賊不意合攻勒圍呼聲動地戰羅博瓦不顧傷胸遇敵勇敢錫號布隆四十四年授護軍參領五十二年臺灣逆匪林爽文莊大田等糾眾滋事六月與侍衛烏什哈達等於府城大北門外沙嵌下載殺賊夥行至蔦松齊力奮擊賊不及防死者約二百餘人八月復帶弁兵迎擊南潭中洲賊匪以巨礮斃五六十人賊退仍帶本隊弁兵及各處義民前赴南潭遇賊五六千人以排槍壓之賊大潰火焚賊寮數百餘賊分竄九月



復敗賊於府城北之三坎店奪獲礮械尋隨閩浙總督常青福州將軍恆瑞江甯將軍永慶廣東副都統博清額赴援諸羅仍由水道赴鹽水港屢著勞績十一月以鹽水港之役勦賊奮勇奏入

賞加副都統銜五十三年二月復隨陝甘總督福康安等攻賊於牛莊賊恃灣裏溪水深湍急排列迎拒官兵突過深溪斬俘甚眾乘勝直抵南潭三月莊大田等被獲全部平定凱旋後署正白旗蒙古副都統 上命紫光閣紀勳圖像復 命詞臣擬平定臺灣後三十功臣像贊岱森保得贊曰初至著績鹽水港營移師南路爰靖海鯨率先鼓勇有將提兵牛莊深入克壯軍聲十一月補正黃旗蒙古副都統五十五年授伊犁領隊大臣五十六年八月前

藏廓爾喀頭人滋事占據聶拉木 上命帶索倫達呼爾兵一千  
名同參贊海蘭察由京至青海草地赴藏會同兩廣總督福康安  
四川總督惠齡等協力征剿五十七年正月官兵行抵西甯迅速  
前進三月抵西藏福康安派同成都將軍成德帶兵三千前赴聶  
拉木牽綴賊勢遂於措克沙木派屯弁領屯土兵丁由夾河兩面  
山梁前進復親率屯弁帶兵由正路直趨據德親鼎山攻克頭卡  
後復直前攻撲斃賊數十人餘俱敗竄奏入得 旨奮勇可嘉七  
月偕侍衛承德由哈那衮木山前往扎木一路進攻賊卡奮力接  
戰遂克扎木八月復與承德成德等分兵三路至多洛卡會合剿  
殺追至俄賴巴道險林密復分兵兩路直撲賊巢賊俱竄逸十月

廓爾喀賊首震懾 天威畏罪乞降奉 旨允准復 命詞臣擬  
平定廓爾喀後十五功臣像贊岱森保得贊曰奪賊要隘德親鼎  
山尋攻扎克開道躋巔或合或分克堪用命日迪果毅由其志定  
五十八年授乾清門侍衛嘉慶元年以副都統職銜爲呼倫貝爾  
總管四年七月署正黃旗蒙古副都統尋授虎槍營統領八月奉  
旨派往陝甘軍營勦滅賊匪十一月張漢潮餘匪分三股在韭菜  
坪滋擾旋竄向西南復折至東北擾及五郎境內工部尙書那彥  
成派同總兵長春赴柴家關茨溝各隘口堵截賊遂竄入整屋洋  
縣界之秦嶺尋竄至大建溝時出沒老林復帶兵入山追勦十二  
月賊竄入洵陽復偕副都統綸布春往來竭力勦撲五年正月奉



上諭將張漢潮餘黨交台布岱森保帶兵追剿務期肅清甘境嗣因步兵從征日久漸形疲乏遂與西安巡撫台布親自挑選統計存兵五千一百餘名除盛京馬兵七百名專令駐紮峪外按緝馳聚以防賊竄出平地其山內征兵實四千四百六十餘名時藍號賊目高遇春就獲後已向西奔竄其白號賊經參將李天林等躡擊復竄西南卽以挑選之兵分路躡追勇往奮迅多有斬獲尋於西鄉五郎等處或堵或剿賊遂竄出辛峪後追至大河壩令步兵由西北山梁下壓馬隊由南山梁抄殺斃賊二十餘名復繞至店子河山梁賊見山路崎嶇潛出毛坪沿山逃逸復與總兵觀祥前後夾擊賊勢甚蹙二月江北張漢潮餘匪竄入盤屋之就峪以官



兵由寶雞向東禦之嗣緣泯州之賊竄入禮縣階州之賊又延及  
洮岷迺與副都統格布舍總兵穆克登布爲一路由禮縣分投進  
擊以窘賊路是月補鑲黃旗漢軍副都統三月賊匪於岷州之石  
刷里臨江鋪一帶焚掠遂與綸布春及遊擊喜明等分三路衝入  
賊巢箭矛並發斃賊無數尋經略額勒登保派與綸布春分兩路  
於臨江鋪進剿殺賊六七百名復於宕昌界追剿賊匪潰竄四月  
賊匪將奔出兩河口遂帶馬步兵繼進賊不能抗又張天倫等股  
匪已抵鎮安之野竹坪後由小大岔尾躡之窮追三十餘里賊向  
西逸計斬獲三百餘人尋隨額勒登保由竹林關兼程直趨趙家  
川蒿坪河一帶復克楊開甲等股匪五月伍金柱股匪由松樹壩

竄入黑水河遂帶兵由焦溝僨出賊前橫擊六月張天倫殷匪從  
二郎壩西竄老山卽隨額勒登保取道洋縣褒城迎截旋分布要  
路安營設卡以斷賊由黑水河東竄入陝之路七月復得台布所  
領鄉勇八百名於褒城之雞頭關一帶協力防堵嗣緣鳳山居民  
譌傳距城五十里之草灘溝有賊匪竄出於長寨得信時親率兵  
赴沔縣一路截擊卽派馬隊數十人躡追十餘里外所帶兵勇僅  
數百名不能窮追仍回長寨防堵旋於長寨患病九月行抵漢中  
病勢日劇於十二日卒 諭曰岱森保在乾清門行走有年茲在  
軍營病故歿於王事殊爲可惜照例議卹並廕子六品頂帶長子  
全山保任二等侍衛兼公中佐領次子吉爾達阿任護軍參領三

子瑚通阿原任戶部顏料庫郎中四子色克精額承廕六品頂帶  
見任藍翎侍衛

右 國史館本傳





國朝耆獻類徵初編卷二百九十七目錄

將帥三十七

文圖

巴圖什里

圖桑阿

李南馨

阿蘭保

劉之仁

和倫

綸布春

成德

蘇靈

潘韜 子汝涓

常懷義

蒼保



國朝名獻類徵初編卷二百九十七

通奉大夫前署江西巡撫江西布政使司布政使湘陰李桓輯  
將帥三十七

文圖

文圖滿洲正紅旗人姓呼爾哈乾隆二十一年襲雲騎尉世職二十九年授三等侍衛三十三年襲世管佐領三十六年授前鋒侍衛四十一年擢前鋒參領四十二年授嚮導處印務章京四十五年出烏里雅蘇臺兵差五十一年發甘肅以副將用尋補中衛協戍署甯夏涼州肅州等鎮總兵六十年署陝西興漢鎮總兵嘉慶元年十二月陝西巡撫秦承恩以湖北邪匪擾近陝境飭文圖領

興漢鎮兵千名馳勦賊聚湖北竹山竹谿文圖兵至蜡玉河奮擊之生擒賊目王見寅等殺賊四百有奇奏入 上以文圖帶兵一入楚境卽殺賊四百餘人足使賊人聞風膽落嘉獎之文圖隨帶兵分路痛勦將蜡玉河賊匪全行誅滅三月賊匪羅進等在羊角山四出搶燒復帶兵由清吉溝渡河斬首百餘級餘匪奔竄預設伏斷其後路追至雙竹園夾擊之殲賊殆盡生擒羅進等父子四人奉 旨交軍機處記名遇有總兵缺出卽行升用嗣大學士署四川總督孫士毅以賊匪偏近來鳳馳奏 諭曰文圖前往羊角山勦賊甚爲奮勇著加恩賞戴花翎卽令酌帶兵丁由竹山一帶取道來鳳沿途遇有賊匪卽可順路殲除以便會合樊繼祖與孫



士毅兩面夾攻更可得力四月文圖與將軍恆瑞先後抵竹山盡  
誅賊匪復分路前赴保康堵禦三里坪賊匪擊殺三千餘人生擒  
首逆祁中輝曾世典賊奔聚東山長嶺文圖與恆瑞等痛加殲戮  
落崖澗死者無算 賞訥恩德巴圖魯號 諭曰文圖勦賊甚爲  
奮勇見在巴東一路營汛單虛恐賊匪乘閒滋擾著傳諭文圖卽  
刻帶兵由興國州一路速赴巴東等處勦殺賊匪如該處賊已勦  
淨而惠齡在深衝口尙未擒獲賊首卽著文圖幫辦尋以永保等  
奏請會勦襄陽逆匪又 諭曰文圖昨令前赴惠齡處協同勦賊  
今仍著恆瑞等酌量情形如惠齡處可無須文圖急於前往卽令  
該署鎮先赴襄陽會合攻勦五月文圖追白雲寺賊至喇叭洞

上以攻圍已越多日於該處賊匪淨盡後卽帶兵速赴榔坪一帶  
勦辦尋恆瑞等以文圖勦殺喇叭洞賊匪淨盡馳奏 諭曰文圖  
前在竹谿竹山勦辦賊匪屢次出力茲又將喇叭洞之賊全行勦  
盡肅清鄖陽一路殊爲奮勉可嘉文圖俟有總兵缺出卽行擢用  
仍交部議敘文圖奏曰白雲寺賊逃至喇叭洞臣親率興鎮兵協  
同襄陽鎮總兵彭之年四路圍勦賊滾崖斃者約七百餘殺死者  
三百餘生擒教首莊正朝張宗玉等並擒首逆王蘭解京 諭曰  
文圖自到鄖陽以來屢次攻勦賊匪打仗得勝帶領興漢鎮兵日  
久與弁兵相習調遣更爲得力卽著加恩補授興漢鎮總兵六月  
攻取丁家大山賊卡偕湖北巡撫惠齡會勦賊潰奪白家壩卡又

乘勝占據羅羅洞賊卡奏入得 旨文圖著加賞提督銜遇缺卽  
升時灌灣腦賊張正謨等勢甚張文圖分兵駐絲羊腦山梁扼其  
隘圍之七月連獲楊樹壩青草窩二卡賊由灌灣腦箐箕壩兩路  
飛奔而上我兵潛伏不動俟半入卡內槍礮四起賊驚竄入卡跌  
落溝濠者不可勝計生擒張文宗等六十八名奏入得 旨著賞  
嵌松石帶版八月賊據王母洞獅眠坳山溝文圖與成德惠齡三  
路進攻盡誅之生擒賊目彭佳兆等四十名旋以榔坪賊匪滋擾  
歸州巴東長陽一帶復馳赴迎擊九月擊殺榔坪賊匪二百餘生  
擒八人搶獲大礮一座及器械贏馬隨分派將弁守卡值霧雨四  
塞賊潛至卡邊文圖豫令兵用繖遮護槍礮賊至登時并發斃五

百餘人生擒賊目潘學僧心海等三十三名尋進攻蓼葉口賊卡  
有長衝卡賊率眾接應我兵擊斃無算追至長衝賊卡又斃百餘  
人奪其卡均奏入得 旨交部議敘十月由蓼葉口進兵擊賊於  
沈香溪山坡賊由獅子巖偷渡文圖帶兵夜繞道行抵張家口見  
滋邱賊巢火光燭天正在搶渡出其不意槍斃甚多生擒賊黨胡  
宗榮劉應祿等奉 旨補授雲南提督未幾滋邱賊匪逃至黃柏  
山潛匿 諭曰滋邱賊匪復逃至黃柏山潛匿殊出情理之外文  
圖在關口黃連坪駐劄而賊匪於初六日搭造浮橋至十三日接  
到補授雲南提督諭旨竟於十九日起身赴滇置逃竄黃柏山之  
賊匪於不顧尤爲畏葸可惡所有前賞花翎及巴圖魯號俱著革



去姑畱提督之任令其帶罪圖功以觀後效文圖見已回至軍營  
卽著成德文圖分往賊營之西南鶴峯州東南長樂縣界帶兵防  
堵儻若再不能堵截又任賊匪由所守之處逃逸則二人二罪並  
發必於軍前正法決不寬貸十一月文圖遵 旨帶兵由黃柏山  
進攻十二月至雙龍寺與副將樊雄楚許文謨等遙爲聲援分路  
堵截力扼賊於獨石坪大破之隨撲進西流溪又斃賊二百餘二  
年正月黃柏山賊匪恃險負嵎文圖會合成德攻剿連獲賊卡二  
座奏入得 旨賞金盒一箇綠玉扳指一箇大小荷包等物嗣賊  
由楊家寨直撲而前文圖復同成德分投攻剿先後擊殺三四百  
人生擒周之文等二十三名獲器械百餘奪其寨由黃金嶂進兵

國朝通志卷之二十一  
擊退西流溪賊時署四川總督福甯擊獲奸細黃士榜知會文圖  
加意防範賊果乘夜潛來我兵齊出奮擊跌巖死者無算文圖遂  
移兵攻撲小薄道嶺 諭曰此次官兵打仗不避危險奪據要隘  
阻遏賊人出路文圖著交部議敘三月攻小薄道嶺賊未賊由山  
溝潛出殺斃無算旋隨額勒登保攻黃柏山賊匪進偪四方臺得  
旨嘉獎四月額勒登保以金雞口至天池口爲糧運要路令文圖  
往來稽查七月防守滋邱河絕賊渡旋以巴東江岸賊匪肆擾帶  
兵赴宜昌歸州一路迎頭截剿十一月防堵巴東江北岸又以長  
樂縣賊匪潛出會同湖北按察使張長庚撲剿奏入 諭曰文圖  
既帶兵前往尤當出其不意一鼓殲擒勿使與長樂縣賊匪合夥

方爲妥善十二月由長樂縣搜勦覃加耀逸出之賊三年正月賊聚終報寨額勒登保以山係懸崖峭壁設法三面仰攻令文圖在東路攻擊二月帶兵駐鄖陽堵大甯賊匪三月川省賊首劉成棟偪近遠安南漳偕湖北巡撫汪新馳赴保康迎擊尋復至南漳截擊遏其西北奔路奏入 諭曰文圖等由南漳截勦正可前後夾攻毋任輾轉逃竄四月川匪張漢潮等竄入楚境文圖奮擊於荆門州屬之石牌因眾寡不敵陷賊圍中左脅受槍傷仍強騎突陣出五月傷漸平駐兵漢江東岸六月川匪王三槐竄入大甯湖廣總督景安奏咨會文圖前往歸巴界駐劄堵禦得 旨務須察探賊蹤實力堵截勿再任竄入楚界慎之七月景安奏文圖受溼過

深染患瘡毒未能乘騎恐帶兵亦不得力 諭曰文圖見經染患瘡毒未能乘騎帶兵不能得力畱彼徒滋戀棧著景安據實奏明再降諭旨八月景安以文圖病勢加增可否准令回旗調養入奏得 旨著准其解任回旗調養四年四月以原品休致 賞給半俸五年十二月病卒佐領世職子興瑞襲

右 國史館本傳



巴圖什里

巴圖什里博爾濟吉特氏正藍旗蒙古人由健銳營前鋒隨征伊犁烏什暨緬甸新街戛鳩皆有功乾隆三十二年襲世管佐領四十六年授貴州提標前營遊擊五十年二月因督緝逃兵未獲革職畱任五十一年十一月 特旨開復五十六年遷丹江營參將六十年二月黔苗石柳鄧叛於松桃廳糾連楚苗滋擾閏二月隨總督福康安由銅仁進撲嗅腦賊潰乘勝克石城燬巖峒寨斃賊無算又進攻馬乾溪暨青魚塘五月由葫蘆坪攻克黨槽三家廟等苗寨奪卡七座 恩賞荷包十月擢定廣協副將進攻鴨保寨嘉慶元年四月進剿天星寨樸木營等險要山梁又進奪納共山

貴道嶺等石城石卡旋攻火麻營追賊於河溪渡口撲水斃者甚  
眾遂克乾州十一月隨將軍明亮由楓形山進攻貴魚坡之南晝  
夜轟擊奪據馬頭山要卡十二月由貴魚坡進剿石隆寨大兵雲  
集槍斃逆首石柳鄧獲其子石老喬二年正月貴州狎苗王囊仙  
七綰鬚等滋事三月隨總督勒保由關嶺進剿時滇黔路阻巴圖  
什里帶兵自安南縣馳赴永甯據盤江鐵索橋進攻黃土坡奮勇  
撲擊立解永甯城圍奏入得 旨議敘並 賞戴花翎旋帶兵在  
普安縣一帶防禦賊匪因黃草壩一帶攻剿緊急聞有鼠至普安  
者當卽剿捕淨盡 諭曰巴圖什里將普安一路賊匪殲除所辦  
亦好著咨部議敘五月在普安之小歹蘇打峯巖一帶捕獲逆苗

沙河三等六犯六月 上以巴圖什里敗賊永甯勦撫普安功  
賜敦勇巴圖魯名號閏六月帶兵防堵雲南邊界旋由黃泥河分路  
進擊黃草壩與知府屠述濂會兵勦於壩城之豐塘接合滇兵滇  
黔之路遂通八月攻三卡寨獲賊目韋阿谷等九月獲賊目韋阿  
尼等乘勝追擊至補路獲漢奸雙文奇等并賊匪二百餘名補路  
踞山臨溪形勢僻阻巴圖什里與總兵施縉等分路進攻駕橋馳  
渡焚燬賊巢乘勝進攻壩郁暗峒岵高等苗寨至黃草壩一帶賊  
眾悉就殲戮得 旨議敘十一月遷永州鎮總兵三年搜查安順  
興義及補路壩郁一帶餘匪蕝事以功 予優敘六年七月卒於  
任子那蘇圖見龔世管佐領

日本書紀卷之六十四

右 國史館本傳

--	--	--	--	--	--	--	--	--	--



圖桑阿

圖桑阿滿洲正白旗人姓董鄂氏一等公費揚古孫一等侯圖巴子乾隆十年襲一等昭武侯兼雲騎尉十四年授藍翎侍衛十六年擢三等侍衛二十八年擢二等侍衛二十九年襲世管佐領三十三年三月授京口副都統四月調江甯左翼副都統三十三年以失察披甲容畱民人私鑄降二級畱任三十四年五月諭江甯兵數無多原設副都統二員內裁汰一員圖桑阿著來京另候補用是月仍授京口副都統三十八年奏請武職參將以下照文職回籍丁憂諭曰父母之喪解任丁憂原係人子各盡孝道亦應視事之當然酌辦文職例應丁憂亦有經督撫奏請在任守制

者武職自參將以下職分較微得項無幾遇有喪事回籍服滿引見未免徒勞往返定例各員本籍丁憂與在任丁憂均屬一體在任丁憂卽爲不孝回籍丁憂卽爲孝乎圖桑阿舞文沽名著嚴行申飭四十年以辦理人川兵丁安速加一級四十六年三月調涼州副都統四月授正藍旗漢軍副都統八月仍授涼州副都統四十七年以涼州莊浪地方緊要請添駐防兵 允之四十九年五月甘肅石峯堡逆回滋事圖桑阿擊賊於馬營街進剿至伏羌雲霧山等處七月大學士公阿桂率兵平石峯堡圖桑阿於防守處巡邏截殺十二月以敘平石峯堡功給一等功牌一五十二年七月以秋審莊浪馬甲六十一毆死達興阿失入降三級從寬畱任

十二月擢廣州將軍旋調荊州將軍五十三年六月荆江泛漲府城被水衝淹圖桑阿與布政使陳淮募船分救滿漢城人口七月奏請借銀修坍塌兵房分年扣還 諭全行賞給 命阿桂會同圖桑阿詳查被災者安插撫卹十一月以奏補協領言過繁瑣代官兵謝恩摺內未將被水後兵民曾否得所情形備細陳奏降二級畱任五十五年調甯夏將軍五十七年調綏遠城將軍五十九年調西安將軍 諭西安地方綦重諸事務當謹慎畱心辦理六十年閏二月以調任後會同山西巡撫蔣兆奎奏請新平口外入官莊頭贖身爲民 上以其受莊頭愆戾 命革職從寬畱任罰世職半俸九月授正白旗漢軍副都統旋調烏里雅蘇臺將軍嘉慶

二年五月以參贊大臣額勒春及子玉敏妄爲無恥圖桑阿未據  
實奏參摘去翎頂 命豐紳殷德併鞫之閏六月革將軍職及侯  
爵世職發往伊犁效力贖罪八月 賞給三等待衛帶黑龍江兵  
往川楚軍營十一月賊於甯羌被官兵擊退由黃官嶺向長寨一  
帶偷渡漢江適圖桑阿偕烏爾圖那遜帶兵至卽馳入江心堵殺  
十二月 賞玉喜字扳指大小荷包并還侯爵世職是月賊從元  
壩子竄出將撲廣元圖桑阿隨明亮抄擊之三年正月勦至金水  
鋪北面山梁抵三河口賊死拒圖桑阿抄上右路梅子坡截殺之  
進至三官廟搜勦樹林崖峒內賊二月擊賊於判官嶺三月勦至  
寬坪賊向蓮花池一帶竄走圖桑阿率步隊衝殺又擊賊於高塘



四月賊於新街江邊東竄由大道迎擊之五月賊由胡家壩走鐵  
鎖關伏兵兩面山梁擊之並勦甘境竄出後股賊於黃瓜嶺七月  
明亮等分五路兵擊賊於清池子山圖桑阿由竹雞溝上右山梁  
前進憑高用木石擊賊跳崖撞石斃者甚眾八月擊賊於西河口  
九月賊屯白林灣一帶由西河口迎擊之十月擊賊於羅坪峽口  
十二月以足疾不能乘馬畱養軍營四年四月 命回京調治八  
月 上念其前在江中殲賊功授烏魯木齊提督六年九月卒長  
子松齡見任頭等侍衛襲一等昭武侯兼一雲騎尉次松福見任  
黏竿處頭等侍衛次松青見任二等侍衛次松文見任鴻臚寺鳴  
贊

國史館本傳 卷二百九十七

十

右 國史館本傳

李南馨

李南馨廣東長樂人乾隆三十四年武進士四十三年正月選授山東兗州鎮標中軍守備二月南馨以生長海濱熟悉外洋水師事宜呈請發往粵省以水師試驗經兵部題准改水師守備發廣東試用四十五年補澄海協左營守備四十七年升秀山協右營都司四十八年升碣石鎮標左營遊擊五十一年擢福建銅山營參將五十五年升澎湖水師副將五十八年正月因前任廣東遊擊任內失察福建同安縣流犯呂辰賄囑郭大頂替過境部議降一級調用上命送部引見奉旨降二級從寬畱任十一月因前在銅山參將任內於浙江永嘉縣船戶董廷發在漳浦縣吉雷

洋面被劫案限滿賊盜未獲部議降一級畱任嘉慶二年正月授  
金門鎮總兵督率舟師出洋搜巡先後派員擒獲在洋行劫匪犯  
蔡紅等二十九名八月以臺灣澎湖各戍兵換班之期向定三年  
換竣後改一年內分四起換竣各營戍兵須俟內地換班兵分赴  
營汛後再將戍兵配船內渡遠隔重洋風期靡定至有四起撥戍  
兵均已全往頭起換回之兵尙未至營每遇換班之年巡防差操  
不敷派委移咨總督魁倫酌量換班期請於兩年一換闕匪眾擊  
斃受傷落海者甚眾生擒張阿四等三十名五月在小岞山洋面  
瞭見匪船遊奕當率兵船馳往圍捕匪船向東南竄南馨與參將  
麥鷹揚等分三路兜擒匪眾放縱抗拒兵船奮擊傷斃匪犯無數



生擒陳六等五十名拏獲匪船一隻四年十一月授水師提督五年五月因琉球國難番船隻在洋被劫上以李南馨未能先事查察交部議處部議降一級調用奉旨改爲降二級從寬畱任六年九月卒

右 國史館本傳



阿蘭保

阿蘭保正白旗滿洲人扎拉爾氏乾隆三十九年三月由司轡授  
藍翎侍衛時金川川兵隨將軍阿桂往四川軍營領隊六月隨副  
將軍明亮赴正地七月往探賊路知賊據高險排列戰礮我兵越  
險遠攻恐賊抄截未可輕進九月明亮奪賊水卡設礮據之料其  
必爭派阿蘭保帶兵預伏坡坳二十一日辰刻霧甚賊二百餘人  
兩路抄至礮旁守礮兵發槍拒之伏兵踵至四面圍射賊遁四十  
年三月阿蘭保帶兵攻科拉木達及喀爾西等處礮卡奮勇上撲  
不避槍石直至科拉木達拔開鹿角拋擲火彈賊拒守喀爾西之  
北阿蘭保力攻賊不能下壓槍箭斃賊十餘人餘俱竄入密林四

月隨參贊海蘭察等率兵攻薩克薩谷賊用排槍迎擊驟如飛雹我兵躍入卡內攻至未刻克之六月阿蘭保督兵攻賊因久雨撤兵賊於林箐中突出尾追我兵回身掩擊槍箭並發殺賊二十餘人餘俱竄是月擢三等侍衛閏十月領隊大臣奎林等分左右兩翼攻耳得谷阿蘭保帶兵從左右溝內進發抵禦來援之賊二百餘人屢次衝突上山阿蘭保督兵力戰槍箭齊發賊墮崖落箐五六十人餘俱潰奉 上諭此次截殺衝突上山滋擾之賊阿蘭保頗爲出力著明亮存記統俟大功告成咨部優敘十一月阿蘭保帶兵數百進攻噶爾角據其地生擒賊番八百殲賊二百餘名十二月阿蘭保帶兵攻達撒谷並獨古木思滿碉寨俱克之交部優



敘四十一年二月 命賞噶布什克巴圖魯名號銀一百兩四月  
凱旋 恩賞緞十端銀一百八十兩圖畫後五十功臣於紫光閣  
命儒臣爲之贊曰日旁夾擊乘賊靡亂戰扎烏古殲戮過半越險  
踰濠旁掠側出掩彼弗敵十不失一四十六年四月擢二等侍衛  
甘肅逆回滋擾 上命阿蘭保馳往軍營聽大學士阿桂委用賞  
銀一百兩五月阿蘭保帶領侍衛章京由龍虎山過溝繞至華林  
山西南潛伏先令士兵由華林山前撲壓賊營賊於濠外設卡數  
重放槍抵禦士兵佯敗賊數百人出濠追壓阿蘭保等由溝中奮  
勇衝出截爲兩段馬上槍箭齊發殲斃甚多餘俱竄閏五月阿蘭  
保帶川省屯練兵斜撲華林山西路賊卡賊已斷前路多掘坑塹

阿蘭保領兵繞近賊卡賊不敢出我兵奮勇撲進賊出抵禦我兵棄槍短接刀斫矛刺殲戮甚眾賊退我兵乘勢撲壓賊復出拒如是者三斃賊六七十名賊竄歸卡內六月阿蘭保隨領侍衛內大臣海蘭察等帶兵攻華林山賊營預伏卡外天陰晦出賊不意將枝捆土袋拋入賊壕我兵用撓鉤搭住溝沿賊卡鉤開土袋板片一擁而進奮力勦賊未刻衝入賊營拋射火彈火箭賊營衣物火藥糧食盡行燒燬奪獲器械無算割賊首一百二十顆並認出蘇四十三首級一顆交部議敘七月阿蘭保隨海蘭察等帶兵由正面進攻賊於溝內竭力抗拒我兵奮勇前進拋擲火彈殲斃守卡賊將卡盡占餘賊竄回華林寺阿蘭保等督兵將寺旁板棚土屋

帳房盡燬奪獲軍器無數殺賊數百名生擒一名八月阿蘭保隨  
海蘭察等帶兵由華林寺前撲入賊窟匿牆壕內我兵放槍擲石  
勦拏淨盡生擒六十七名賊平阿蘭保回京四十九年升頭等侍  
衛五十年六月挑補 御前侍衛八月署正藍旗蒙古副都統五  
十一年授正黃旗蒙古副都統嘉慶元年管理善撲營二年三月  
因奉 命往召喀申和卓不到革退副都統作爲頭等侍衛仍在  
御前行走五月奉 旨阿蘭保前因遇差委靡將伊降用頭等侍  
衛但伊在御前行走年久施恩見有正紅旗蒙古副都統員缺仍  
將阿蘭保補授九月補授武備院卿四年正月授正黃旗護軍統  
領黏桿處大臣管理健銳營事務三月調正紅旗滿洲副都統十

一月署正黃旗滿洲副都統五年五月 皇上齋宿雍和宮阿蘭保曠班退出御前侍衛在乾清門行走罰俸一年并革署正黃旗滿洲副都統尋署正紅旗護軍統領六年四月奉 上諭阿蘭保內廷行走二十餘年一應差使尙屬勤慎加恩著補授鑲藍旗蒙古都統六月管理上駟院事務十月卒

右 國史館本傳



劉之仁

劉之仁貴州銅仁人由行伍拔補把總升千總乾隆三十九年正月補雲南永北營守備五月升貴州上江協左營都司以隨征金川打仗奮勇蒙 恩賞戴花翎四十一年二月升雲南昭通鎮左營遊擊十二月擢河南衛輝營參將四十六年授直隸山永協副將五十年擢雲南鶴麗鎮總兵五十一年調騰越鎮總兵六十年以病回籍嘉慶四年病痊引 見發往四川候補五年正月以川匪滋事分竄陝西巡撫台布以劉之仁屢經出兵洞悉行伍見隨川餉來陝札調至營幫同勦辦二月補四川川北鎮總兵隨調甘肅巴里坤總兵 上諭台布石泉等處竄匪酌派劉之仁等抽撥

防江兵丁前往協勦旋因川匪大股竄至黃龍鋪一帶台布派協  
領富盛阿等隨之仁帶兵由鄖西小路迎擊至臥龍岡賊分隊向  
通鄖西小路之東川滋擾官兵分兩股迎擊擒殺賊匪四五十名  
賊奔合追之羅家河之仁令將弁上山據險賊繞路奔竄台布復  
令之仁往鎮安抄截奉 諭多爾濟札布劉之仁帶兵打仗應將  
陝境各股竄匪卽在本省殲除淨盡不可僅驅除境外致到處狂  
奔裹脅多人儻賊匪經官兵痛勦後折回川境多爾濟札布係高  
廉鎮總兵劉之仁係巴里坤總兵均非陝省守土之官不可逗遛  
卽當帶兵前赴川省跟蹤進勦盡絕根株是月五家營賊匪由鎮  
安折竄安康之琉璃溝之仁與侍衛愛星阿防護商州鄖西一帶

復與總兵多爾濟札布由鎮安抵洵陽之河溝口聞賊聚三岔河老林之仁畱兵數百扼之多爾濟札布領兵馳擊力戰陣亡之仁前往策應與被圍官兵奮力夾攻賊向後山奔竄 上諭恆瑞台布馳赴鎮安督同劉之仁相機勦辦時楊開甲辛聰賊股竄過棧道隔入東溝台布恐與五家營股匪合夥派提督柯藩幫同之仁勦辦兼顧楚豫門戶三月總督長麟奏陝西五郎廳設立總兵一員 賜名甯陝鎮以之仁調補旋 諭額勒登保等曰五郎地界山南路徑叢雜形勢扼要必須強幹歷練之員在彼鎮守方足以資控馭劉之仁儻不能勝任卽著據實查明候朕簡調若竟能勝任卽覆奏不必更調四月伍金柱等匪向山陽一路東竄將軍恆

瑞同之仁帶兵前往阻其入豫之路聞賊由鎮安之南向東北竄  
卽回兵抄截抵殺虎嶺賊從界河竄至據竹凹山梁抵禦官兵分  
路攻擊占奪山梁恆瑞復派侍衛等由左右山溝繞進以防賊伏  
督之仁等三面仰攻賊向東南竄乘勝追殺擒獲甚多閏四月楊  
開甲辛聰賊股從米糧川竄往鄖西邊界衝撲嵩坪堽一天門隘  
卡恆瑞督兵趕抵賊又從上津東竄仍折回向西之仁等分路併  
擊追至麗於關前後擒斃一千一百餘名額勒登保奏總兵劉之  
仁到陝以來甚知奮勉而年過六旬若令獨領一路恐不能出眾  
而在營年久於操練新兵善後等事尙堪倚任似可無庸更調得  
旨俞允時張漢潮餘黨劉允恭等自洵陽西岔河竄大中溪王家



莊各處之仁等迎擊於王家莊賊竄大中溪口經楊遇春兜擒獲男婦一千數十名奏入 諭之仁等俱著交部議敘六月之仁在五郎防堵並招練新兵於石泉巡防七月以川匪遠遁回駐五郎兼司山內緝捕高二賊股竄至白沔峽茶鎮江岸於五郎壩等處搶渡之仁與石泉縣知縣李樞煥協同抵禦屢擊退之又因賊奔梅湖移師防堵九月伍逆餘黨由甯陝廳之火地嶺奔入銀杏壩等處之仁抽防江兵同參將普德迎擊賊奔柳溪江岸遊擊李有貴抵禦不及賊乘間搶過南岸 諭曰賊奪路過江劉之仁雖不能截任殲擒然不令其直前東竄越過漢江功過足以相抵尙可免其治罪此時仍在江岸防堵江水日涸儻南竄之賊復令北竄

過江則疎縱之罪甚大著額勒登保傳諭該鎮令實力嚴防不得稍有疏虞致干重戾嗣因高二等匪由安康竄至紫陽雙河塘及石泉之梅湖柳溪之仁與副都統額勒亨額兩路轟擊賊向西竄十一月賊至西鄉之蜡溪直超江岸搶渡提督慶成令之仁等傳江北各卡哨探嚴防六年二月額勒登保奏委副將富蘭前往石泉防守更替之仁前赴軍營面示營制汛界事宜並抽兵勇三千令之仁於南山一帶搜捕餘匪督催團寨諸務四月高見奇餘匪在郿縣盩厔一帶奔竄之仁等由小王澗虎豹河進剿率鄉勇乘夜入賊營擒殺各數十人賊匪竄至盩厔洋縣復由北星溝西竄之仁兩路扼截及抵寇家關適伍逆股匪三百餘人竄近之仁卽

由濫紫溝迎擊斃賊七十餘人五月官兵至沙坪追及徐添德樊人傑於高冠峪之仁與通判雒昂帶兵突出殺賊四五十名復以修築寨堡出力先後奏入俱得 旨議敘七月於貫子垣擒殺伍逆零匪三十餘人十月陸有仁奏甯陝鎮應設額兵一節 諭令之仁上緊招募勤加訓練旋額勒登保奏之仁積勞患病請以原品休致奉 諭該鎮久歷戎行著有勞績著准其解任回籍安心調養俟病痊之日再行來京候旨簡用尋卒於軍 諭加恩照軍營病故例賜卹

右 國史館本傳

三才圖會卷之四

四



和倫

和倫博都里氏正藍旗滿洲人乾隆二十三年由護軍拔補護軍校二十六年授陝西盧溝堡守備三十二年升甘肅陝口營都司三十四年升湖北襄陽右營遊擊四十年擢湖南澧州營參將四十六年三月甘肅回匪蘇四十三滋事派往軍營隨大學士阿桂進剿閏五月升衡州協副將四十九年回匪田五滋事六月賊竄蓮花城趨擾靜甯陝甘總督李侍堯派和倫帶兵馳赴蓮花城迎截賊踞石峯堡陝甘總督福康安參贊大臣海蘭察由隆德分路進剿令和倫帶領撒拉爾舊教回兵爲一路攻其右七月賊匪由高家灣奔逸阿桂福康安派同侍衛額勒登保馳往搜捕追至昌

家岔青風山箇家岔劉家店一帶先後殺傷多名尋調甘肅大通  
協副將五十年四月署巴里坤總兵以巴里坤屯所加種地畝渠  
水不敷澆灌並鎮屬各營兵少差多暨該處磨夫工價屯車修費  
等項經前任烏魯木齊都統海祿奏請裁汰後兵丁苦累情形臚  
列各款具稟福康安奏 聞 上命福康安前往會同新任都統  
奎林詳加確勘據實具奏五月福康安奎林會奏巴里坤有地短  
水差繁兵少實在情形前任都統常青加兵屯種之議實屬格礙  
難行和倫並無掩飾迴護取悅兵丁情弊嗣後請毋庸加兵屯種  
命軍機大臣會同兵部議行七月授巴里坤總兵六十年八月因  
失察哈密營都司楊英春等侵用官項奉 旨革職嘉慶六年十

一月故

右 國史館本傳

國史館本傳

卷三十七

三





綸布春

綸布春滿洲鑲白旗人羅佳氏由黑龍江學圍駐京乾隆三十六年授司轡隨參贊海蘭察征廓爾喀五十七年六月積功補藍翎侍衛八月以冒雨克熱索橋功 恩賞色默爾亨巴圖魯名號擢三等侍衛六十年二月從護軍統領德楞泰征黔楚逆苗三月抵貴州攻克土空賊寨 賞荷包一對四月克蘭草坪寨晉授二等侍衛遂進勦腊夷寨五月攻賊渠吳半生於蘇麻寨敗之復設伏敗賊於雷公山七月吳半生自雷公灘糾眾來犯擊走之獲賊歐老保等十七人八月攻據狗腦坡十月擒吳半生於高多寨奏入奉 旨優敘又自龍角峒進攻鴨保克大小城卡三十餘座 命

賞金絲火鑱大小荷包以示獎勵十一月克天星垂藤董羅各苗  
寨時大兵偏首逆吳隴登來援乃迎擊之擒之於臥盤寨得 旨  
嘉獎擢頭等侍衛先是天星寨各苗均降者吳八月被擒後其子  
廷福復脅之叛綸布春率兵破之並焚其旁寨卡十有三直抵得  
盤山十二月克高斗山燬其巢擒賊目廖老慕隴老四並獲賊匪  
四十餘名嘉慶元年正月進攻禽頭坡麻馬岡懸崖陡險攀援競  
上盡奪其寨卡殲賊甚多屢次邀 賜玉扳指大小荷包銀鏢銀  
錢有差其攻麻馬岡時奮勇獨前右中指受賊槍傷骨仍手殪賊  
事 聞加副都統銜 上復念軍前大臣等平賊勞苦綸布春帶  
兵出力 賞蟒袍一襲三月賊據高吉坨窺伺大軍綸布春率勁

兵擊敗之六月隨四川總督和琳突入賊巢連破廖貢坡馬鞍山  
諸險隘進徧乾州俱邀 獎賞九月以病暫畱辰州十一月大兵  
分四道攻平隴賊掘壕築石牆木柵爲固守計綸布春自獅子坡  
入囊土填壕盡焚其牆柵又攻克土官坡湖耳坳諸石卡十二月  
奪余錦坡斷賊後路而賊尙排槍設伏於貴魚坡以爲平隴後勁  
副都統明亮率大兵掘其前綸布春由閒道繞後夾擊破賊卡七  
奪溝四遂進徧賊於石隆斬馘無算賊目石柳鄧殲焉苗匪平二  
年四月隨都統額勒登保剿川楚邪匪擊賊於光頭山攻克其卡  
牆五月剿賊於芭葉山克五尖嶺進奪廖家壘又殲之於車家灣  
六月復破之於斜嶺蒙 恩賞玉扳指玉喜字牌大小荷包者再

賊渠林之華於芭葉山竄建始閏六月額勒登保率軍尾追令綸  
布春邀擊之大破賊土紅溪七月賊折回白魚寨復破之於鐵礦  
坡攻奪三鞍子山卡進擊賊於鑼鍋圈八月授鑲藍旗蒙古副都  
統九月覺賊於帽子山三年正月從額勒登保擊賊渠覃加耀於  
終保寨擒之並獲其黨張正潮等百餘人二月隨額勒登保入川  
勦賊三月擊賊渠高均德齊王氏於野竹坪敗之五月擊賊李全  
等於紫泥嶺等額勒登保奉命仍赴湖北協勦率步軍自漢江  
下襄陽綸布春繞騎出陝省平利遇賊張漢潮於南漳擊退之六  
月賊竄房竹追擊之於菩提河賊由竹谿復竄陝省七月邀擊之  
於孟石嶺先後殲賊數千賊竄入川時賊渠號二大帥藍號詹世



爵黃號張漢潮白號李槐合其三黨萬餘將窺陝省八月綸布春  
從明亮率騎兵出閒道扼賊於清池子山口馳擊之黃號賊驚遁  
比及隘口白號已半爲大兵所截不得出合藍號爲一大隊藍白  
二帥字大旗左右搖轉我兵見之益憤綸布春以騎隊截擊木石  
並發賊窘甚多觸崖石自斃李槐詹世爵皆殲焉九月從額勒登  
保擊賊高均德於吳家河口賊恃眾犯我軍綸布春率騎兵馳擊  
林中賊矛突出傷左肋仍七戰破之十月破賊於張公橋生獲漢  
潮子張正滢及劉朝佐等百二十餘人斃賊無算四年二月械諸  
賊送京師三月 上命借侍衛等十八員分解軍餉赴川楚以呈  
報侍衛伊立布烏紹患病失實降爲副都統銜頭等待衛七月從

成都將軍慶成邀擊張漢潮於黃牛鋪十月我兵會剿於張家坪  
殲漢潮 諭曰張漢潮一股竄至張家坪地方綸布春趕往剿擊  
殲斃賊匪搜出張漢潮屍身確係矛傷身死綸布春著加恩挑在  
乾清門侍衛上行走並交部議敘十一月大破賊於教場壩 諭  
曰此次張漢潮餘匪分爲二股其後股賊匪經綸布春奮力攻擊  
賊勢退敗追殺三十餘里斃賊百餘名所辦俱好時大軍分道躡  
擊工部尙書那彥成剿賊於大建溝綸布春亦於藥壩茨溝遇賊  
擊斬甚多奏入 諭曰那彥成等督率兵勇跟蹤追截俱有斬獲  
而綸布春遇賊奮剿殲斃一百餘名殺賊夥甚多自係實在情形  
不是從前軍營虛報惡習見在竄匿不過張漢潮餘黨並非首犯

統賊匪分屯八里灣牛蹠鎮聯營十餘里互相應援綸布春以潛師破八里灣而牛蹠鎮諸賊復列陣誘金山與大兵抗拒綸布春衝入賊隊賊叢直刺綸布春手射數人賊始退卻四月賊圍卡狼寨十一堡率步兵赴援蹠賊入石硤中前後邀擊賊自相蹂躪斬敵千三百有奇六月勦賊匪楊開甲於七盤溝與總兵穆克登布夾擊八月提督王文雄擊賊高二馬五等於西鄉鎮上命綸布春併力勦辦速行擒獲九月追擊馬五等於白溪十一月擊賊丹學勝於江北六年正月經略額勒登保以綸布春數月來竟不出力前令追勦丹學勝遲延被逸請褫職諭曰綸布春在軍營不日出力著革退乾清門侍衛副都統充爲馬甲畱營效力以示懲

倣二月隨總兵穆克登布擊賊伍懷志於鐵鎖橋率先隊兵三十人首衝賊隊殺賊二十餘賊據山拒敵綸布春卽超上山梁擊殺之殪賊三百有奇三月躡擊賊於紅水河徒步奮攻進據山梁擊殺甚多額勒登保具奏 諭曰綸布春甚知愧悔打仗奮勉著加思賞給藍翎侍衛六月偕總兵穆克登布躡賊偵知賊在一層巒恃險藏匿山勢壁立我兵自危磴猿升魚貫而入賊驚潰官兵奮呼圍勦賊渠伍懷志與其黨六七人皆窘蹙自投層崖下爲綸布春所獲 諭曰首逆伍懷志係襄陽老教起事有年輾轉奔逃到處裏脅實屬大惡已極自層崖躍下正值綸布春率領兵勇在彼截殺悉數生擒尤爲出力綸布春自獲咎後極知愧勵此次伍懷



志卽係伊帶兵丁擊獲著加恩超升二等侍衛賞給原有巴圖魯名號以示優獎十一月以疾回漢中調理旋卒 恩旨照頭等侍衛議卹如例

右 國史館本傳

成德

成德索倫額蘇里氏滿洲正黃旗人成都駐防乾隆十一年以領  
催隨勦瞻對賊番十三年隨征金川二十二年擢驍騎校三十年  
授防禦三十四年擢佐領三十六年派赴金川南路軍營隨副都  
統鐵保勦趙拉約咱等處三十七年擢協領兼正紅旗滿洲佐領  
三十九年正月攻斯第博堵身受槍傷九月攻木克什山右一礮  
首先撲進左膀被槍傷骨經定邊右副將軍明亮以奮勉出色保  
奏 賞戴花翎四十一年正月金川平 恩予議敘閏六月調鑲  
紅旗滿洲協領五十六年授荊州右翼副都統五十九年調左翼  
副都統六十年十一月奉 旨來京嘉慶元年正月與千叟宴二

月回任時湖北教匪滋事陷當陽湖廣總督畢沅派令馳赴荆門會豫省官兵進剿馳抵當陽偕河南南陽鎮總兵阿克東阿湖北糧道舒永阿等分兵圍攻賊於城上放礮抗拒我兵用礮轟擊晝夜不息成德等攻破東門迤南城牆丈餘官兵將入賊衝出逆僧心願爲礮擊斃北門復出賊數千牽制我兵仍竄入城內於缺口處壘石卡五月偵得賊糧漸乏官兵佯攻其缺設伏城西南北三面賊由北門遁出遇伏逃回成德等追斬多名七月官兵分八路圍攻成德率同佐領貴福等爲南面一路侍衛舒亮等攻破東門賊退保西北半城踞龜背山成德等由東南進攻西北用礮轟開牆垣拋擲火彈火毬焚其房屋殲斃無數經畢沅奏入 賞成德

玉扳指大小荷包時鍾祥賊匪滋擾 上命成德舒亮阿克東阿  
赴鍾祥協同署總兵觀祥勦捕八月賊經官兵勦潰我軍復分四  
路追勦成德等於附近山溝樹箐分投搜捕十月畢沅以襄陽樊  
城爲豫楚咽喉軍糧重地偕成德等嚴密防堵三年十月因傷復  
發奏請解任奉 旨准其解任回旗調養六年十一月卒于色欽  
色和禮均官驍騎校色瑚禮官協領

右 國史館本傳





蘇靈

蘇靈順天大興人原隸正黃旗滿洲乾隆二十二年以清查旗檔出旗隸今籍行伍於乾隆二十七年拔巡捕營中營外委累擢至遊擊三十九年授北營參將四十一年以父憂去職四十三年步軍統領帶領引 見奉 旨賞副將銜旋 命署圓明園副將以服閔實授四十六年調中軍參將四十九年遷甘肅涼州鎮總兵行至西安聞甘省逆回不法馳赴軍營勦賊奪其營卡殲斃數十人以功 賞戴花翎又率官兵掘溝壕斷賊水路力戰十六次中箭傷左肘復搜獲賊匪馬文喜等四十餘名賊平功列頭等五十二年調河州鎮總兵五十二年擢甘肅提督五十七年陝甘總督

勒保奏靈挑備赴藏馬匹疲瘦不堪用 諭曰勒保前與蘇靈來京陛見時卽奏其爲人喜事任性朕以言無實據未便遽將提督大員更換去年該督復以出口馬匹疲瘦奏參在蘇靈固有應得之咎而該督有意苛求亦難逃朕洞鑒旋部議降三級 諭曰蘇靈原係京營出身著以巡捕營參將補用卽著回京當差五十八年授圓明園副將五十九年授湖南永州鎮總兵六十年二月黔楚逆苗不法靈初至鎮卽率兵迎擊奪據得勝坡獅子口二處山梁 上嘉其奮勇交部議敘旋隨總督福甯提督劉君輔屢殺賊五月福甯檄守鎮筵防範甚嚴六月賊來窺城靈隨福甯堵禦出不意襲擊之俄賊集愈多直撲螺螄坡卡我兵槍箭並發賊冒

死而上爲我兵殲斃無數城東之觀景山地勢扼要賊率眾急攻我兵奮勇勦殺賊陣動靈率遊擊胡廷泰等從茶園坡夾擊斃三百餘滾崖死者甚眾餘悉潰竄靈又於石羊哨楊州坪轉戰八晝夜功皆最以 聞 諭曰鎮筸一帶兵力稍單賊匪肆行焚搶正深慮念今得此奏知鎮筸固守無虞福甯蘇靈合併一處與賊打仗多日晝夜不息亦甚出力蘇靈著交部議敘 賜勤勇巴圖魯名號屢 賞貂冠大小荷包等物嘉慶元年調赴隆圍堵禦連獲有名苗目石老必石八月逆犯吳滿兒等論功 賞賚有差靈撫禦苗疆招降石季三歐再禮等一百八十餘寨煙戶三千餘事平功列超等二年授廣西提督五年以川省邪匪滋事調兩粵兵進



勦擊徐添德股匪均極奮勇 諭曰此次廣東廣西官兵調赴楚  
省初次打仗卽能奮勇殺賊該督撫提督等平日尙知整飭操防  
而於檄調時亦能認真挑選甚爲妥協著交部議敘六年十一月  
卒於官長子景貴官肅州吏目次子良貴 恩廕生主事兵部武  
選司行走

右 國史館本傳

潘韜于汝渭

潘韜廣東吳川人乾隆三十年由行伍拔補龍門協營外委洊升右營千總四十一年補雷州右營水師守備四十三年授龍門協中軍都司四十七年擢左翼鎮標中軍外洋水師遊擊五十年升閩浙督標水師營參將五十一年四月臺灣逆匪林爽文滋事圍諸羅總督常青檄韜帶兵赴勦韜因陸路賊多渡海路而前常青奏入 諭曰該參將由海道繞至諸羅尙無不是與其輕率前進致有挫失自不若繞道行走雖到彼稍遲而添兵協勦更爲得力也五十二年二月隨總兵柴大紀勦北路收復諸羅彰化等處四月林爽文復圍諸羅時南路賊匪聚於龍山腳等處韜領弁兵從

赤蘭埔至龍山腳三路合剿斃賊甚眾七月賊擾諸羅東西北三門韜與遊擊李隆從番社後夾攻又追擊之於牛稠溪先後殺賊無算賊復從山仔頂犯南門韜偕各義民協剿復與總兵魏大斌遊擊李隆擊賊於東西二門皆有功又於城西之三苞竹番仔溝等處擊敗之五十三年四月遷澎湖協副將七月巡撫徐嗣曾奏換班兵丁康飛俸等毀屋滋事副將潘韜督同將弁拏獲並查出起意拆屋之王攀龍糾眾搶犯之王添生等十二人鞫訊得實分別正法韜雖到任未久亦難辭咎請交部議處 諭曰澎湖爲臺灣扼要重地當此甫加懲創之後該犯等復敢糾眾擾民逞兇搶犯實爲藐法已極該副將於聞信後速行前往拏獲並卽據實稟

報尙無迴護且該兵丁等俱係新行派澳非其素所管轄亦尙可  
原潘韜著從寬免其交部議處五十五年丁父憂回籍續丁母憂  
五十九年服闋引見奉旨潘韜著往福建以水師副將用嘉  
慶元年諭曰廣東水師人員出有澄海香山春江副將三缺見  
在兵部並無熟諳水師候補之員因思閩粵境壤相接著魁倫於  
該省水師人員內通融酌量分撥數人飭令就近赴粵差遣委用  
旋經閩浙總督魁倫以潘韜撥往二年補廣東香山協副將五年  
升南澳鎮總兵六年卒子汝渭由行伍入武學畱伍補外委嘉慶  
三年中式武舉九年投效水師營十年四月在長山尾洋面擊賊  
獲賊船及礮械旗幟等件五月又擊賊於高瀾洋迭有擒獲拔補



香山協左營外委把總八月調右營外委把總十二年九月擒盜  
首梁亞瑞於仰船洲十月署右營右哨千總十三年在瀾洲洋面  
獲盜船四擒賊八十餘名十四年調署左營右哨千總時粵洋羣  
寇中路東路均經剿撫惟西路烏石二東海霸等尙在高廉雷瓊  
等府洋面游駛十五年四月總督百齡調派師船分三隊前進副  
將洪鼇率汝涓等爲一隊抵高州境偵知烏石二等屯聚碣洲頭  
外洋汝涓等督兵進剿左右轟擊前後兜捕沈盜船十餘隻溺斃  
不計其數獲船十六擒盜首張亞安等百三十餘名五月追至儋  
州新英外洋擊沈及燒燬盜船十餘獲船十七隻烏石二就擒汝  
涓躍入賊舟獲盜首烏石三袁亞石等東海霸率黨投誠盡繳大

小船隻及男婦四千餘名口起獲軍械礮位無算奏入 上嘉汝  
渭在事出力 命以應升之缺卽行升用十七年補提標右營外  
海守備十九年升香山協右營都司二十三年引 見擢碣石鎮  
標中軍水師遊擊二十四年遷閩浙督標水師營參將二十五年  
丁母憂道光二年服闋四年八月遷浙江瑞安協副將旋調福建  
水師協副將總督孫爾準奏汝渭練達勤能熟諳水師堪勝專閩  
之任六年正月 命送部引見尋因臺郡嘉義彰化二縣閩粵民  
人分黨械鬪焚莊劫掠五月提督許松年馳赴勦辦飭汝渭兼程  
隨往所到匪徒星散仍令暫駐嘉義嚴密防範事平十一月擢廣  
東南澳鎮總兵九年以足疾乞歸 諭令回籍調理旋卒

右 國史館本傳

常懷義

常懷義四川崇甯人乾隆十九年武進士二十八年補湖廣提標中營守備三十八年隨征金川三十九年攻達爾圖山梁首先撲礮殺賊擢湖南永順協都司又攻本克什受槍石傷四十年攻克爾替石真噶沙爾尼琅谷等處皆克之將軍明亮以軍營出力人員奏 聞授湖廣提標右營遊擊旋攻克達撒谷 賞戴藍翎四十七年湖廣總督舒常以出師著績預保赴部引 見得 旨賞換花翎旋補永州鎮標中營遊擊五十二年擢桂陽營參將五十五年升辰州協副將五十七年丁母憂回籍六十年服闋補江甯城守營副將嘉慶四年調督標中軍副將五月擢直隸秦甯鎮總



兵尋調天津鎮總兵奏營伍首重召募兵丁名糧缺出該管千總多因親戚謀食糧缺濫舉呈驗上司將就充補又兵丁年老衰弱者減去年歲更換名字開報入伍輾轉更換仍係衰老之人此實營中積弊夫營伍之廢弛係乎召募之餘丁營伍之起色係乎將備千把之振作查督撫提鎮巡閱時如該營廢弛往往糾察將備而置千總把總於不問殊未平允以後凡行伍廢弛千總參革把總係操兵之官亦應斥革如此立定章程則各千把自顧功名兵丁亦不敢濫充入伍又操演宜專責成將備爲督標之官而操營弁兵之法必須派定千把分隊經管如馬隊弓箭應專派千總驗管其步隊弓箭槍礮藤牌應分派四司把總驗管本營將備按期

督操隨時考察督撫提鎮巡閱時兵丁技藝純熟卽將千把總紀功遇缺拔補如技藝生疏卽將千把總責處咨革至操演之期務於清晨齊集教場隨到隨演先操先散俾兵丁散操後仍可各作生計於訓練之中兼施體卹之意該兵丁等未有不激發天良而成勁旅者矣至營中屬員逢迎餽送實爲弊竇應請嚴禁以除積習奏入得 旨允行十一月 諭曰本年秋閒詣 陵途次曾有人奏及天津鎮中軍遊擊傅日明在任聲名平常朕當經面詢天津鎮總兵常懷義據奏甫經到任未能深悉俟查明再奏乃總未據該鎮覆奏常懷義於奉諭查詢後並不將傅日明有無劣款隨時覆奏遽以傷發移咨護督勒休實屬疏率著交部議處尋部議

國朝通志卷一百九十一

三

同治六年授江南提督以疾卒於天津鎮任

右 國史館本傳

蒼保

蒼保鑲白旗漢軍人由武生於乾隆二十九年授鑿儀衛整儀尉三十年遷治儀正三十二年授廣東肇慶城守營都司三十三年調督標中營都司四十年升江南池州營遊擊四十二年遷江南提標中營參將四十四年遷廣西平樂協副將五十年擢廣西右江鎮總兵五十二年煙瘴俸滿經兩廣總督孫士毅奏請畱辦邊防旋調廣東潮州鎮總兵五十五年調雷瓊鎮總兵六十年擢浙江提督嘉慶元年恭遇 覃恩以子幼廕其姪嵩芑二年粵盜竄入浙江蒼保督率將弁沿海查拏復通閱營伍訓練水操戎紀嚴明地方賴以甯謐四年安南夷匪復由閩竄入浙境蒼保奉 命



勤捕五年正月以艇匪船高礮大官兵船身低小追捕不能得力  
奏請另造大船添設礮位 從之嗣以會同黃巖鎮總兵岳璽先  
後擒獲土盜一百七十名 敕部議敘十二月温州鎮胡振聲所  
轄之北鹿外洋有盜船游奕值 冊封琉球使臣過境適盜遇於  
中流胡振聲未能先期偵緝蒼保亦疏於督率部議降調 上免  
之是年 賞內外文武大臣千叟宴詩二百部蒼保與焉六年二  
月温州之披山及定海之馬磧山六橫山等處時有盜船出沒蒼  
保督飭温州鎮胡振聲及定海鎮所委之遊擊許松年張世熊等  
併力追捕生擒李水楊烏林新俊等四十餘名沈溺盜船一隻奪  
獲礮械藥彈無算積盜章小狗至是亦悔罪投誠奏入報 聞尋

又言浙江水師巡洋定例以總兵爲統轄總巡副將參將遊擊都司守備輪班出洋爲兼轄分巡千總爲專汛外委爲協防提標右營遊擊守備爲委巡按季分駕戰船派出巡洋此歷來辦理之章程因邇年洋面不靖奏明定海黃巖溫州三鎮共配兵船一百隻派將弁等分守管駕令三鎮總兵統領分爲三幫南至福建北至江南探蹤緝捕雖有總兵統領究須將領大員管帶追捕方能得力通水師副參遊都守共止三十員又因三鎮總兵長年在洋必得酌畱各該標中軍遊擊一員在營管理彈壓見又派委守備二員赴閩成造米艇此外祇有將備二十五員並有委署之員在內若必責令將備親身出巡通省計須分巡委巡將備十五員而所

餘之將備十員以之管帶一百隻兵船南北往來分剿盜匪實不敷用如先儘管兵船之用不得不派員代巡查温州鎮左營及玉環營止有參遊守備而無都司其代巡之員均因將領帶兵出洋派署理守備事之千總代巡並非越級派委今若令鎮將各守一隅專巡本管洋汛一經閩粵大幫盜匪竄入浙洋行蹤無定三鎮兵船一時不能會合攻擊於捕盜不能得力殊有關係且例禁代巡者原恐其偷安怠惰憚於涉洋茲浙省水師自總兵終年在洋或北或南不分畛域惟視盜蹤之所在相機會剿且海洋所恃在三鎮舟師之合力不在一隅將弁之專巡亦不可廢而權衡之輕重不得不暫爲通融請嗣後各鎮將應巡洋汛其未派兵船緝匪

之員均令親身出洋不許委員代替其帶領兵船出洋緝匪者准其委員代替俟浙省洋面甯靜緝捕事竣再照定例親身巡查如有借端規避濫委代替者卽據實嚴參重治其罪奏入 諭曰見在粵浙洋面盜匪竄越無定正當緝捕緊要之時三鎮舟師必須合力會勦若僅守專巡本汛洋面轉不得力該提督所奏自係實在情形著照所請所有浙省鎮將除未派兵緝捕之員均令親身出洋不許委員代替外其已經帶領兵船在洋緝匪者准其暫行委員代巡俟洋面甯靜緝捕事竣三鎮各回本營後仍照定例親身巡查毋得藉端諉卸是月復奏言浙省洋面失事處分凡專協兼轄分巡及總轄總巡各官俱就該管洋面失事方與開參獨提



國朝通志卷之二十一 三十一  
標右營之委巡將備無論何洋失事卽一律開參提標惟右營係屬水師額設一遊一守輪流出巡一年之中半年在外已屬責無旁貸而令箭一經到手處分業集其身無論身之至與未至皆不免於咎譴較之管轄一營一汛之專協各官已不免勞逸迥殊亦且處分獨多似不足以昭平允請嗣後凡遇派出巡洋令將何日巡至何營何汛何處隨時報明如所巡之洋一遇失事卽將該將備查參奏入 諭部議行十一月調福建水師提督七年二月  
陸見來京以病請開缺旋卒子監生嶽芑

右 國史館本傳

國朝耆獻類徵初編卷二百九十八目錄

將帥三十八

宗室弘豐

宗室額勒亨額

馬玉魁

宗室書敬

七十五

子武隆阿

國霖

艾如文

黃標

台費蔭

扎郎阿

明安

亮祿

陳大用

倭星額

國朝耆獻類徵初編卷二百九十八目錄

漢書卷之八十一

一

國朝耆獻類徵初編卷二百九十八

通奉大夫前署江西巡撫江西布政使司布政使湘陰李桓輯  
將帥三十八

宗室弘豐

宗室弘豐正藍旗人多羅貝勒允祐之子乾隆三十六年授頭等  
輔國將軍五十五年授散秩大臣嘉慶四年三月授正紅旗蒙古  
副都統旋擢正黃旗滿洲護軍統領九月授荊州將軍五年正月  
奏言荊州府駐防滿兵向有馬乾三分以一分養馬所餘二分添  
補度日每歲馬乾按月大小各以六月爲率大月馬乾每分銀一  
兩零五分三之得三兩一錢五分小月每分銀六錢三分三之得



一兩八錢九分前自荊州被水元氣未復又經妖氛驚擾凋敝之餘物價沸騰一分馬乾不足以養馬不得不以添補度日之資添補餵馬兼以兵丁自得甲之日例將成造器械併立馬之費二十八兩給還故兵之家馬乾已失其半又該兵立馬及馬倒又立不得不動借公項按月扣還而馬乾益無幾矣此養馬累兵之實在情形也查荊州向稱用武之地然居大江大湖之間官道之外盡屬水田難於馳騁宜水師與馬步兼用而馬可從少荆滿營除差操外別無多須於馬況自雲南金川以及湖廣用兵之際十兵中馬無二三閒有因山路陡險以馬爲累棄而不用者是餵養於無事之日棄之於當用不得用之時轉不若減馬添兵之爲得也謹

擬於滿兵四千名各抽馬乾一分歲可得銀四萬三百兩有奇於  
四千匹馬酌裁其半留二千匹已足敷差操之用每馬月支口分  
銀一兩八錢馬二千匹歲支口分銀三萬一千二百兩尙餘銀九  
千一百兩有奇又每歲出青之月以一千匹留營備用其半出青  
計六月之久可節省銀七千八百兩台之前項共銀一萬六千九  
百兩有奇臣查見在駐防兵丁生齒日繁多至二萬七千餘口擬  
於閒散餘丁中挑選技藝可觀者依養育兵例月給銀一兩五錢  
每歲費銀一萬零八十兩可得兵五百六十名遇有甲缺卽於此  
內挑補再於幼丁中年在十五以下者挑取四百名令其入學讀  
書演習技藝每人月給銀一兩歲支銀四千八百兩尙餘銀二千

兩有奇以爲立馬及買補之費至於採買馬匹向自荊州至張家口地隔四千里馬至千百匹來往糜費甚多且沿途牧養無地枵腹數十日多有倒斃及至荊州潮熱過甚北馬善操而畏熱食性亦不相宜土馬於陡險處便捷北馬雖大而便捷遜之是適用又不宜也應請以就近採買爲便又查荊州舊有馬廠八處遠近不等請畱其一以其切近府城南之窖金洲於牧養尤近所交七處聽地方官給民耕種以上數條雖有裁馬之名究皆有名無實之馬實與未嘗裁馬等而兵丁得免賠累之苦馬額亦不致再有缺少矣尋部議以教匪未靖請須馬力俟大功告竣再行酌減是時川省教匪竄入竹山竹谿擾至荊州屬之孫家灣草店一帶有

旨命弘豐帶兵馳赴襄陽爲峇巡撫倭什布聲援旋奉 諭曰弘豐年近六旬在宗室中行輩較尊前在散秩大臣上行走卽知其乘騎未能便捷不必親冒矢石惟當督飭官兵奮力截勦勿令滋擾閭閻二月奏言臣於本月十一日馳至襄陽詢悉賊匪潛奔房縣山內地險路雜臣帶兵一千名究屬單薄未便深入見派協領富魁赴襄陽迤西之茨溝據保康縣稟報賊匪於初九日竄至該縣之高家鋪臣恐其南竄遠安勢又逼近荆門就見在所帶官兵內分撥五百名派協領巴克坦布帶赴荆門遏其東南一路 上以弘豐年老未經行陣所帶兵力又未免分而見單 諭仍回荆州鎮守所帶滿兵交宜昌鎮總兵明亮管領七年四月調杭州將



皇朝通志卷之八十一

軍九月卒子永錦閒散宗室孫縣鸞襲頭等奉國將軍

右 國史館本傳

宗室額勒亨額

宗室額勒亨額正白旗人乾隆三十四年由十五善射授三等侍衛洊升護軍參領四十五年升莊浪城守尉四十六年蘭州逆回蘇四十三陷河州三月額勒亨額帶涼州兵偕總兵德甯擊賊於黃河南岸賊退據山梁屢敗之斬獲甚夥得 旨優敘 賞戴花翎並大小荷包六月攻賊於華林寺盡奪賊卡首逆蘇四十三就殲四十九年五月進勦逆回田五等敗之於田家山旋攻破石峰堡賊平與有功五十一年調鳳凰城城守尉五十五年因親老回京授頭等侍衛嘉慶三年補開原城守尉十月擢盛京副都統四年八月 命帶盛京兵協勦湖北邪匪九月抵南陽時楚匪李淑

張漢潮等竄擾陝境河南巡撫吳熊光奏令取道鎮平入陝  
論曰此次盛京官兵在途行走遵奉約束甚屬安靜朕已密經訪聞  
皆由額勒亨額督率得宜深爲可嘉今額勒亨額行抵南陽面見  
吳熊光商定將官兵二千分爲四起額勒亨額先帶頭起由南陽  
赴陝豫交界之荆子關一面飛飭各兵陸續前進所辦俱妥十一  
月川匪竄近漢江參贊大臣那彥成以江岸地勢平衍馬隊得力  
奏令帶盛京兵一千徑赴紫陽會合總兵柯藩堵剿十二月太平  
股匪龍紹周唐大信由西鄉竄入紫陽柯藩截擊之賊走望虎山  
適額勒亨額兵至殲戮無算西鄉賊分爲兩股一竄繞溪河一竄  
裴家溝連次搶渡漢江額勒亨額與柯藩擊退之五年正月高家

營戴家營各賊分股偷渡石泉江岸二月 諭陝西巡撫台布酌量情形或派額勒亨額柯藩等抽撥防丁協勦石泉等處竄匪尋台布以川匪苟文明鮮大川及龍唐各股在漢江以南奔竄無定所有平利紫陽安康等縣向來責成額勒亨額等堵禦且額勒亨額馬隊檄令入山亦恐未能施展未便調動奏 聞三月 上以額勒亨額柯藩等近日總未見打仗而額勒亨額尤不出力切責之仍 諭經略大臣額勒登保查明防守各員如並非必不可離之地卽調赴經略大營派令勦賊尋以楚匪樊人傑王朝貴等竄近陝省平利縣台布令額勒亨額帶同侍衛將弁於紫陽之任河上下往來截殺不令搶渡八月龍唐二逆復分股擾紫陽額勒亨



額率兵由魯家坊渡河與署崇陽令張占帶領鄉勇擊敗之九月  
敗楚匪舟學勝張世龍於康家壩獲賊探張老么郝二劉芳王學  
勝等斬之追至螞蟻垵葉家壩等處生擒賊目王學存等十六名  
賊竄宦姑灘江岸官兵由瓦房店邀擊之皆有斬獲經額勒登保  
奏聞得旨嘉獎十月額勒登保遣總兵楊遇春由西鄉進擊  
會合額勒亨額於瓦房店緊躡舟張各匪楊遇春敗賊於銀硃壩  
賊由芭蕉口竄出額勒亨額帶兵追擊獲賊黨鄭得平等又偵知  
襄陽股匪曾芝秀由繞溪河欲竄鐵佛寺額勒亨額迎擊之追殺  
三十餘里斬獲百餘人先是龍唐二逆屢犯川陝邊界甘省勦敗  
之楚匪高均德餘黨高二馬五等匪亦由沔縣奔入西鄉復竄入

紫陽之朱溪河額勒亨額帶兵分截賊南竄十二月賊自紫陽權河來窺江岸擊退之六年二月調三姓副都統時賊復由紫陽南奔小道河竄安康所屬五塊石躡淺過江經額勒登保奏參請將額勒亨額拔去花翎畱紫陽防堵以觀後效 上以額勒亨額係專派紫陽防江之員拔去花翎不足示懲 敕部嚴議尋議褫職諭曰額勒亨額未能豫爲防範部議革職固屬咎有應得但念賊匪偷渡時若額勒亨額係在該處專司防守之員卽革職尙不足以示懲今旣查明賊匪偷渡處所距額勒亨額駐劄地方尙有八九十里與專防安康汛地者有閒著加恩改爲革職畱任八年無過方准開復五月因病回京調理九月赴三姓副都統任七年卒

國史館本傳

子綽勒明阿十五善射次子綽勒洪阿見在

東陵郎中

右 國史館本傳

馬玉魁

馬玉魁山東東阿人乾隆三十六年武進士以營守備用揀選兩江督標隨營學習四十四年補狼山鎮標左營守備四十七年升漕標佃湖營都司五十年升督標京口左營遊擊五十四年閏五月調蘇松鎮標奇兵營外海水師遊擊七月遷江南提標川沙營參將五十五年升廣東澄海協副將六十年擢江南蘇松鎮總兵嘉慶元年丁母憂三年服闋四年授廣東右翼鎮總兵五年七月川陝楚邪匪滋擾上以陝西西南守禦單弱命玉魁以粵兵一千五百名赴陝之沔縣協勦尋以漢中鄉勇暨官兵足資防守命玉魁卽赴慶溥溫承惠一路協勦八月偕副都統綸布春專辦



西鄉賊匪時高一馬五等逆於西鄉之板橋灣僞充官兵圖渡漢江經義勇擊退賊夜走石泉縣之縉溪柳溪玉魁偵知卽偕總兵官劉之仁分赴西灘列陣以待賊不敢近九月玉魁紮營於黃河驛會總兵楊遇春追楊開甲黨於螞蟻溝玉魁率兵合剿斃賊三百餘生擒八十餘乘勝追擊四十餘里復有殲擒十月王廷紹與學勝等股屯安康縣之銀硃壩徐添德一股屯鐵鑪壩玉魁楊遇春合兵斷鐵鑪壩之路悉精銳趨銀硃壩轉戰數十里大敗賊眾殲獲無算十一月經略額勒登保以徐添德等逆被勦狂奔遣玉魁偕總兵喜明陝西布政使溫承惠等駐兵大貴坪杜其東竄入楚之路已而龍紹周苟文明各股果東逃玉魁等邀截多所殲擒

惟徐添德夜由閒道逸出額勒登保疏請免議 許之六年正月  
龍紹周苟文明分擾溢河等處玉魁偕副都統慶溥等敗賊於熊  
家埡又敗賊於平利之徐家壩曾家壩二月龍逆等復圍東竄參  
贊大臣德楞泰檄玉魁偕喜明慶溥仍於大貴坪等處迎截奏入  
諭曰德楞泰務將龍逆股匪迅速殄平卽或一時未能剿盡亦祇  
應倡令入川斷不可越入楚境德楞泰曾飭慶溥喜明馬玉魁等  
扼住隘口堵截竄楚之路儻稍有疎虞致龍逆竄楚則德楞泰及  
慶溥等均當一併治罪賊尋竄至平利之香河八道河玉魁偕慶  
溥分左右進剿賊敗退七月以剿平邪匪大功將次告竣額勒登  
保奏令帶兵回粵十二月回任七年卒子彪二品廕生官直隸廣

國朝書目類錄卷一百六十八

平府同知

右 國史館本傳

宗室書敬

宗室書敬鑲紅旗人乾隆三十一年三月由宗人府效力筆帖式補七品筆帖式三十五年七月擢宗人府經歷三十九年正月擢宗人府副理事官四十二年授宗室佐領四十九年擢江西道監察御史五十六年擢禮科給事中五十八年遷戶科掌印給事中五十九年擢鴻臚寺少卿六十年遷光祿寺少卿嘉慶元年擢內閣學士兼禮部侍郎銜二年授鑲黃旗漢軍副都統三年正月擢盛京兵部侍郎八月調禮部右侍郎授正藍旗滿洲副都統四年正月調兵部右侍郎五月授鑲白旗滿洲副都統七月署鑲黃旗蒙古副都統五年正月奉 上諭上年演放礮位曾派書敬等前



往監驗乃伊等僅照向例於礮車上演放以致火藥鉛丸未能遠及百步因以礮位鏽澀不能適用奏請將神機神樞等礮交兵部查辦而兵部率行議請改鑄經派成德等將礮位安放在地試演羣子遠及百步之外俱能中牌復將單丸裝藥點放亦能及遠是書敬等實因拘泥不能如法遽請查辦殊屬冒昧著交部察議三月調吏部右侍郎七月擢左都御史授鑲紅旗漢軍都統八月擢廣州將軍七年九月奏言總督吉慶由惠州寄到文書因勦辦匪徒調取員弁當派曾經出師之協領全甯佐領官德防禦陳廷佐馬世甯等四員跟隨兵十八名起程奉 旨書敬等藉詞防守省城殊屬不成事體著申飭仍著明白回奏十月奏東莞縣有博羅

匪徒逃至土瓜墟等處調營官四員前往剿辦又奏永安縣餘匪肆掠卽帶兵前往剿捕 諭曰書敬奏帶兵由惠州前赴軍營緣由一日限五百里馳奏復屬錯謬以無關緊要之件煩勞驛遞著嚴加申飭若吉慶業將餘匪蕩平則書敬卽將兵帶回儻逃匪仍未蕩除書敬已年邁而所帶駐防兵丁未經行陣亦係無用卽著帶兵回任十二月奉 旨書敬年老忠病不勝廣州將軍之任著來京另賞差使八年正月卒於任所長子博慶額原任盛京工部侍郎次子博棟額見任右翼宗學副總管

右 國史館本傳

臣等之職其能平治  
一 名ニ臣ナリ

十

七十五 子武隆阿

七十五滿洲正黃旗人瓜勒佳氏由護軍於乾隆三十六年出師雲南旋隨征金川奮力勦賊 賞戴藍翎三十九年擢火器營鳥槍護軍校四十年將軍阿桂率兵攻克甲爾納各碉寨七十五先登受槍石傷奏蒙 恩卹洊擢至護軍參領四十三年揀發貴州補大定協副將四十七年保舉堪勝總兵引 見 賞戴花翎四十九年擢湖北宜昌鎮總兵五十年 恩旨命其父九格赴宜昌任就養五十二年丁父憂以失察中軍遊擊陳望海那移公項鑄職回旗五十三年 恩授健銳營前鋒參領五十七年大兵征廓爾喀隨兩廣總督福康安等冒雨涉險攻克熱索橋等處碉卡



賞哈齊巴圖魯名號復自雍雅隨勦奮勇得 旨嘉獎擢健銳營翼長嘉慶元年隨勦湖北鄂匪屢戰有功二年四月賊竄陝西山陽縣之周家河七十五偕巴圖魯等進攻殲賊七百餘生擒九十人十月授西安右翼副都統尋管領健銳營兵十一月賊首王三槐等竄四川境擾達州七十五率兵千餘由蚊蟲溪倍道勦至崖峰尖十二月朔遇賊奮擊斃二三百人傷右臂次日賊復來力戰白辰及酉斬獲甚眾三年四月授四川提督在巴州等處擊賊屢獲勝仗七月於廣木山奪卡三擊賊於險隘急戰被創 上以七十五任提督大員親督兵殺賊受傷優加 獎賚仍 命醫治速痊九月勦賊冷添祿於木瓜坪夜撲其卡槍中右股鉛丸深入

赴夔州調治四年四月傷愈六月率兵於寶塔蓮花池等處堵賊  
不得竄入楚境得 旨優獎九月剿賊樊人傑於雲陽斃百餘人  
復擒賊首龔建 上嘉之尋以勦川東竄賊不力十二月 上諭  
經略額勒登保曰七十五係提督大員本有奏事之責既未將剿  
賊情形具奏又日久並不呈報經略殊屬延玩著查明如有輕視  
經略不受調度及藉端逗遛之事嚴參治罪又 諭曰據欽差廣  
興奏提臣七十五見在駐守夔城七十五在彼所辦何事著額勒  
登保查明如係在彼逗遛即將伊革職鎖拏交魁倫嚴審定擬具  
奏五年正月額勒登保奏七十五在鹿子坪山梁擊賊遇賊矛穿  
裏衣被傷右股亦受創又奏奉 旨飭查七十五在川東相距甚

遠文報未能如期尙非有意延玩報 聞二月賊首鮮大川在川  
楚界上之螞蟻坪滋擾七十五傷發不能乘騎進剿時總督魁倫  
檄其移師重慶 諭曰七十五既有足疾所帶兵亦無多令仍在  
原處堵禦不必調赴川西三月奏所傷處創潰駐兵順慶調治  
諭曰七十五係四川提督見當軍務喫緊之際不思奮勇勦捕徒  
藉養傷爲名安坐不動七十五著解任交松筠嚴行審訊四月奏  
赴重慶 諭曰七十五自奏稱於三月初八日自順慶起程前抵  
重慶帶兵守禦係未奉解任諭旨松筠見因患病著准其來京陛  
見此時七十五已抵重慶與勒保相距不遠卽著交勒保提到軍  
營確切查驗如七十五傷發潰爛屬實則其在大甯駐紮多日尙

非無故逗遛卽令來京候 旨免其治罪勒保尋奏七十五傷發  
屬實 諷曰勒保查明七十五帶兵打仗尙能認真所稱傷發驗  
明屬實卽照所奏仍以提督銜准畱軍營養傷如傷痕平復聽候  
勒保派委何路帶兵卽前往何路剿賊自效見在不准給予分例  
五月傷愈勒賊於摩天嶺鐵鑪寨等處多所斬獲七月率兵至新  
甯偵知馬驛溝有賊夜發卒伏溝下賊至擊斃五百餘復授四川  
提督八月進剿樊人傑賊千餘狂竄奮力擊之戮五百餘生擒二  
百餘搜獲器械馬匹甚夥得 旨嘉獎十二月參贊德楞泰奏奉  
諭帶兵赴陝楚剿辦南岸賊匪令七十五於廣元三家壩由西北  
前進以期兩面夾擊七十五覆稱恐以兵深入偏賊入陝難當其



旨嚴飭六年正月率其子頭等侍衛武隆阿督兵由廣元  
赴南江剿賊張士龍戮之 諭曰七十五等在三台山後河嶺及  
鐵溪河等處剿斃賊八百餘名獲馬騾器械無數並將張士龍臨  
陣殲斃生擒掌櫃趙建功僞總兵李大雄等事機極爲順利著交  
部議敘二月賊竄太平七十五督兵於華尖山等處斃賊六百餘  
生擒賊目邱添富僞總兵周一洪餘匪三百餘 上嘉其奮勇  
命部臣敘功三月在竹園坪殺賊六百餘名生擒僞總兵旗首賊  
首多人卽由太平追剿得 旨嘉獎五月復由一碗泉追藍號賊  
至陝西平利縣之大渝河大獲勝仗 諭曰七十五殲擒賊匪所  
辦可嘉著交部議敘仍 予優賞六月賊首湯思蛟劉朝選竄楚

境七十五截之於羊耳河殲賊無算賊東走東湖保康又擊敗之  
殪賊首王鎮賢 上命敘其功八月賊竄回川七十五敗之於馬  
家亭又敗之於桑樹坪尋由通城進勦賊首苟文明分出之眾生  
擒僞總兵苟文懷餘匪千餘由西溪河竄遂取道徐家壩扼截得  
旨嘉獎九月苟文懷餘匪至大甯山復與苟文明辛總并湯劉諸  
賊合 上令七十五速勦之十月官兵擒賊首龍紹周 上以七  
十五帶兵勦賊出力 賞烏雲豹馬褂十一月初九日額勒登保  
奏七十五數日未報賊情苟逆等竄入通江亦未見七十五追勦  
諭曰七十五如有逗遛情事卽據實奏參二十三日 諭曰七十  
五專勤日久總未見趕上賊匪獲一勝仗早經朕看出令據實查

奏苟逆本止一千餘人近又裹聚二千餘人此卽七十五縱容之  
罪著卽解任交額勒登保德楞泰將七十五沿途如何逗遛延緩  
之處訊明奏參治罪二十五日復因苟文明等賊由川之廣元偷  
渡江竄入甘境奉 旨革職拏問十二月德楞泰奏參七十五在  
縣城耽延致賊西竄 諭曰額勒登保德楞泰著卽遵旨將七十  
五革職拏問秉公嚴審德楞泰不得因已將七十五奏參又欲心  
存開脫尋額勒登保德楞泰覆奏七十五在太平疏通道路支發  
餉項且令兵丁置辦衣履暫駐六日尙非無故逗遛七十五前後  
出師數次會帶傷十五處眾兵勇聞其拏問多痛哭者請仍畱軍  
營效力 諭曰七十五本應正法姑念其尙非出於有心延玩伊

從前出師又曾受傷十五處擊問時兵勇痛哭可見其平日尙得  
兵心著加恩免其正法作爲兵丁效力贖罪令其認真殺賊如果  
奮勉立功據實具奏七年七月以舊傷復發 賞護軍校回京調  
治八年正月病卒奉 旨七十五著加恩賞給副都統銜並賜卹  
著交部照例辦理子武隆阿見任福建臺灣鎮總兵

右 國史館本傳

武隆阿

武隆阿父七十五由監生補健銳營前鋒嘉慶元年出師湖北勦  
擒賊目劉起隴二年正月補藍翎長八月補副前鋒校隨父七十  
五勦賊於四川達州累戰有功三年七月補前鋒校進攻仙人峒



受石傷擒首逆王三槐九月升副前鋒參領攻川東之三台寨擒賊首李四貴殲其黨五年八月追剿股匪樊人傑於三溪溝殲賊目羅成賊潰九月敗賊於豐城寨斬級四百擒賊目郝長壽等十一月以功擢頭等侍衛十二月賊匪辛聰田陝竄廣元與李炳合武隆阿扼之於銀磨壩六年正月隨父七十五破賊於三台山又敗之於鐵溪河殄其渠俘馘甚眾捷聞下部議敘二月追擊樊逆由竹峪關趨通江遇賊獅子嶺敗之上嘉其奮勇復下部議敘三月賊目陳潮觀魏棒棒等犯九龍三台兩寨武隆阿偕都司羅思舉進討克之得旨以應升之缺升用五月攻賊於雙龍硎克卡三嶺二百餘人賊走茅壩設伏破之六月追賊至茅家河殲

擒無算湖廣總督吳熊光上其功 賞阿勒精阿巴圖魯名號七  
月首逆湯思蛟劉朝選糾黃白二號賊匪分路滋擾官軍亦分道  
擊之賊竄花柳園尋潰走追敗之於温水溝疊有斬獲經四川總  
督勒保奏入 賞副都統銜時有股匪走奉節武隆阿奉檄追剿  
衝其中堅遂克之九月追躡於温湯井乘勝進擊賊潰十月追白  
號股匪苟文明至凌洞埡山梁冒石仰攻屢有殲擒十一月敗賊  
於琵琶寺十二月擊賊於青岡渡賊敗走屯踞木耳巖武隆阿帥  
精銳攻克之殲賊千七年二月由火峯界嶺進兵遏零匪東折楚  
境之路賊西竄追敗之於上高坪三月截堵於巫山邊界賊走雲  
陽追擊之遇白號股匪於大昌殲其眾四月青白號股匪自楚入

川竄白果寺官軍三路掩襲武隆阿兵當其衝賊趨峪口追斬三百級燼其渠捷 聞下部議敘五月圍賊於隻保山燬其巢復由茅山嶺閒道掩擊賊大敗七月黃白號餘黨走蕭家渡武隆阿督兵連破之八月授鑲藍旗漢軍副都統迎剿賊渠蒲添寶遇於千里埡冒雨鏖戰賊遁進取滾子坪蒲逆窮蹙官軍分三路抄擊武隆阿帥前隊入老林窮追敗賊於百仞溝斬級百五十賊亂分竄南江河瓦屋溝我師攻之益急蒲逆懸崖樹死賊黨殲戮無遺股匪廓清奏入 上以武隆阿奮勇可嘉 命在乾清門行走仍下部議敘九月督兵防巫山邊界十月搜剿梁萬零匪敗賊於雙鳳山斬級三百掩殺至大溝壩賊逸復擊之於烏林埡等處十一月

賊走太平謀入陝武隆阿乘夜襲破之賊竄洪口移寨通江以躡其後八年二月丁父憂回旗五月補公中佐領兼管健銳營事署鑲黃旗滿洲副都統尋署貴州古州鎮總兵九年調署廣東潮州鎮總兵十年正月諭曰廣東洋匪較多由於營伍廢弛綏靖海疆先以得人爲要卽如武隆阿素稱帶兵勇往是以調赴粵東然必需所帶兵丁同心戮力方可埽蕩賊氛著飭武隆阿嚴密查察設法整頓五月服闋實授十一月獲盜首李崇玉下部議敘尋按治崇玉得招撫誘降狀初崇玉依閩盜朱瀆橫行海澨兩廣總督那彥成行閒謀誘以四品服並守備劄始歸命事覺削那彥成職謫戍伊犁武隆阿坐不能力阻命解總兵職畱巴圖魯名號降



二 等侍衛發往臺灣軍營差委十一年三月委辦營務翼長事先  
是洋盜蔡牽擾臺灣提督李長庚擊卻之盜艘往來剽掠爲海上  
患四月福州將軍賽冲阿奏請防堵洋匪得 旨武隆阿係獲咎  
之員經朕特恩發往臺灣自當渡臺效力卽派令搜捕餘匪畱心  
察看七月禦蔡牽於鹿耳門沈其船十一獲其船十執賊目林略  
傅琛斬級百十月 賞頭等侍衛署福建汀州鎮總兵 諭閩浙  
總督阿林保畱心察看如果奮勉稱職一二年後再行奏請實授  
十二年十月調署臺灣鎮總兵獲朱濱夥賊朱和等十一人十一  
月實授臺灣鎮總兵十三年六月阿林保奏朱濱匪船竄臺分飭  
內地各舟師會剿時署總兵周國泰以舟師追朱濱 上命責成

武隆阿周國泰二人合力殲擒九月劾臺灣府知府鄒翰畏避銷  
張不務實政奪職逮問十月遊擊王贊擊朱瀆兵船陷於賊武隆  
阿坐防禦不力降二級畱任十四年正月獲蔡牽之黨陳聰明張  
水二人又獲會匪張逆等四十四人均寘之法十一月以漳泉民  
人械鬪辦理不善陳奏遲延下部嚴議尋議奪職 上加恩改爲  
革職畱任仍傳 旨勛勉十五年四月誅洋匪李樞等五人十月  
劾都司熊瓊違玩捕務請褫職 上寔之十七年獲匪犯高瑪達  
等十九年獲匪徒章霞等均按治如律二十一年奏澎湖偶被偏  
災請緩其賦如所請行二十三年以病乞假 特允其請俾就醫  
省城二十四年病痊入 覲仍回本任二十五年二月丁母憂回

旗十一月 賞副都統銜授喀什噶爾參贊大臣道光元年四月  
補正白旗漢軍副都統八月奏回城伯克例不筵宴擬發回諭阻  
其進京並酌賞緞匹物件 上是之又奏喀什噶爾私越開齋之  
案請照伊犁辦理十月奏喀什噶爾英吉沙爾兩城請增侍衛二  
員以資差委又奏沖巴噶什布魯特潛回本地者請寬其禁頗提  
格訥布魯特卡外游牧請聽其便皆 允行十一月條奏八旗生  
計請將各省綠營馬兵分半作爲旗缺令駐防子弟挑補 上以  
紊言亂政下部嚴議尋議革職得 旨著加恩降二等侍衛仍留  
參贊大臣任帶革職閒任處分八年無過方准開復二年九月調  
西甯辦事大臣十一月以審擬阿布都爾滿私鑄錢文案科罪錯

誤嚴飭之三年五月 召還京九月 賞副都統銜署鑲白旗漢  
軍副都統十月遷內閣學士兼禮部侍郎銜十二月授直隸提督  
四年正月因在參贊任內給二等待衛阿布都爾滿私換地畝執  
照鑄秩畱任四月請裁梅花車礮仍用九進連環陣式五年四月  
請挑派各協備戰兵丁仍照舊額一萬二千名均如所請行八月  
授江西巡撫旋調山東巡撫奏山東款收請緩買補截畱漕糧以  
裕民食 允之十月疏陳海運章程一戰船巡洋不必拘三月九  
月之限一鷹遊門爲海防要地應梭織巡查一寄淀收泊島嶼應  
增兵駐守一沿海漁船出入應編號取結一沿海礮臺墩臺應設  
卡駐兵如所請行六年七月臺灣匪徒張丙等滋事 命武隆阿



往討尋以西陲不靖逆裔張格爾入卡滋擾授欽差大臣馳赴回  
疆參贊軍務八月奏調山東擡礮二十兵二百又請調川兵三千  
均從之 諭曰見在逆回猖獗武隆阿到彼卽遵奉歷次諭旨  
與長齡楊遇春隨時詳慎籌辦務殲首逆迅奏膚功勿任竄逸方  
爲不負委任十一月 上念邊外沍寒 賜貂皮馬褂獾皮戰裘  
十二月武隆阿馳抵大營七年二月自阿克蘇進兵張逆糾眾五  
萬在洋阿爾巴特迎拒我兵分爲三武隆阿帥右軍扼其前路賊  
敗走追至排子巴特殲萬餘人俘三千二百人奏入得 旨嘉獎  
下部優敘 賞翎管荷囊尋克沙布都爾莊乘勝追至渾水河賊  
數千來援武隆阿督兵追擊斬級千是役也擒斬不下五萬人斃

賊目色提巴爾第等捷 聞復荷 褒賞下部優敘師次阿瓦巴  
特賊設伏挑戰大兵分兩翼進討賊佯退擊以連環槍礮復令勁  
卒虎衣虎帽直前躍舞賊馬驚陣亂援賊從林箐中出我兵縱擊  
殪賊萬餘誅賊目阿瓦子邁瑪底那爾巴特阿渾獲馬匹器械無  
算敘功 賞太子少保銜尋進攻渾河沿賊於南岸憑河列陣掘  
溝築岡復於空穴中列礮以抗我師勢張甚迨日暮西南風陡作  
官兵乘風潛渡上游以襲其後賊潰斬級六萬俘賊四千進復喀  
什噶爾城張逆已先期竄上 聞 諭曰上年逆裔張格爾滋事  
朕特命長齡楊遇春武隆阿馳往回疆督辦萬里之外調兵轉餉  
閱時既久始克會勦朕以天戈所指各城無難克期收復惟張逆

係元惡大愆必應殲擒以彰天討而靖邊圉特降諭旨令同心合力奇正分途總須布置周妥無任竄逸不啻至再至三據奏大兵克復喀什噶爾張逆已先期竄逸辦理不善自應加以懲創長齡著革去紫韉楊遇春著撤去太子太保銜武隆阿著撤去太子少保銜三月武隆阿由英吉沙爾進兵葉爾羌中途疾作奏請暫回喀什噶爾俟疾愈卽馳赴軍營 諭曰武隆阿病愈後不必前赴葉爾羌卽在喀什噶爾幫同長齡籌辦一切事宜查探張格爾蹤跡務期必獲迅速蔽功四月病痊馳赴圖舒克什卡倫尋以臂疾折回七月以偵探逆酋蹤跡迄無定所降 旨詰責旋 賞副都統銜克喀什噶爾參贊大臣仍 諭隨同長齡辦理善後事宜並

嚴緝張格爾以觀後效尋借長齡奏請將逆裔阿布都哈里管西  
四城回務並給職銜 上以長齡所奏紕繆武隆阿隨聲附和嚴  
飭之八月偵聞張格爾竄匿達爾瓦所督師擊之殲賊三百而官  
兵亦有傷損侍衛色克精阿等歿於陣奏入 諭曰該將軍等探  
知張逆藏匿地方派兵追捕自應倍加慎重乃虛延時日老師糜  
餉竟令零星殘匪傷我官兵縱斬獲多名已屬不值長齡等調度  
失宜辦理不善咎無可辭俱著交部議處尋議褫職 命從寬畱  
任九月因病陳請開缺 允之 諭令在喀什噶爾安心調理十  
一月密陳善後情形略言畱兵少則不敷戰守畱兵多則難籌經  
費請畱兵一萬二千分駐各城並以按年換防需費繁多請許駐



防移眷糧餉加增籌撥不易請令屯兵開墾疏入會直隸總督那彥成授爲欽差大臣馳赴西陲 諭曰武隆阿所奏不爲無見著那彥成抵喀什噶爾後會同熟籌妥議具奏尋那彥成覆奏回疆甫定非安設重兵勢難鎮撫請抽派陝甘兵六千五百分防各城仍循五年舊例分三班更換如所請行十二月武隆阿病痊署喀什噶爾參贊大臣八年正月張逆就擒 上念武隆阿嘗督兵進剿克復四城免積次吏議仍授喀什噶爾參贊大臣二月 上以回疆用兵將士勞績卓著 命武隆阿等繪戰圖以進四月奏革各省陋規勒石永禁 上是之五月偕那彥成請移建葉爾羌城於罕那里克六月請增省回疆武職官制又請於喀喇哈依外之

七里河築堡設兵並別建英吉沙爾城又奏定保送伯克章程均如所議行張格爾既誅其妻孥匿浩罕方傳檄索之浩罕詐投賀書以伺隙那彥成偕武隆阿陳兵衛其出入不與犒賞絕其貿易並諭以逆屬在外無足重輕宣示 恩威破其居奇之計 上以深得大體嘉之八月繪像紫光閣 御製贊曰少從父征閱歷亦久溫宿進兵先驅恐後未獲賊酋蓋非時否數月疾瘳仍畱鎮守九月偕那彥成奏請西四城安設官鋪並借項採副茶以濟兵食又奏揀補印房章京章程又奏撤防兵歸伍籌議校閱章程又請優獎忠盡後裔及軍營出力之伯克回子等給與翎頂十月請改建軍臺道路增給換防滿洲兵馬芻牧添設綠營差馬又請設喀

什噶爾等三城銀庫均從之十一月補正紅旗滿洲副都統十  
二月奏招致歸順之額提格訥布魯特落安置依劣克達坂地  
上以受降易撫降難諭以安撫機宜九年正月命還京時那  
彥成劾奏凱撤陝甘新兵緣應領鹽糧各項悉照防兵例支發持  
械譁謀武隆阿拘泥成例幾至釀成事端疏入上命武隆阿明  
白回奏尋奏言此次凱撤新兵實仍照征兵例支發惟將部駁駝  
價銀每兵裁減三分何至激變祇以愚兵無知聞設立官鋪調劑  
兵丁遂因望賞誼譁非有他釁上諭那彥成曰武隆阿如此措  
置是否能資鎮撫該兵弁回人不致心存藐視儻兵將不能相安  
恐致別生事端朕心實深塵念著該督體察實在情形密速回奏

那彥成奏言武隆阿久歷戎行屢咸知其奮勇惟多疑少斷未洽人心新兵誼譁因其專意節省拘泥辦理所致恐不勝參贊大臣之任七月抵京 召對詞多掩飾 特命廷臣詢問奉 旨武隆阿居心含混不知愧懼於陝甘凱撤征兵一事又復辦理不善著降爲頭等侍衛在大門上行走伊子慶安逐出乾清門在大門上行走十月授和闐辦事大臣十年 召還京十一年卒子慶安太常寺六品官慶寅廣東督標中軍副將慶容江南道監察御史慶寬戶部堂主事

右 國史館本傳



臣等謹將各省...

臣等

國霖

國霖富察氏鑲白旗滿洲人父文綬官至四川總督自有傳國霖於乾隆三十三年由筆帖式授藍翎侍衛三十七年擢鑾儀衛治儀正三十九年遷雲麾使四十一年升冠軍使四十四年授頭等侍衛兼總理冠軍使四十七年四月因其兄山東巡撫國泰貪縱營私經御史錢澧劾奏 上命尚書和珅左都御史劉墉帶同錢澧馳赴山東查辦國霖適於是時遣家人赴伊兄任所 諭將國霖革職拏問交軍機大臣會同刑部嚴訊五月訊無寄信情弊 諭曰國泰之犯罪原無關於國霖之寄信與否著加恩賞給國霖三等待衛在大門上行走贖罪四十八年升二等待衛五十三年

擢一等侍衛五十五年授山東沂州協副將五十七年因該管地方有搶劫傷差案部議降一級調用五十八年三月命在三等侍衛上行走洊擢頭等侍衛嘉慶四年正月授鑾儀衛總理冠軍使十一月授正白旗蒙古副都統時大兵征勦卯匪命國霖管解軍需銀兩前赴川陝軍營三年正月奏陝省各路官兵所需鹽糧等項均應由省供支請將解到餉銀內撥留二十萬兩存省備用從之二月奉命留陝省作爲領隊三月駐兵山陽截勦旋赴商雒一帶扼要防堵四月奏有西來賊匪竄至商州軍嶺地方臣與侍衛愛星阿率同將領奮力擊斃三十餘名賊向北路翻山奔逸見探明所竄之路相機抄截諭曰商雒一帶面面皆山國

霖與愛星阿督率兵勇扼住要隘毋令賊匪乘閒竄出闕入豫省河南巡撫吳熊光奏陝省賊匪竄入商州國霖等未能攔住旋竄至保安衛一帶距雒南縣三十里雒南與豫省盧氏接壤並無兵追勦因霖亦以附近賊匪多至數萬人奏 諭曰國霖奏前右商州軍嶺地方將賊匪截回本日吳熊光奏稱賊匪竄往商州國霖等不能攔住或係國霖前奏不實或又係一股賊匪竄至國霖未行截回著額勒登保查明具奏又 諭經略額勒登保曰國霖前在商州未能攔住楊開甲等股賊匪任其竄入雒南並奏稱附近賊匪多至數萬國霖素未經歷戎行其人本不足恃但亦應查明國霖在商州時如果兵力有餘並未與賊打仗輒稱賊匪數萬



張皇入奏則既畏蕙不前又復捏詞諉卸自應嚴加懲治額勒登保卽當一面奏參一面將國霖革職鎖拏解京治罪如國霖實因賊多兵少與賊接仗不能攔阻尙非有心捏飾亦應據實奏參見在額勒登保處帶兵得力之人自屬不乏如國霖之庸懦無能畱彼無益卽飭令回京候旨額勒登保尋奏國霖年雖五十餘歲而體氣軟弱實不能耐久辛苦當楊開甲等股賊匪奔竄之時國霖帶兵祇有千餘名趕赴軍嶺一帶期於截擊迨其到時該匪業經前竄斬獲係零星落後之賊國霖仍復在後迫臣額勒登保帶兵到商州時國霖猶在畱仙坪一帶堵截尙無畏蕙情事其所稱賊匪數萬詢係僅據探報未能查察之故亦非敢於捏飾希圖諉卸

但帶兵打仗須強幹之員國霖究非所長若在京當差辦理尋常旗務尙堪稱職 上以國霖於帶兵打仗既不能得力 諭令回京十月授右翼總兵六年二月兼鑲黃旗漢軍副都統先是步軍統領衙門左右翼尉扎勒罕布岐山奉 旨兼管副都統事務經步軍統領布彥達賚告知扎勒罕布岐山遇有呈報事件不必書名並於考驗時亦令同坐至是 上命明安管理步軍統領事務明安偕左翼總兵恭阿拉及國霖奏向例各處大小衙門呈報事件未有不書名者步軍統領及左右翼總兵有統轄之責遇有八旗結報事件俱係該翼尉等書名畫押具結以專責成今不書名並於揀選旗員時同坐考驗與從前舊案不符 諭交軍機大臣

會同兵部議奏尋議副都統兼攝翼尉呈報步軍統領衙門事件  
應照舊例書名畫押遇有揀選事件左右翼總兵仍與步軍統領  
連銜具奏 諭曰向來滿洲大臣同列中往往欲自占身分各懷  
意見前此布彥達賚任提督時因有翼尉副都統之旨布彥達賚  
告知扎勒罕布岐山遇有呈報事件不必書名並於考驗時亦令  
同坐彼時布彥達賚並未詳查舊例出自己見謙抑下人深合同  
寅協恭之意惟時恭阿拉國霖見步軍統領如此亦卽隨同謙抑  
並未訊據舊例阻止及明安接任步軍統領後恭阿拉國霖扎勒  
罕布三人俱欲各爭分位殊屬卑鄙均着傳旨申飭國霖又偕明  
安恭阿拉奏參 恩賞八旗領催步甲摺雪銀兩有兵數不足翼

尉協尉等扣鈔給與外郎跟役情弊 命將扎勒罕布革職鞭責  
發落岐山革職賞給黏竿處拜唐阿並查出明安私用步甲四名  
國霖私用步甲十三名俱分得銀兩 諭明安交部察議國霖交  
部議處並傳旨申飭部議罰俸 上以國霖係右翼總兵私用步  
甲較之步軍統領多至兩倍尤屬非是著罰俸一年三箇月不准  
抵銷十一月朝陽門外放米開城時車馬行人爭先擁擠俱至海  
墁之上傾跌踐蹋致斃男女十一命 諭曰步軍統領衙門京城  
內外一切稽查事宜是其專責此次朝陽門口於扇鑰時竟有多  
人擁擠致斃多命之事該提督等並未即時親往彈壓直至三更  
始據該營將備稟報前來查看殊有不合俟此案查審得實再候



諭旨國霖尋偕明安恭阿拉奏稱城外海墘以上並非營員專管  
僅以營員具報遲延奏參並自請交部議處 上以所奏顯係有  
心推諉著嚴加議處部議降三級調用得 旨從寬畱任七年正  
月奉 旨國霖以右翼總兵兼副都統不能照料步軍事務著不  
必兼管副都統尋因失察戶部員外郎袁錫等在家鬪鶉番役訛  
索銀兩一案奉 旨交部嚴加議處部議降三級調用 上改爲  
革職畱任六月調左翼總兵八年二月因病 賞假調理三月卒  
子華英三等待衛兼公中佐領華封直隸試用理事同知

右 國史館本傳

艾如文

艾如文貴州平遠州人乾隆三十六年由馬兵隨往金川攻二交  
阿仰格藏等處功補外委旋擢把總三十九年隨征小金川升銅  
仁協右營千總四十年升行營守備閏十月攻克扎烏山梁礪卡  
賞戴花翎四十五年升陝西邠州營都司五十一年遷直隸提標  
左營遊擊五十九年升山西太原城守營參將六十年升蒲州協  
副將嘉慶元年擢陝西興漢鎮總兵二年正月赴四川達州軍營  
隨同總督宜縣等勦辦賊匪偕副將富明阿等由丹家壩一路會  
攻張家觀等賊卡如文率眾先登諸路官兵繼之擒獲蕭良久等  
三百餘名賊退踞金峩寺清溪場兩處如文劄營白瓦溝與總兵

朱射斗等分路進攻朱射斗行抵漏月巖賊匪豫伏二千餘人突出相持適如文自白瓦溝馳到兩面夾攻殲斃多名 恩賞象牙香囊大小荷包三月偕朱射斗攻雞爪嶺克之焚其卡棚四月因先後攻克清溪塘場金峩寺要卡 恩賞雕身火鏹板指大小荷包尋因楚省匪徒竄至鄖西地方如文偕陝西提督柯藩帶兵赴商州雒南一帶勦堵自興安赴洵陽白河敗賊於胡坪地卽偕柯藩於漢江南岸巡防五月因賊匪由紫陽縣屬之白馬石地方搶船過江經都統惠齡入奏如文與柯藩均得 旨嚴行申飭革去花翎六月賊匪竄入簡池鋪如文趕上迤北山梁剗住賊匪分路搶撲官兵放槍迎擊賊始退回經柯藩奏入 諭曰前因柯藩艾

如文先在洵陽堵剿不能實力防範以致賊匪偷渡過江是以將  
伊二人俱革去花翎今看此情形艾如文尙能帶兵邀殺賊匪勝  
柯藩遠甚功罪兩不相掩艾如文著仍賞戴花翎並加賞玉扳指  
大小荷包續據陝西巡撫秦承恩奏艾如文在小龍溝剿賊情形  
得 諭曰昨已降旨嚴飭柯藩並將艾如文花翎賞還今閱秦承  
恩所奏情形該提鎮功過顯然賞罰纖毫不爽閏六月如文躡賊  
至西鄉賊復竄入開縣等處卽隨惠齡等分路馳擊南天峒火燄  
壩白巖峒各屯聚賊匪均有斬獲旋帶兵駐守開縣復馳赴雲安  
場地方堵遏賊匪奔竄夔巫之路三年於開縣東鄉萬縣一帶往  
來防堵六月四川總督勒保奏林亮功一股賊匪自開州坪竄至



葛藤山之後復從東南一帶奔逃艾如文等併力衝擊斃賊六百餘名但賊匪所竄之地正在艾如文等一面營卡未能全數殲擒究屬有誤奉 旨拔去花翎令其圖功自贖八月如文隨同勒保圍剿冷天祿一股賊匪於祖師觀地方賊分股衝突經官兵截殺如文等從旁邀擊斃賊三四百名卽從銅鼓包進兵克之抵黎兒壩擒斬甚多眾遂潰散五年五月因前攻祖師觀賊巢時石中右手腕骨節折損至是傷重經勒保奏 聞奉 旨興漢鎮總兵艾如文因打仗受傷已成廢疾著加恩賞還花翎以原品休致在家食俸八年十一月卒

右 國史館本傳

黃標

黃標廣東潮州人由行伍拔補千總乾隆四十六年擢香山協左營守備五十五年署本協右營都司二月總督福康安委標帶兵赴龍門洋面緝捕獲洋盜吳盛昌等五十八年補碣石鎮標右營都司五十九年署廣海寨遊擊六十年在沙底黑水雞頭外洋等處均捕盜有功嘉慶元年十一月於南澎外洋首先射斃匪船舵手復督率弁兵擒獲洋盜李超勝等三十八名 上以其緝捕奮勉嘉之旋擢海門營參將二年緝獲洋盜胡三勝鄭亞六王亞大陳阿勝等多名又擊斃夷洋盜首並全獲夥盜得 旨從優議敘三年三月升廣東澄海協副將六月升廣東左翼鎮總兵 諭曰

黃標自由參將題升副將爲時無幾資格甚淺因該員在粵三十餘年出洋捕盜著有勞績是以特加恩升擢此係破格殊施傳諭該鎮到任後務須倍加感奮認真緝捕洋面一律肅清方爲不負獎擢儻始勤終怠此後仍有洋匪滋事惟該總兵是問四年圍搜大放雞山及雙魚梳夾門外洋均有殲獲五年 諭曰黃標在洋面帶領兵船不避風濤認真緝捕頗屬出力著賞戴花翎三月兩廣總督吉慶奏夷洋盜船竄入廣東北額港內劫去鹽船二十隻洋面疏防各員請交部議處 諭曰黃標係總統之員本難辭咎但念該鎮平日在洋捕盜尙屬認真著加恩免其議處六年於果洲南澎外洋拏獲田亞猛黃廣文等並匪船礮械七年帶兵赴廣

東博羅等處地方勦捕會匪偕提督孫全謀攻破羊屎坑羅溪營等處賊巢共擒斬三千餘人奏入 諭曰黃標身先士卒殺賊立功該鎮係武臣於失察地方會匪處分較之文職本輕今又能奮勉打仗迅擣賊巢殊屬可嘉著交部從優議敘並賞玉扳指及荷包等件會匪平仍回洋面偵巡八年九月 諭曰總兵黃標等督率兵船在洋捕盜數月之久未獲一賊緝捕不力著交部議處尋議革職畱任十一月卒

右 國史館本傳

公名標字殿豪南澳人隸籍香山幼孤負薪奉母弱冠充南澳步兵以次拔至香山縣守備時尚未知名也乾隆五十五年擒獲洋



匪吳昌盛等又勦滅狗頭山賊授都司始爲總督福公所知數年擢至左翼鎮總兵官前後手縛賊六七百人沈盜艘無算公身長八尺面赤赭能開十二石弓左右射又善占雲氣測風雨著測天賦及海疆理道圖凡東南水道淺深險易之處如指諸掌嘗曰水戰與陸戰不同全在驗風旬識水性司命寄諸舵可以轉逆爲順故每戰必親操舵援桴以鼓發礮縱火如弄丸一舟先眾舟尾之浪高如山隨風上下賊望見旗幟卽遠遁故所向有功嘉慶五年奉旨賞戴花翎 命繪象以進異數也七年九月博羅會匪陳爛展四盤踞羅浮山制府檄公會勦賊聞風奔竄一晝夜直搗巢穴事聞賜白玉拳指鑲嵌帶頭大小荷包各一對晉封武顯將軍八年

公偵知海賊大隊出掠與提督孫全謀率舟師勦捕賊遁廣州灣  
灣險不可進公曰守其隘口不半月賊必乏食可盡殲也孫以相  
持日久有風濤患議分兵守實如公功而欲養寇公力爭不得拊  
髀歎曰此機一失海氛無已時矣賊悉公勢孤冒險突圍出公知  
眾寡不敵引師退憤懣成疾卒年六十二病中猶大呼縱船縱船  
云公自結髮從戎出海未嘗失利率擒賊殲其首惡不妄殺一人  
所獲贓物以其二分士卒其一儲修船費降者量才委用俾自效  
擢顯職成良將者殆不止一二數云子四人次子琮見官干總  
吳應達曰粵中雖婦人孺子無不知有黃總鎮者海氛不靖垂二  
十年徵公則海濱居民糜爛久矣惜哉使廣州灣之策行奚事後

來招撫之紛紛也公乘馬張蓋觀者塞途一顯官也及登舟則衣短後衣大布裹頭與士卒飲食同臥起故人樂爲用雖古之名將何以加茲丙寅廣州試院不戒於火諸童排牆走公之子爲眾所擠股折矣於時香山應試者數百人爲禱於城隍神願乞黃總鎮子無恙醫者曰此殆非藥物有靈也蓋公之功德在人心如此

右傳吳應遠撰

福文襄王督粵時簡練水師募奇材異能之士優爲賞擢有守備黃標者由水師步卒以善泅水著其能於海洋中出沒月餘視波中之魚鼈歷歷可數王奇其才立擢參將後洊至左翼鎮總兵官捕獲海盜尤多偉績云

右錄宗室昭榘撰

國朝宗室昭榘撰

三





台費蔭

台費蔭伊爾根覺羅氏滿洲正黃旗人祖喀爾吉善官閩浙總督  
父定長官湖廣總督均自有傳乾隆三十年台費蔭由閒散挑拜  
唐阿三十二年承襲世管佐領三十七年授印務章京四十年擢  
副參領四十五年擢參領五十四年授山海關副都統五十五年  
奏言流犯田自相自陝西配所逃歸至是十八年之久在籍窩藏  
不法匪徒肆行攘竊見在率領兵役將自相等首從捕獲懲辦得  
旨嘉獎五十六年調錦州副都統嘉慶二年八月調鑲藍旗滿洲  
副都統十月授管理火器營大臣三年正月授正紅旗護軍統領  
五月署理鑲紅旗蒙古都統尋擢兵部右侍郎四年正月調吏部

右侍郎兼管太僕寺事務尋調戶部右侍郎五月 諭曰台費蔭  
前在錦州副都統任內於莊頭許五德送給和珅地畝一事聽情  
迎合朦混咨部因令明白回奏未據奏出實情本日交軍機大臣  
會同刑部傳訊不肯盡情吐露罪無可追著革職嚴審六月復  
諭曰台費蔭自稱係阿桂保舉並非和珅所汲引冀掩其阿附之  
迹其實台費蔭素藉和珅奧援倖登卿貳朕所深知朕辦理和珅  
一案不欲株連凡有附勢之人悉予以自新之路台費蔭若早將  
此事原委陳明不過交吏部嚴議予以革職而止詎有心捏飾不  
吐實情昨日傳旨質訊猶復始終抵賴其居心巧詐實不可問台  
費蔭昨已革職著加恩寬免治罪令其自備資斧前往伊犁贖罪

旋奉 旨賞藍翎侍衛作爲塔爾巴哈臺領隊大臣九月 賞三等侍衛授西甯辦事大臣十二月奏言見據貴德循化兩廳先後拏獲搶劫蒙古牲畜之番賊策楞他勒沙加乞古等九犯已押赴邊界傳集番眾公同看視處斬以昭炯戒其餘擬遣各犯俱交驛充當茗差一面帶領官兵二千名前赴貴德邊界遣人嚴諭番賊令其悔過投誠既不敢姑息養奸亦不敢少涉張皇致開邊衅奏入 上是之五年 諭曰此次貴德番眾見大兵壓境卽畏懼投誠台費蔭等諭令出具甘結並退出搶去牲畜交還蒙古屬下人戶所辦皆是此時台費蔭等移兵前赴循化查辦該廳野番亦應照此辦理尋奏言循化野番恃險插帳較貴德番族更爲強悍若



不懾以兵威固屬不知畏懼又須加以招撫方能感戴輸誠臣等  
進兵宗喀寺駐紮正當演放槍礮揚威震懾其宗喀寺喇嘛嗎呢  
哇卽來營訴稱番眾畏懼大兵不敢前來願往宣諭嗣後卽有來  
營乞命願交贖畜之賀爾迭闡多瓦瓜什濟等族惟查曼受加咱  
索諾赫沙卜浪等族道路較遠尙有恃險負固觀望之意因移師  
於見已投誠之境紮定營盤示以必欲剷除之勢索諾赫等族亦  
卽聞風畏懼投誠交贖其宣諭各族之喇嘛嗎呢哇優給獎賞至  
繳出所搶蒙古人戶牲畜札知蒙古扎薩克王公台吉等派委妥  
人認領奏入 上優獎之尋授頭等侍衛仍畱西甯辦事大臣六  
年授內閣學士兼署理藩院侍郎尋授鑲藍旗蒙古副都統七年

正月署正藍旗漢軍副都統調鑲黃旗漢軍副都統復調鑲白旗  
滿洲副都統八月授圍場副都統八年卒子三人長和欽見任遊  
擊次文魁見任雲麾使次國欽見任三等待衛

右 國史館本傳

TABLE OF CONTENTS

iii

168-876

扎郎阿

扎郎阿伊爾根覺羅氏滿洲正黃旗人由健銳營前鋒藍翎長補  
護軍校乾隆四十年授荊州佐領尋轉京城副護軍參領四十七  
年揀發貴州投長寨營參將五十二年雲貴總督富綱奏帶兵二  
千名赴臺灣協勦林爽文五十四年擢貴州清江協副將五十九  
年升雲南開化鎮總兵嘉慶二年貴州狎苗滋事偪近雲南雲貴  
總督勒保赴平彝羅平等處防堵尋以師宗彌勒五疇等州縣均  
有苗匪出沒令扎郎阿仍回開化就近防撫四月敗賊於西恥五  
咩獲火藥馬匹刀矛甚夥復敗賊於豆温鄉率守備李耀光等連  
蹙賊目各苗寨多悔罪投誠繳納軍械五月苗匪撲羊街營扎郎



阿分兵伏擊斃賊首仙達仙姑等十餘人賊夥多名又令沙夷百戶田有才擒獻廣西逆苗王布台及賊黨劉抱黨郎抱轉余光山等讞實悉誅之廓清七月復由羅平州之板橋清水河進兵與總兵德英額兩路夾擊沿途攻破賊卡八月據魯布革山梁痛勦捧鮮賊苗搜獲偽光仙將軍多名圍立解 諭曰捧鮮被賊匪圍困日久經勒保派令德英額扎郎阿督率將弁分路進攻將苗匪痛加殲戮乘勝追擊賊匪紛紛潰散圍城已解所辦深爲可嘉著賞戴花翎時首逆王囊仙方踞洞瀝九月官兵五路進攻扎郎阿率參將孫大猷等爲一路同時並進殲斃王囊仙又進攻首逆王抱羊於巴林賊踞照壁山河濱拆橋抗拒勒保督扎郎阿等躡渡淺

水直撲山梁焚寨二十餘殺賊無數抵巴林以火攻悉燬賊卡生擒王抱羊餘孽遂平捷 聞得 旨嘉獎前後疊蒙 恩賞玉喜字牌玉喜字搬指大小荷包三年二月廣西西隆州苗匪賀成猿會受仙達偽封被官兵擊敗竄開化境糾合僮人旺老念旺老么田以高等並逃匪八九百人伺總兵外出巡防乘虛竊發由木腊出革灑寨沿路焚掠至大汛屯聚扎郎阿聞信馳回掩捕悉數殲擒未及一月事竣報 聞 諭曰開化僮人聽從粵西逸匪勾結糾眾滋擾扎郎阿督率兵勇勦捕生擒首犯餘黨殲戮殆盡辦理迅速殊屬可嘉著交部議敘七年丁憂回旗八年卒子巴杭阿盛京戶部員外郎

右 國史館本傳

明安

明安滿洲鑲黃旗人鈕祜祿氏一等果毅繼勇公豐昇額嗣子乾隆四十三年襲爵四十五年授三等侍衛在乾清門行走四十九年三月隨上幸江南遷尙茶正頭等侍衛九月扈駕木蘭行圍賞穿黃馬褂五十年命在御前行走五十三年管右翼稅務五十四年授十五善射嘉慶元年管左翼稅務三年七月授鑲藍旗漢軍副都統九月兼公中佐領四年正月管左翼稅務兼管三山暢春園事務授鑲藍旗護軍統領二月管左翼鐵匠營三月調正白旗滿洲副都統五月擢工部右侍郎七月轉左侍郎五年正月管衛導處事務四月兼鑾儀衛鑾儀使六年正月擢步軍統



領二月授正紅旗蒙古都統三月署工部尚書五月署鑲白旗蒙古都統七月疏濬城內河道招募窮民恐有未便應照例派步甲挑挖 上允之八月管崇文門稅務九月管上駟院事是月疏大興縣民人張士桓呈稱平泉州等處有銅苗透出請自備工本開採 上以事涉言利不允又以陳奏馬家堡淤灘事兵部照違制例議革職 諭曰明安陳奏馬家堡淤灘摺件將所懷圖據預囑奏事處太監代奏意在請得邀對以炫其眷注之隆顯違節次嚴禁諭旨卽照部議亦屬咎所應得姑念明安所得公爵原係世襲而於管理步軍統領諸務尙無貽誤著加恩賞畱公爵兼管步軍統領上駟院事仍帶革職畱任其餘任俱罷七年正月御史王鏞

劾戶部司員袁錫等開圍關雞番役圍宅詐財明安知情故縱  
上命軍機大臣鞠訊得實 諭曰明安以提督大員卑鄙無恥實  
係自取罪戾此而不嚴加懲辦何以儆貪黷而肅官方着革職拿  
問尋發往伊犁效力贖罪九月 上以明安平日常嫻於弓馬賞藍  
翎侍衛爲伊犁領隊大臣八年卒於任子那蘇巴圖於九年賞給  
主事十年襲公爵 諭曰明安在日不過旅進旅退兼復獲罪伊  
子原不應襲此公爵念明安之父軍營奮勉出眾著加恩承襲以  
示眷念舊臣至意

右 國史館本傳

168-884

5

亮祿

亮祿伊爾根覺羅氏滿洲正紅旗人由健銳營前鋒襲輕車都尉世職乾隆四十二年授密雲參領嘉慶元年命發河南以參將補用旋署南陽鎮標中營遊擊三年署開封城守營遊擊五月寶豐邨縣匪徒薛三羅先春等聽從教匪劉之協勾結滋事屯聚汝州四里營四出焚掠布政使馬慧裕令亮祿偕佐領德明額領兵先往撲捕賊聞兵至退屯寶豐翟家集寨內寨東阻大溝賊沿溝列陣官兵槍礮並施賊恃險不退亮祿躍馬過溝直衝賊隊大軍繼之殲斃二百餘名奪獲軍械旗幟無算餘賊入保寨內官兵攻破之擒僞軍師李岳僞總兵孫繼元斃賊六百餘勦除淨盡奏入

國朝實錄卷之三十八

將帥三十八

臣



諭曰候補參將署遊擊亮祿首先帶兵躍馬過溝實爲超眾出力著卽起升副將先換頂帶仍賞戴花翎遇缺卽補仍交部議敘尋以葉縣首逆劉之協就獲命巡撫吳熊光撥兵二百令亮祿押解來京復因豫省地方緊要遣侍郎高杞及侍衛等沿途接解諭亮祿途遇高杞仍回豫彈壓六年補江西南昌協副將旋擢雲南開化鎮總兵七年榆苗通甸一帶賊匪滋擾總督琅玕檄赴劍川軍營令於迴龍廠吉尾等處往來策應八年卒諭曰開化鎮總兵亮祿前於參將任內勦捕寶邲匪徒會著勞績加恩超擢用至總兵茲在滇南遠省染病身故情殊可憫著加恩於藩庫內賞銀二百兩並著該督撫酌量資助交伊家屬料理回旗用示軫恤

石 國史館本傳

伊爾根覺羅總兵亮祿以世廕任河南城守尉嘉慶庚申川楚教匪滋事已踰數載豫省將校皆檄調他往撫軍吳公熊光亦率兵堵禦盧氏腹心千里兵力虛弱故寶豐邲縣教匪藉以謀逆時布政馬公故書生未嫻軍旅公曰吾聞兵貴神速未聞遲巧今賊初滋事率皆烏合之眾易於撲滅不可使其蔓延日久有害蒼黎也乃驅兵疾行未三日至賊尙未知覺公卽率兵圍其堡寨聲言滿兵自京中至數逾十萬賊未知虛實使偵者探伺公命樹八旗大纛五色絢爛並命兵卒以鞭笞馬腹使其騰蹶嘶號聲震數里賊已畏懼至夜聞公起曰此正擒賊時也因吹角命士卒喊號進公

首先踰濠焚其寨堡士卒益用命一鼓殲之回報馬公馬公方踞  
鞍危立戰慄不能上馬也事聞上大喜立擢公副將後任雲  
南開化鎮總兵未逾年卒於任按寶豐爲中原腹心之地四通八  
達無不襟連微公乘賊之瑕卽時撲滅僮至盤踞日久豕突於江  
淮濠潁之間則其禍有不忍言者若公者謂之社稷臣可也

右錄宗室昭榘撰

陳大用

陳大用甘肅甯夏人高祖福官陝西提督爵三等子 贈三等公  
有傳大用襲子爵乾隆三十八年授湖南衡州協副將四十年調  
永綏協副將四十三年擢雲南臨元鎮總兵四十四年正月調直  
隸正定鎮總兵六月直隸總督楊景素奏據總兵陳大用稟稱接  
到提督公文內折有紅紙匿名揭帖控告山西高平縣白蓮教任  
天祥等謀爲不軌正定有一軍師當卽飛咨山西巡撫臣嚴密查  
拏並委直隸按察使達爾吉善馳赴正定率同知府黃檢嚴密查  
辦 諭曰詞內旣稱正定有一軍師或卽係正定地方之人挾仇  
造寫投遞但所稱軍師並未指有姓名一時恐難根究該督旣委



達爾吉善前往其逐埔挨查破損緣由易於稽覈自可卽得端倪尋獲匪名正犯錢榮祿聞之謙俱正定已革書識因大用到任後屢求復充未允遂謀陷害將平日所知之山西富戶任天祥等捏稱邪教逆黨并稱該鎮可以合夥卽封爲王寫作揭帖囑書識王貫一裝入公文以圖奏辦 上以大用不准革役復充尙屬持正及錢榮祿等兩次稟懇均不批准所辦甚是四十六年 諭曰從前征討三藩時陳福功績最著陳大用見已擢任總兵尙可望其及時效用克繼家聲四十八年四月調山東登州鎮總兵十月調江南壽春鎮總兵四十九年 命署浙江提督五十一年實授五十二年十月因商船在洋被盜文武員弁互相推諉經巡撫瓊珩

奏參 上以大用於海洋劫盜重案不能豫爲防範又未飭屬迅  
緝下部嚴議尋議革職 上寬之十一月兼署黃巖鎮總兵五十  
三年丁母憂五十五年服闋授江南提督 命在乾清門行走六  
十年六月奏較閱海外水師情形并獲盜二百九十餘名 上嘉  
之七月奏稱行抵吳淞海口接都司稟報有匪船三十餘從浙洋  
梅山望塌餅門外洋直駛官兵迎放槍礮擊損賊船餘匪南遁  
諭曰賊船既向塌餅門外洋駕駛官兵正當不露聲息設法誘之  
使前以便悉數擒捕乃甫經望見賊船輒先施放槍礮豈非使賊  
知覺得以聞風逃竄此最爲綠營水師惡習況賊匪蹤跡無定見  
官兵追擊或暫在附近島嶼藏匿待兵船收回又可潛出恐南遁

之語不足深信著傳諭蘇凌阿卽通飭水師將弁等嚴束官兵嗣後遇見賊船務當設法誘擒不得遙放槍礮以致賊匪驚竄遠颺是月疏稱擒獲洋盜礮械船隻當將盜犯張茅等十二名飭交寶山縣收禁聽候督臣究辦 諭曰陳大用身爲提督於地方審辦案件雖不應干與但伊見駐海口督緝洋盜遇有拏獲盜匪自應究明首夥及如何搶劫情形一面奏聞一面跟蹤追捕乃僅將盜犯飭縣監禁並不問供詞一句豈以向盜訊供卽侵總督之權乎陳大用係陳福之孫簡任提督有年不應糊塗若此著交部嚴加議處至綠營水師將弁遇有盜船逃竄往往不敢追趕此次遊擊楊天相外委沈春發駕駛直追跳過盜船將盜匪打倒生擒十二

名並搜獲器械等物甚爲奮勉可嘉楊天相著以水師參將升用  
沈春發卽以守備超等升用旋經署兩江總督蘇凌阿訊係福建  
詔安縣商民有縣給船照腰牌遊擊楊天相等誣指爲盜奏入  
諭曰前因陳大用於擊獲海洋盜船一案並不訊問供詞輒將盜  
犯飭縣監禁具奏朕以陳大用祇係糊塗不曉事體僅交部嚴加  
議處昨據蘇凌阿奏張茅等十二人均係福建詔安縣人向來雇  
船在上海等處販運貨物並非匪船該遊擊楊天相外委沈春發  
並不查驗船照又未訊供輒飾詞裝點具報是前此陳大用之率  
行具奏竟係明知此案情形未確不過借此入告以爲見長地步  
幾至冤及無辜實屬可惡陳大用著卽照部議革任交蘇凌阿歸



案審擬具奏尋 上以大用有心取巧僅予革職不足蔽辜 命軍機大臣會同刑部從重改擬於海口枷號三箇月滿日發往伊犁充當苦差嘉慶四年三月大用呈請叩謁 高宗純皇帝梓宮諭曰朕在藩邸時曾聞陳大用盤獲洋盜一案彼時蘇凌阿署兩江總督以誣良爲盜定擬遂置楊天相於重辟而和珅與蘇凌阿因係姻親爲之護庇致成冤獄因命軍機王大臣詢問陳大用據稱從前巡獲閩船張茅等十二人查有令字旗竹盜鐵礮火藥鉛子等件俱係違禁之物又與浙督吉慶來咨所獲洋盜相符是以交地方官審辦伊等如何定擬亦不敢過問等語所言似屬有因著傳諭費淳卽檢查原案秉公研訊據實具奏尋詳查奏入 諭

曰據費清查明張茅船隻貨物等項俱有照票行戶中保可憑並與吳淞口掛號冊檔相符其所帶鐵礮等件亦有賣給之人歷有證據似係良民別無疑竇且張茅等於釋放後復有投行攬貨報稅出口之事若果係真正盜匪縱或前案漏網豈有不思逃匿公然出名投行復充商販之理看此情形蘇凌阿審辦此案尙無虛捏惟咨查閩省後不待查覆先行定擬具奏未免失之疏縱此案既無出入罪名亦無可平反不必輾轉提人致滋拖累十月 賞大用守備銜發往陝西委用五年因病以原品休致八年卒子均襲子爵官安徽安慶協副將卒孫述祖襲

右 國史館本傳

四庫全書

卷八

倭星額

公諱倭星額字厚畚漢姓系出蔣氏先世以佐命勦隸漢軍正黃旗世襲一等阿達哈哈番三代皆不顯以公貴 誥贈如例公少失怙恃育外家讀書識大義長精騎射挑補侍衛屢隨 高宗圍射萬矢無虛發 高宗奇公能 簡用雲南景蒙營遊擊自京至滇萬餘里公悉繪其所經山川險要既抵任軍政大治設鹿角柵梅花坑防偷竊諸營宗以爲法故景蒙營當日稱勁旅升元江營參將調補武定營 仁宗改元邪匪倡亂起荆襄閒西連關隴巴蜀南結黔筑公戒備賊無敢犯境當是時 朝命經略大臣勒公出兵進剿公念世受 國恩言及賊輒慷慨涕泣誓不與俱生預



與家人訣請從征 詔可簡精壯投經略麾下 一路勦捕無敵自  
始征至凱旋凡八年大小身經三百三十七戰未嘗敗挫嘗夜斫  
賊營數遇險卒能自脫嘗與賊敵賊槍中公左右立斃公色不動  
指揮進兵如故王三槐者賊之渠魁號萬人敵屢闢大營諸將深  
以爲患公請於經略謂王三槐一日不得賊一日不能平仗 天  
威遵帥謨戮力深入脫不幸以馬革裹屍報國耳追之於走馬嶺  
賊挈石投墜深澗馬斃公傷超距出賊眾至步射一賊殪再射再  
殪五射連中其魁賊卻脫歸復督兵擣賊穴故雖王三槐亦畏憚  
公後經略誘降王三槐械送京師公與謀焉奏入 賞戴花翎後  
賊由蘭州路夜渡嘉陵江成都警公馳赴川西攻殺論功晉陝西

西安軍標副將川楚平晉甘肅涼州鎮總兵官緣事去職 仁宗  
念公前後勞績賞四等侍衛放庫爾喀拉烏蘇領隊大臣升三等  
侍衛調英吉沙爾辦事大臣撫綏回部自新疆回以三等待衛在  
六門上行走兼公中佐領傷疾作告退畱公中佐領仍戴花翎公  
論兵法宗戚少保諸家每進兵預決勝負主將違之輒不利嘗言  
回民本非孝子順孫馭之不善易爲變後果如公言公之識解多  
如此卒年六十有四

論曰公在雲南與提督楊公芳善議事多至夜分今楊公以平定  
逆回功封侯使公若在功當與楊上下然李廣在漢時號名將軍  
卒不封侯不封侯固無害其爲名將與

K320.45

516825

2

右家傳劉鴻翹撰

右家傳

168-900



21101000161408